


C.VII. 242 *de*







BERNARDINI FERRARI

Mediolanensis Theologi

D E

R I T U

Sacrarum Ecclesiæ Veteris

CONCIONUM

Cum Præfatione

JOANNIS GEORGII GRAEVII.



VERONÆ MDCCXXXI.

APUD JACOBUM VALLARSIVM
SUPERIORUM PERMISSU.

THE UNIVERSITY OF CHICAGO
LIBRARY


1900

THE UNIVERSITY OF CHICAGO
LIBRARY

THE UNIVERSITY OF CHICAGO
LIBRARY

THE UNIVERSITY OF CHICAGO
LIBRARY

(III)



ILLUSTRISSIMO

JOSEPHO
BLANCHINO

Ecclesiae Veronensis Canonico

JACOBUS VALLARSIVS TYPOGRAPHVS

S. S. O. C.



*Uæ in Artium iuvandarum
cura quæve in deligendis
præstantibus viris penes li-
brorum Auctores voluptas
residet, dum in illos grati
animi officium, elucubratas eis res inscribendo,*

* 2

con-

conferre possunt; ea, Canonice Illustrissime, sin minus omni, aliqua saltem ex parte vel librariis ipsis solet quandoque contingere, ubi eorum Opera recudentes, illa sapientibus hominibus devoteant, atque commendent. Si mihi tamen quicquam id genus pro votis evenit unquam, si in aliqua potissimum sum re delectatus, profecto est liber iste; non equidem magni voluminis, sed lectissima eruditione undequaque refertus per celebratissimum FERRARIUM Patrum nitidissimis bausta fontibus, in quo veteres concionandi ritus summa industria ac labore in unum redacti collectique magna cum utilitate luculentissime conspiciuntur: in hoc siquidem Eruditi invenient quod maxime arrideat, mihi que peculiariter gaudendum est, quod sub auspiciis prodeat tuis; et ex eo animus meus adversus te ita omnibus perspectus sit, ut multis efferar laudibus, qui in te unum oculos nunc intendens, Sacro et Erudito Viro, Sacrum Eruditumque Opus devoverim. Si nihil unquam præclare a te gestum esset, si nullius eximii operis te ratio commendaret, quum id solummodo innotesceret te Illustrissimi Francisci Nepotem optimæ cuiusque artis solertissimi cultoris,

(V)

ris, amplificatorisque sapientissimi, quem boni omnes e vivis ereptum etiam nunc lugent; suam enim mortem potiorum studiorum gravis jactura subsequuta est, certe hoc nemini præter te deberi, plenis buccis profiterentur. Quid vero si Patruī tui Pietatis æque ac Doctrinæ heredem scirent, si eandem penitus vivendi studendique rationem esse cognoscerent, quid, bone Deus, honoris tibi deesset, officii, gratiæ, et benevolentiae suavissimæ? Sed non est cur ita divager, qui rem bene factis tuis complecti possum, quorum gratia te norunt, colunt atque observant viri præstantissimi, et eximiis dignitatibus præfulgentes; atque nominis tui fama non hos inter breves Veronenses fines coercetur, sed ex eo die usque perstrepat, quo Romam a Patruo accersitus, illo in præclaro contubernio, ea in florentissima Urbe docti moratique viri statim specimen præbuiſti. Quid sub tanto Moderatore profeceris, quo usque fueris eo Doctore evectus, idem esset si promere vellem, ac multum debiti honoris eripere, teque justissimis laudibus fraudare. Quicumque tamen apertius rem scire expetit, Hilarium nuper a nobis recusum legat, et in permulta loca incidet sum-

(VI)

mo cum studio atque improbo labore e vetustissimis Amplissimi Capituli tui Codicibus per te excerpta, in quibus quanti valeas fierique debeas abunde cognoscet. Quid vero si eam Appendicem perlegat tres Gelasi I Romani Pontificis Epistolas complectentem, quam notis lucupletissimis ac Præfatione suffultam Tomo IV Venetæ Sirmondi Editionis publici juris fecisti? Quid, si ejusdem Editionis Tomo I Facundi Hermianensis Episcopi Opera percurrat 645 locis illustrata, suppleta atque emendata ope præstantissimi alterius Codicis, quem tu omnium primus quanto in honore habendus esset ita declarasti, ut Typographus merito dixerit: In novam vitam resurgit, lector humanissime, Facundus Hermianensis Provinciæ Africanæ Episcopus. Damus videlicet luci publicæ in hac Veneta Sirmondi Voluminum editione Opera ejus tot mendis purgata, ut fere novum opus videri possit. Diligentissima a JOSEPHO BLANCHINIO Francisci Blanchinii virtutibus, eruditione, dignitate præstantissimi viri, nepote dignissimo, facta collatio est cum Ms. codice, qui adservatur in Bibliotheca Amplissimi Capituli Veronensis,
cui

(VII)

eui et ipse cooptatus est: atque subinde Bernardus Maria de Rubeis vir eruditissimus Ordinis Prædicatorum e Congregatione B. Jacobi Salomonii in dissertatione, De una Sententia damnationis in Acacium Episcopum Constantinopolitanum post quinquennium silentii lata in Synodo Romana Felicis Papæ III. pag. 93 protulerit JOSEPHO BLANCHINIO multum debere Venetam Sirmondi Operum editionem? Mitto Gelasianas literas a te emendatas quas cum eximio Codice contulisti, et Tomum V nuperæ Conciliorum editionis doctissimorum hominum testimonio illustrasti; quemadmodum etiam non in Patriam tantum Philarmonicorum Academiam ultro exhibitis suffragiis fuisse cooptatum, sed in Urbinatem etiam Ludovico Muratorio tanti nominis viro rem curantē, ut tui fama quantum est in se ubique innotesceret; majora siquidem te manent, ubi constituas tandem cendum tradere perfectum jam opus Italæ illius Versionis, quæ vetustiores Ecclesiæ Patres usi sunt, quamque per tot sæcula ab innumeris ævūnnis fuisse servatam ad præstantissimum Capitularis Bibliothecæ ms. referre debemus, eundem tamen ob longissimam ætatem cara-

(VIII)

teribus pene consumptis, nulli antea vel co-
 gnitum vel exploratum; quam non collegisti
 tantum, sed doctis ubique lectisque ani-
 madversionibus ita confirmasti, ut nemo va-
 tustatem, nemo illius integritatem possit in
 dubium revocare: Tunc profecto non Verona,
 Roma, non Italia solum, sed Mundus totus
 oculos in te convertet, habebitque quo mul-
 tum letetur, ubi Blanchinæ Gentis nomen
 decusque in longius adhuc ævum produci co-
 gnoscat: Fortasse ducentur parvi, compara-
 te ad altiora hæc, et humaniorum literarum
 a te exculti politiores modi, et sanioris Phi-
 losophiæ studium; quippe inlustrem gloriam
 aliunde satis vindicabis. Sed epistolam ni-
 mium productam non sine tuis votis clauda-
 mus tandem, et quæ reliqua dicenda essent
 in hoc colligamus, ut Valetudinem tuam tan-
 ti faciendam, quamve nimio et nunquam inter-
 misso studio aliquod in discrimen adduxisti,
 servare studeas, ut bonarum artium incre-
 mentum exigit, et tui obsequentissimus exo-
 rat.

Vallarsius.

JOAN.

JOANNES GEORGIUS
GRAEVIVS

S. D.

LECTORI.



N explicandis antiquis Ecclesiae Christianae ritibus, & illa veterē disciplina, quae vigeat olim, sed quae longi temporis tractu obsolevit, multi hoc & superiore saeculo Viri Docti elaborarunt summo studio, magnoque cum eorum fructu, qui aut priscos illos Christianae doctrinae antistites evolvunt; aut studio tenentur cognoscendi, non solum quid illi senserint de praecipuis divinae sapientiae capitibus, sed & quo castu publice domique sacris fuerint operati. Iis, qui haec contemnunt, & suorum magistrorum scita, suaeque tan-

tantum aetatis admirantur scripta, vere
 dici potest, quod Soloni Aegyptius Pro-
 pheta insufurravit, Graecos, qui suae so-
 lius gentis res, nec eas antiquissimas, nos-
 sent, semper esse pueros. Ignorantiae
 patronos, & qui omni eruditioni libera-
 liori bellum indixerunt, nihil moramur,
 sed iis precamur bonam mentem. Ne-
 sciunt miseri, cum politiori doctrinae
 irascuntur, se sibi maxime irasci. Nam
 licet satis ipsi prodant, in quanta ver-
 sentur inscientia pulcherrimarum rerum,
 sine quibus nec sacra, nec τὰ τῶν ἑξῶ mo-
 numenta, nobis per manus quasi tradita,
 queant intelligi, potuisset tamen illa te-
 gi, ne omnium oculis pateret, nisi odium
 ingenuarum artium, quod prae se pa-
 lam ferunt, foedam istam ignorantiam
 cunctis conspiciendam proponeret. Nam
 sola ignorantia hoc odium parit. Nulli
 sunt hostes eruditionis, nisi ineruditi, qui
 fumos suos, licet videantur ἀποβατέιν, non
 nisi suae sortis hominibus possunt vendita-
 re. Neminem unquam vidi, qui deplora-
 rit tempus, quod in excolendis literarum
 studiis posuit, multos, qui graviter conque-
 rantur, se illis animum non expoliisse, aut de-

desidia, aut culpa magistrorum, qui aut veram ad solidam doctrinam perveniendi viam iis non ostenderint; cum ipsi eam ignorarent, aut ab ea illos abduxerint, amore sui ablati, ne colant & suspiciant alia, quam se, ac quibus ipsi sunt dediti. Qui severioribus disciplinis se manciparunt, cognoverunt & ipsi, absque humanitatis studiis nihil posse memoriae prodi, quod ferat aetatem, sed omnia brevi ad instar solstitialium herbarum exarescere. Equidem Franciscus Bernardinus Ferrarius Theologiae Doctor in Ambrosiano, quod Mediolani est, Collegio, tam exquisita Bibliotheca instructo, & tot Viris doctis claro, existimavit insulas suas non fatis nitere, nisi istis, ut ita dicam, vittis, ex interiorum literarum penetrali depromptis, illustrarentur. Fidem tibi faciet, Lector, hic liber ejus de sacrarum veteris Ecclesiae concionum ritu pereruditus, ne de aliis nunc loquar, quibus tam praecclare tum de Romana, cum de Antiquitate Ecclesiastica est meritus. Non sine magna utilitate, nec sine minore voluptate illum leges. Miraberis tam multa in sacris conventibus olim observata fuisse,

(XII)

se, quae a nostrae memoriae consuetudine ac moribus abhorrent, & diuturnitate quasi extabuerunt. Recte ne an secus, meae non est disquisitionis. His libellis labeculae quaedam sunt adpersae. Ut nemo sine vitii nascitur, sic nemo sine ulla hallucinatione scribit. In libro I. cap. 3. non intellexit rationem, cur B. Augustinus aliquae conciones, cum ad populum verba facerent in Ecclesia Pastores, dictae fuerint disputationes. Sibi persuasit, aut hanc esse causam, quam prodidit Hugo Cardinalis, cum observasset in Actis Apostolicis, saepius orationes Apostolorum, quas habebant, appellari disputationes, quod in primis Ecclesiae incunabulis doctrinae suae rationem in iis reddiderint; aut quod in haereticorum pravis opinionibus explodendis desudarit plerumque veterum concionatorum industria. Verum apud Romanos olim disputatio proprie non dicitur contentio, qua dissidentium a nostra sententia rationes refelluntur, sed dissertatio, sive illa versetur in laude virtutis alicujus, aut hominis, aut alterius rei, sive in reprehensione vitii, sive in dilucidatione & expositione ali-

(XIII)

alicujus argumenti, de quo quis verba faceret. Cic. 11. Academ. Quaest. 2: *Reliqui, qui etiam si non improbant*) literas Graecas, aut Philosophiam) *tamen earum rerum disputationem principibus civitatis non ita decoram putant*, hoc est aut differendo, aut scribendo ea explicare non decere principem civitatis Romae. Sveton. Tib. 33: *Grammaticus disputare sabbatibus Rhodi solitus*, hoc est, scholam habere, ut alibi Cicero loquitur, sive de argumento personae, quam sustinebat conveniente, sermonem habere, ut disputatio nihil aliud sit, quam dissertatio, sermo, oratio, διατριβή, ὁμιλία, περίπατος, ut veteres Graeci loquebantur. Ideo & conciones dictae sunt disputationes. Cap. vii. lib. 1. de ratione convocandi Christianos ad celebrandos conventus, cum vexarentur dirum in modum a paganis, ex Ignatii loco contendit Ferrarius, hoc officio convocandi populum sanctos esse vel ipsos Episcopos, vel Diaconos, qui singulis tempus conventus indicarint. Verba Ignatii in Epistola ad Polycarpum haec sunt: πυκνῶταρον συνάγωγαι γενέσθωσαν, ἐξ ὀνόματος πάντας ζητεῖ. *Saepe congregationes fiant. Ex nomine omnes quaere.* Eadem fere ver-

(XIV)

verba leguntur in supposititia Ignatii Epistola ad Hermonem diaconum. *Τῶν συναχθῶν μὴ ἀμέλει, ἐξ ὀνόματος πάντας ἐπιζητεῖ. Congregationes ne negligas, ex nomine omnes require.* Ista loca Ignatii, licet illa ad Hermonem epistola genuinis adnumeretur, nequaquam loquuntur de convocando coetu Christianorum per Episcopos, aut diaconos. Qui enim mancipia in Gentilium aedibus tam facile poterant conveniri? Sed agunt illa de cognitione illorum, qui Christo nomen dederunt. Vult Ignatius Episcopum singulorum sui gregis nosse nomina, & inquirere quoque, num praesto sint omnes cum sacra facerent in aliqua domo. Ne servos quidem ait esse praetereundos, sed inquirendum in illorum nomina & vitae rationem, num & ipsi adsint, cum populus coit Sacrorum causa. Ex his sane Ignatii *ἐπισκοπαῖς* nihil eorum confici potest, quae ex illis colligit doctissimus Ferrarius. Christo tamen devotos fuisse coactos per diaconos, aut alios Ecclesiae ministros, patet ex Tertulliani libro 11. ad uxorem cap. 4. *Quis nocturnis convocationibus, si ita oportuerit, a latere suo eximi libenter feret? Quis denique sollemnibus Paschae abnoctantem*
secu-

(XV)

securus fastinebit? Vides hic nocturnas convocationes, quia noctu temporibus illis iniquissimis conveniebant primi Christiani, ut nemo ignorat. Amalarius de Officiis Ecclesiasticis cap. 21. existimat ligni pulsifigno Christianis tum fuisse tempus conveniendi significatum. Quod qui ausi fuerint illa tempestate dirissima, cum infestarentur undique, ut ne noctu, si detegerentur, illis impune liceret una esse, non video. Ne dicam post Constantini Magni tempora demum, coepissi ligna pulsari ad Christianos coetus cogendos, ut docuit Lacerda in Adversariis Sacris cap. 133. Hoc lignum, quo postea sunt usi, praecipue in monasteriis, & etiam nunc utuntur in Asia, ut vidit Petrus Vallenſis, idque tradidit Itinerarii sui tomo primo, & Thevenothus in Itinerarii tomo secundo, dicebatur *σήμαντρον*, ut malleus, quo percutiebatur, *σημαντήρ*. De quo vide Gretserum in Variarum rerum lib. 1. cap. 10. Recte lib. 1. cap. 25. docuit Ferrarius Christi diem natalem dictum esse priscis Christianis *τὴν ἐπιφανείαν*, festivitatem vero in illius memoriam institutam *τὰ ἐπιφάνεια*. Sed veram rationem, cur haec sollemni-

lemnitas vocetur ἐπιφάνεια, nescivit. Ἐπιφάνεια, inquit, numero multitudinis a Graecis hic dies dictus, quod in eo uno, & multiplex sane praesentiae ac divinitatis signum dederit Christus, & plures agerentur a Christo celebritates, Nollem Viro docto haec excidisse. Nam τὰ ἐπιφάνεια notat diem festum memoriae apparitionis alicujus Dei dicatum, non quod plures agitentur sollemnitates. Vocabula haec acceperunt Christiani a gentibus & Scriptoribus vestutioribus Christo. Ἡ ἐπιφάνεια illis erat apparitio Dei, & τὰ ἐπιφάνεια sacrificium & festivitas, quae celebrabatur in honorem & memoriam talis apparitionis, quod multis docuerunt Viri docti, inprimis magnus Casaubonos in Exercitationibus ad Baronium. Dies igitur nativitatis Christi, quo ex utero B. Mariae prodiens in lucem se conspiciendum Deus prae-buit hominibus, in antiqua Ecclesia nominabatur τὰ ἐπιφάνεια, sacratus nimirum apparitioni divinae. Is autem credebatur in Orientali Ecclesia fuisse VI Januarii. Putabant quoque illo die Magos ad Christum venisse, qui solus nunc τῶν ἐπιφανείων nomen retinuit, quamvis non propter adventum Magorum, sed propter Christi

(XVII)

natalem id invenerint. Illo ipso die, quo
natum esse Christum, & advenisse statue-
bant ad illum Magos, post xxx annos
Solpitatorem quoque nostrum baptizatum
esse, persuasum habebant. Quo die cum
& Deus Pater apparuerit, edita voce:
Hic est Filius meus dilectus, & Spiritus
Sanctus columbae specie, itidem dictus
est & propter hanc divinam apparitionem
τὰ ἐπιφάνεια, non tamen propter plurium
apparitionum sollemnitates, quamvis plu-
rium memoria illo uno die celebraretur.
Nam licet soli natali Christi dicatus fuisset,
ut in Occidentali Ecclesia xxv Decemb.
ἐπιφανείων tamen nomen & illi conveniebat,
& impositum est. Plures facile tales naevi in
pulchro hoc corpusculo possent notari, nisi
facile ab eruditis hominibus animadverte-
rentur, indoctis vero frustra occinerentur.
Ceterum Ferrariorum familia Mediolani
multos tulit Viros ingenii & doctrinae lau-
de florentes, inter quos eminet Hieronymus
Ferrarius, cujus bonae frugis plenas ob-
servationes in Ciceronis Philippicis in mul-
torum manibus sunt, & politissimus ejus
filius Octavianus. Ejus de sermonibus
exotericis Aristotelis, & de encyclopaedia

* *

libri

(XVIII)

libri nemini nisi ἀπαιδωτοὶ sunt ignoti. Ex illa quoque provenit magnum seculi nostri decus Vir disertissimus, & mei, cum in vivis esset, perquam studiosus, Octavius Ferrarius, Patavini Lycei lumen. Hujus patruus fuit hic Bernardinus, cujus libros de concionum ritu nunc accipis; olim Mediolani, post Lugduni Gallicae denuo typis descriptos, sed tam cupide direptos, ut a paucis hic sint visi, a multis vero desiderati. Hinc bibliopola consilium cepit eos denuo divulgandi, petiitque a me ut Lugdunensis editionis exemplum secum communicarem, & hoc prooemium in illorum gratiam, qui istum librum ignorent, ei praefigerem. Cujus honestissimis desideriis non potui non satisfacere.

Vale.



BERNARDINI FERRARII
MEDIOLANENSIS THEOLOGI
D E R I T U
Sacrarum Ecclesiæ Veteris
Concionum:
LIBER PRIMUS.

Operis totius Argumentum, & Partitio.

CAPUT PRIMUM.



ONSILIUM mihi est, præcipua
quæque e Sanctis Patribus monu-
menta depromere, quæ ad Sacra-
rum Ecclesiæ Catholicæ Concio-
num Ritus illustrandos pertinere videbuntur. Ac

A

in

in primo quidem libro ea tractabimus, quæ de ipsa Concione quærentur. In secundo quæ Concionantem respiciunt, & Auditores. In tertio deinceps de iis differemus, quæ ad Concionum Locum, & Tempus apte possunt ac legitime revocari. His omnibus admiscebuntur, prout locus postulabit, ii Hebræorum, ac Gentium in dicendo Ritus, e quibus, velut e fonte, nostros hausimus. Operis autem initium erunt ipsæ Concionum appellationes, a Sacris olim Scriptoris usurparæ. Congruens enim videtur, quam rem tradituri sumus, ejus nomen prius aperire.

CAPUT II.

Varia nomina sortitæ antiquitus Conciones. Tractatus appellatæ, ipsumque Concionari Tractare. Tractatores quinam olim dicerentur ab Ecclesiasticis Scriptoris. Authentici, & Canonici oppositi. Tractatoris vocabulum quando ceptum usurpari. Vocis Tractatus in hanc rem significatio, nec non & differentia ab aliis Concionum appellationibus.

Sacras igitur Conciones, Tractatus, Disputationis, διδασκαλίας seu Doctrina, Sermonis, Homiliæ, & Allocutionis nomine, prisca Patres cum Græci,

Græci, tum Latini appellarunt. De quibus omnibus dicemus, a Tractatu ordientes.

Optatus Milevitanus tum Donatistarum omnium, tum unius Parmeniani Conciones, *Tractatus* appellatione non semel nominavit. Nullus vestrum, ait lib. 4. qui non aliud initiet, aliud explicet: *lectiones Dominicas incipitis, & Tractatus vestros ad nostras injurias explicatis; profertis Evangelium, & facitis absenti fratri convicium; Auditorum animis infunditis odia, inimicitias dicendo suadetis.* Et lib. 5. ipsum alloquens Parmenianum: *Et cum hæc initio dictionis tuæ late tractaveris, in processu Tractatus tui horum immemor factus es, inducendo duas aquas, & de aqua vera, & falsa dicturus, principium sermonis tui insipienter perstruens ordinasti.* Et paulo post: *In progressu Tractatus tui alterum te inanire professus es, ut alterum replere videreris.* Et in extrema Libri parte: *Nam quod ad amplificandos Tractatus tuos, frater Parmeniane, Naaman Syrum, quasi immaturam quamdam durissimorum nascentium vulnerum massam diu describere voluisti, quid hoc ad presentem pertinet causam?* In quem omnino sensum Beatus etiam Ambrosius dixit in Epistola 14. ad Marcellinam sororem scribens: *Sequenti die (erat autem Dominica) post Lectiones, atque Tractatum, (habebantur enim ut plurimum Conciones inter ipsa Missarum solennia, proxime post Evangelii recitationem, ut infra suo loco dicemus) dimissis Catechumenis, Symbolum aliquibus Competentibus in Baptisteriis tradebatur Basilica.* Beatus autem Gaudentius, Brixien-
 A 2 Episco-

Episcopus, præterquam quod *Tractatus* nomen inscripsit omnibus singulatim Concionibus suis, præterez in Præfatione ad Benevolum, quam ipsismet Tractatibus præmisit, ita scriptum reliquit, non multo post principium: *Quatuor præterea breviores Tractatus, quos de diversis Capitulis Evangelii apud te olim fuisse me locutum prodidisti, & quintum de Maccabæis Martyribus, emendatos tibi, quoniam cogis, remittam; ut eos, si ulla utili memoria dignos arbitris, in postrema parte schedula hujus simul transcribendos adjungas. De illis vero Tractatibus, quos Notariis, ut comperi, latenter adpositis, proculdubio interruptos, & semiplenos, otiosa quorundam studia colligere præsumpserunt, nihil ad me attinet: mea jam non sunt, quæ constat præcipiti excipientium festinatione esse conscripta.* B. quoque Hieronymus in Epistola 65. de Origene cum Pammachio & Oceano, ad quos scribebat, agens, omnes ipsius Origenis Conciones *Tractatus* appellatione nominavit, iis verbis: *Scripturas memoriter tenuit, & in studio explanationis earum diebus desudavit ac noctibus. Mille, & eo amplius, Tractatus in Ecclesia loquutus est.* Idem Hieronymus usus est hac in re eodem *Tractatus* vocabulo, de iis ejusdem Origenis in Canticum Cantorum Concionibus loquens, quas ipse Latine converterat: hæc enim sunt ipsius verba in Præfatione ad Damasum: *Itaque, illo opere prætermisso, quia ingentis est otii, laboris, & sumptuum, tantas res, tamque dignum opus in Latinum transferre sermonem, hos duos Tractatus, quos in morem quotidiani eloquii*

eloquii parvulis adhuc lactentibus composuit, fideliter magis, quam ornate, interpretatus sum, gustum tibi sensuum ejus, non cibum offerens. Sanctus pariter Augustinus *Tractatus* nomen dedit iis Concionibus, quibus Evangelium atque Epistolam Joannis exposuit. Quin etiam Sermone 20. de Diversis universas Conciones suas hoc uno nomine signavit, sic inquires: Si percepit hoc Sanctitas vestra, res vobis dicta est, quantum arbitramur, utilissima, & qua vos multum adjuvet, non solum ad audiendos *Tractatus* nostros, sed etiam ad intelligendas ipsas Scripturas. Possidius item generatim omnes Augustini Conciones una *Tractatus* appellatione nuncupavit, ita scriptum relinquens in ejus Vita: Libros ejusdem, (de Augustino loquitur) sive *Tractatus*, mirabili gratia procedentes ac profluentes, instructos omni rationis copia, atque auctoritate Sanctarum Scripturarum, ipsi quoque Hæretici concurrentes cum Catholicis ingenti ardore audiebant. Victor Uticensis, seu Vitenfis, lib. 1. de Persecut. Vandalic. Qua tempestate Hippone Regiorum obsessa est civitas, quam omni laude dignus Beatus Augustinus, librorum multorum confector, Pontifex gubernabat. Tunc illud eloquentiæ, quod ubertim per omnes campos Ecclesiæ decurrebat, ipso metu siccatum est fluxmen, atque dulcedo suavitatis dulcius propinata in amaritudinem versa est, ut Davidicum præconium conveniret. Pl. 38. 3. Dum confisteret peccator adversum me, obmutui & humiliatus sum & filui a bonis. Usque ad illud tempus cc. jam xxx. & duos confecerat libros, exceptis innu-

merabilibus Epistolis, vel expositione totius Psalterii & Evangeliorum atque Tractatibus popularibus, quas Græci Homilias vocant, quorum numerum comprehendere satis impossibile est. Beatus demum Petrus Chrysologus verbum hoc eodem sensu non semel usurpavit, veluti Sermone 40. quo loci ait: Sic nos, Fratres, ubi Quadragesima aridente verno Ecclesiasticum gregem videmus fundere uberes fructus, Tractatus nostri cantus, & consueti Sermonis epulas seponentes, totam curam in colligendo caelesti germine anxii gravissimo labore dependimus. Et paulo post: Quia præfatio hæc nostra Pastoris boni fecit, & intulit mentionem, de ipso, qui solus bonus, solus Pastor, solus Pastorum Pastor est, tota Sermonis nostri & Tractatus repleatur, & habeatur intentio. Et Sermone 122. Scientes, quod & dicenti & audienti semper generet lassitudo fastidium, superiore Tractatu maximam partem propositæ distulimus lectionis, ut reparatis animorum viribus, &c.

Sed & ipsum Concionari Tractare dixerunt Augustinus & Paulinus. Illius quidem verba sunt hæc in Sermone 19. de Verbis Apostoli: *Ece Christianus es, Ecclesiam frequentas, Verbum Dei audis, de lectione Verbi Dei latissime commoveris: tu laudas Tractantem, ego quero facientem.* Et quasi explicans, quid per Tractantem intelligeret, subiungit: *Tu, inquam, laudas dicentem, ego quero facientem.* Paulinus vero (quicumque tandem ille sit) in Vita Sancti Ambrosii ait: *Per idem tempus quidam vir de Hæresi Arianorum accerrimus nimirum*

mirum disputator, & durus atque inconvertibilis ad fidem Catholicam; is constitutus in Ecclesia, tractante Episcopo, vidit, ut ipse postmodum loquebatur, Angelum ad aures Episcopi tractantis loquentem, ut verba Angeli populo Episcopus renuntiare videretur: quo viso conversus, fidem, quam expugnabat, cepit ipse defendere. Et aliquanto infra: Translato corpore Martyris (Nazarii) ad Basilicam Apostolorum, ubi pridie Sanctorum Apostolorum reliquiae summa omnium devotione posita fuerant, cum tractaret Episcopus, quidam de populo, repletus spiritu immundo, clamare cepit, se torqueri ab Ambrosio: at ille conversus ad eum ait, obmutescere Diabole, &c. Victor Uticensis lib. 2. de Persecut. Vandal. narrans quomodo Hunericus, Zenone Imperatore, atque Placidia, Relicta Olybrii, rogantibus, dederit licentiam ut Carthagenensis Ecclesia sibi, quem vellet Episcopum ordinaret, quæ jam per xxiv. annos tali ornameto fuerat destituta, sub hoc tenore permisisse ait: Ut nostræ religionis Episcopi, qui apud Constantinopolim sunt, & per alias Provincias Orientis, ex ejus præcepto liberum arbitrium habeant in Ecclesiis tuis, quibus voluerint linguis populo tractare & legem Christianam colere, quemadmodum vos hic vel in aliis Ecclesiis, quæ in Provinciis Africanis constitutæ sunt, liberum arbitrium habetis in Ecclesiis vestris missas agere, vel tractare, & quæ legis vestræ sunt, quemadmodum vultis, facere.

Verum, quo minori quivis labore de hujusce vocis Tractatus significatione, usu, ac differentia

possit iudicium ferre, illud hoc loco adnotabo: a
 priscis Ecclesiæ Scriptoribus eos passim dici solitos
Tractatores, qui Dei Verbum, sacrasque literas,
 vel voce, vel scripto exponerent ac docerent;
 quam Ecclesiasticam Observationem, ne nova &
 parum firma cuiquam videatur, idoneis veterum
 Patrum testimoniis confirmabo. Sanctus itaque
 Hieronymus in libro de Perpetua Beatæ Mariæ
 Virginitate adversus Helvidium: *Licet tu* (de Hel-
 vidio loquitur) *mira impudentia in Grecis Codicibus*
falsata contendas, qua non solum omnes pene Græciæ
Tractatores in suis voluminibus reliquerunt, sed non-
nulli quoque & Latinis, &c. Et in Epistola 50. ad Pam-
 machium scribens: *Certe multo clementiores erga*
conjugia fuimus omnibus pene Latinis & Græcis Tra-
ctatoribus. Idem in Apologetico ad Domnionem:
Inventus est homo absque præceptore perfectus, qui elo-
quentia Tullium, argumentis Aristotelem, prudentia
Platonem, eruditione Aristarchum, multitudine libro-
rum Chalcenterum Didymum, scientia Scripturarum
omnes sui temporis vincat Tractatores. Et iterum Epi-
 stola 52. ad eundem Pammachium: *Non sum tantæ*
felicitatis, quanta plerique hujus temporis Tractato-
res. Item Apologia tertia adversus Rufinum: *Scribis*
apud Ecclesiasticos Tractatores tres de animabus esse
sententias; unam, quam sequitur Origenes; alte-
ram, quam Tertullianus & Lactantius, licet de La-
ctantio apertissime mentiaris; tertiam, quam nos sim-
plices & fatui homines, &c. Rursus Epistola 75.
 adversus Vigilantium: *Eadem absenti significo, qua*
præ.

præsenti quoque loquutus sum; me ita Origenem legisse vel legere, ut Apollinarium, vel ceteros Tractatores. Paulo post autem, eundem Vigilantium alloquens: Tibi soli (ait) licet τῷ σπουδαίῳ κρῖναι de cunctis, & Græcis, & Latinis Tractatoribus ferre sententiam, & quasi censoria virgula alios ejicere de Bibliothecis, alios recipere. Nec non Epistola 101. de optimo genere interpretandi: Respondeant λογιζομένοι, & fastidiosi aestimatores omnium Tractatorum. Rufinus quoque Ecclesiasticæ Historiæ lib. 7. cap. 26. de Samosateno Paulo agens, præ se alios Concionantes pro nihilo ducente, ob idque insolentius in sacrarum litterarum Interpretes, & Doctores insultante: Sed & antiquis & defunctis jam Tractatoribus insultabat, & illis derogans, suas laudes inverecunde impudenterque jactabat. Quos autem Tractatores appellat hoc loco Rufinus, hos ἑρμηνεὺς τοῦ λόγου, hoc est, Verbi Dei interpretes, dixerat Eusebius cap. 24. Cognoscitur etiam hoc idem manifeste ex pluribus B. Augustini locis: nam & lib. 4. de Doctrina Christiana cap. 4. Debet (inquit) Divinarum Scripturarum Tractator, & Doctor, defensor rectæ fidei, ac debellator erroris, & bona docere, & mala dedocere. Et homilia 28. libri Quinquaginta Homiliarum: Lector ascendit, sed & ipse non silet. Tractator loquitur: si vera loquitur; Christus loquitur: si silet Christus, ego vobis ista non dicerem. Et Sermone 137. de Tempore: Lectiones sanctas plures, cum recitarentur, audivimus, & de his nos oportet dicere, quod Dominus

fuerit donare dignatus; sed lectionum omnis Auditor, quod recentius lectum est, magis meminit, & ut inde aliquid a Tractatore verbi dicatur, expectat. Et Sermone 20. de Diversis: Si non fuit qui daret, excusabis te; si autem sonant Lectores, etiam quando tacent Tractatores, & ubique Verbum predicatur, & vere dictum est, In omnem terram exivit sonus illorum, &c. Accedat & Severi Sulpitii auctoritas, qui in Dialogo 1. cap. 2. ita scribit: Congregati in unum sapientius Sacerdotes frequentibus decrevisse Synodis videbantur, ne quis Origenis libros legeret, aut haberet, qui Tractator Sacrarum Scripturarum peritissimus habebatur. Id ipsum & Claudianus Mamertus, Episcopus Viennensis, perspicue docet lib. 1. de Statu animæ cap. 3. Porro, quia neotericus Scriptor, juxta Prophetica locutionis exemplum, meditationunculas suas autumat debere pensari, non Tractatorem profitetur se iste, sed vatem. Et mox: Secus igitur est, ac ratio postulat, mystico Prophetarum stilo texere periodos oratorias: quo fit, ut ille, qui aliena expositurum se spondet, non possit exponi: igitur aut vatum verbis non utere, aut vaticinare: nequaquam profecto condecet vel presenti vaticinium tempori, vel Prophetica locutio Tractatori. Et lib. 2. cap. 10. Unde multum miror, Hieronymum testem citatum, cum potissimus Tractatorum minime posuerit, & pro anima, & in animam disputare. Et paulo post: Eatenus Divinarum Tractatoribus Scripturarum fidem adhiberi par est, quoadusque eidem tenore veritatis ad stipulantur. Et Epistola ad Apollinarem Sidonium:

Sic

Sic diligendum est corpus & spiritus; secundum quod diligenda sunt; sicut quidam nobilissimus Tractator Scripturarum dixit. Sidonius ipse lib. 2. cap. 9. de Origene loquens: Sermocinabantur, cur a quibusdam Protomystarum tamquam scævus cavendusque Tractator improbaretur. Vincentius quoque Lirinensis Commonitorio 1. cap. 27. exponens ea verba B. Pauli 1. ad Timotheum c. 6. v. 20. O Timothee depositum custodi, devitans prophanas vocum novitates, hæc habet: O Timothee, o Sacerdos, o Tractator, o Doctor, si te Divinum munus idoneum fecerit, ingenio, exercitatione, doctrina, esto spiritualis tabernaculi Beseleel, pretiosas Divini dogmatis gemmas exculpe, fideliter coapta, adorna sapienter, adjice splendorem, gratiam, venustatem. Intelligatur te exponente illustrius, quod ante obscurius credebatur; per te posteritas intellectum gratuletur, quod ante vetustas non intellectum venerabatur. Eadem tamen, quæ didicisti, doce, ut cum dicas nove, non dicas nova. Sed & Beatus Petrus Chrysologus Sermone 91. Vacat (ait) humanus sermo, si let prædicatio Tractatoris, quando Angelico præconio Joannis profertur gloria, virtus insonat, laus collaudatur. Nec non Cassiodorius in Præfatione ad librum de Institutione Divinarum Lectionum: Ferunt Scripturas Divinas Veteris Novique Testamenti ab ipso principio usque ad finem Græco Sermone declarasse, Clementem Alexandrinum, cognomento Stromateum, & Cyrillum ejusdem civitatis Episcopum, & Joannem Chrysostomum, Gregorium, & Basilium, nec non & alios studiosissimos viros,

viros, quos Græca facundia concelebrat. Sed nos potius Latinos scriptores, Domino juvante, sectamur; ut, quoniam Italis scribimus, Romanos quoque Expositores commodissime indicasse videamur: dulcius enim ab unoquoque suscipitur, quod patrio sermone narratur. Unde fieri potest, ut per Magistros agatur antiquos, quod impleri non potuit per novellos. Quapropter Tractatores vobis doctissimos indicasse sufficiat, quando ad tales remississe competens plenitudo probatur esse doctrina. Et cap. 17. ejusdem libri: Habent etiam post Tractatores diversos relatores temporum studia Christiana, qui Ecclesiastica gravitate compositi, per vicissitudines rerum, mutabilitatesque regnorum, lacteo quidem, sed cautissimo nitore decurrunt. Huc etiam pertinet, quod Greg. Magnus in Ep. ad Leonardum Episcopum, quam suæ præmittit in Job. Expositioni, ita scribit cap. 2. Sancti Tractator eloquii morem fluminis debet imitari: fluvius quippe dum per alveum defluit, si valles concavas ex latere contingit, in eas protinus sui impetus cursum divertit, cumque illas sufficienter impleverit, repente se in alveum refundit, sic nimirum, sic Divini Verbi esse Tractator debet. Et cap. 5. Quæso autem, ut hujus Operis dicta percurrentes, in his verborum folia non requiras; quia per sacra eloquia ab eorum Tractatoribus infructuosa loquacitatis levitas studiose compescitur, dum in templo Dei nemus plantari prohibetur. Nicolaus tandem Papa eo nomine primus Epistola 4. ad Archiepiscopos & Episcopos Galliæ data: Si enim (inquit) ipsorum decreto cæterorum Opuscula Tra-

Etatorum approbantur, vel reprobantur, ita ut, quod Sedes Apostolica probat hodie, teneatur acceptum, &c.

Atque hinc nemini jam obscurum erit, cur Canonicis & Authenticis auctoribus Tractatores opponat Beatus Augustinus, unaque cum eo Mammertus Claudianus: Illius enim verba ex lib. de Catechizandis Rudibus cap. 8. sunt hæc: *Nec ipse sane inutiliter interrogatur, (vir doctus catechizandus) quibus rebus motus sit, ut velit esse Christianus; ut si libris ei persuasum esse videris, siue Canonicis, siue utilium Tractatorum, de his aliquid in principio loquaris, collaudans eos pro diversitate meritum Canonica auctoritatis, & exponentium solertissimæ diligentie. Alterius autem illa in lib. 1. de Statu animæ cap. 2. Sed video Prophetas, Evangelistas, Apostolos, (hi Authentici) post etiam Authenticorum plurimos Tractatores, sua propriis voluminibus nomina prænotasse. Et lib. 2. cap. 10. Sed nunc locus, & tempus est, ut sicut a Philosophis ad Tractatores, ita a Tractatoribus ad Authenticos gradum consequar.*

Tractatoris porro vocabulum Vincentii Lirinensis seculo ad solos forte Concionatores pertinere, innuere videtur ipsemet Vincentius in citato Commonitorio 1. cap. 40. cum ait: *Quosdam quidem posuit Deus in Ecclesia, primum Apostolos, quorum ipse (Paulus) unus erat: secundo Prophetas, qualem in Actibus Apostolorum legimus Agabum: tertio Doctores, qui Tractatores nunc appellantur; quos hic idem Apostolus etiam Prophetas interdum nuncupat,*

eo quod per eos Prophetarum mysteria populis aperiantur.

Ex quibus omnibus, ut concludam aliquando, intelligitur facillime, vocem *Tractatus* apud Ecclesiasticos Scriptores illud potissimum Concionum genus significasse, quo certus aliquis Divinæ Scripturæ locus explanabatur. Id quod etiam liquido constat ex ipsismet Gaudentio & Augustino; quorum ille initio citatæ ad Benevolum Præfationis, de ipsis Tractatibus agens, adfirmat, iis se Divinas exposuisse Scripturas. Alter vero, suos in Evangelium & Epistolam Joannis Tractatus inscribens, sic inquit: *Aurelii Augustini in Evangelium Joannis Expositio, Tractatus 1. 2. 3. &c.* Et, *Aurelii Augustini Expositio in Epistolam Beati Joannis, Tractatus 1. 2. 3. &c.* Ita ut Augustino, & Gaudentio (quod de aliis quoque citatis Patribus dicendum videtur) unum & idem fuerit Tractatus, atque Scripturæ Sacræ, seu Verbi Dei, Expositio, vel Explanatio.

CAPUT III.

Disputationis nomine vocatæ Conciones. Tradita ejus nominis ratio. Concionari etiam Disputare : ipseque Concionator Disputator dictus.

DE Disputationis nomine testes produco Viros idoneos. Pachomium, Augustinum, Possidium, & Adonem Viennensem. Pachomii verba (prout illum nobis Latine loquentem reliquit Hieronymus) in sua Monachorum Regula n. 7. ea sunt : Mane per singulas domos finitis orationibus, non statim ad suas cellas revertentur, sed conferent inter se, quæ Præpositos audierint disputantes, &c. Disputatio autem a Præpositis domorum per singulas hebdomadas tertio fiet ; & in ipsa Disputatione sedentes fratres suum ordinem non mutabunt, &c. Nam in hunc sensum accipiendam esse Disputationis vocem hoc loco, ex ipso Pachomii contextu satis apparet. Sed & abunde probant sequentia testimonia. Augustinus initio 6. Sermonis de Sanctis (si tamen foetus ille Augustini est, & non potius Fulgentii) hæc verba habet : Quoniam video Disputationes nostras graphio ceraque ligari, & nequaquam sumus idonei lectitare, adjuvate me ipsum, queso, intercessu vestro. Verum accipiendus ne sit hic locus de iis Concionibus, quæ de scripto interdum recitabantur, an vero de iis,

iis, quæ scripto solebant ab Auditoribus excipi; infra suo loco videbimus. Idem Augustinus Tractatu 89. in Evang. Joannis sic ait: *Sed quomodo id fieri possit, si adjuvante Domino per nos demonstrari potest, quia hæc Disputatio est jam claudenda, nunc non potest, &c.* Possidius quoque in ipsius Augustini Vita eodem pacto: *Hujus* (de Ambrosio loquitur) *interea Verbi Dei Prædicatoris frequentissimis in Ecclesia Dei Disputationibus adstans in populo intendebat, suspensus atque affixus.* Quæ verba a Possidio mutuatus Ado, Viennensis Archiepiscopus, transcripsit in suo Martyrologio ad v. Calendas Septembris.

Notat præterea Hugo Cardinalis, in suis ad Actuum Apostolorum caput 24. Postillis, fere ubique in eo libro Disputationis appellatione nominatam Prædicationem. Veluti cap. 6. vers. 9. cap. 9. vers. 26. cap. 17. vers. 17. cap. 18. vers. 4. & 29. cap. 19. vers. 8. & 9. cap. 20. vers. 7. & 9. cap. deumum 24. vers. 12. Idque ob eam potissimum rationem: quod tunc jacerent Apostoli fundamenta Ecclesiæ, unde necesse erat, ut semper (quemadmodum habetur in prima Petri cap. 3. v. 25.) *Parati essent omni posceanti reddere rationem de fide Christi.* Addiderim autem ipse, ea quoque de causa Disputationis nomine fuisse olim appellatas Conciones, quod in iis plerumque Concionatorum industria ac doctrina adversus Hæreticos desudaret, quorum certe pravitas ac pertinacia non nisi disputando coarguitur ac vincitur.

Planc

Plane veteres Ecclesiæ Patres non Concionem duntaxat, ut modo vidimus, *Disputationis* vocabulo nominarunt, sed ipsum etiam Concionari *Disputare*, & Concionatorem *Disputatoris* nomine non semel appellarunt. Beatus Hieronymus Epist. 22 ad Eustochium, de Cœnobitarum vivendi ratione tractans: *Post horam nonam in commune concurritur; Psalmi resonant; Scripturæ recitantur ex more: & completis orationibus, cunctisque residentibus, medius, quem Patrem vocant, incipit disputare; quo loquente tantum silentium fit, ut nemo alium respicere, nemo audeat exscreare. Dicentis laus in fletu est Audientium, &c.* Quod Hieronymi testimonium adducta paulo ante Pachomii verba non parum illustrent. Beatus etiam Augustinus lib. 5. Confessionum cap. 13. de B. Ambrosio loquens: *Ad eum (inquit) ducebar abs te nesciens, ut per eum ad te sciens ducerer: suscepit me paterne ille homo Dei, & peregrinationem meam satis episcopaliter dilexit: & eum amare capi, primo quidem non tamquam Doctorem veri; quod in Ecclesia tua prorsus desperabam, sed tamquam hominem benignum in me; & studiose audiebam Disputantem in populo, non intentione qua debui, sed quasi explorans ejus facundiam, &c.* Idem Serm. 81. de Diversis: *Neque miremini multitudinem Christianorum malorum, qui Ecclesiam implent, qui ad altare communicant, qui Episcopum vel Presbyterum de bonis moribus Disputantem magnis vocibus laudant. Et Serm. 82.*

Satis sint vobis pauca ista; quoniam & post laboraturi sumus, & de Sacramentis altaris hodie infantibus disputandum est. Et Tract. 62. in Evangelium Joannis: Sed jam hinc in Sermonem Domini, qui factus est ad pios, antequam teneretur ab impiis, intentior flagitur Auditor, & ideo cum precipitare non debet, sed differre potius Disputator. Et Tract. 63. Hac prelocutio, Dilectissimi, intentam fecerit caritatem vestram ad istum Domini Sermonem, quem ad Discipulos habuit ante passionem: profundus enim est; & utique, ubi multum laboraturus est Disputator, non remissus debet esse Auditor. Et rursus Serm. 50. de Diversis: Cumque Lazarus Diaconus recitasset, & Episcopo codicem tradidisset, Augustinus Episcopus dixit, Etiam ego legere volo, plus enim me delectat hujus verbi esse Lectorem, quam verbi mei Disputatorem. Et Serm. 121. Ex ipso codice audite: propterea enim non tantum Disputatoris, sed etiam Lectoris fungor officio, ut sermo iste noster Sanctarum Scripturarum auctoritate fulciatur.

CAPUT IV.

Διδασκαλίας, seu Doctrinæ, appellatione nominata aliquando Conciones. Concionator Doctoris, seu Docentis, nomine appellatus. Eorum nominum ratio allata.

CUM unicum eorum, qui Conciones habent, propositum esse debeat, optimis præceptis Auditores informare, & Dei mandata assidue inculcare atque infigere, Doctores inde dicti sunt; atque eorum Conciones *διδασκαλία*, seu *Doctrina*. *Διδασκαλίας* nomine pluries vocavit Homiliās suas Joannes Chrysostomus, Basilii Seleucensis, Dorotheus, atque multi alii. Unde mirari subit, qui sit, ut ea vox a Græcis toties usurpata, apud Latinos vix reperiatur. Non ita de *Doctoris* seu *Docentis* appellatione pro Concionatore; cujus exempla passim occurrunt. Augustinus in Sermone 122. de Diversis: *Quamquam propter commoditatem depromendæ vocis altiore loco stare videamur, tamen in ipso altiore loco vos judicatis; & nos judicamur. Doctores dicimur, sed in multis Doctorem quærimus, nec volumus nos haberi magistros. Periculosum ergo Magisterium, Discipulatus securus est: securior est enim verbi auditor, quam verbi prolator.* Non aliter

Vincentius Lirinensis, qui citato Commonitorio primo cap. 27. ita scribit: *O Timothee, o Sacerdos, o Tractator, o Doctor, si te divinum munus idoneum fecerit, ingenio, exercitatione, doctrina, &c. intelligatur, te exponere, illustrius, quod ante obscurius credebatur, &c.* Et cap. 40. (quem locum, aliam in rem, supra jam adduximus) *Beatorum Patrum Sanctum Catholicumque consensum ne quis sibi temere contemnendum forte arbitretur. Ait in Prima ad Corinthios Apostolus, Et quosdam quidem posuit Deus in Ecclesia; primum Apostolos, quorum ipse unus erat: secundo Prophetas, qualem in Actibus Apostolorum legimus Agabum; tertio Doctores, qui Tractatores nunc appellantur, quos hic idem Apostolus etiam Prophetas interdum nuncupat, eo quod per eos Prophetarum mysteria populis aperiantur. Petrus quoque Chrysologus, Vincentii æqualis, hunc ejusdem vocis usum aperte confirmat, cum in Sermonem 52. ait: Doctoris officium est, lecta differere, & mysticis obscurata sensibus lucido adstruere, & demonstrare sermone. Magnus item Gregorius in hunc sensum lib. 17. Moralium cap. 14. Ut vero Auditores rudes non inundatione scientiæ, sed moderata prædicationis distillatione foveantur; ligat Deus aquas in nubibus, ut non erumpant pariter deorsum; quia Doctorum prædicationem temperat, ut Auditorum infirmitas, Doctorum rore nutrita, convalescat. Et paulo post: Aqua itaque ligatur in nubibus, quia Predicatorum scientia infir-*

MOTUM

morum mentibus loquens, quantum sentire valet, docere prohibetur; nam plerumque si Auditorum cor Verbi immensitate corrumpitur, lingua Docentium indiscretionis pœna multatur. Et lib. 18. cap. 8. Esse ars Docentium debet, ut in Auditorum suorum mentibus prius studeant perversa destruere, & postmodum recta prædicare, ne bonum Sanctæ prædicationis semen plena malis corda non capiant. Eligius denique, Noviomenfis Episcopus, ait in Homilia 16. Quoniam nomen Christianum a Christo Dei Filio vocabulum sumpsit, & per sanctos Prædicatores crescendo usque in ultimos fines terræ pervenit, idcirco tam Doctoribus, quam Auditoribus scire necesse est, &c.

Existimarim itaque, ob id potissimum fuisse aliquando Concionem *didascalicæ* seu *Doctrinæ* vocabulo nuncupatas, ipsumque Concionatorem appellatum *Doctorem* seu *Docentem*, quod doctrina maxime excellere debet, quicumque concionandi munere fungitur, & Auditorum mores, tamquam Discipulorum, Magister ipse ac Doctor Concionibus suis formare ac corrigere.

CAPUT V.

Homilia, seu Sermo, communius Concionum nomen. Latinis Sermo est, quod Græcis Homilia. Homiliæ nomen Græcum quidem est, sed longo & frequenti usu Latinum pene factum. Quodnam Concionum genus Homilia.

Porro de Homilia ac Sermonis appellatione innumera pæne Auctorum testimonia suppetunt; quæ res mihi causam attulit sane justam, cur ea hoc loco non subjicerem: hoc magis, quod, cum pateant, in promptuque sint omnibus, hominis esset otio abutentis, ea velle persequi. Tantum admonebo, quod Latinis Sermo est, id esse Græcis Homiliam. Hoc ita se habere, Beati Augustini locus in Proœmio enarrationis in Psalmum 118. aperte declarat; in quo ita est: *Statui autem per Sermones id agere, qui proferuntur in populis, quas Græci ὁμιλίαι vocant. Quin Latini, seu verborum inopes, sive etiam alienorum nimis appetentes, Homilia vocem à Græcis semel mutuati, numquam reddidere. Est autem Homilia Sermo valde familiaris, & ad vulgi sensum atque intelligentiam maxime accommodatus. Atque hinc liquido potest intelligi,*

ligi, quid sit causæ, quamobrem permulti, cum Græci, tum Latini Patres, suas plerumque Conciones non continua contexuerint oratione, sed voluerint sacri textus recitatione eas primo constare, mox brevibus ad recitata verba observationibus: quod nimirum ea forma aptior esset ac commodior ad Auditorum captum atque utilitatem.

CAPUT VI.

Adlocutionis, seu Locutionis, *etiam vocabulo signatæ interdum Conciones, & quam ob causam.*

CUM autem in Concionibus sæpenumero Auditores suos Concionator, tamquam aut familiam pater, aut amicus amicum, amice & familiariter alloquatur, hinc *Adlocutionis* quoque seu *Locutionis* nomen invenere Conciones. Cujus appellationis locupletes ac idonei testes sunt Tertullianus ac Gregorius Magnus. Ille quidem lib. de Anima cap. 9, eorum multa breviter strictimque complectens, quæ in Missæ sacrificio peragi consueverunt. Concionum etiam, proxime post Divinæ Scripturæ, hoc est, Epistolæ ac Evangelii recitationem, plerumque haberi solitarum, (qua de re infra) expresse meminit, *Adlocutionis* nomine eas appellans, in hæc verba: *Jam vero prout Scripturæ leguntur, aut Psalmi canuntur, aut Adlocutiones proferuntur, aut Petitiones delegantur, &c.* Gregorius vero lib. 7. Epist.

52. ad Secundinum Episcopum scribit: *Hæc, ut Deo largiente potuimus coram vobis, Fratres carissimi, rimati sumus, nemo autem me reprehendat, si post hanc Locutionem cessavero; quia, sicut omnes cernitis, nostræ tribulationes excreverant. Et Homilia 5. in Ezechielem: In ea Locutione, quæ ad vos, Fratres carissimi, nudius tertius facta est, qualiter offensa animalia vel Redemptorem nostrum, vel quatuor ejus Evangelistas, atque perfectos omnes significarent, dictum est. Et in Homilia 9. Caritati itaque vestra colloquimur, eidem omnipotenti Deo gratias referentes, quia post tot opaca silvarum tandem lati ad campos exivimus, in quibus liberis gressibus Locutionis nostræ intrepidum pedem ponamus, Et in Homilia 14. In priori Locutionum nostrarum parte jam diximus, cur Propheta, quoties ad videnda spiritualia ducitur, Filius hominis appelletur, &c. In Homilia demum 22. Meminit (inquit) caritas vestra, qua superiori Locutione per portam Orientis fidem: per Aquilonis spem; per Austri autem caritatem diximus designari. Burchardus quoque & Ivo verbum hoc eodem sensu usurparunt: alter enim in 2. Decretorum libro cap. 65. ex Laodicensi Synodi cap. 19. hæc habet: *Quod oporteat seorsum primum post Allocutiones Episcoporum, vel Presbyterorum, orationem super Catechumenos celebrari. Alter vero in 6. Decreti Parte cap. 165. a Burchardo eadem ista sumit ac describit: Quod oporteat seorsum post Allocutionem Episcoporum, vel Presbyterorum, orationes super Catechumenos celebrari.**

CAPUT VII.

Quo Signo convocarentur olim Fideles ad Concionem. Card. Baronii hac de re sententia perpenditur. B. Ignatii loci qui sit sensus, aperitur commodius, quam quomodo Baronius docuit. Vocis Cursor interpretatio a recente Scriptore allata refellitur. Reprehenditur idem Scriptor, verbi Præco significationem in Hieronymi Epistola 22. minime assecutus. Urgente persecutione Fideles olim ab Episcopo, vel a Diacono, de loco & tempore conventus Fidelium privatim admoniti. Reddita Ecclesie pace Fideles publico Campanarum sono ad Ecclesiasticos vocabantur conventus. De Campanis multa summatim. Dictum etiam obiter de Tubæ sono, de excitatorio Malleo, de Ligni pulsibus, de voce Alleluia, ad priores Monachos excitandos & ad Collectam seu conventum evocandos.

Expositis Concionum nominibus rem ipsam propius aggrediamur; ab eo Signo exorſi, quo

quo solebant olim Fideles ad Concionem evocari.

Plane quamdiu Ecclesia Dei ab Ethnicis Regibus, quasi hostibus, fuit undique obsessa & oppugnata vehementer, tamdiu haud liberum fuit patenti atque aperto signo Fideles ad publicos cogere conventus. Caius certe Plinius in ea Epistola, quam ad Trajanum Imperatorem de Christianorum coetibus dedit, cum omnia, quae facerent Fideles, exequatur diligentissime, huiusmodi quoque Signi, si quod vulgatum fuisset ac notum, mentionem procul dubio fecisset. Neque vero eodem semper loci, aut interdum duntaxat, colligebantur Christiani, sed & noctu saepe conveniebant, (unde illud in eos *latebrosa & lucifuga natio*) & conveniendi locum frequenter mutabant, novum etiam interdum, eumque abditum ac latentem statuantes, quem ipso deinde conventu sacrum redderent ac religiosum,

Diligentissimus ille antiquitatis Ecclesiasticae vindex, cuius ego memoriam, ut debeo, sancte & religiose colo, tomo 1. Annalium ad annum Christi 58. existimavit deligi tunc temporis in Ecclesia consuevisse, non sine Episcopi auctoritate, certos ac determinatos Viros, quorum proprium munus ac officium esset, perquirere diligenter unumquemque Fidelem, eumque privatim admonere de loco & tempore conveniendi: additque, eos ob id muneris *Cursores* fuisse

fuisse appellatos. Traxerunt autem illum in hanc sententiam ea beatissimi Martyris Ignatii Antiocheni verba, quæ in Epistola ad Polycarpum Smyrnæ Episcopum ita leguntur: *Decet, Polycarpe Deo beatissime, concilium congregare Deo decentissimum, & ordinare aliquem, quem dilectum valde habetis & impigrum, qui poterit Dei Cursor vocari; & hunc dignificari, ut vadens in Syriam glorificet vestram impigram caritatem in gloriam Dei.* Sed eo loco (bona tanti Viri pace ac venia dixerim) vereor, ne non longe alia Ignatii mens fuerit, qui, de Ecclesiasticis hujusmodi Ministris nihil cogitans, hoc unum significare voluit: Decere maxime, ut cogeret Polycarpus cunctos Smyrnenfes Ecclesiasticos Viros, ex iisque unum aliquem deligeret impigrum & diligentem, quem mitteret Legatum in Syriam ad Antiochenos; ut & congratularetur iis, quod per Smyrnenfium preces & vota tranquillam tandem & tutam nacti essent pacem, & ad Dei gloriam extolleret ad cælum laudibus impigram eorundem Smyrnenfium caritatem. Atque hanc esse veram hujus loci sententiam, non difficile est videre, dum quidem ipsa subjiçiantur Ignatii verba, quæ male accepta erroris ansam dedere: ea sic paulo ante habent: *Quia Ecclesia, quæ in Antiochia Syriæ pacem habet, ut ostensum est mihi, per orationem vestram.* Quibus statim at-
 texuit: *Decet, Polycarpe Deo beatissime, concilium congregare Deo decentissimum, & ordinare aliquem,*
quem

quem dilectum valde habetis & impigrum; qui poterit Dei Cursor vocari; & hunc dignificari, ut vadens in Syriam glorificet vestram impigram caritatem in gloriam Dei. Et non multo post: Quia igitur omnibus Ecclesiis non potui scribere, propter repente navigare me a Troade in Neapolim, ut voluntas præcipit: scribes aliis Ecclesiis, ut Dei sententiam possidens, idem & ipsos facere; hi quidem potentes pedites mittere, hi autem Epistolas per a te missas, ut glorificeris aeterno opere. Mox autem: Saluto futurum dignificari ad eundem in Syriam. Sed mentem ipse suam aperit Ignatius, omnemque omnino dubitationem tollit, dum ad ipsos Smyrneneses hac eadem de re scribens ita ait: Oratio vestra pervenit ad Ecclesiam, quæ est in Antiochia Syriæ; unde ligatus Deo decentissimis vinculis, omnes saluto non existens dignus inde esse, extremus ipsorum existens: secundum voluntatem autem Dei dignus factus sum, non ex conscientia, sed ex gratia Dei; quam oro perfectam mihi dari, ut in oratione vestra Deo potiar. Ut igitur perfectum vestri fiat opus in terra & in celo, decet ad honorem Dei, ordinare Ecclesiam vestram Deo venerabilem, (alias Sacrum Legatum) in factum usque Syriam congaudere ipsis, quoniam pacem habent, & acceperunt propriam magnitudinem, & restitutum est ipsis proprium corpusculum. Visum est mihi igitur Deo digna res, mittere aliquem vestrum cum Epistola; ut glorificent eam, quæ secundum Deum, ipsis factam tranquillitatem. Hactenus I-
gna-

gnatius, qui dum Sacrum Legatum appellatum, qui deligendus erat, ut in Syriam mitteretur ad Antiochenos, præterquam quod exprimit hujus viri munus, declarat etiam manifeste, quid per Divinum *Consortem*, scribens ad Polycarpum, intellexerit. Ex quo fit, ut Baronii opinionem de vocis, *Cursor*, significatione probare nullo modo queam.

Non me fugit tamen, novitium Scriptorem inveniri, qui nullo teste fretus antiquiore, sed Baronium tantum, ut videtur, sequutus, affirmet. Ad Ecclesiasticos hujusmodi conventus indicendos habuisse olim nascentem Ecclesiam certos quosdam homines, qui, quod longos brevi tempore cursus conficerent, *Cursores* appellarentur: quod quam intelligenter ac perite faciat, ex paulo ante narratis perspicue apparet. Neque vero est ullo modo hic idem audiendus, cum, quos (omnino ex Baronii mente, licet is de industria id ipsum reticuerit) *Cursores* nuncupari dixerat, eosdem ex propria opinione configit vocari *Præcones* a Beato Hieronymo in Epistola 22. ad Eustochium. Adscribam Epistolæ verba, quo per se possit quivis, vel litteris tinctus, si modo ea semel inspexerit, de Hieronymi sensu, contra quam is crediderit, judicare: ea vero sunt hujusmodi: *Nudus ante fores earum Christus emoritur; & cum manum egenti porrexerint, buccinant; cum ad Agapem vocaverint, præco conducitur.* Nimirum loquitur Hieronymus de opulenti

lensis quibusdam mulieribus, quæ ad inanem duntaxat & gloriosam quamdam ostentationem inopum egestati succurrere consueverant: conductis etiam in eam rem certis hominibus, qui palam, veluti præcones, hujusmodi beneficentiam ac liberalitatem prædicarent. Sed redeo ad institutum.

Ego itaque, ut id quod sentio dicam, ausim asseverare, fuisse olim in Ecclesia, urgente persecutione, vel ab Episcopo, vel a Diacono, ipsius tamen Episcopi auctoritate & jussu, singulos Fideles de loco & tempore publici Conventus privatim admonitos. Id quod ita se habere, ejusdem Beatissimi Martyris Ignatii verbis ex adducta paulo ante ad Polycarpum Epistola planissime confirmabo: inibi enim Polycarpi Episcopi diligentiam in eo munere tam impense requirit Ignatius, ut non ei curam deesse velit in ipsis etiam servis & ancillis singulatim admonendis: *Sape* (inquit Ignatius, ipsum Episcopum alloquens Polycarpum) *congregationes fiant: ex nomine omnes quære, servos & ancillas ne despicias.* Epistola autem 13. Heronem, Diaconum Antiochenum officii sui admonens, illud etiam hortatur ac præcipit, ut & publicos Conventus minime prætermittat aut negligat, & singulos Fideles diligenter perquirat & convocet. Ignatii verba ad Heronem ea sunt: *Nihil sine Episcopis operare, Sacerdotes enim sunt, tu autem Diaconus Sacerdotum: illi baptizant, sacrificant, manus imponunt,*

ponunt, tu autem ipsis ministras, ut Sanctus Stephanus in Hierosolymis Jacobo & Presbyteris. Congregationes non negligas, ex nomine omnes require, &c. Quæ sane verba illud etiam haud obscure declarant, quod supra dicebam; perfungi quidem consuevisse eo munere Diaconum, sed non sine Episcopi auctoritate & jussu.

Quæ quia planissime scripta sunt, eo fit, ut Amalarium Fortunatum mirer, qui, primis Ecclesiæ temporibus, urgente Cæsarum persecutione, lignorum pulsatione, quemadmodum fit hodie tribus postremis Hebdomadæ sanctæ diebus, cogi solitos Fideles ad publicos Conventus, scripserit. Id enim omnino sonant ejus verba, dum de tribus illis Majoris Hebdomadæ diebus agens ait lib. 4. de Ecclesiasticis. Officiis cap. 21. *Attitudo Signorum, quæ fiebat per vasa ærea, deponitur, & lignorum sonus usquequaque humilior æris sono necessario pulsatur, ut conveniat populus ad Ecclesiam: potest & in hoc humilior usus Ecclesiæ Romanæ designari antiquis temporibus, quam nunc sit, & præcipue tunc quando latitabat per cryptas propter persecutores; nam adhuc junior Roma, quæ antiquis temporibus sub uno Domino cum antiqua Roma regebatur, usum lignorum tenet, non propter æris penuriam, sed propter vetustatem. Etenim præterquam quod ad hanc Amalarii opinionem confirmandam nullum potest ex Veterum monumentis testimonium proferri, haud simile vero videtur, eos Fideles, qui; ut se ab infestis Cæsarum*

sarum ministris occultarent, abdita & latentia ad conveniendum loca perquirebant, voluisse ingenti & pæne publico lignorum strepitu sese manifestare. Addo, neque solitum olim in Ecclesia, quemadmodum nunc fit, tribus illis Majoris Hebdomadæ diebus ad convocandos Fideles ligna pulsari.

Hæc eadem de re quid scriptum reliquerit Vualafriðus Strabo, rerum Ecclesiasticarum Scriptor, ut minime recens, ita valde bonus, malo te ex illius, quam ex meis verbis cognoscere. Sic enim in libro de Rebus Ecclesiasticis cap. 5. legimus: *De vasis vero fusilibus, vel etiam productilibus, quæ simpliciter Signa vocantur, quia eorum sonoritate quibusdam pulsibus excitata significantur. horæ, quibus in domo Dei statuta celebrantur officia; de his, inquam, hic dicendum videtur, quod eorum usus non adeo apud Antiquos habitus proditur, quia nec tam multiplex apud eos conventus assiduitas, ut modo est, habebatur: apud alios enim devoti, sola colegebat ad statutas horas concurrere; alii prænunciationibus publicis invitabantur, & in una celebritate proxime futuram discebant. Apparet ergo ex Vualafriði narratione, triplicem olim fuisse confluentem Fidelium ad Ecclesiam conveniendi rationem. Primam, cum populus per se solo pietatis ac religionis studio conveniebat; alteram, cum publicis invitabatur prænunciationibus; postremam, cum in uno conventu alterius proxime futuri locum ac tempus discebant. Verum primam,*

primam, & alteram, ad ipsa nascentis Ecclesie incunabula (de quo tamen tempore nunc quærimus) referri nequaquam posse ; hoc uno quam maxime revincitur ; quod tunc Christianos omnes ita divexabant ac oppugnabant Ethnicæ Reges, ut cogerentur ii & conveniendi locum non semel mutare, & novum sæpe, eumque latentem & abditum statuere : quapropter liberum tunc fuisse Fidelibus, aut per se solo religionis studio convenire, aut publico ac parenti signo ab aliis ad conveniendum acciri, nemo sanæ mentis dixerit. Postremam quidem si quis ad illa tempora retulerit, ei non repugnanter assentiar ; nititur enim ea res probabili omnino conjectura.

Cæterum ubi primum confedit Cæsarum furor in Christianos, pacemque ac tranquillitatem consecuta est Ecclesia, tum cœperunt publice Fideles ex edito loco ad Ecclesiasticos evocari Conventus, distincto eorum tintinnabulorum sono, quibus deinde Campanarum nomen dedit, vel præcellens eorum artifex, vel ea Italiæ regio, quæ Campania dicitur, (propter æs nimirum Campanum, quod optimum creditur ad campanas conflandas) seu potius, quod in urbe Campaniæ Nola primum reperta sint tintinnabula, aut saltem cœperint fieri grandiora. Sed ut ut est de nominis Campanarum origine, (qua de re, si Deus annuerit, alibi accurate) statuendum videtur hoc loco, quando.

C

nam

nam primo mos hic pulsandi Campanas ad cogendos Fideles fuerit in Ecclesiam inuestus. Sabiniano quidem Romano Pontifici, qui Magno Gregorio successit anno Domini 604. id primo acceptum ferunt Polydorus Virgilius, Genebrardus, Panvinus, & Alphonfus Ciaconius. Illius verba sunt hæc lib. 6. de Inventoribus rerum cap. 12. *Quod tintinnabulorum sono populus invitatur, vocaturque ad sacra audienda statim diei horis; Sabiniani, qui Gregorio successit, hoc Decretum est. Alter in Chronico ad annum Christi 604. de eodem Sabiniano verba faciens ita scribit: Campanas sive Tintinnabula invenit. Panvinus vero in Epitome Romanorum Pontificum hæc ait: Hic Papa Campanarum usum invenit, iussitque, ut ad Horas Canonicas, & Missarum sacrificia pulsarentur in Ecclesia. Quæ verba desumens Ciaconius tomo primo de Vitis Romanorum Pontificum: Sabinianus (inquit) usum Campanarum invenit, iussitque, ut ad Horas Canonicas & Missarum solemnia pulsarentur in Ecclesia. Nec quemquam ab hac sententia dimovere debent loci illi Beati Hieronymi Regulæ Monacharum cap. 33. *Ad matutinas excubias media nox vos præparet; nullam ex vobis dormientem reperiat Campanilis sonitus, & cap. 39. post peractam cœnam, vel si omititur, post aliquam horulam juxta exigentiam temporis, ad Ecclesiam Sorores Campanula vocet, ubi vel de Sanctarum gestis, vel de aliis mirabilibus**

bus Dei lectio devota dicatur : utpote Auctoris ducentis annis Sabiniano antiquioris, cum doctus nemo in dubium revocet, falso Regulam illam Hieronymo tribui. Ceterum falli puto Joannem Stephanum Durantum, virum aliqui bene doctum, ac multæ lectionis; dum lib. 1. de Ritibus Ecclesiæ Catholicæ cap. 22. Anastasii Persæ Monachi & Martyris seculo (accepit hic martyrii coronam, juxta Baronii rationem, anno a Christo Domino 627.) nondum fuisse Campanarum usum in Ecclesiam inductum narrat; eo fretus argumento, quod appropinquantibus Cæsaream ejusdem Martyris Anastasii reliquisset, utest in secunda Synodo Nicæna Act. 4. tota civitas sacra ligna pulsans obviam processerit. Etsi enim apud Græcos Campanarum usus fortasse nondum invaluerat, sed solummodo *αμπύριον*, seu ligneorum instrumentorum, de quibus frequens mentio est in Vitis SS. Patrum Græcorum: tamen apud Latinos jam a temporibus saltem Sabiniani obtinebat.

Eorum probabiliorē puto sententiā, qui Beatum Paulinum, Episcopum Nelanum, ipsius Hieronymi æqualem, primo in Ecclesiam Campanæ usum induxisse produnt: non quod prioribus seculis ignotus ille esset, sed quia sanctissimus vir prophanum Gentilium sacrorum usum correxit, & ad Ecclesiastica nostra munia transtulit. Adfirmarim autem, adductos Auctores, qui hujus Ecclesiasticæ consuetudinis

originem a Sabiniano trahunt, hoc duntaxat
 sensisse; receptum jam in Ecclesia morem, fuisse
 deinde Sabiniani Constitutione firmatum;
 quemadmodum allata Polydori verba sonare vi-
 dentur; seu potius, id quod ex citatis Panvinii
 & Ciaconii locis facile colligitur, Sabinianum
 primo decrevisse, ut ad Horas Canonicas, &
 ad Missarum solemnias pulsarentur Campanæ.
 Nisi forte dicere malimus cum Martino Polo-
 no, id primo statuisse Sabinianum, ut horæ
 diei per Campanæ pulsum ex Ecclesia populis
 indicarentur. Poloni verba de Sabiniano agen-
 tis ea sunt in suis supputationibus ad Ann. Chri-
 sti 604. *Hic constituit, ut horæ diei per Ecclesias
 pulsarentur. Ad quæ respiciens Platina ait: Sabin-
 niani hoc fuisse institutum ferunt, ut & horæ in
 Ecclesiis distinguerentur officii gratia.*

Possem hic equidem multa adijcere, & de
 Tubæ sono, quo Monachos olim ad Collectam
 cogi solitos legimus in Pachomii Regula art. 2.
 & de Excitatorio malleo, quo Tarlensis Ado-
 lius, teste Palladio in Lausiaca cap. 104. Cel-
 larum fores pulsans, Fratres omnes ad oratoria
 convocabat; & de ligno, cujus pulsu, ut ha-
 bemus in Leonis Imperatoris Panegyrico de
 Chrysostomo, excubitor Monachos ad matuti-
 na Cantica excitabat; & de plausu, (sic enim
 appellat Cassianus de Coenobiorum Instituto lib.
 2. cap. 11.) quem dans senior Pater, manu
 sua, in sedili, quo sedebat, cunctos faciebat

Mo-

Monachos ad Orationem consurgere; & de voce denique Alleluia, qua altius decantata, quemadmodum scriptum reliquit B. Hieronymus Epistola 23. & 27. ad Synaxim evocabantur Moniales. Sed cum ista privata sint, & certorum duntaxat hominum ac locorum propria, nos vero agamus hic de communi ac publico signo, quo Fideles omnes olim ad Conventus Ecclesiasticos solebant convocari, ea silentio de industria prætermitto.

In eo igitur standum, quod hætenus ex optimis Auctoribus & ex certa conjectura docui, tunc cõpisse Fideles publico ac patenti Campanarum sono ad Conciones aliosque Conventus Ecclesiasticos evocari, cum Ecclesia, fracto Tyrannorum furore, tutam tandem ac tranquillam consecuta est pacem.

Illud tamen non opinor omittendum, quod huic Capiti coronidem imponat. Nostros, dum primam Campanarum originem ab ultima antiquitate repetunt, referre illam passim ad eas tubas, quas Deus Numerorum cap. 10. fieri iusserat; quarum nimirum usus is quoque erat, ut Plebs ad Concionem vocaretur: id quod planissime confirmat Josephus lib. 3. Antiquitatum Judaicarum cap. 15. *Adinvenit autem (de Mose loquitur) & modum tubæ ex argento factæ, quæ est huiusmodi; longitudinem quidem habens, &c. Factæ sunt tales duæ; & una quidem utebantur ad iussionem & collectionem populi in Ecclesiis*

celebrandam; altera vero, cum oporteret ad cogitandum de rebus necessariis Principes convenire: ambabus autem multitudo colligebatur. Sed jam de iis, quæ a Concione propius absunt, dicamus.

CAPUT VIII.

Preces ad Deum Concionem semper anteisse. A Gentium quoque Oratoribus dicendi initium a precationibus captum. Præclara B. Ambrosii, mox concionaturi, precationis formula.

BEne ac sapienter Majores instituerunt, ut quemadmodum rerum agendarum, ita dicendi initium a precationibus caperetur, quod nihil rite, nihilque providenter homines, sine Deorum immortalium ope, consilio, honore, auspicarentur. Libet enim ab iisdem verbis hujusce capituli initium ducere, quibus affatur Imperatorem Trajanum in sui Panegyrici principio Plinius Secundus; non eadem ille quidem religione, neque iisdem præceptis imbutus, quibus nos sumus, sed eruditus tamen, ac eloquens, & Deorum suorum cultor eximius. Qui mos, cui potius convenire potest, quam Oratori Christiano? aut quando magis usurpandus, quam cum

cum populorum mores dicendo formamus ac corrigimus? Periclem illum Atheniensem Oratorem, cujus in labris Lepor habitabat, qui- que fulgurare, tonare, & permiscere Græciam dicebatur, non nisi Deos precatum accessisse ad dicendum, ut dexteri nimirum ac volentes adessent, nec ullum sibi paterentur verbum ex- cidere, unde quisquam Auditorum jure posset offendi, scriptum reliquit Plutarchus. Cur cum igitur Christianus Orator, jam ad dicendum pa- ratus, Deum precetur, veneretur, atque im- ploret, ut & menti lumina præferat, & diri- gat linguam, ipsique Auditores emergant ali- quando a vitiis, & se ad frugem bonam reci- piant? Designavit utique hanc consuetudinem, seu potius necessitatem, orandi ante Concio- nem Beatus Lucas Actorum cap. 6. dum de Prædicatione agens, Orationem ante illam con- stituit, sic inquit: *Nos vero Orationi & Mi- nisterio verbi instantes erimus.* Quod nimirum Prædicationem dirigat Oratio, & sine hac sit illa veluti muta ac sterilis. Atque in hanc om- nino sententiam accepit allata Lucæ verba Chry- sostomus Homil. 3. de incomprehensibili Dei natura, cum ait: *Porro Sermoni Oratio debet an- teire: sic Apostoli dicunt, Nos in Oratione & Sermonis doctrina perseverabimus.* Id ipsum Pauli exemplo confirmans, subdit: *Sic Paulus facit, cum in Exordiis suarum Epistolarum orat, ut perinde, quasi lumen lucernæ, lux ipsa orationis*

AD

C

4

regat

regat sermonem ac dirigat. Pertinent huc etiam ea Augustini verba de Christiano Oratore agentis libro 4. de Doctrina Christiana cap. 15. *Ipsa hora jam ut dicat accedens, priusquam exerat proferentem linguam, ad Deum levet animam sitiientem, ut eructet, quod biberit, vel, quod impleverit, fundat: Præclara porro & imitatione digna est illa precationis formula, quam B. Ambrosium mox concionaturum pronunciare solitum legimus in hunc fere modum: Obsecro, Domine, & suppliciter rogo, da mihi semper humilem scientiam, quæ adificet, da mitissimam & sapientem eloquentiam, quæ nesciat inflari, & de suis bonis super Fratres extolli: pone, quæso, in ore meo verbum consolationis, & adificationis, & exhortationis per Spiritum sanctum tuum, ut bonos ad meliora valeam exhortari, & eos, qui perverse gradiuntur, ad tuæ rectitudinis lineam revocare verbo & exemplo. Sint verba, quæ dederis sermo tuo, tamquam acutissima jacula & ardentes sagittæ, quæ penetrent & incendiant mentes audientium ad timorem & amorem tuum. Hætenus Ambrosius.*

CAPUT IX.

*Accepta olim Benedictione habitæ nonnumquam
Conciones.*

NEc reticere debeo in præsentia, veteres Ecclesiæ Patres, mox concinatuuros, Benedictionem ab Antistite postulare consuevisse. De S. Amando Trajectensi Episcopo, tradite ejus vitæ Scriptor Beda, solitum eum, Concionem mox inchoaturum, Benedictionem a Prælato accipere.

Quid porro causæ sit, quamobrem Concionum initio peti & dari soletet hujusmodi Benedictio, eam puto commode proferri posse rationem, quam Abbas Rupertus reddidit, cur Lecturus in Ecclesia Benedictionem petat, dicens: *Jube Domine benedicere*. Quod nemo, nisi missus, aut accepta licentia, officium prædicandi usurpare potest. Ruperti verba subscribam: *Lecturus vero*, (inquit lib. 1. de Div. Offic. cap. 12.) *Benedictionem petens, hoc significat, quod nemo, nisi missus, aut permissus, officium prædicandi usurpare debeat; Quomodo enim prædicabunt, inquit Apostolus, nisi mittantur?*

Hic alienum ab instituto nostro non erit observare, plerisque Homiliis Patrum & Vitis Sanctorum præfigi a Græcis solere hæc verba,

ἐὐλόγησον

εὐλόγησον πάτερ, *Benedic Pater* : apud Athanasium, Orationi de Assumptione Domini: apud Epiphanium, Orationi de die festo Palmarum: apud Joan. Chrysostomum 4. & 5. Hom. de Christi Ascensione: nec non Vitis Joannis Chrysostomi a Georgio Alexandrino, Dionysii Areopagitz a Simeone Metaphraste scriptis, &c. quæ verba cave a Sanctis ejusmodi Patribus usurpata putes, sed ex eo originem traxisse scito. Solebant Monachi in suis Conventibus, seu Collationibus, atque etiam Ecclesiis Homilias Patrum, Martyrum Agones, atque alia ejusmodi scripta sinceram pietatem spirantia, legere. Qui lecturus erat, benedictionem a Præposito his verbis petebat, εὐλόγησον πάτερ, Hinc factum est, ut Monachi, quorum antiquitus libros exscribere opus erat atque officium, quotiescumque similes tractatus exscriberent, hæc verba præscriberent. Hoc sufficienter adstruunt plerique libri editi, sed præsertim manu exarati, qui raro admodum ejusmodi verba omittunt.

CAPUT X.

*Concionaturi olim Cruce se consignabant ipso
Concionis initio. Id ipsum facerant cum
Hereticis disputaturi.*

NEque vero ullus nobis relinquitur dubitan-
di locus, quin laudabilis ille mos inchoan-
di Conciones a Crucis Signo olim etiam in
communi ac quotidiano fuerit usu. Etenim ad-
firmat Tertull. lib. de Corona Militis cap. 3.
Nascentis Ecclesie Christianos ad omnem progressum
atque promotum, ad omnem aditum & exitum,
ad vestitum, ad calceatum, ad lavacra, ad men-
sas, ad lumina, ad cubilia, ad sedilia, & ad
omnes, quæ eos poterat exercere, conversationem,
frontem Crucis signaculo terere consuevisse. Id quod
Hierosolymitanus quoque Cyrillus in 4. Cate-
chesi ita confirmat: Signo isto utere, cum edens
ac bibens, tum sedens ac cubans, de lecto surgens,
loquens, ambulans, & ut semel dicam, in omni
re, omnique negotio. Et in Catechesi 13. iis
verbis: In fronte confidenter signaculum Crucis di-
gitis imprimatur, & in aliis omnibus Crux fiat;
in panibus comedendis, & in poculis bibendis, &
in egressu & in ingressu, ante somnum, recumben-
do & surgendo, eundo & quiescendo. Quis igi-
tur dubitet, quin Conciones exorsuri hoc idem
olim

olim factitarint? Certe hanc unam ob causam puto, S. Methodium, Patarentem Episcopum & Martyrem, suam, quam de Simeone & Anna, quo die sibi in Templo occurrerunt, Homiliam, Navem Sermonis Crucis signaculo insignitam appellasse, quod ipse ad ejus initium se Cruce consignasset. Ejus verba sunt hæc: *Caterum hic navem nostri Sermonis Crucis signaculo insignitam, tamquam in portum appellentes, ut modus jam, ratioque ejus postulat, velis contractis quiescere sinamus.* Junio-rem quoque Justinum Imperatorem, verba facturum ad populum, Crucis signo prius se muniisse testatur Corippus Africanus, non ineleganter ita canens:

*Ipse coronatus solium conscendit avitum,
Atque Crucis faciens signum venerabile sedit,
Erectaque manu, cuncto præsentè Senatus,
Ore pio hæc orans ait.*

Atque huc etiam referendum videtur, quod de S. Zenobio, Florentino Episcopo, (cujus virtus sub Juliano Apostata enituit) parentibus iratis factum suum probare volente, (quibus nimirum insciis baptismum susceperat) scriptum reliquit Joannes Archipresbyter Aretinus apud Surium die 25. Maii: *Signo Crucis edito, (inquit Joannes) pios in cælum oculos sustulit, cujus lingue sanctus Spiritus tantam exemplo eloquii ubertatem infudit, ut parentes ipsius, impio furore depositi, eum, quem paulo ante in filio baptismum cul-*
pave-

paverant, ipsi mox nuda humo prostrati ad pedes sacri Antistitis contenderent.

Sed & cum Hæreticis, & maxime cum ipsius Crucis adversariis, disputaturi olim Fideles, Cruce sese olim consignabant. Sanctus Porphyrius, Gazensis Episcopus, cum Manichæa muliere disputationem exordiri volens, linguam signo Crucis munivit, ut habetur in ejus Vita. S. Cyrillus Hierosolymitanus id ipsum faciendum monet citata Catechesi 13. in hæc verba: *Accipe arma contra adversarios hujus Crucis, trophaum statuas, fidem Crucis, adversus contradicentes; cum enim de Domino, Cruceque contra infideles quaestio tibi erit, prius statue manu tua signum, & obmutescet contradicens; non pudeat Crucem Christi confiteri. Angeli enim gloriantur dicentes, Jesum quaeritis crucifixum, corona enim est Crux, non ignominia.*

CAPUT XI.

Angelica Salutatio proxime ante Concionem, quando nam, & cur recitari cœpta. Erasmi inanis opinio confutatur.

E Nimvero quando hic agimus de iis omnibus, quæ Concioni præmitti consueverunt, non erit prætermittenda præclara illa ad Beatam Virginem Salutatio, quam ab Angelo Ga-

Gabriele profectam, nunc passim hic proxime ante Concionem, aut, ut alibi, post primum proœmium recitari videmus. Non ita vetus autem esse laudabile hoc Ecclesiæ institutum, ex eo facile crediderim, quod Beatus Vincentius Ferrerius, qui floruit anno Domini 1410. primus ex omnibus Ecclesiasticis Scriptoribus illius meminerit, dum singulis Sermonibus suis præmittit ea verba, *Salutetur Beata Virgo*. Faciendum ut sit, illud vel a Beato Vincentio initium habuisse, vel certe ipsius Vincentii temporibus coepisse frequentari.

Cur vero fuerit in Ecclesiam inuenta ea consuetudo, aliam commodiorem adsignari non posse rationem existimo, quam quæ ab erudito viro Carolo Regio in suo Oratore Christiano lib. 1. cap. 2. strictim ita attingitur: *Arbitror esse recens institutum, & inductum forte propter Hæreses in Beatam Virginem exortas, cum ipsa sit, quæ omnes Hæreses interimere queat. Hæc ille.* Et sane, quemadmodum ad pestiferam Arii, aliorumque Hæreticorum tunc vigentium, opinionem ejiciendam prorsus ac evellendam, qua Filium Patri minime coæternum nec consubstantialem adfirmabant, caverunt Patres in Nicæna Synodo congregati, ut in Formatis Epistolis conscribendis adhiberentur prima Græca elementa Patris, & Filii, & Spiritus Sancti, Π. Τ. Α. Π. Veluti Symbolicæ formulæ eandem Divinarum personarum æqualitatem ac consub-

substantialitatem exprimentes (ut in libello de antiquo Epistolarum genere apud Christianos olim aperui.) Et sicut ad eundem Arianorum errorem refellendum ac coarguendum constitutum fuit, sicuti ex Valensis Concilii secundi can. 5. liquido constat, ut Glorificationis Hymno adderentur ea verba, *Sicut erat in principio, nunc, & semper, & in secula seculorum*, exprimentia trium sanctissimæ Trinitatis personarum cœternitatem ac consubstantialitatem. Quemadmodum etiam ad Pelagi Hæresim, qui liberum arbitrium Divinæ gratiæ anteferebat, adfirmabatque ad Divina jussa implenda voluntatem per se sine gratia sufficientem esse, convellendam consueverunt illius temporis Patres in Epistolarum suarum principio *Misericordia Dei & Gratia indigentes* sese appellare, ut præclare observavit Cardinalis Baronius ad annum Christi 415. eam referens Epistolam, quam Lucianus, Hierosolymitana Ecclesiæ Presbyter, de revelatione Corporum Beatissimi Stephani Protomartyris, & Sanctorum Gamalielis, Nicodemi, & Abibonis, ad universos Christi Fideles dederat: cujus illa erat Inscriptio: *Lucianus, misericordia Dei indigens, & omnium hominum minimus, Presbyter Ecclesiæ Dei, &c.* Ita credendum videtur, fuisse a Patribus institutum, ut Sermonibus suis præmitterent Concionatores Angelicam Salutationem, ob ipsas in Beatam Virginem exortas Hæreses. Si quis tamen pri-

mura

num eam præmissam fuisse Concionibus de An-
nunciatione, Assumptione, & aliis B. Mariæ fe-
stivitatibus, atque paulatim cæteris cujuscunque
argumenti Concionibus præfixam fuisse conten-
derit, huic non invitus accedam. Certe constat
appendicem illam Salutationis Angelicæ *Sancta
Maria*, &c. ante centum quinquaginta annos ad-
ditam fuisse, quæ a plerisque Concionatoribus
jam recitatur.

Quidquid sit, suppudeat Desiderium Erasmus,
qui, jocosè magis an impie, scribere non dubita-
vit in Ecclesiaste, ob id Concionatores introdu-
xisse Virginis salutandæ consuetudinem ipso Con-
cionum initio, ut sexui femineo blandirentur,
imitarenturque Poetas Ethnicos, Virginem scili-
cet Matrem pro Musa substituentes.



CAPUT

CAPUT XII.

Ante præviam Concioni lectionem Sacrarum Scripturarum silentium olim imperatum a Diaconis. Sic Levitæ apud Judæos silentium faciebant ante sacram lectionem. Mos idem in Ecclesiam Ambrosianam olim inventus, nunc etiam constantissime retinetur. Ecclesiasticas omnes actiones moderabantur olim Diaconi, idque voce interdum, interdum nutibus, aliquando orario. Nunc etiam Cæremoniarum Magistri in Majoribus seu Cathedralibus Ecclesiis sacras omnes actiones dirigunt ac moderantur.

Illud hoc loco pro certo & concessio mihi sumo, accurate infra demonstrandum: habitas olim ut plurimum Conciones post recitatam aliquam Scripturæ Sacræ lectionem, unde ipsarum etiam Concionum argumentum eruere-
tur. Ante hujusmodi itaque Concioni præviam, sive Evangelicam, sive quamlibet aliam Sacræ Scripturæ recitationem, consueverunt olim Diaconi silentium imperare. Sic & apud Judæos Levitæ, quibus nostri succedere Diaconi, ante

D

Sa-

Sacram Lectionem silentium faciebant, quemadmodum perspicue Esdras demonstrat lib. 2. cap. 85. cum ait: *Et aperuit Esdras librum coram omni populo: super universum quippe populum eminebat; & cum aperuisset eum, stetit omnis populus, & benedixit Esdras Domino Deo voce magna: & respondit omnis populus, Amen, Amen; elevans manus suas: & incurvati sunt, & adoraverunt Deum proni in terram.* Porro Josue, & Bani, & Serebia, Jamin, Accub, Sebtbai, Eodia, Maasia, Celita, Azarias, Jozabe, Anam, Phalaia, Levite, silentium faciebant in populo ad audiendam Legem. De silentio autem per Diaconum in Ecclesia facto ante Sacram Lectionem, Auctor Constitutionum Apostolicarum ita indicat lib. 2. cap. 57. *Diaconus populum speculetur, ne quis murmure obstrepat, dormitet, aut nutus faciat; oportet enim stare in Ecclesia sapienter, sobrie & vigilanter, auribus ad Verbum Domini intentis.* Et lib. 8. cap. 11. *Diaconi contemplantur viros & mulieres, ne quis fiat strepitus, ne quis nutus faciat, aut mussitet, aut dormitet.* Meminerunt etiam illius haud obscure Ambrosius & Augustinus. Ejus verba, si quis requirat, hæc sunt in Præfatione ad Psalmos: *Quantum laboratur in Ecclesia, ut fiat silentium, cum Lectiones leguntur?* Augustinus vero de Civitate Dei lib. 22. cap. 8. *Facto tandem silentio, Scripturarum sunt lecta divina solemniter.* Sed apertius expressit hanc consuetudinem B. Joannes Chrysostomus

Ho-

Homil. 19. in Acta Apostolorum sic scribens: Stat minister, communis minister alta voce clamat, ac dicit, Attendamus: & sapius illam vocem clamat: hæc communis Ecclesia est, quam ille emit- tit: post illam incipit Lector. Et Homilia 3. in 2. ad Thesalonicenses: Non attendunt, non cogi- tant, huc ad Deum se ingressos, Deum cum ipsis sermocinari. Quando enim, qui lecturus est, sur- gens dicit, Hæc dicit Dominus: & Diaconus stans omnes indicto silentio compescit. Turonensis quoque Gregorius id ipsum in usu suis tempori- bus fuisse tradit lib. 4. Histor. Francorum prope finem: Factum est, ut quadam die Dominica, postquam Diaconus silentium populis indixit, Rex conversus ad populum diceret, &c. Eriam Isido- rus Hispalensis in hanc rem ita scriptum reli- quit lib. 1. de Ecclesiasticis Officiis cap. 10. Ideo Diaconus clara voce silentium admonet, ut, si- ve dum psallitur, si- ve dum Lectio pronuntiatur, ab omnibus unitas conservetur, & quod omnibus præ- dicatur, equaliter ab omnibus audiatur. Et lib. 2. cap. 8. Ipsi (Diaconi) clara voce in modum præ- conis admonent cunctos, si- ve in orando, si- ve in fle- tendo genua, si- ve in psallendo, si- ve in Lectionibus audiendis; ipsi etiam, ut aures habeamus ad Domi- num, clamant. Quæ Isidori verba Rabanus Mau- rus transcripsit in lib. 1. de Institutione Clerico- rum cap. 7. Ex eo præterea possumus non male conjicere, fuisse olim silentium per Diaconos ante Sacras Lectiones pronuntiatum, quod ii

sacrarum omnium actionum ritus & ordinem in Ecclesia dirigerent ac moderarentur: credendum ut sit, hanc etiam Concionis comitem ac sociam ab eis fuisse directam: atque adeo imperatum ab iisdem silentium, antequam illa de suggestu haberetur.

Mediolanensis certe Ecclesia (ut Ambrosianos Ritus, quantum in me est, illustrem) morem hunc indicendi ante Lectionem Sacram silentii semel acceptum constanter adhuc retinet. Siquidem in Missis, quas Pontificales vocant, ante Evangelii recitationem silentium populo de suggestu alta voce ter in hanc formulam indicitur: *Parcite fabulis, Silentium habete, Habete silentium.*

Quoniam vero Ecclesiasticas omnes actiones moderatos olim fuisse Diaconos res ita certa est, ut, qui ei veluti dubie repugnet, simul Patribus, simul rationi palam repugnet; de ea universa nihil equidem dicam hoc tempore: tantum partem ejus parvam ad id, quod mihi proposui, pertinentem paucis omnino ac summatim attingam. Quo nimirum modo, quoque potissimum ritu sacras hujusmodi dirigerent actiones ac moderarentur Diaconi.

Voce quidem eas direxisse planissime declarat Chrysostomus Homilia 17. ad caput 9. Epistolæ beati Pauli ad Hebræos, sic inquit: *Diaconus, in altiori loco stans, magna voce, terribili clamore, veluti quidam praco, manus suscitans*

lens in altum, alios quidem vocat, alios autem prohibet, alios excludit, alios introducit. Cæsarius quoque Arelatensis in xxxiv. Homilia sententiam hanc eandem confirmat his verbis: Rogo vos & admoneo, Fratres carissimi, ut, quotiescunque juxta altare a Clericis oratur, aut Oratio, Diacono clamante, indicitur, non solum corda, sed etiam corpora fideliter inclinatis; nam dum frequenter, sicut oportet, & diligenter attendo, Diacono clamante, Flectamus genua, maximam partem populi, velut columnas erectas, stare conspicio: quod Christianis, dum in Ecclesia oratur, omnino nec licet, nec expedit: non enim propter nos, sed propter vos Diaconus clamat: & ideo, quia ad vos specialiter vox illa, vel maxime ad negligentes dirigitur, justum est, ut a nobis fideliter impleatur. Et ad finem ejusdem Homiliæ: Quotiescunque Diaconus clamaverit, ut aut in oratione genua flectere, aut benedictioni inclinare capita debeatis, obedientes & fideliter cum vera humilitate faciatis. Id quod etiam probant Isidori & Rabani verba, quibus recitandis supersedeo, quod ea paulo ante hoc eodem capite producta sint. Ivo Carnotensis Sermone de Excellentia Sacrorum Ordinum, & de Vita ordinandorum, de Diaconis agens: isti (inquit) in modum præconis manifeste admonent cunctos ad orandum, & ad genuflectendum, &c.

Nutibus etiam aliquando moderatos fuisse Diaconos sacras Ecclesiæ actiones commemorat Albinus Flaccus lib. de Divinis Officiis cap. de

Celebratione Missæ & ejus significatione, iis verbis: Gloria Patri, & Filio, & Spiritui Sancto: quæ verba ad divisionem Psalmorum, qui prius indifferenter canebantur, beatus Hieronymus, Damasus Papa petente, composuit. Sed cum nequaquam id sufficeret, prædicto Apostolico iterum suggerente, addidit adhuc, Sicut erat in principio, &c. Et hoc ad nutum Diaconi ait Cantor, sicut & Kyrie eleison; quia ad hoc in ministerium admittitur, ut officium integre peragi possit, quoniam Presbyter sine Diacono nomen habet, officium non habet.

Sed & oratio hoc ipsum quandoque factitatum, in Orientalibus præsertim Ecclesiis, observo ex Theodoro Balsamone, & Matthæo Blastare. Balsamonis verba ea sunt ad Canonicum 22. Synodi Laodicenæ: Orarium ferre est solum Diaconorum; hi enim eis, qui celebrant, adstantes, & sanctarum orationum mysteria, & Presbyterorum prolationes observantes, eis qui sunt in suggestu, Diaconis per orarium significant, quando debeat fieri pronuntiatio seu prolatio precationum Catechumenorum, & reliquorum: & appellatum est orarium *αὐτὸ τὸ ὀρίον*, quod est observo. Matthæus vero Blastares in Synopsi Conciliorum nondum edita, littera 1, can. 9. quod est De Vestimentis Viris sacratibus accommodatis: *Διῆκτον ἐστὶν* (inquit) orarium, dequæta voce a verbo *ὀρίον*, quod est observo: Diaconi enim hoc indui celebrantibus adstantes, & sacræ celebrationis preces observantes, per orarium iis, qui sunt in ambo-

ne,

ne, Diaconis significant, quando oporteat vel ad Catechumenos, vel ad Fideles orationem flectere.

Sic olim in Hebræorum Synagogis Legem ex ambone explicanti aderat aliquis manu sudarium tenens, qui populo signum daret, ut *Amen* diceret: dabat autem signum moritans sudarium, ut ex Rabbīnorum libris observasse se ait vir multæ lectionis in suis ad Vopiscum Emendationibus & Notis. Id quod etiam Elias Levita in suo Lexico Hebraico, verbo *Suddar*, non obscure indicat. Ita nunc quoque in singulis Ecclesiis, quas Majores seu Cathedrales dicimus, Cæremoniarum Magistros videmus, eorum ministerio & cura (ut scriptum est in Romano Episcoporum Cæremoniali lib. 1. cap. 5.) omnia Ecclesiastica munia rite peragi. Sed me sentio paulo longius esse provectum. Igitur ut ad ea, quæ hujus Capituli maxime propria sunt, redeam. Cum sacras omnes actiones omniaque Ecclesiastica munia dirigerent Diaconi ac moderarentur, haud absurdum erit dicere, Sacrarum etiam Concionum Ritus & Actiones eos fuisse moderatos; atque adeo imperasse silentium, antequam illæ ad populum de suggestu haberentur.

CAPUT XIII.

Ipsa Concionum initio manu silentium olim factum Concionatoribus. Apostoli ipsi, ac Apostolorum æquales, ad dicendum se componentes, morem hunc frequenter usurparunt. Ab Ethnicis quoque ac Judæis, mox dicturis, id ipsum factitatum.

JAm vero quemadmodum Diaconi, ut supra demonstratum est, vel voce, vel nutu, vel etiam oratorio silentium ante Sacram Concioni præviam Lectionem imperare consueverunt; ita sacros olim Concionatores ipsomet Concionum initio manu illud idem factitasse, parasseque sibi audientiam, reperio.

Ipsis certe nascentis Ecclesiæ temporibus solitos Apostolos, ac Apostolorum æquales, mox dicturos, manu silentium Auditoribus imperare, convincitur manifeste ex ipsis Apostolorum Actis, in quibus volentes verba ad populum habere Petrus, Paulus, & Alexander, prius dicuntur manu silentium & audientiam sibi fecisse. Capite quidem XII. vers. 17. de Petro ita habetur: *Annuens eis manu, ut tacerent, narravit, quomodo Dominus eduxisset eum de carcere.* Cap. XIII. vers. 16. *Surgens autem Paulus,*

ma-

manu silentium indicens, ait, *Viri Israelita, & qui timetis Deum, audite.* Cap. xix. vers. 33. Alexander autem, manu silentio postulato, volebat reddere rationem populo. Et cap. xxi. vers. 40. Paulus stans in gradibus annuit manu ad plebem, & magno silentio facto allocutus est lingua Hebræa, dicens, *Viri fratres & Patres, audite.*

Ethnicos quoque, ad dicendum se componentes, manu silentium imperasse testatur perspicue, Persius Satira iv. sic scribens:

Fert animus calide fecisse silentia turba

Majestate manus.

Quod & Lucanus lib. i. de Julio Cæsare agens confirmat his verbis:

— tumultum

Composuit vultu, dextraque silentia fecit. Et Xiphilinus in Adriano, de præcone loquens, hæc ait: *Is cum manum porrexisset, essetque ob eam causam silentium consecutum, ut est consuetudo.* Subjiciamus hic etiam Herodiani ac Taciti testimonia, ut ex eorum verbis, tamquam adhibito lumine, obscurus mos iste magis illustretur: *Sedens, ait ille, Imperatoria sella Commodus, pleno spectatoribus theatro, fuisse cuique locis ad sedendum pro dignitate attributis, priusquam quidquam diceretur, agereturque in scena, repente quidam Philosophi habitu, manu baculum gestans, peramque semi-nudus ab humero suspensus, curriculo prodiit: mediaque in scena consistens, manuque silentium imperans: Non hoc, inquit, ludum*

rum tempus, o Commode . Tacitus vero de Druso loquens ad dicendum se componente, ut concitatum Legionum seditionem ac discordiam sedaret: Stabat Drusus, silentium manu poscens, &c.

Sed & Judæorum morem hunc fuisse, beatus Joannes Chrysostomus initio Homil. 29. in Acta Apostolorum, ad ea verba, Surgens Paulus, ac innuens manu, diserte tradit: Mos hic Judæis erat, & ideo & ipse (Paulus) juxta illum eis loquitur.

C A P U T XIV.

Quo manus gestu aut forma soleret olim hujusmodi silentium postulari, fierique audientia . Digitorum concrepatione interdum . Interdum indice & medio in jotam erectis, cæteris pollice compressis . Sæpius tamen dextera dicentis manu, cum dignitate quadam ac majestate, porrecta & extenta .

VErum quo manus gestu, motu, forma, flexuque soleret in dicendo hujusmodi silentium & audientia fieri, investigandum videtur: non minus enim quo id ritu, quam quod fieret, scire refert.

Di-

Digitorum igitur concrepatione paratam inter-
 dum audientiam, subjecta Petronii Arbitri
 ex Satirico verba comprobant: *Ut ergo tam am-
 bitiosus detonuit imber, retexit superbum pallio ca-
 put, & manibus inter se usque ad articulorum stre-
 pitum strictis: Quenam est, inquit, hac audacia?*
 Et ea, quæ non multo post leguntur: *Intrat
 homo omnium insulsissimus, & plane illa domo di-
 gnus, qui ut infractis manibus congemuit, ejusmo-
 di carmina effudit, Huc, Huc, convenite, &c.*
 Eodemque spectare videtur illud Propertii lib. 4.
 Eleg. 7.

— at illi

Pollicibus fragiles increpuere manus.

Illustrius autem exemplum ejusdem consuetudi-
 nis suppeditat B. Hieronymus Epist. ad Rusticum
 Monachum, de Rufino loquens: *Testudineo (inquit)
 incedebat ad eloquendum gradu, & per intervalla
 quædam vix pauca verba carpebat, ut cum puta-
 res singultire, non proloqui: & tamen cum, men-
 sa posita, librorum exposuisset struem, adducto su-
 percillo, contractis naribus, ac fronte rugata, duo-
 bus digitulis concrepabat, hoc signo ad audiendum
 provocans.*

Indice præterea & medio in jotam erectis,
 ceterisque pollice compressis, silentium indictum,
 planum fit ex Apuleii Metamorphoseos lib. 2.
 quo loci Telephronem inducens Apuleius fabu-
 lam exponere volentem, audientiam sibi in
 hunc modum parasse narrat: *Suberectus in to-*

rum

rum porrigit dexteram; & instar Oratorum conformat articulum, duobusque infimis conclusis digitis, ceteros eminentes porrigit, & infesto pollice clementer subrigens infit, *Telephron pupillus ego*, &c. Quem morem Fabius quoque Planciades Opusculo de Allegoria librorum Virgilii ad Chalcidium Grammaticum, ita perstringit: *Itaque compositus in dicendi modum erectis in jotam duobus digitis tertium pollice comprimens, ita verba exorsus est.* Hac etiam digitorum compositione ac conformatione veteres Christianos Auditoribus significasse, verba se velle facere, adnotat vir eruditus ad citata Propertii verba; admonetque, Episcopos sic pingi consuevisse, quod eo gestu olim, in loco, qui *Salutatorium* Latinis dicebatur, αὐτῶντος Græcis, alloquebantur populum, eique benedicebant. Addit etiam, eosdem hodie eo quidem gestu benedicere, non autem populum alloqui. Verum quidquid sit de hac Episcopali manus conformatione ac compositione in benedictione populis tribuenda, (quam ad denotandam Sanctissimæ Trinitatis unitatem trahi ab aliquibus non sum nescius) certe non ausim adfirmare, fuisse eandem in dicendo tam religiose observatam a Petro, Paulo, Alexandro, de quibus supra ex Apostolorum Actis, ceterisque veteris Ecclesiæ Concionatoribus.

Illud verissime asseverarim, dexteram dicentis manum cum dignitate quadam ac maiestate porrectam & extentam silentium olim parasse, fecisseque

fecisseque audientiam. Dixi multa paucis: ac ne quis gratis dixisse me putet, in horum confirmationem testimonia producam. Ac dexteram quidem unam id operis habuisse, commemorant expresse Lucanus & Apuleius locis superius allatis. Non nisi vero extentam & porrectam id ipsum perfecisse, & citata Xiphilini ac ejusdem Apuleii testimonia declarant: & colligo manifeste ex Actuum Apostolorum cap. xxvi, vers. 1. quo loco defensionem suam exordiri volens beatus Paulus coram Agrippa Rege, manum prius extendisse dicitur, ut videlicet & silentium sibi conciliaret & audientiam. *Agrippa vero* (inquit Lucas) *ad Paulum ait: Permittitur tibi loqui pro temetipso: tunc Paulus, extenta manu, capit rationem reddere.* Addo, eandem; pæne, vel ipso Budzo testo in Commentariis Linguz Græcæ, vim esse ac potestatem Græci verbi *καταρτισιν*, quo utitur in hanc rem idem beatus Lucas Actorum capitibus xi i. xi x. & x x i. superius adductis, Quin etiam Syrus in eundem sensum accepit eam vocem ac transtulit. Sed & juniorem Justinum Imperatorem in ejus Orationis initio, quam ad populum habuit, ubi primum Imperii diademate fuit redimitus, ut populi audientiam sibi conciliaret, manum erexisse scribit Corippus Africanus iis versibus, quos supra protuli capite x.

*Ipse coronatus solium conscendit avitum,
Atque Crucis faciens signum venerabile sedit;
Erc-*

*Erectaque manu, cuncto presente Senatu,
Ore pio hæc ait.*

Fuisse demum non nisi cum dignitate quadam
ac majestate porrectam & extentam prodit Per-
sius iis verbis supra ex Satira quarta relatis:

*Fert animus calidæ fecisse silentia turbæ
Majestate manus.*

Non dubitarim itaque adfirmare, sacros olim
Concionatores, ut silentium sibi & audientiam
ab Auditoribus ipso Concionum initio concilia-
rent, consuevisse dexteram cum majestate qua-
dam extendere ac porrigere. Quam sane con-
suetudinem, etsi procedente tempore, sive ne-
glectam, sive intermissam, nunc penitus in Ec-
clesia amisimus, illud tamen ejus vestigium ex-
rat adhuc in familiaribus nostris collocationibus,
quod dum volumus attentos eos facere, quibus-
cum sermones conferimus, extendimus subito
dexteram, verbum etiam *Audite*, tamquam cer-
tam ejus gestus explicationem, non raro adden-
tes.

CAPUT XV.

Proxime ante Concionem recitabatur semper aliquid e Scriptura Sacra, unde ipsum Concionis argumentum erueretur. Judæi quoque nun nisi post Legis aut Prophetarum lectionem accedebant ad ipsam Legem explicandam, Prophetasque interpretandos, & Auditorum mores exhortationibus formandos ac corrigendos.

HEbræos quidem, quorum ex fonte nostros hæc omnes in concionando ritus mansisse diximus, non nisi post Legis, aut Prophetarum lectionem, sive ad ipsam Legem ac Prophetas interpretandos, sive ad mores exhortationibus formandos ac corrigendos, accessisse, vel unus B. Lucas locuples testis esse potest. Enim Evangelii capite iv. vers. 16. Christum Dominum inducens quadam Sabbati die in Synagoga verba facere volentem, non prius eum loqui cœpisse scribit, quam singularem ex Isaïæ libro locum legisset: *Intravit Jesus, inquit, secundum consuetudinem die Sabbati in Synagoga, & surrexit legere, & traditus est illi liber Isaïæ Propheta, & ut revolvit librum, invenit locum,*
ubi

ubi scriptum erat, Spiritus Domini super me, propter quod unxit me, evangelizare pauperibus misit me, &c. Et cum plicuisset librum, reddidit ministro, & sedit, & omnium in Synagoga oculi erant intendentes in eum; cepit autem dicere ad illos, &c. Paulum quoque & Barnabam non nisi post Sanctorum Voluminum lectionem a Synagogæ Principibus ad dicendum fuisse invitatos tradit idem Lucas Actorum capite xxi i. vers. 14. iis verbis: *Venerunt Antiochiam Pisidia, (de Paulo & Barnaba loquitur Lucas) & ingressi Synagogam die Sabbatorum, sederunt; post lectionem autem Legis & Prophetarum miserunt Principes Synagogæ ad eos dicentes, Viri fratres, si quis est in vobis Sermo exhortationis ad Plebem, dicite: surgens autem Paulus, & manu silentium indicens, ait, &c.*

Hunc Synagogæ morem Christi sane Ecclesia & nascens recepit, & constanter retinuit adulta. Philo Hebræorum doctissimus, de Esæis agens, ita scriptum reliquit in libro, cui nomen est, *Quod omnis probus liber: Has (patrias nimirum leges) ediscunt, & alio tempore, sed præcipue recurrente die septimo, quem sacramtum existimant, ferianturque tunc ab omnibus aliis negotiis. Quoties sacras ades, quas Synagogas vocant, adeunt, pro ætatis ordine juniores ad seniorum pedes considunt, & ad audiendum se componunt: ibi alius ex libro prælegit: alius quispiam unus e peritioribus accedens, quæ obscura sunt, explicat.*

plicat. Constitutionum etiam Apostolicarum Auctor, de Ritu, qui in Ecclesia Apostolorum temporibus maxime vigeat agens in lib. 2. cap. 54. hæc habet: *Post Lectionem, & Cantum Psalmorum, ac post Doctrinam de Scripturis, dicat Diaconus, &c.* Per Lectionem intelligens Epistolarum & Evangelii recitationem, per Doctrinam autem Concionem, ut demonstratum est Cap. iv. Apud eundem in lib. 8. cap. 5. apertius ita scriptum legas: *Post lectionem Legis, & Prophetarum, & Epistolarum nostrarum, & Actorum, atque Evangeliorum, salutat Ecclesiam Ordinatus, dicens, Gratia Domini Jesu Christi, & Caritas Dei Patris, & Communicatio Spiritus Sancti cum omnibus vobis, & omnes respondeant, Et cum Spiritu tuo, & post salutationem alloquantur populum Sermonem hortatorio.* Id ipsum quoque nos docet beatissimus Martyr Justinus extrema ad Antoninum Pium Apologia, sic inquit: *Die, qui Solis dicitur, omnes, qui in agris vel oppidis morantur, unum in locum conveniunt, commentariaque Apostolorum, vel Prophetarum scripta leguntur, quamdiu hora patitur: deinde ubi is, qui legit, destitit, is, qui præst, admonet & hortatur, ut ea, quæ lecta sunt, bona imitemur.* Tertullianus etiam exprimit non obscure eandem consuetudinem in Apologetici cap. 39. *Cogimur ad Literarum Divinarum commemorationem, si quid presentium temporum qualitas aut præmonere cogit, aut recognoscere; certe*

E fidei

fidem sanctis vocibus pascimus: spem erigimus, fiduciam figimus, disciplinam præceptorum nihilominus inculcationibus densamus; ibidem etiam exhortationes, & censura divina. Quo loco Divinarum commemorationem Literarum nominans Tertulianus signat certe Sacram Lectionem, seu recitationem; cum autem præmonitiones, sanctas voces, præceptorum inculcationes, exhortationes, & castigationes dicit, Sermonem intelligit, seu Concionem; cujus nimirum scopus is est, commovere, exhortari, moresque formare ac corrigere. Sed longum nimis esset, singula Ecclesiasticorum Auctorum hac de re testimonia proferre: mihi præcipua antiquiorum delibasse satis est. Plura si quis desideret, legat Basilii, Chrysostomi, Ambrosii, Augustini, Chrysologi, Leonis, Gregorii Magni, & aliorum Ecclesiæ Patrum Sermones, in quibus fons est, unde rerum talium cupidi abunde sitim expleant. Tantum adscribam, ex hac veteri consuetudine illud in vestum in Ecclesiam, ut intra Missarum solemnia proxime post recitatum Evangelium Concio habeatur: (qua de re infra lib. III.) Extra vero Missæ tempus hoc adhuc extare ejusdem vestigium, ut pro lectione proluxa, quam olim Concioni præmitti diximus, consueverint sacri Concionatores brevem aliquem e Sacris Voluminibus locum, tamquam ipsius Concionis argumentum, vel memoriter vel de Codice recitare.

CA-

C A P U T XVI.

Idemne esset olim, an alius, qui Sacra Volumina legeret, & qui tractaret seu explicaret. Concionaturi, suggestum ascendentes, sacrum plerumque Codicem in manibus habebant; quem aut ipso Concionis initio, ad indicandum, quem potissimum Scripturæ locum explicandum suscepissent, legerent; aut longius etiam provecti, prout sese vel dicendi vel legendi occasio dabat, nunc deponerent, nunc iterum sumerent.

CUm lectum semper aliquid e Scriptura Sacra, proxime ante Concionem, exposuerim, forsitan hoc loco quærat aliquis, idemne esset, an alius, qui Sacra Volumina legeret, & qui tractaret seu explicaret. Et eundem quidem fuisse dices, si ad Esdræ libri II. caput 8. respicias, in quo idem omnino & legit, & lecta explicat. Christus quoque Dominus Lucæ capite IV. & legit & explanavit Isaïæ locum. Sin spectes Actuum caput XIII. secus esse pronuntiabis. Etenim Paulus & Barnabas tunc fuerunt ad loquendum invitati a Principibus Sy-

nagogæ, cum jam satis ab alio lectum esset de Lege & Prophetis. Præterea Philo Judæus & Justinus Martyr locis nuper citatis, prælegisse alium, alium obscura explicasse, disertis verbis tradunt.

Sed nullo negotio propositæ quæstioni satisfaciet, qui tempora, quibus habebantur Conciones, scite distinguet. Concio (quemadmodum suo loco patebit) & intra Missarum solemnia & extra Missæ tempus consuevit olim haberi. Si eam nunc consideremus Concionem, quæ inter ipsa Missarum solemnia habebatur, alius certe erat a Tractatore Lector, si vero de illa quæramus, quæ solebat extra Missæ tempus haberi, tunc eundem & legisse, & lecta tractasse, pronuntiandum videtur. Ac de priori quidem nihil est, quare quisquam dubitet, cum illud nobis apertissime declarent Augustinus & Chrysostomus: dicit enim ille in Sermone 237. de Tempore, hoc modo: *Lectiones sanctas plures, cum recitarentur, audivimus, & de his oportet dicere, quod Dominus fuerit donare dignatus; sed Lectionum omnis Auditor, quod recentius lectum est, magis meminit, & ut inde aliquid a Tractatore dicatur, expectat. Cum ergo in ultimum sit Sanctum Evangelium recitatum, non dubito expectare caritatem vestram, ut de ista vinea, & de conductis, & de mercede denarii aliquid audiat. Et Sermone 30. de verbis Apostoli: De Divinis Lectionibus, quod Dominus admonere digna-*

dignatur, intenti audite, Fratres: illo dante; me ministrante, primam Lectionem audivimus Apostoli Fidelis sermo & omni acceptione dignus, &c. Hoc de Apostolica Lectione percepimus. Deinde cantavimus Psalmum, exhortantes nos invicem, una voce, uno corde dicentes, Venite adoremus, &c. Post hæc Evangelica Lectio, decem Leprosos mundatos, ostendit, &c. Has tres Lectiones, quantum pro tempore possumus, pertractemus, dicentes pauca de singulis. Chrysostomus vero in Sermone, cui titulus est, Carnis concupiscentias ne scitemur, quæ generant mortem, ita scriptum reliquit: Dic mihi, quis hodierno die vel Propheta, vel Apostolus prælectus est? aut quibus de rebus verba feci? nihil habes quod respondeas, utpote ille sis, ad quem somniantem verba sunt facta. Sed ut hoc ita esse credam, faciunt in primis illa verba, quæ passim in Sanctorum Patrum Sermonibus ac Homiliis leguntur: Sanctum Evangelium, cum legeretur, audivimus. Ut verba Sancti Evangelii capitulum, quod modo, cum legeretur, audivimus, Sicut audivimus, cum Sanctum Evangelium legeretur. Quod lectum est modo de sancto Evangelio. Et ea: Mox ut hoc verbum sonavit Lectoris. Ad hæc proposita nobis divinitus ex ore Lectoris. Sicut audistis pronunciare Lectorem. Jam me propemodum paulo ante Evangelii Lector hac cura liberavit. Statim audito Lectore. Lector ascendit. Hæc cum audistis personante Lectore. Et sexcenta ejusmodi, quæ alium omnino

fuisse a Tractatore Lectorem aperte demonstrant.

Hic ramen admonuerim, non repugnare, quominus intra ipsa etiam Missarum solemnia peculiarem aliquem ejusdem jam recitatae, sive Apostolicæ, sive Evangelicæ, Lectionis locum Concionator ipse initio Concionis repeteret: nimirum vel ad renovandam Auditorum memoriam, vel ad ostendendum, quem potissimum ex tota lectione locum in Concione tractandum selegisset. Id quod haud obscure significare videntur Origenes, Ambrosius, Chrysostomus, & Gregorius; ut ceteros Patres mittamus, cum selectam brevemque Sacri Textus partem ipso Homiliarum initio plerumque recitant, adduntque ea verba, *Et reliqua*, quibus nimirum indicant, ex tota ea lectione, quam Lector pronuntiaverat, se brevem illum, quam tractarent, locum selegisse.

Extra vero Missæ tempus, (ut alteram rei in quæstionem vocatæ partem dissolvamus) aut semper aut plerumque legebat idem, qui explicabat. Adducor, ut ita existimem, Chrysostomi verbis ex Homilia; quam, cum Presbyter esset designatus, habuit, quæ sic habentur: *Ceterum, ut vobis, quod dico, fiat evidentius, ipsum Psalmum ab initio vobis praelegemus*, Laudate Dominum de cælis, &c. Atque etiam ex Augustini Sermone 45. de Diversis, ita scribens: *Jam quæ sit ista mulier, me proloquente, audistis: videte*

videte etiam, ut me legente, agnoscatis. Et Sermone 121. Sed ex ipso Codice audite: propterea enim non tantum Disputatoris, sed etiam Lectoris fungor officio, ut sermo iste noster Sanctarum Scripturarum auctoritate fulciatur, non humanis suspicionibus super arenam edificetur, si forte aliquid non memoriter occurrerit. Audite ergo Evangelium secundum Joannem, Amen, Amen dico vobis, &c. Plainissime autem omnino hoc ipsum ex eo licet intelligi, quod consueverunt priusci Tractatores, suggestum ascendentes, sacrum Codicem in manibus habere; quem scilicet vel legerent ipso Concionis initio, ad indicandum qua de re essent verba: facturi; vel etiam longius provecti, prout sese dicendi aut legendi occasio dabat, nunc iterum sumerent legendum.

Ac ne quid non idoneis probatum testimoniis afferamus, ea quaeso expende. Hoc lectum est, (ait Augustinus Tractatu 15. in Joannis Evangelium) & hanc lectionem tractandam suscepimus: gestamus in manibus, quod Dominus Jesus. ad puteum Jacob loquebatur cum Samaritana muliere. Tractatu 35. Sentio vestros affectus attolli mecum in superna, sed corpus, quod corrumpitur, aggravat animam, & deprimit terrena: inhabitatio sensum multa cogitantem: depositurus sum & ego Codicem istum, discessuri estis & vos. Tractatu 36. Quare ista dixi? Forte, enim post hac verba quisquam mihi iuste dicat: Pone ergo Codicem,

E 4

quod

quod excedit mensuram tuam. Quid sumis in manum tuam? Tractatu 40. De Sancto Evangelio secundum Joannem, quod gestare nos videtis in manibus, jam multa audivit caritas vestra. Tractatu 45. Legamus ergo: Quia venturus est, &c. ad ea verba, in quibus nobis aliqua, quæ dixit, dignetur exponere. Et Expositione 2. in Psalmum 21. Quod si mihi aliquis dicat, O stulte, quid interrogas? Codicem portas; legamus igitur, quod modo dictum est: ibi habes, unde emit; ibi quære, quid emit. Et paulo post: Si est adhuc, quod dicant, nescio; litigent cum Scripturis, non nobiscum. Ecce Codex ipse, contra illum certent. Et Sermone 14. de verbis Apostoli: Rogo vos, ut paululum acquiescatis. Lego tantum, Sanctus Cyprianus est, quem in manus sumpsi, antiquus Episcopus sedis hujus: quid senserit de baptismo parvulorum, imo quid semper Ecclesiam sensisse monstraverit, paululum accipite. Et mox: Ad hoc ergo legi Sanctum Cyprianum, ut videatis, quomodo sit intellectus Canonicus. Sermone demum 45. de Diversis: Hoc, quod gestamus in manibus, Scriptura scilicet, quam videtis, commendat nobis inquirendam & laudandam mulierem quamdam, de qua paulo ante, cum legeretur, audistis. Et statim: De hac, secundum lectionis tenorem, quam me portare conspiciatis, pauca pro tempore, quæ Dominus suggesserit, dicam. Omnia hæc igitur Augustini testimonia, solitos olim Concionatores, suggestum ascendentes, Codicem Sacrum
in

in manibus habere, quem; data legendi vel dicendi occasione, modo deponerent, modo rursus sumerent, satis fidem faciunt: convincunt etiam (id quod secundo loco probandum posueram) extra Missæ tempus plerumque fuisse eundem & Lectorem, & Tractatorem.

CAPUT XVII.

Pro communi ac determinata, alicujus diei Lectione, sive Apostolica, sive Evangelica, seligebatur aliquando peculiaris aliqua, & tempori maxime congruens particula, quam tractandam susciperent Concionatores.

VEre nos hæc quidem hætenus: verumtamen si quis dixerit, pro communi ac determinata alicujus diei, sive ex Evangelio, sive ex Apostolo, lectione, fecisse aliquando Concionatores, ut peculiaris aliqua lectio fieret, quæ esset congruens & accommodata ei argumento, quod ipsi tractandum suscepissent; non is, mea quidem sententia, a vero longe abibit. Etenim apud Augustinum in Serm. 121. de Diversis ita scriptum invenias: *In memoria retinentes pollicitationem nostram, congruas etiam ex Evangelio & Apostolo fecimus recitari Lectiones.* Et in Sermone 23. de verbis Domini secundum Matthæum ait:

ait; Hesterno die qui adfuitis, promissionem nostram tenetis, qua hodie non solis vobis, sed pluribus etiam, qui convenerunt, Domino adjuvante, reddenda est. Quae sint decem Virgines, quarum sint quinque prudentes, & quinque stultae, non facile indagari potest. Verumtamen secundum ea, quae continet ipsa Lectio, quam caritati vestrae etiam hodie volui recitari, &c. Et in Tractatu 12. in Joannis Evangelium: Meminit caritas vestra, Dominico praeterito, quantum Dominus adjuvare dignatus est, disseruisse nos de spiritali regeneratione; quam Lectionem vobis iterum legi fecimus, ut quae tunc non dicta sunt, in Christi nomine, adjuvantibus orationibus vestris, implcamus. Chrysologus etiam hoc eleganter expressit in Serm. 66. Duas hodie a duobus Evangelistis editas ita recitari fecimus Lectiones, ut sermoni nostro vester intellectus occurreret, paterent abdita, &c. Et in Sermonem 118. Quoniam tota spes fidei Christianae in resurrectione constituta est mortuorum, ne quisquam de ea ausus sit dubitare, beati Pauli asserentis eam auctoritatem, rebus, exemplis, latissimam recitari vobis fecimus Lectionem.

CAPUT XVIII.

Quod Lectori Codicem fortuito aperienti primum occurrisset, aliquando extemporalis Concionis argumentum.

HOc loco venit mihi in mentem quiddam, a re proposita minime alienum, quod præterire tacitus nequaquam debeo. Recitatum scilicet id etiam aliquando proxime ante Concionem, quod aperienti Codicem Lectori occurrisset primum, seque fortuito legendum obtulisset: ex qua deinde sectione dicendi argumentumsumeret Concionator. Hujus rei Augustinum in Homilia 27. Libri 50. Homiliarum certissimum testem invenimus, cujus verba ea sunt: *Aliquid de pœnitentia dicere divinitus jubemur: neque olim nos istam Psalmum cantandum Lectori imperavimus, sed quod Deus censuit vobis utile ad audiendum, hoc cordi etiam puerili imperavit.* Extat & huic loco valde confimilis alius ejusdem Augustini in Sermone 63. de verbis Domini in Evangelium Joannis, quem hoc libentius recitabo, quod ex altero aptius alter exponetur; ait autem: *Evangelica lectio proposuit nobis, unde loquamur ad caritatem vestram, tamquam Domini imperio; & vere Domini imperio. Ab illo enim expectavit cor meum tamquam jussionem proferendi Sermonis; ut hinc*
cum

eum intelligerem loqui me velle, quod recitari ipse voluisset. Sed plura in hunc locum congerere, minime quidem in præsentia necessarium ducimus: hæc enim res eadem posterius, cum de Concionibus ex tempore dictis agemus, dilucide magis patebit.

CAPUT XIX.

Sanctorum Martyrum Passiones, cum anniversarii eorum dies in Ecclesia celebrarentur, ante Concionem publice recitatae. Ex hoc fonte manavit consuetudo recitanda in Choro quotidie ex Martyrologio Lectionis. Christi quoque Domini Passio, proxime antequam de ea Concio haberetur, lecta quidem, sed ex Matthæi dumtaxat Evangelio, in Africana saltem Ecclesia.

DE hac Concioni prævia Lectione illud etiam meo judicio restat, in quod paululum consideratio propter utilitatem intendatur, recitata fuisse proxime ante Concionem Sanctorum Martyrum certamina, passiones, ac triumphos, tunc scilicet, cum anniversarii eorum dies in Ecclesia celebrarentur. Idem beatissimus vir Augustinus moris hujusmodi non uno in loco firmis-

missimum dat testimonium; cujus verba ad faciendam fidem apponam ex Sermone 12. de Sanctis: In Passionem, qua nobis hodie recitata est, Fratres mei, evidenter ostenditur Judex ferox, Tortor cruentus, Martyr invictus, &c. Sermone 9. de Tempore: Magnum & multum mirandum spectaculum noster animus cepit, nec inanissimam & perniciosissimam, sicut solet in theatris quarumcumque nugarum, sed plane utilissimam & fructuosissimam voluptatem oculis interioribus hausimus, cum beati Vincentii gloriosa Passio legeretur. Sermone 45. de Diversis: De qua muliere volumus aliquid dicere; Ecclesia est; non enim licet nobis loqui de quacumque alia muliere; quamquam & recitatione Passionis Martyrum audivimus feminas, de quibus decenter loquamur. Sermone 63. Carnales spectant, miseros putantes eos Martyres, qui bestiis subjecti sunt, qui capite cæsi, qui ignibus concremati, detestantes eos & exhorrentes. Alii vero sicut & sancti Angeli spectant, non attendentes corporum laniatus, sed mirantes fidei integritatem. Magnum spectaculum præbet oculis cordis integer animus corpore dissipato. Hæc vos, cum in Ecclesia leguntur, libenter spectatis oculis cordis: si enim nihil spectaretis, nihil audiretis. Sermone 93. Cum aliorum Martyrum vix gesta inveniamus, quæ in solemnitatibus eorum recitare possimus, hujus (Sancti Stephani) Passio in Canonico libro est. Sermone 101. Audistis persequentium interrogationes, audistis confitentium responsiones, cum Sancto-

rum

rum Passio legeretur: Inter cetera, quale erat illud beati Fructuosi Episcopi? Et non multo post: Beati, quorum Passio recitata est. Beata Agnes sancta, cujus Passionis hodiernus est dies. Sermone 103. Hodiernus dies anniversaria replicatione nobis in memoriam revocat, & quodammodo representat diem, quo sancta famula Dei Perpetua & Felicitas coronis martyrii decorata, perpetua felicitate floruerunt; tenentes nomen Christi in prelio, & simul invenientes etiam suum nomen in premio. Exhortationes earum in divinis revelationibus triumphosque Passionum, cum legerentur, audivimus: eaque omnia verborum digesta & illustrata luminibus aure percepimus, mente speravimus, religione honoravimus, caritate laudavimus: debetur tamen etiam a nobis tam devota celebritati Sermo sollemnis. Sermone 105. Hac de vocabulis Martyrum, quibus consecratus est dies, pro tempore pauca suffecerint. Quod autem attinet ad istas, quarum sunt ista vocabula, sicut audivimus, cum earum Passio legeretur, sicut memoria traditum novimus. Denique in Sermone 109. Istum diem nobis solemnem gloria Maccabeorum fecit; quorum mirabiles Passiones, cum legerentur, non solum audivimus, sed etiam vidimus & spectavimus. Magnus quoque Leo in Sermone de Sanctis septem fratribus Maccabæis, sicuti Augustinus, consuetudinem hanc non obscure designavit, cum dicit: Causam sollemnitatis hodiernæ, Dilectissimi, plenissime Sacræ Historiæ lectione didicistis: nec latere vos

vos potuit, quem in tanto rerum gestarum ordine exceperitis auditum, cum gloriosam septem Martyrum matrem exultanti & non tacito honorantis affectu in singulis quidem filiis passam, sed in omnibus coronatam. Ista quidem sunt Augustini & Leonis testimonia, ex quibus recitatas olim a Lectore Martyrum Passiones proxime ante Concionem manifeste tamquam oculis cernimus.

Ex hac porro consuetudine si quis investum in Ecclesiam dicet morem illum, quem nunc passim usurpari videmus, recitandæ in Choro quotidie ex Martyrologio Lektionis, is meo quidem animo vere iudicabit; nititur enim ea res credibili ac perspicua prorsus conjectura.

Addam autem illud, priusquam hinc abeo, ipsius etiam Christi Domini nostri Passionem, proxime antequam de ea Concio haberetur, recitari consuevisse. Possem equidem non paucorum Patrum testimoniis hanc consuetudinem confirmare; sed nunc locum unum atque alterum ex eodem Magno Leone apposuisse sufficiet. Sacratissimum Dominicæ Passionis diem, quam Dominus Jesus Dei filius pro humani generis salute suscepit, & sicut promisit, omnia ad se exaltatus attraxit, tam plane ac lucide Evangelicus sermo referavit, ut religiosis & piis cordibus non aliud sit audisse, quæ lecta sunt, quam vidisse, quæ gesta sunt. Unde, cum indubitabilem obineat auctoritatem sacra narratio, annitendum nobis est, auxiliante Domino, ut perspicuum habeat intelligen-

gentia, quod notum fecit Historia. Hæc quidem Leo ex primo de Passione Domini Sermone. Eadem variatis paululum verbis, ex 19. Ser-mone: *Sacram, Dilectissimi, Dominica Passionis Hi-storiam, Evangelica, ut moris est, narratione de-cursam, ita omnium vestrum arbitror inhæsisse pe-ctoribus, ut unicuique audientium, ipsa lectio, quæ-dam facta sit visio. Habet enim hanc potentiam fi-des vera, &c.*

Atque hoc quidem loci non quo mihi tem-perare, quin illud quoque in transitu admo-neam, Christi Domini Passionem, quam ante Concionem publice legi solitam diximus, ex Matthæi dumtaxat Evangelio, in Africana sal-tem Ecclesia, solitam recitari. Id quod ita se habere, beati Augustini Sermone 144. de tem-pore verba hæc aperte declarant: *Resurrectio Do-mini nostri Jesu Christi & hodie recitata est, sed de altero libro Evangelii, qui est secundum Lucam. Primo enim lecta est secundum Matthæum, hesternæ autem die secundum Marcum, hodie secundum Lu-cam. Sic habet ordo Evangelistarum. Sicut enim Passio ipsius ab omnibus Evangelistis conscripta est, sic dies isti septem vel octo durant spatium, ut se-cundum omnes Evangelistas Resurrectio Domini re-citetur. Passio autem, quia uno die legitur, non solet legi nisi secundum Matthæum. Volveram ali-quando, ut per singulos annos secundum omnes E-vangelistas etiam Passio legeretur: factum est: non audierunt homines, quod consueverunt, & pertur-bati*

bati sunt. Haftenus ex Augustino, qui certe de re, quam proposui, nihil dubitationis relinquit, cum eo in loco fateatur aperte, inducere se quidem voluisse in Ecclesiam suam, ut quemadmodum Dominica Resurrectio, ita & Passio, ex omnibus Evangelistis legeretur: sed minime id a populo acceptum; vel si semel acceptum, ægre omnino factum, & nequaquam postea retentum, Simul autem & illud elucet ex hoc Augustini loco, Christi Domini Resurrectionem ex omnibus quatuor Evangelistis solitam singulis annis publice legi: quod idem perspicitur etiam manifestius ex ejusdem Augustini Sermone 146. de Tempore hæc scribentis: Hodierno die jam ecce tertio audivimus ex Evangelio Domini nostri Resurrectionem, quemadmodum me vobis locutum esse meministis: quoniam hoc moris est, ut secundum omnes Evangelistas Resurrectio Domini recitetur.

CAPUT XX.

Concionis argumentum aliquando Auditoribus indicatum plerumque ipso Concionis initio: aliquando etiam multis ante diebus. Illud etiam nonnumquam multo ante significatum, qui potissimum Scripturae locus esset pro Concione tractandus.

LECTUM semper aliquid ante Concionem e Scriptura Sacra, unde Concionis argumentum esset erutum, jam satis ostendimus. Dicemus nunc, ipsummet Concionis argumentum Auditoribus plerumque indicatum seu propositum. Auctorem habeo beatum Joannem Chrysostomum Concione 3. de Lazaro, cujus ipsa verba subjicio: Proinde ne vobis, quod traditum fuerit, effluat; non semel vobis inclinavimus doctrinae poculum, sed in dies aliquot partitum sumus, passi vos interim hisce diebus interquiescere ab audiendi labore, quo simul & ea, quae deposuimus, sic insigantur animo caritatis vestrae, ut excidere non possint, & ea, quae dicentur, sedatis ac vegetis mentibus excipiat. Eoque crebro vobis praedicimus multis ante diebus argumentum, de quo sumus locuturi, ut his in medio diebus sumpto libro, perpen-

pensaque rei summa tota, posteaquam intellexeritis, quid dictum sit, quid restet dicendum, mentem vestram instructionem reddatis ad audienda, quæ post differuntur. Hactenus Chrysostomus, qui, dum prævia argumenti cognitione instructiones reddi Auditores affirmat, ad ea, quæ post dicenda sunt, designat utique rationem, ob quam soleret ipse multis ante diebus argumentum, de quo esset locuturus, Auditoribus sæpenumero significare.

Ac ne quid prætermittamus ex iis, quæ huc apte possunt revocari, doceamus illud etiam, fuisse nonnumquam multo ante cognitum Auditoribus, quem Scripturæ locum pro Concione tractare vellet Concionator. Cujus rei idoneus testis est ac locuples idem beatus Chrysostomus Homilia 10. in caput 1. Evangelii secundum Joannem, cum ait: *Quid igitur a vobis contendimus? Ut una dierum in Sabbato, vel saltem in Sabbato cura vobis sit, Evangelicas legere lectiones, quas ante has Conciones in manibus habere, domi frequenter repetere, earum diligenter sensum disquirete; quid clarum, quid obscurum in his sit, adnotare velitis; quid pugnare videatur, cum non pugnet: ita omnibus penitus examinatis, his vos Concionibus quam attentissimos exhibeatis.* Rursusque Homilia 1. in caput 1. Matthæi: *Ut autem facilius sit iste ad intelligendum liber, rogamus ac hortamur, quod in aliis quoque Scripturis facere consuevimus, ut præveniat animo, at-*

F 2

que

que voluatis eum, qui a nobis elucidandus est locus, ut intellectui lectio viam parans, quod etiam in Eunuchio illo factum est, multam nobis conferat facultatem dicendi, &c.

C A P U T . X X I .

Proœmia, olim etiam, sacris Concionibus sæpenumero adhibita. Eorum caussa, & necessitas.

HOc loco Concionum Proœmia ad se non immerito vocant. Atque iis quidem usos olim Concionatores, & nos passim videmus in eorum Homiliis ac Sermonibus, & testatur disertis verbis Chrysostomus in ea Homilia, quæ ita inscribitur, *De ferendis reprehensionibus, & de conversione Pauli*: Reprehenderunt nos amicorum quidam, quod productiora Sermonum initia faciamus. Et paulo post: *Serviunt nobis in hoc Proœmia, ut Auditores de dicendis per compendium instruantur, & manifestior tradatur doctrina*: fateor enim, non opus Proœmiis, neque instructionibus, his, qui semper Scripturis vacant, neque aliis occupationibus distrabuntur; statim enim, audito Lectore, dictorum mentem accipiunt: qui autem bonam temporis partem secularibus negotiis impendunt, & rarius hic comparent, nisi Proœmia audiant, & instructi intelligant, quæ Sermonem illum præcedant,

dant, absque lucro hinc abeunt. Non est autem hæc sola nobis Proæmiorum caussa, sed & alia non minor, quam ista. In tanta multitudine sunt alii qui adveniunt, alii qui sæpe non adveniunt; & necesse est, ut laudentur præsentēs, arguantur absentes, ut illi quidem laudibus studiosiores evadant, hi autem reprehensi ignaviam abjiciant. Est & alius usus Proæmiorum, incidimus enim sæpe in longiora argumenta, quæ uno die ad finem perducere nequeunt; & interdum duobus, vel tribus diebus, ut recte explicentur, opus habent; unde tunc opus est die secundo finem Doctrinæ prioris repetere, ut, dum principio finis congruit, sermo cohereat, Auditoribusque minus sit obscurus. Et ut discas Sermonem absque Proæmiis valde obscurari, ecce exempli gratia, &c. Ex quo Chrysostomi loco non modo intelligimus, quibus de causis Proæmia adhiberent sacri olim Concionatores, verum etiam quibusnam Auditoribus ea essent necessaria. Sed eorundem necessitatem declarat iterum Chrysostomus ibidem non multo post, iis verbis: Proinde sicut corpus capite, arbor radice, & flumen fonte indiget, ita & Sermo Proæmiis, &c.

CAPUT XXII.

Concionum initium fecerunt nonnumquam veteres Patres ab iis verbis, Benedictus Deus; tunc scilicet, cum vel adversi casus impendebant aut premebant, vel depulsus cesserat jam malorum metus. Hujusce consuetudinis causam dedit beatissimus Job.

A Concionum initio non ante discedam; quam illud præterea monuerim, consuevisse aliquando veteres Patres, saltem Concionatorum exemplar Chrysostomum, suas ad populum Allocutiones ab iis verbis, *Benedictus Deus*, exordiri, cum vel adversi casus impenderent aut premerent, vel cessisset jam malorum metus. Si quis autem piæ hujus consuetudinis originem a beatissimo Job, tamquam a capite, ducendam conjecerit, næ illum bene conjecisse crediderim: eam certe beatus Joannes Chrysostomus Job uni acceptam eam refert. Chrysostomi verba id exprimentia sunt hujusmodi in Homilia post suum prioris exilii reditum: *Quid dicam? quid loquar? Benedictus Deus. Hunc egrediens dixi sermonem, hunc iteravi revertens, & illic constitutus hunc in ore volebam. Puto vos meminisse, cum ante hoc be-*
tum

tum Job adduxissem in medium dicentem , Sit nomen Domini benedictum. Hanc vobis Historiam derelinqui, has gratiarum actiones iterabo regressus, Sit nomen Domini benedictum, &c. Quemadmodum igitur beatissimum Job, ut in secundis rebus, sic in adversis, eam semper verborum formulam, Sit nomen Domini benedictum, usurpasse Sacra testantur Volumina, ita beatum Chrysostomum tunc in concionando ab iis verbis, *Benedictus Deus*, exordiri consuevisse observo, cum nimirum vel adversi casus impendebant aut premebant, vel evaserat jam ipse ex iis atque emergerat. Ac ne mihi adfirmanti fidem qui abroget, subjungam ipsos Chrysostomi locos id aperte significantes. Chrysostomus Homilia iv. ad populum Antiochenum (quæ ita inscripta est, *Exhortatio ad populum de patientia ac tolerantia, ob impendentem videlicet ac prementem calamitatem.*) ait : *Benedictus Deus, qui dolentes animas vestras consolatus est, & vacillantes mentes confirmavit: quod enim congruam ceperitis consolationem, per studium hoc & audiendi promptitudinem demonstrastis: non enim datur, animam dolentem & tristitia nube pressam posse, quæ dicuntur, cum promptitudine audire: vos autem video cum multa benevolentia & acris studio nobis attendentes, omnibus tristibus excussis, & audiendi desiderio instantem angustiam repulisse: propterea Deo vobiscum gratias ago, quod disciplinam vestram miseria non redarguit, non. rigorem*

nostrum timor remisit, nec alacritatem vestram extinxit tribulatio, nec labefecit zelum vestrum periculi magnitudo, nec superavit in Deum desiderium hominum timor, nec studium vestrum temporis iniquitas dejecit.

Mali autem mole jam depulsa illud idem Concionum initium usurpasse Chrysostomum, manifeste declarat ipsemet non semel neque uno in loco, veluti Homilia 12. ad Populum Antiochenum; ubi ait: *Cum præteritam tempestatem, & præsentem cogito tranquillitatem, non desino dicere, Benedictus Deus, qui facit omnia & ipsa transmutat, qui fecit lucem de tenebris, qui deducit ad portas inferi & reducit, qui castigat & non mortificat. Et hoc vos continue dicere volo, nec desistere: si enim ipse vobis operibus benefecit, qua nos venia digni esse possimus, ne verbis quidem ipsum remunerantes? Propterea exhortor vos, nunquam cessare ipsi gratias agere. Si enim pro primis grati fuerimus, certum quod & aliis majoribus potiemur. Dicamus igitur continue, Benedictus Deus, qui & solitam nobis dedit cum fiducia vobis mensam apponere, & vobis præbuit secure nostros audire sermones. Benedictus Deus, quoniam non amplius exteriora fugientes pericula, sed audire optantes, huc concurrimus, non amplius cum anxietate & tremore & sollicitudinibus inter nos convenimus, sed cum fiducia omnem excutientes timorem, quo per superiores dies fluctuantibus in medio mari, & naufragium per singulas horas expectanti-*

Etantibus nihilo melius nos habebamus. Infinitis tota die rumoribus pulsati, turbati, & undique circumacti, & singulis satagentes diebus, & curiose seiscitantes, Quis venit e castris? Quid vero veniens nunciavit? Numquid verum an falsum, quod dicitur? & noctes sine somno transigentes, & civitatem respicientes cum lacrymis, tamquam mox perituram. Propterea & nos superiores hos dies tacuimus, omnis civitas nostra erat exhausta, & omnes in solitudines transmigraverant, & residui tristitia nube caligaverant. Et Homilia 12. Et heri dixi, Benedictus Deus, & hodie hoc ipsum rursum dicam: etsi enim gravia præterierunt, tamen gravium memoria ne prætercat; non ut doleamus, sed ut gratias agamus. Si enim malorum memoria manserit, malorum experientia numquam urgebit. Quid enim experientia opus est, cum memoria nos corrigat? Sicut igitur submergi nos Deus non permisit præsentibus procellis, sic neque nos ipsos illis sublatiis resolvere sinamus. Enumerans autem Chrysostomus calamitates, e quibus evaserat populus, hæc mox subjicit: Quis vidit, quis audivit unquam nostris casibus similia? Quotidie civitatem nostram cum suis habitatoribus funditus tollendam esse suspicabamur, sed cum Diabolus navigium submergere sperabat, tunc puram reddidit Deus tranquillitatem. Ne igitur obliviscamur magnitudinis malorum, ut beneficiorum a Deo collatorum magnitudinem recordemur: etenim morborum naturam nesciens, Medici artem numquam sciet, & pueris

nostris hæc dicamus, & in mille mittamus generationes, ut omnes discant, quomodo Diabolus civitatem funditus delere studuerit, & quomodo ipsam Deus lapsam & jacentem rursus erigere, neve ullum fieret nocumentum, prohibere potuerit; ad hæc & timorem sustulerit, & repulerit cum multa celeritate periculum, &c. Dicamus igitur semper & quotidie, Benedictus Deus. Et Homil. 13. idem aliis verbis ostendit; ea sunt: Ab eodem principio & iisdem Proœmiis, quibus heri & nudiustertius cæpi, & hodie incipiam, dicam & nunc, Benedictus Deus. Quale præteritum vidimus quatrimum, & quale nunc videmus præsens? Quanta in illo obscuritas tunc erat, quanta nunc in præsentī tranquillitas? Tremendum in civitate Tribunal illud & omnium corda conquassavit, & nocte fecit diem nihilo meliorem, non radiis obtenebratis, sed tristitia & timore oculos offuscantibus vestros, &c. Et in Homilia 20. longe manifestius: A verbo, a quo semper in periculorum tempore apud caritatem vestram exordiri consueveram, ab eodem, inquam, & hodie apud vos sermonem incipiam, & dicam vobiscum, Benedictus Deus. Hanc nos vobiscum sacram solemnitatem cum gaudio & lætitia multa hodie celebrare dignatus, & qui caput corpori dedit, & Pastorem ovibus, Præceptorem discipulis, militibus Ducem, sacerdotibus Pontificem; Benedictus Deus, qui ex superabundanti facit, quæ petimus, aut cogitamus. Et in citata initio hujus capituli Homilia
post

post reditum prioris exilii: Quid dicam? quid loquar, *Benedictus Deus*: hunc egrediens dixi *Sermonem*, hunc iteravi revertens, & illic constitutus hunc in oreolvebam. Puto vos meminisse, cum ante hoc beatum *Job* adduxissem in medio dicentem, Sit nomen Domini benedictum, Hanc vobis *Historiam* dereliqui, has gratiarum actiones iterabo regressus, Sit nomen Domini benedictum in secula. Et statim: *Benedictus Deus*, qui concessit exire; *Benedictus Deus*, qui redire precepit; *Benedictus Deus*, qui permisit hiemem; *Benedictus Deus*, qui dissolvit hiemem, & fecit tranquillitatem. Hæc dico admonens vos, ut semper benedicatis. Si evenerint mala, benedicite, & dissolventur mala: si prospera evenerint, benedicite, & perseverabunt prospera. Siquidem *Job*, cum in prosperis esset, benedicebat, & cum pauper effectus, glorificabat: neque tunc ingratus fuit, neque postea blasphemavit. Diversa quidem tempora, sed una voluntas gubernantis actum. Nec tranquillitas resolvit, nec tempestas hiemis demergit. *Benedictus Deus*, & cum a vobis sum segregatus, & cum iterum recepi vos. Quæ quidem omnia manifeste declarant, ab iis verbis, *Benedictus Deus*, solitum *Chrysostomum* suas exordiri Conciones, non modo cum immineret aut urgeret calamitas, verum etiam cum ipse malorum metus jam esset depulsus.

CAPUT XXIII.

Preces ad Deum factæ a Concionatore inter ipsam etiam Concionem, cum nimirum difficilior locus aliquis esset tractandus. Ab Ethnicis hoc idem factitatum.

Qui ritus olim vel ante Concionem, vel ipso Concionis initio servarentur, eos hæcenus & enumeravi, & S.S. Patrum auctoritate diligenter firmavi. Mox vero quæ adjunguntur, eo pertinent, ut quid aut inter concionandum, aut ad Concionis finem, aut etiam proxime post fieret, declararetur. Illud igitur primo loco demonstramus, non initio dumtaxat dicendi, quod supra docuimus, Christianum Oratorem divinum implorasse auxilium, sed longius etiam proVectum, cum difficilior nimirum locus aliquis esset tractandus. Ethnicos quidem hoc ipsum laudabiliter factitasse adnotat Quintilianus in Proœmio Libri IV. suarum Institut. Oratoriarum, iis verbis: *Nemo miretur Poetas sæpe fecisse, ut non solum initiis operum suorum Musas invocarent; sed proVecti quoque longius, cum ad aliquem gravio-rem venissent locum, repeterent vota, & velut nova precatione uterentur.* Subdit autem, eamdem & ipse retinens consuetudinem: *Mibi quoque*

que profecto poterit ignosci, si nunc omnes in auxilium Deos, ipsumque in primis, quo neque praesentius aliud, neque studiis magis propitium numen est, invocem: ut quantum nobis expectationis adiecit, tantum ingenii adspiret, dexterque ac volens adsit, & me, qualem esse credidit, faciat. Cujus mihi religionis non hæc sola ratio, quæ maxima est, sed alia, quæ sic procedit ipsum opus, ut majora præteritis, ac magis ardua sint, quæ ingredior.

Beatus certe Joannes Chrysostomus Homilia 3. de Incomprehensibili Dei natura, cum ad eum locum venisset, in quo erat explicandum, Incomprehensibilem utique esse Divinam naturam, renovans vota ad Deum, & velut nova precatione utens: Age, (inquit) ad rem ipsam demonstrandam explicandamque veniamus, si prius interim oraverimus, a Deoque imploraverimus auxilium, sæpius enim orandi rationem, de qua agitur, probabit atque exponet. Invocemus itaque ipsum Regem Regum, & Dominum Dominantium, qui solus habet immortalitatem, & lucem inaccesibilem habitat, quem nullus hominum vidit, nec videre potest, cui est honor & imperium in sempiternum, Amen. Hactenus Chrysostomus, qui, dum ait sæpius rem, de qua agitur, per Orationem illustrari atque exponi, declarat etiam quam ob causam in re graviore ac difficiliore explicanda repetendæ sint preces ad Deum, & vota renovanda. Basilii Seleuciensis circa medium

dium Orationis 39. Dei Incarnationem, Virginisque partum explicare volens, preces ac vota renovat in hunc modum: *Quando igitur Deum incarnatum enixa Deipara dicitur, ad Deum precatio- nis ope ascendam, ipsumque ducem Orationis faciam. Domine omnipotens, universa creatura Rex, qui inexplicabili quadam ratione mentes incorpora- les spiritali luce perfundis, mentem meam illumina, ut proposita res absque errore cognoscatur, cognita pie dicatur, dicta sine periculo animo capiatur. Eli- gius quoque, Noviomensis Episcopus, cum ad Cœnæ Dominicæ mysteria explicanda venisset, Homilia 4. sic ait: Cujus mirifica sacramenta ut nostra digne queat fragilitas celebrare, atque de eisdem, licet tenuiter, saltem utiliter aliquid ex- plicare; a Verbo, de cujus operibus & verbis sa- lutaribus ad profectum vestrum loqui desideramus, nobis implorandum est posse: ergo ut hujus diei mysteria perspicue aliquatenus, & nonnulla pro modulo nostro valeamus effari condigne, rogamus Iupplices, dicentes cum Psalmista, Cor mundum crea in me Deus; itemque, Repleatur os meum laude, ut cantem gloriam tuam, &c.*

CAPUT XXIV.

Auditorum etiam preces ad Deum a Concionatore postulatae aliquando inter concionandum.

NEquē vero satis habebant Concionatores , ut jam ante dixi , cum difficilior locus aliquis inter concionandum tractandus occurrebat , sua ipsi vota repetere , & velut nova ad Deum precatione uti , nisi ipsorum etiam Auditorum preces ac vota aliquando postularent . Abundant testimoniis veterum Patrum Homilix , ex quibus hæc illustria maxime subjiciuntur . *Magna quæstio est* (inquit Augustinus Sermone 11. de verbis Domini in Evangelium secundum Matthæum) *de recenti Evangelica Lectione proposita , cui solvenda , quantum ad nos attinet , impares sumus ; sed sufficientia nostra ex Deo est , quantum ejus adjutorium vel accipere vel capere possumus .* Prius ergo magnitudinem advertite quæstionis , ut , cum ejus molem humeris nostris impositam videritis , oretis pro laboribus nostris , atque in auxilio , quod nobis præbetur , inveniatís adificationem mentibus vestris . Et in Sermone 38. de verbis Domini in Evangelium secundum Joannem : *Attendite , adsit ipse nobis , adjuvantibus orationibus vestris , & pia intentione acci-*

accipere cupientibus, quod ipse suggesserit. Adsit nobis, ut possimus quoquomodo explicare quod cœpimus: tamen, Fratres, ante dico; si non potuerō ego explicare, non rationem putetis, sed hominem defecisse. Itaque vos hortor & deprecor, ut oretis, adsit misericordia Dei, & ita rem a nobis dici faciat, ut vos audire oportet, & nos dicere. Et in ejusdem operis libro, Sermone 63. ita scriptum videas: Fecit vos per me Deus intentos. Orate pro nobis, & quasi aperientes sinum, donet ipse, unde, quod aperuistis, impleatur. Collaborate nobiscum: videtis enim, quid susceperimus, non solum quid, verum etiam qui, unde volumus dicere, ubi positi, quomodo positi in corpore, quod corrumpitur & aggravat animam, & deprimit terrena inhabitatio sensum multa cogitantem. Rursus in Sermone 4. de verbis Apostoli hæc habet idem Augustinus: Hanc itaque lectionem, totumque ipsum molestum & obscurum, sed intelligentibus salubrem Epistolæ Apostoli locum suscepimus, adjuvante misericordia Dei, exponere differendo. Caritati vestræ debitores nos esse scio, exactores vos esse sentio. Quemadmodum nos, ut ista percipiamus, oramus; sic & vos orate, ut ea vobis explicare valeamus. Si enim oratio nostra concordet; & vos faciet Deus idoneos Auditores, & nos debiti hujus fidelissimos redditores, &c. In Sermone demum 45. de Tempore de eadem re longe dilucidius edisserit: Sic ergo intendat caritas vestra, donec, quod Dominus donaverit, dicam vobis; ut
ubi

ubi me forte laborare videritis in difficultate alicujus obscuritatis, adjuvetis me affectu pietatis &c. Sed nolo plura hujusce consuetudinis ex Patrum Homiliis testimonia proferre, quod nimia eorum copia ad alia properanti lectoris fastidio sit: quare ad alia, quæ probatione magis indigent, transeo.



CAPUT XXV.

Paschatis olim dies valde controversus. Ejus investigatio Alexandrino Episcopo assignata. Ille Romano eum patefaciebat, a quo universi deinde Episcopi certiores reddebantur. Epiphaniarum nomine, & Magorum adventus, Christi que Baptismus, & ipse quoque Natalis, olim signabatur. Ægyptii uno eodemque die tres hasce festivitates celebrabant. Episcopi omnes, in propria unusquisque Ecclesia, Epiphaniarum die futuram Paschalem celebritatem inter concionandum Auditoribus denunciabant. Quadragesimæ quoque initium intra Concionem denunciatum. Eusebii & B. Hieronymi locus illustratus. Denunciandi Paschatis morem Mediolanensis Ecclesia hodie retinet.

OMnium prima sit Paschatis Denunciatio: de qua tamen, quantum ego video, non commode dici posse videtur, nisi prius cognitum

tum; sit, quanta olim dissensione de eo celebrando; sit primis Ecclesie temporibus dimicatum; quidque ad eam controversiam sive sedandam sive funditus tollendam, statuerint deinceps Catholici Patres. Hoc explicemus, rem totam, paulo quidem altius, sed paucis tamen omnino ac summatim repetentes.

De constituendo Paschalis celebritatis die pugnantissime semper in veteri Ecclesia certatum est. Atque hoc ex Eusebii Historia Ecclesiastica lib. 5. cap. 22, 23, 24. & lib. 3. de Vita Constantini cap. 51, 13, 16, 17. facillime quivis didicerit. In Epistola etiam 83. idem affirmat Ambrosius. A Socrate quoque lib. 5. cap. 21. Epiphonio Hæresi 70. Beda in Chronico, & lib. 5. de Ratione Paschæ. Isidoro lib. 6. Etymolog. cap. 17. aliisque gravibus ac certis Auctoribus id ipsum uno consensu conprobatur. Quare Pius Pontifex ejus nominis primus, ut excitatam comprimeret controversiam, decrevit, in die Dominico esse Pascha ab omnibus celebrandum; meminit Eusebius in Chronico ad annum Christi 145. Hermes item, Pii æqualis, hanc ipsam ob causam librum scripsit, in quo Pascha nonnisi Dominico die celebrandum docet; quemadmodum Anastasius Bibliothecarius in ipsius Pii Vita, & Beda in lib. de Sex Ætatibus prodidere. Victor deinde urbis Romæ Episcopus, Pii vestigiis insistent, eandem Decreto suo renovavit Constitutionem, ut est in ejus Epistola ad Theophi-

lum Cæsareæ Palestinæ Episcopum, traditque idem Anastasius in ejus Vita. Horum Pontificum Decretis favens ipsemet Theophilus, Synodicam adversus eos, qui decima quarta Luna cum Judæis Pascha celebrabant, conscripsit Epistolam, teste Hieronymo in Catalogo Scriptorum Ecclesiasticorum cap. 43. Oecumenicæ tandem primæ Nicænæ Synodi Decreto firmatam hanc eandem fuisse observationem, convincitur ex Athanasio in lib. de Synodis, Theophilo Alexandrino in suis paschalibus Epistolis, Eusebio de Vita Constantini lib. 3. cap. 13. & 17. Socrate lib. 1. cap. 6. Theodorito lib. 1. cap. 10. & Nicephoro Callisto lib. 8. cap. 25.

Verum, cum fieri facillime posset, ob diversam temporum a diversis initam supputationem, ut Paschalis hujusmodi festivitas, licet ab omnibus Dominico quidem die, non uno tamen eodemque Dominico ab omnibus celebraretur, placuit eidemque sanctissimæ Synodo, id negotii Alexandrinis maxime Episcopis dare, (quod essent Ægyptii Mathematicarum rerum, ob Nili incrementa, peritissimi) ut, quo potissimum die singulis annis Pascha celebrandum esset, diligentissime investigarent, moxque investigatum Romano Pontifici per literas patefacerent, a quo universi deinde totius Ecclesiæ Episcopi redderentur certiores. Rem ita gestam narrat nobis beatissimus Pontifex Leo in Epistola

Stola 64. ad Martianum Augustum scribens:
*Paschale festum, quo sacramentum salutis humane
 maxime continetur, quamvis in primo semper men-
 se celebrandum sit; ita tamen est Lunaris cursus
 conditione mutabile, ut plerumque sacratissima die
 ambigua currat electio; & ex hoc fiat plerumque
 quod non licet, ut non simul omnis Ecclesia, quod
 nonnisi unum esse oportebat, observet; studuereque san-
 cti Patres. (Nicæni) occasionem hujus erroris aufer-
 re, omnem hanc curam Alexandrino Episcopo de-
 legantes, quoniam apud Ægyptios hujus supputatio-
 nis antiquitus tradita esse videbatur peritia, per
 quam qui annis singulis dies prædictæ solemnitatis
 eveniret, Sedi Apostolicæ indicaret; ut hujus scri-
 pti ad longinquiores Ecclesias judicium generaliter
 percurreret. Hactenus Leo.*

Sed ad tollendam omnem omnino hac de re
 dissensionem, stabiliendamque firmiter apud om-
 nes Paschalem hujusmodi Festivitatem, hoc am-
 plius constitutum invenio, ut futurum proxime
 cujuslibet anni Paschatis diem ab Alexandrino
 Episcopo hoc modo investigatum, ac Romano
 Pontifici patefactum, & ab hoc universis Epis-
 copis promulgatum, ipsi deinde Episcopi, in
 propria unusquisque Ecclesia, sacra Epiphanie-
 rum celebritate inter concionandum audienti po-
 polo denunciarent. Arque hoc est, quod ipso
 hujus Capituli initio probandum posueram. Age
 ergo, ritum hunc, antiquitatis tenebris invo-
 lutum, ac paucis cognitum, adhibito locuple-

tissimorum ac certissimorum Auctorum lumine, illustrare, quantum licet, experiamur. In Concilio Aurelianensi quarto A. D. 541. Canone 1. ita scriptum in hanc rem videas: *Placuit, ut sanctum Pascha secundum laterculum Victorii ab omnibus uno tempore celebretur: qua Festivitas annis singulis ab Episcopo Epiphaniarum die in Ecclesiis denuncietur.* Sed dilucidius Patres in Braccarenfi Concilio secundo congregati A. D. 572. *Postquam omnia* (Canonis 1x. verba sunt) *in Concilio Sacerdotum fuerint ordinata, superventurum ipsius anni Pascha, quota Calendarum die, vel quota Luna debeat suscipi, a Metropolitano Episcopo nunciatur: quod ceteri Episcopi, vel reliquus Clerus breviculo subnotantes, unusquisque in sua Ecclesia, adveniente natalis Domini die, astanti populo post Lectionem Evangelicam nunciet.*

Sed hæc, quæ modo dicta sunt ex Synodo Braccarenfi, itidem & ex Aurelianensi Concilio mox prolatis, & a me in ipsius Capituli summa ac initio positis, videri possunt repugnare: qui enim apte cohæreat Epiphaniarum dies cum natalis Domini celebritate? Verum hæc nulla est, quamvis aliqua esse primo aspectu videatur repugnantia. Sustuleris illam, si dicas, Epiphaniarum nomine priscis Ecclesiæ temporibus non adventum modo Magorum, Christi que baptismum; sed ipsum etiam Domini natalem fuisse signatum; quemadmodum ex Epiphania Hæresi 51. & Suida in verbo *Ἐπιφάνια*, haud magno

magno negotio intelligi potest: quod nimirum in iis omnibus Christus Dominus præbuerit sese mortalibus conspiciendum, propriæque Divinitatis ac præsentis expressa indicia ostenderit meminerique, & natalem Domini, & Magorum adventus, Christi baptismi solemnitatem non duobus distinctis diebus, ut est in perpetuo Ecclesiæ Romanæ usu, sed uno eodemque die a Græcis, Egyptum maxime incolentibus, fuisse antiquitus celebratam: id quod a Theophilo Alexandrino Episcopo in Proœmio Paschali Epistolatum, & Cassiano Collatione 10. cap. 2. memoriæ proditum est: ex quo etiam factum putò, ut hic unus dies fuerit: & *varijs* numero multitudinis a Græcis dictus, quod in eo uno & multiplex suæ præsentis ac Divinitatis signum dederit Christus, & plures agerentur ab Ecclesiâ celebritates.

Sed de Epiphaniarum nomine & festo hæc quidem nunc hætenus; quæ pro re pauca, pro tempore satis sunt. Itaque redeo ad institutum. Paschatis igitur cujuslibet anni diem (quod dicebamus) denunciatum olim fuisse Auditoribus inter concionandum, præter adductos ex Aurelianensi & Braccarensi Conciliis locos, satis meo judicio declarant Paschales Cyrilli Alexandrini Sermones, qui nunc primo ex Ambrosiana nostra Bibliotheca publicam aspexerunt lucem cum elegantissima doctissimi viri Antonii Salmatiz collegæ mei interpretatione. Hæc enim, præter-

quam quod hanc ipsam ob rem nomen invenire, habent etiam singuli sub finem Paschalis hujus Denunciationis formulam. Operæpretium autem puto subjicere ipsa Cyrilli verba ex uno aut etiam altero Sermone: Ita namque prorsus (ait in primo Sermone Cyrillus) purum Domino jejunium celebrabimus; inchoantes sanctam quidem Quadragesimam decima quinta Februarii mensis, hebdomadam vero salutaris Paschæ vigesima mensis Martii, solventes jejunia de more vigesima quinta ejusdem mensis. Festum porro diem Paschæ celebrantes illucescente deinceps Dominica die vigesima sexta ejusdem mensis Martii. In quarto autem ita scriptum est: Hoc namque pacto, cum Festos dies sancte peragemus, tum vero jejunium, ex quo bona omnia profisciscuntur, qua decet ratione, celebrabimus, inchoantes quidem sanctam Quadragesimam sexta & vigesima mensis Februarii; hebdomadam vero salutaris Paschæ Calendis Aprilis, solventes quidem jejunia, ut Evangelicis constitutionibus sanctum est, vespera Sabbati, sexta ejusdem mensis Aprilis. Festum vero diem Paschæ agentes illucescente deinceps Dominica die ejusdem mensis Aprilis septima. Hæc quidem uterque Cyrilli locus complectitur: eadem etiam variatis verbis paululum in reliquis Sermonibus iterata facillime cognoscet quicumque iis curiosum adjecerit oculum. Una & illud, intelligens harum rerum æstimator, parvo labore perspiciet, quemadmodum, Pascharis diem, ita etiam initium Qua-

Quadragesimæ fuisse olim inter concionandum audienti populo denunciatum.

Forſitan erunt hoc loco, qui exiſtiment, ad hujus moris confirmationem pertinere, quæ de Dionyſio Alexandrino Epifcopo, inſigni Origēnis auditore, memoriæ prodidit Eufebius in Hiſtoria Eccleſiaſt. lib. 7. cap. 15. & ex eo beatus Hieronymus in lib. de Illuſtribus Eccleſiæ Scrip- toribus cap. 69. Apud illum enim ſcriptum eſt: *Dionyſius, præter Epifto- las a nobis ante citatas, alias eodem tempore ~~ἱεραγικὰς~~ Orationes, quæ Feſti Paſ- chatis laudes plenius uberiusque continent, inſtituit.* Alter vero: *Eſt & ejus ad Didymum altera Epi- ſtola: & ~~ἱεραγικαὶ~~ de Paſcha plurimæ, declamato- rio Sermone conſcriptæ, &c.* Sed hoc, quantum judico ipſe, non eſt, ut recte fieri poſſit: ete- nim ab utroque dilucide planeque hæc Diony- ſii ~~ἱεραγικὰς~~, Epifto- larum ſemper, numquam Concionum nomine, appellari ſcimus. Mihi ta- men accuratius cogitanti quiddam occurrit, quamobrem non omnino improbabilis videatur ea opinio. Quæ in mentem venerunt, ſunt hæc. Conciones nimirum proprie fuiſſe has Dionyſii ~~ἱεραγικὰς~~, & ad præſentem populum habitas, in cuiusque etiam Paſcha vere denunciatum; ſed Epi- ſto- larum deinde nomen fortitas, quod habitæ jam illæ coram populo, poſtmodum per Epifto- las, hoc eſt, in Epifto- larum figuram habitumque formatæ, ad abſentes mitti conſueviſſent, ut ſcilicet omnibus pervulgatus & cognitus eſſet proxime futurus

Pa-

Paschalis celebritatis dies . Id quod ita contigisse, Alexandrini Cyrilli verba, quæ in Paschalis 22. Sermonis Prologo habentur, non obscure declarant: *Haud nos sane (ait Cyrillus) eloquentiæ ostentanda studio Oratiunculam hanc sive Epistolam dedimus, sed vetere instituto ad id rursum vocati sumus. Etenim, si umquam alias, certe hoc tempore, celebritatem advenientem, facta lucis instar denunciatione, indicari consentaneum fuit. Ex quibus Cyrilli verbis, Sermonem hunc, Orationis primo, postea Epistolæ appellatione fuisse nominatum, perspicue intelligitur: quod nimirum habitus is quidem fuisset de suggestu coram populo, sed in Epistolæ deinde formam ad eos missus, qui Concioni nequaquam interfuerant: idque verbum etiam illud (dedimus) aperitissime convincit. In Cassiani quoque Collatione 10. cap. 2. hoc idem subobscurè significari puto; cum sit inibi scriptum in hunc fere modum: *Intra Ægypti regionem mos iste antiqua traditione servatur, ut peracto Epiphaniorum die, quem Provincia illius Sacerdotes vel Dominici Baptismi, vel secundum carnem Nativitatis esse definiunt; & idcirco utriusque Sacramenti solemnitatem, non bifarie, ut in Occidentis Provinciis, sed sub una diei hujus festivitate concelebrant. Epistolæ Pontificis Alexandrini per universas dirigantur Ægypti Ecclesias, quibus & initium Quadragesimæ, & dies Paschæ, non solum per civitates omnes, sed etiam per universa monasteria designentur. Secundum hunc igitur**

igitur morem post dies admodum paucos, Theophili prædictæ urbis Episcopi solennes Epistolæ commearunt, &c. Hæc Cassianus, qui cum Pontificis Alexandrini Paschales Epistolas, non nisi peracto Epiphaniarum die, per universas Ægypti Ecclesias mitti consuevisse narret, indicat etiam, meo iudicio, in ipsa quidem Epiphaniarum celebritate intra Concionem denunciatum Pascha audienti populo, consequenti autem die ipsammet Concionem, in Epistolæ habitum formatam ad illos missam, qui concionantem Episcopum ac Pascha denunciantem præsentem audire non potuerant.

Morem porro publice denunciandi Paschatis sacro Epiphaniarum die Ecclesia nostra Mediolanensis hodie adhuc retinet. Siquidem eo die inter Missarum Solemnia, post recitatum Evangelium, Diaconus futurum proxime Paschatis diem populo in hæc verba annunciat: *Noverit Caritas vestra, Fratres carissimi, quod annuente Dei & Domini nostri Jesu Christi misericordia, Die N. mensis N. Pascha Domini cum gaudio celebrabimus. Extatque de eo Decretum in 9. Synodo Diocesana his verbis: Archidiaconi Metropolitana nostra Ecclesiæ sit, in Epiphania solemnitate Paschæ celebritatem denunciare.*

CAPUT XXVI.

Collectæ nomen multiplex. Ecclesia & nascens & adulta, ad sublevandam tenuiorum inopiam, Collectas indixit. Dominica maxime dies huic rei destinata. Nova pauperum necessitate emergente, novæ indictæ ab Episcopo Collectæ. Gazophylacia ad illas reconducendas in singulis Ecclesiis constituta: appellata ea interdum Arcæ nomine, interdum Corbonæ, aliquando etiam Mensæ. Collectæ pecuniæ distributor Præpositus dictus, Probatus Senior, & Præsiciens Denunciati olim Auditoribus ac indicti inter concionandum dies, in quibus fieri hujusmodi Collectæ debebant.

CUm nobis agendum sit de denunciatione Elemosynarum, quæ inter concionandum fiebat, prius de earum nominibus aliquid dicendum, ac primo de Collecta. Quid olim ea fuerit, quo modo, a quibus, & in quem usum indicta & facta.

Collectæ nomen multiplex fuit. Interdum pro hominum coetu ac congregatione positum
repe-

reperio Levitici capite xxiii. Deuteronomii cap. xvi. Paralipomen. lib. ii. cap. vii. ad Hebræos cap. x. & apud beatum Hieronymum in Epitaphio Paulæ. Aliquando pro Missa, ut apud Tertullianum libro de Fuga & Persecutione, beatum Augustinum in Breviculo Collationis tertii diei, Cassiodorum in Tripartita lib. 7. cap. 32. & lib. 9. cap. 38. eo quod ad illam colligeretur populus. Sæpe pro precibus ac orationibus, sive quod dicerentur populo congregato ac collecto, ut volunt Alcuinus lib. de Divinis Officiis cap. de Celebratione Missæ, & Hugo de Sancto Victore lib. 2. de Officiis cap. 16. sive quod Sacerdos, legatione fungens ad Deum pro populo, omnium petitiones ac orationes compendiosa brevitate colligeret, & hac oratione concluderet, ut tradunt Innocentius lib. 2. cap. 27. Vualfridus cap. 22. & Micrologus cap. 3. Non raro tamen Eleemosynas significat, hoc est, pecuniam in pauperum usum corrogatam ac collectam: in quem ego sensum nunc cum multis aliis accipio Collectæ nomen.

Ad sublevandam itaque tenniorum inopiam consuevit nascens Ecclesia hujusmodi Collectas imperare. Sic legimus Actuum Apostolorum cap. xi. Antiochenos Christianos (hæc autem prima fuit in Ecclesia ad pauperum usum facta Collecta) pecunias collegisse, easque, famis subsidium, Jerosolymam perferendas Barnabæ & Saulo tradidisse. *Surgens* (ait Lucas) *unus no-*
mine

mine Agabus significabat per spiritum famen magnam futuram in universo orbe terrarum, quæ facta est sub Claudio. Discipuli autem, prout quisque habebat, proposuerunt singuli in ministerium mittere habitantibus in Judæa Fratribus: quod & fecerunt, mittentes ad Seniores per manus Barnabæ & Sauli. Ipsum quoque Paulum non semel hoc idem fecitasse ostendit locus hic ex ejus prima ad Corinthios Epistola cap. xvi. in quo est: De Collectis autem, quæ sunt in Sanctos, sicut ordinavi Ecclesiis Galatiæ, ita & vos facite: per unam Sabbati unusquisque vestrum apud se seponat recondens quod ei bene placuerit. Ab Auctore etiam Constitutionum Apostolicarum in 5. libro cap. 8. consuetudinis hujus mentionem factam video, quem locum, ut insciis notum faciam, illinc assumptum; totidem verbis hic subjicio; est autem sic: Pecuniam coactam dispensate, conferentes eam in ministerium redimendi Sanctos, ut liberetis servos, captivos, in vincula coniectos, calumniam oppressos, damnatos a Tyrannis ad monomachiam, aut ad mortem propter nomen Domini. Sed & adulta Ecclesia introductam ab Apostolis consuetudinem & libenter excepit & tenuit religiose. Adducor ut ita credam, primo quidem verbis Justinii Philosophi ac Martyris ex extrema ad Antoninum Pium Apologia sic habentibus: Ceterum qui copiosiores sunt, & volunt, pro arbitrio quisque suo, quod visum est, contribunt: & quod ita colligitur, apud Prepositum de-

ponitur; atque inde ille opitulatur pupillis. & viduis, & his, qui propter morbum, aut aliquam aliam causam egent; quique in vinculis sunt, & peregre advenientibus hospitis, & ut simpliciter dicam, indigentium is omnium curator est. Ad hæc Terrulliani gravi auctoritate, Apologerici capite 39. ita harrantis: Modicam unusquisque stipem mensura die, vel cum velit, & si modo velit, & si modo possit, apponit: nam nemo compellitur, sed sponte confert. Hæc quasi deposita pietatis sunt; nam inde non epulis, nec potaculis, nec ingratis voracibus dispensatur, sed egenis atendis, humandisque, & pueris ac puellis, re ac parentibus destitutis: itemque domesticis senibus, item naufragis, & si qui in metallis, & si qui in insulis, vel in custodiis, dumtaxat ex causa Dei sectæ, alumni confessionis suæ sunt. Est insuper, quod ad hanc rem omnino pertineat ex Libro adversus Vigilantium beatissimi Hieronymi testimonium in hæc verba: Ego hoc loquor, quod beatus Apostolus incunctis pæne Epistolis suis loquitur, & præcipit in Ecclesiis Gentium; per Unam Sabbati, hoc est, in die Dominico, omnes conferre debere, quæ Ierosolymam in Sanctorum solatia dirigantur: & vel per discipulos suos, vel per quos ipsi probaverint, & si dignum fuerit, ipse aut dirigat, aut perferat, quod collectum est. Et paulo post: Longum est nunc, si de cunctis Epistolis ejus omnia testimonia revolvere voluero, in quibus hoc ait, & tota mente festinat, ut Ierosolymam & ad sancta

sancta loca credentibus pecuniæ dirigantur; non in avaritiam, sed in refrigerium; non ad divitias congregandas, sed ad imbecillitatem corpusculi sustentandam, & frigus atque inediã declinandam. Hac in Judæa usque hodie perseverante consuetudine, non solum apud nos, sed & apud Hebræos, ut qui in lege Domini meditantur die ac nocte, & partem non habent in terra, nisi solum Deum, Synagogarum & totius orbis foveantur ministeriis, ex æqualitate dumtaxat, non ut aliis sit refrigerium, & aliis sit tribulatio, sed ut aliorum abundantia aliorum sustentet inopiam. Cognoscitur etiam hoc idem manifeste ex iis beati Leonis Papæ Sermonibus, quos plures de Collectis habitos nemo nescit. Beatus autem Chrysostomus hanc consuetudinem Antiochiæ paulatim abrogari cernens, eam accuratius restitui curavit, insignem illam habens Orationem de Eleemosyna & Colatione, in qua præter cetera meminit expresse Gazophylaciorum in Ecclesiis ex prisco usu constitutorum, in quibus collectæ hujusmodi pecuniæ conderentur.

Ista quidem sunt de Collectarum in pauperum usum consuetudine veterum Patrum testimonia: in quibus duo præcipue debent animadverti, his, quæ nunc scribimus, minime inutilia. Unum, Dominicam maxime, diem fuisse huic rei a Majoribus præfinitam: per Unam enim Sabbati, quam dixit beatus Paulus citato primæ ad Corinthios Epist. cap. xvi. intelligi debere

debere Dominicam diem testantur disertis verbis ad eundem Pauli locum Ambrosius, Augustinus, Chrysostomus, Theophylactus, & Oecumenius, nec non & Hieronymus adducto paulo ante adversus Vigilantium loco, & Epistola ad Hedibiam, Quæstione quarta: interpretationem omnes ex Hebraismo elicientes, quod nimirum solerent Hebræi Unum, pro Primo, usurpare: per Sabbatum autem, Hebdomadam significari ex eo liquet, quod Hebdomadæ dies, ipsasque Hebdomadas solerent Judæi a Sabbato, velut a præcipuo die, in Sabbatum sequens numerare; ita ut Unam Sabbati, sive Primam post Sabbatum cum dicimus, perinde sit, ac si Dominicam diem diceremus. Alterum, quod erat animadvertendum, illud est, constitui olim solita in Ecclesiis Gazophylacia, in quibus corrogatæ ac collectæ hujusmodi pecuniæ reconderentur.

Forſitan hoc loco quærat aliquis, cum Dominicam diem faciendæ Collectæ ex Apostolorum instituto adſignatam dixerimus, an illud ſit de utraque Dominica die intelligendum. Equidem non auiſim ego id affirmare, cum indicare videatur Tertullianus, ſemel dumtaxat in menſe fieri ſolitas huiusmodi Collectas; inquit enim citato Apologetici cap. 39. *Modicam unusquisque ſtipem menſtrua die, vel cum velit, & ſi modo velit, & ſi modo poſſit, apponit.* Illud indubitanter aſſeverabo, procedente tempore,

H non

non Dominicis dumtaxat diebus, sed inter Hebdomadam etiam non raro factas hujusmodi Collectas; etenim sanctissimus Leo Papa & de Secunda Feria huic rei assignata mentionem facit Sermone 2. de Collectis, & de Tertia Sermone 3. & de Quarta Sermone 4. & de Sabbato Sermone de Collectarum die: cujus ipsa verba extremo hoc Capite adscribam.

Quin etiam, si quæ nova necessitate emergeret, cui consueta Dominicæ diei non sufficeret pecuniæ collectio, tunc Episcopus, nulla temporis, aut diei, habita ratione; novam indicabat: quemadmodum pro Christianorum a Barbaris captorum redemptione factitasse beatum Cyprianum, ejusque exemplo ceteros in Africa Episcopos, discimus ex ejus Epistola 60. ad Januarium, Maximum, aliosque Numidiæ Episcopos data.

Cur autem fuerit Dominica potissimum dies huic rei assignata, nullam aliam puto commodiorem adferri posse rationem, quam quæ a beato Chrysostomo citata Oratione de Eleemosyna & Collatione redditur. Ejus verba, quoniam hic apte conveniunt, recitabo libenter: *Quamobrem hunc diem (loquitur de Dominica) oblationi deputat? Cur non dixit, Secunda Sabbatorum, vel Tertia Sabbatorum, vel aliis Sabbatis? Profecto nec hoc temere, nec absque causa dictum, nam & a temporis opportunitate ansam capit, quod alacriores reddat offerentes. Et quid commodi habet*

bet ejus dici tempus, quo facilius detur Eleemosyna? Ecce, quoniam tum a labore omni cessatur, atque relatione & scriis alacrior sit animus. Et, quod multo majus est, innumeris eo die bonis potiti sumus. Nam eo die destructus est infernus, extinctum maledictum, disparuit peccatum, confractæ inferorum portæ, captivus factus est Diabolus, diuturnum bellum direptum, conciliati Dea homines, nostrumque genus ad pristinam, immo ad majorem rediit dignitatem; viditque sol inopinatum & admirabile illud spectaculum, quod homo factus est immortalis. Hac omnia volens ipse nobis in memorem iam referre, diem illum in medium attulit, ipsum in advocatum assumens, qui unicuique diceret. Cogita homo, quanta & qualia bona accepisti hoc die, quantis malis es liberatus: qualis eras antea, qualis postea factus es. Jam si nos Natalitia celebramus, & multi libertorum etiam eos dies, in quibus libertate donati sunt, in magno habent honore, ita ut alii, venerando tempus, convivium faciant, alii multa munera largiantur; quanto magis nobis dies ille observandus, quem si quis Natalitium totius humanæ naturæ appellet, haud aberraverit. Perditi enim eramus, & inventi sumus; mortui eramus, & reviximus; inimici eramus, & reconciliati sumus: spirituali autem honore, inquam, hunc diem venerari oportet, non convivando, non vinum profundendo, non ebrietati choreisque vacando; sed indigentes fratres liberalitate facili juvando, &c. Hactenus Chrysostomus.

Gazophylacia porro, quæ ex Patrum auctoritate diximus in singulis Ecclesiis ad collectam pecuniam recondendam solita olim constitui, varia apud Ecclesiasticos Scriptores sortita sunt appellationes. *Arca* quidem nomine a Tertuliano Apologetici cap. 39. fuerunt appellata: *Corbona* a B. Cypriano lib. de Opere & Eleemosynis: & a B. Paulino *Mensa* Epistola 32. Neque vero nostram hanc de Gazophylaciorum consuetudine opinionem evertunt adducta superius Justinii Martyris verba, quibus adfirmat, collectam huiusmodi pecuniam apud Præpositum deponi consuevisse: non enim de collectæ pecuniæ repositione sunt illa accipienda, sed de ejus in pauperum usum distributione: collecta siquidem, in Gazophylacio mox recondebatur; in egenos vero distribuenda, Præposito referabatur. Quem autem hic ~~episcopus~~ Præpositum appellat Justinus, *Probatum Seniore*m dixit Tertullianus, & *Præsentem* sanctus Leo Sermone de Collectarum die.

Et hæc erant fere de Collectarum nomine, origine, ac usu, quæ paucis ac summatim dicemus. Nunc ad id aggredior demonstrandum, quod antea proposui, & cujus gratia superior omnis oratio habita est: id vero erat, denunciatio olim Auditoribus ac indictos inter concionandum huiusmodi Collectarum dies. Id quod non semel, neque uno in loco planissime confirmari scimus a beatissimo Papa Leone apud quem
in

in primo de Collectis Sermone ita scriptum legas: *Ventura igitur Dominica dies, Collectarum futura est. Hortor & moneo Sanctitatem vestram, ut singuli quique & pauperum memineritis, & vestri; & pro possibilitate virium vestrarum intel- ligatis in egentibus Christum, qui tantum nobis pauperes commendavit, ut se in ipsis vestiri ac sus- cipi testaretur. Et in secundo Sermone eadem his verbis repetite: Proinde, Dilectissimi, in se- cundam Feriam spontaneas Collectas vestras sollici- te praparete, ut quidquid vobis de temporalibus substantiis dempseritis, id multiplicatum in ater- na retributione sumatis. Et in sermone 3. Quo- niam ad destruendas antiqui hostis insidias, in die quo impii sub Idolorum suorum nomine Diabolo serviebant, providentissime in sancta Ecclesia pri- ma est instituta Collectio, volumus Dilectionem vestram tertia Feria omnes Regionum vestrarum Ec- clesias cum voluntariis oblationibus Eleemosynarum convenire. Et in 4. longe manifestius: Ad ho- rum operum, Dilectissimi, piam curam dies nos Apo- stolica institutionis invitat, in quo sanctarum Collectio- num prima collectio est prudenter a Patribus & uti- liter ordinata; ut, quia in hoc tempore gentilis quon- dam populus superstitiosius Daemonibus serviebat, contra prophanas hostias impiorum, sacratissima a no- bis nostrarum Eleemosynarum celebraretur oblatio: quod, quia incrementis Ecclesie fructuosissimum fuit, placuit esse perpetuum. Unde hortamur Sanctitatem vestram, ut per Ecclesias Regionum vestrarum quar-*

ta Feria de facultatibus vestris, quantum suadet
possibilitas ac voluntas expensas misericordiae con-
feratis, ut possitis illam beatitudinem promereri, in
qua sine fine gaudebit qui intelligit super egenum
& pauperem. Et in Sermone 5. Quia die Do-
minica prima est futura Collectio, omnes vos devotio-
ni voluntariae preparate, ut unusquisque secundum
sufficientiam habeat in sacratissima oblatione confor-
tium. In Sermone demum de Collectarum
die: Providenter, (ait) Dilectissimi a sanctis Pa-
tribus pieque dispositum est, ut in diversis tempo-
ribus quidam essent dies, qui devotionem fidelis po-
puli ad Collationem publicam provocarent. Et
quia ad Ecclesiam maxime ab unoquoque opem qua-
rentem decurritur, fieret ex possibilitate multorum vo-
luntaria & sancta Collectio, quae per Praesidentium
curam necessariis serviret expensis: ad cuius operis
desideratum vobis, ut credimus, fructum dies vos
vicinus invitat, accedentibus admonitionibus nostris,
ut ad Ecclesias Regionum vestrarum Sabbato proxi-
me futuro misericordiae munera deferatis.

CAPUT XXVII.

Privatæ etiam ac singulares Eleemosynæ antiquitus inter concionandum indictæ ac collectæ: Et tunc maxime, cum maximi erant Auditorum concursus. Regii opinio refutata, aut saltem illustrata. Hæc indicendæ Eleemosynæ consuetudo a voluntaria oblatione, in nascentis Ecclesiæ Synaxi fieri solita, tamquam a capite arcessenda.

DEnunclatos olim inter concionandum publicos ac communes Collectarum dies, jam perspicue liquet. Sed & privatam ac singularem Eleemosynam, antiquitus etiam, quemadmodum nunc fit in tota præne Italia, atque alibi, indictam interdum ac collectam inter Concionem, quoniam quidem non satis illustrarunt, qui res ejusmodi solummodo delibant, nos ex Augustino & Chrysostomo notum faciamus. *Date ergo pauperibus;* (inquit Augustinus Sermone v. de verbis Domini in Evangelium secutum Matthæum) *rogo, moneo, precipio, jubeo, Quidquid vultis, date pauperibus. Non enim occultabo caritati vestræ, quare hunc sermonem necesse habui vobis præmere. Ex quo hic sumus eun-*

tes ad Ecclesiam & redeuntes, pauperes interpellant nos, & dicunt, ut dicamus vobis, ut aliquid accipiant a vobis. Nos monuerunt loqui vobis, & cum se vident non accipere a vobis, inaniter arbitrantur nos laborare in vobis. Expectant aliquid & a nobis; damus, sicut possumus. Numquid tamen ad eorum necessitatem implendam idonei sumus? Quia ergo ad eorum necessitatem implendam idonei non sumus, vel ad vos Legati ipsorum sumus. Audistis, laudastis, Deo gratias. Et in Sermone 40. de verbis Domini in Evangelium secundum Joannem. Omnia; etsi breviter, ut potui, exposui caritati vestrae; erogavi, quod ad me pertinet; quod autem ad vos pertinet, pauperes cogitate, &c. Est & aliud in Epistola 215. ejusdem Augustini, testimonium, quod, quia ritum hunc dilucide exprimit, totum libentissime adscribam. Cum Frater noster Fastius debito decem & septem solidorum ab oppignoratoribusurgeretur, ut redderet; quod ad praesens, unde explicaret se, non inveniebat; ne corporalem pateretur injuriam, ad auxilium sanctae Ecclesiae convolvit; illi etiam exactores, cum proficisci cogerentur, & ideo dilationem dare non possent, gravissimis me querelis oneraverunt, ita ut eis ibi traderem; aut, quod sibi deberi ostendebant, unde acciperent, providerem. Cumque obiulissem Fastio, ut vestram sanctitatem de necessitatibus ejus alloquerer, pudore deterritus, ne facerem, deprecatus est. Ita ego majore necessitate coarctatus, a Fratre nostro Ma-

cedonio

cedonio decem & septem solidos accepi; quos in causam ejus continuo dedi; promittente illo, quod ad certum diem, cum eis reddendis posset occurrere, occurreret: & consentiente, ut, si non posset occurrere, sermo de illo fieret ad vestram misericordiam, quam fraternam Fratribus exhibere consuevistis. Nunc ergo, quoniam absens est, restat, ut subveniatis, non illi, quem nemo compellat absentem, sed pollicitationi meæ, cujus existimatio semper vobis est præsens. Jam enim dies, ad quem se promiserat occursurum, translatus est, & ego ei, qui solidos suos fidei meæ comisit, quid respondeam, non invenio, nisi ut faciam, quod me facturum esse promisi. Sed quoniam non sum de hac re commotus, ut die Pentecostes, quando aderat major vestra frequentia, sermonem inde facerem, peto, ut has litteras pro lingua mea præsente habere dignemini. Et paulo post: Quoniam erga domesticus fidei est, Christianus fidelis, Catholicus frater noster, pro cuius supplenda necessitate vos peto, ut faciatis quod Dominus imperat, sine tristitia, sine murmuratione, & cum letitia & hilaritate facite: Deo enim trebitis; non homini; quia ille promittit, vos nihil eorum, quæ misericorditer facitis, perdituros, seu in illo die, cum usuris immortalibus recepturos. Hæc sunt Augustini verba, ex quibus dilucide constat, ob id etiam solitam aliquando indici interconcionandum Eleemosynam, ut ære alieno obstricti liberarentur. Simul & illud elucet, tum maxime indictam, cum majores essent

essent Auditorum concursus. A beato quoque Chrysostomo in Sermone de Eleemosyna & Colatione in Sanctos hujus moris mentio facta est his verbis: *Exsurrexi hodie functurus apud vos legatione quadam, justa, utilis ac honesta, non alterius cujuscumque, quam pauperum nomine, qui vestram hanc inhabitant civitatem. Hi mihi hanc provinciam injunxerunt, non sermonibus, nec communis consilii suffragiis & sententia, sed miserabilibus acerbissimisque suis spectaculis. Nam cum ad vestrum hunc conventum festinans, per forum & angiportus transire, videremque in mediis viris jacere multos, quorum alii absecta manus, alii exoculati, alii ulceribus pleni, & incurabiles, ac protendentes eas partes, quas utpote tabidas, potissimum necessarium erat, contingerent; extrema inhumanitatis esse duxi, si apud caritatem vestram de his non differerem. Eapropter, quia pluribus habent opus, nos saltem manus porrigamus, non jam mercedem, sed eleemosynam daturas.*

Quapropter, minime solitam olim colligi inter concionandum eleemosynam, asserere, quod scriptum ab eruditissimo Regio Christiani Oratoris Auctore video, non sine errore potest; quem si nihil aliud, allata certe Chrysostomi atque Augustini testimonia plane coarguunt: nisi forte dicere velimus, loquutum eum de nascente, non de adulta Ecclesia: quæ quidem interpretatio, etiamsi vera sit, non tamen necessaria videtur.

Cete-

- Ceterum inditendæ inter concionandum elemosynæ consuetudinem, qui a voluntaria oblatione, in nascentis Ecclesiæ Missis fieri solita, tamquam a capite arcessendam opinabitur, meo quidem animo, is a vero haud aberravit: præsertim, cum juxta antiquissimum Ecclesiæ ritum solereut ut plurimum Conciones post Evangelii recitationem, inter Missæ solemniam factam, haberi: id quod infra suo loco docebimus.

CAPUT XXVIII.

Antiquissimus in Ecclesia Vigiliarum usus. Ejus nominis origo. Jejunia fere semper cum Vigiliis conjuncta. Denunciata olim inter concionandum stata Vigiliarum ac Jejuniorum tempora. Allata ejus Denunciationis formula.

DE Vigiliis, ac Jejniis, multe occurrunt hoc loco eruditæ quæstiones, a bonis Auditoribus, non veteribus modo, verum etiam recentibus, propositæ magis, quam serio tractatæ: quarum nodos si quis expedierit, is, ut mea fere opinio, nec operam iuserit, & ab iis gratiam inierit, qui veri cognoscendi studio ducuntur. Sed nos illas relinquamus, alibi accuratius

curatius considerandas, si, quod spero, erit otium: neque enim instituti nostri est, quodcumque dignum cognitu inciderit, id omne velle perscrutari, & aucupari nimium diligenter. Tantum adnotari cupio in præsentia, antiquissimum fuisse in Ecclesia Vigiliarum usum & observationem. Conveniebat enim veteres Christiani, vel ipso Plinio teste lib. 10. epist. 97. ad Trajanum scribente, (ut Tertullianum, Arnobium Eusebium, & alios Scriptores Ecclesiasticos reticeam) certo tempore ac loco, non interdiu solum, verum etiam noctū, ad præcandū Deū, sacros Hymnos canendos, & alia pietatis munia obeunda: qui quidem nocturni conventus, quod in iis pervigilaretur, Vigiliarum nomen invenere. Cum hisce porro Vigiliis erant fere semper Jejunia conjuncta: id quod vel ex eo facile colligas, quod apud beatū Paulum ubicumque ferme de Vigiliis mentio habetur, Jejunia quoque adjiciuntur.

Agēs ergo, nos etiam Vigiliis Jejunia jungentes, doceamus, denunciata olim inter concionandum statā, hujusmodi Vigiliarum ac Jejuniorum tempora. Doctissimum, antiquissimumque Ecclesiæ Patrem hujusce consuetudinis testem produco; is vero est Leo Magnus Papa, in cujus Sermone 2. de Jejunio decimi mensis & Collectis hæc leguntur: *Quod temporis ratio, & devotionis nostræ consuetudo, pastoralis vobis, Dilectissimi, sollicitudine prædicamus, decimi mensis*

*mensis celebrandum esse Jejunium. Quarta igitur
 & sexta FERIA jejunemus. Sabbato autem apud
 beatum Petrum Apostolum pariter vigilemus. Of-
 ferunt mihi sese præter superiorem alii ejusdem
 Leonis loci, quos aspernari ac rejicere nullo
 modo debeo, quoniam, quem nunc illustran-
 dum suscepi, morem planissime confirmant.
 His, Dilectissimi, (inquit in Sermone 4. de Je-
 junio septimi mensis) ad profectum vestrum pro
 temporis occasione perstrictis, Jejunium vobis septi-
 mi mensis indicimus, in quo vos non solum de ci-
 borum abstinentia, sed etiam de pietatis operibus
 commonemus; ut, quod vestris usibus religiosa par-
 citate subtrahitis, in alimoniam pauperum & in
 cibos debiliū transferatis, &c. Quarta igitur &
 sexta FERIA jejunemus; Sabbato vero apud beatif-
 simum Petrum Apostolum Vigiliās celebremus. Ser-
 mone primo de Jejunio decimi mensis & Collectis:
 Quarta igitur & sexta FERIA jejunemus; Sab-
 bato autem apud beatissimum Apostolum Petrum Vi-
 giliās celebremus. Sermone 4. Hac itaque ut,
 adjuvante Deo, pia devotione curentur, quarta &
 sexta FERIA jejunemus; Sabbato vero apud beatum
 Petrum Apostolum Vigiliās celebremus. Quod idem
 iisdem pæne verbis apud eundem scriptum vi-
 deas Sermone 5. 6. 7. & 8. de Jejunio decimi men-
 sis & Collectis. Item Sermone 4. de Quadrage-
 sima. Sermone primo & 2. de Jejunio Pente-
 costes. Nec non & Sermone 1. 3. 4. 7. & 9.
 de Jejunio septimi mensis. Atque hæc quidem
 Leonis*

Leonis superiora docent planissime, olim inter concionandum denunciata simul stata & Jejuniorum & Vigiliarum tempora: quæ vero mox suggeram ex Augustino, & eodem Leone, id ipsum de Jejuniorum dumtaxat diebus luculenter patefaciunt: ita enim apud Augustinum in Ser-mone 60. de Tempore scriptum legitur: *Publice Jejunium indicimus, & vidente toto populo pariter cum ipso jejunamus.* Leo vero in Sermone de decimi mensis Jejunio: *Hac ergo ratione, Dilectissimi, evidenter instructi Ecclesiasticis Regulis Jejunium decimi mensis adjungimus, idque devotioni vestræ, sicut est moris, indicimus, quoniam plenum pietatis, plenumque justitiæ est, ut terrenorum fructuum perceptione conclusa agantur Deo gratiæ.* Qui certe locus ad id, quod proposui, facit, si quidquam: nihil enim dubitationis relinquit, cum in eo fateatur aperte Leo, id se communi ac usitato more facere.

Ex allatis porro Leonis locis illud etiam verissime discimus: Qua potissimum verborum Formula solerent stata hujusmodi Jejuniorum ac Vigiliarum tempora denunciari: id quod ex Ordine quoque Romano cognoscitur manifeste, in quo ita est: *Annua nobis est, Dilectissimi, Jejuniorum celebranda festivitas, quam mensis decimi solemnis cursus indicit. Quarta ergo & sexta Feria succedente, solitis eandem conventibus exequamur. Sabbatorum die hic sacras acturi Vigiliis, ut per observantiam competentem Domino, purificatis*

catibus mentibus, supplicantes, beatissimo Petro Apostolo suffragante, a presentibus periculis erui mereamur, pariter & futuris. Et alibi: Hac hebdomada nobis mensis illius recensenda sunt Jejunia: quapropter fidem vestrae dilectionis hortamur, ut eadem quarta & sexta Feria solitis processionibus exequentes, Sabbatorum diem Vigiliis solemnibus expleamus; quatenus, Apostolis suffragantibus meritis, propitiationem Dei nostri perseverantia debite servitutis obtineat. Et iterum: In anniversarii, Fratres carissimi, Jejunii puritate, qua & corporis acquiritur & animae sanctitas, nos commonet illius mensis instaurata devotio. Quarta ergo & sexta Feria solito convenientes occursum offeramus Deo spirituale Jejunium. Die vero Sabbati apud beatum Petrum, cujus nos intercessionibus credimus adjuvandos, sanctas Vigiliis Christiana pietate celebremus, ut per hanc institutionem salutiferam peccatorum sordes, quas corporis fragilitate contraximus, Jejuniis & Eleemosynis abluamus, &c.

CAPUT XXIX.

*Indictum inter concionandum Audit-
ribus, ut patefacerent, si quos
novissent, Hereticos.*

AC ne illud quidem alienum est demonstra-
re, indictum aliquando inter concionan-
dum,

dum; ac imperatum Auditoribus, ut patefacerent, in iudiciumque proferent, si quos novissent, Hæreticos. Atque hoc ita se habuisse, in Sermonem 4. de Collectis, his verbis docuit beatus Ieo: *Ut autem, Dilectissimi, placeat Domino vestra devotio, etiam ad hanc vos hortamur industriam, ut Manichæos, ubicumque latentes, vestris Presbyteris publicetis. Magna est enim pietas prodere latebras impiorum, & ipsum in eis, cui serviunt, Diabolum bellare. Contra istos enim, Dilectissimi, omnem quidem orbem terrarum, & totam ubique Ecclesiam decet fidei arma arripere. Sed vestra in hoc opere devotio debet excellere, qui in progenitoribus vestris Evangelium crucis Christi ab ipso beatissimorum Apostolorum Petri & Pauli ore didicistis. Non sinantur latere homines, qui legem per Moysen datam, in qua Deus universitatis conditor ostenditur, recipiendam esse non credant. Et aliquando post: Cavendi sunt, ne cuiquam noceant; prodendi sunt, ne in aliqua civitatis nostræ parte consistant. Vobis, Dilectissimi, ante tribunal Christi proderit, quod indicimus, quod rogamus. Habemus & huic loco haud dissimilem alium ejusdem Leonis in Sermonem 5. de Jejunio decimi mensis, quem producere mihi non erit ingratum, vobis legere: Illud quoque vos, Dilectissimi, obsecrans moneo, ut si cui vestrum innotuerit, ubi habitent, (loquitur de Manichæis) ubi doceant, quos frequentent, & in quorum societate requiescant, nostræ sollicitudini*

dini fideliter indicetis; quia parum prodest unicuique, quod, protegente Spiritu Sancto, ab istis ipse non capitur, si, cum alios capi intelligit, non movetur. Contra communes hostes pro salute communi una communis debet esse vigilantia, ne de alicujus membri vulnere etiam alia possint membra corrumpi: & qui tales non prodendos putant, in judicio Christi inveniantur rei de silentio, etiamsi non contaminentur assensu. Assumite igitur religiosa sollicitudinis pium zelum, & contra sevisimos animarum hostes omnium fidelium cura consurgat. Ideoque enim misericors Deus quamdam nobis partem prodidit hominum noxiorum, ut manifestato periculo excitaretur diligentia cautionis. Non sufficiat quod actum est, sed eadem inquisitio perseveret, &c.



CAPUT XXX.

Miracula, si quæ recens accidissent, inter concionandum vel a Concinatore memoriter, vel de scripto a Lectore ad Auditores relata. Qui ope ac deprecationibus Sancti alicujus vel ex morbo convaluerant, vel impendens aliquod grave periculum, præsentemque calamitatem evaserant, ii Libellos Episcopo dabant in Ecclesia publice recitandos, qui & morbis eriem, & restitutionem salutis, & imminentis urgentisque mali declinationem continerent, nec non etiam illius Sancti nomen, qui se pro eis deprecatores præbuerat. Hosce Libellos Episcopo datos Lector deinde, vel proxime ante Concionem, vel sub ejus finem publice recitabat. Post recitados hujusmodi Libellos, ii ipsi, qui fuerant ad sanitatem reducti, proponantur interdum in Ecclesia, palamque in oculis omnium collocantur.

ET quoniam omnia persequimur, quæ olim inter concionandum aut denunciari, aut pro-

promulgari solebant, dicendum est etiam, si quod recens accidisset miraculum, id intra Concionem vel a Concionatore memoriter, vel de scripto a Lectore fuisse ad Auditores relatum. Ac ne quis causæ meæ inservire me credat, idoneisque destitutum testimoniis hæc proferre, ea sigillatim asseram.

De miraculis ergo a Concionatore memoriter inter concionandum populo recitatis, apud beatissimum virum Augustinum in Sermone 39. de Diversis ita scriptum videas: *Ego quia mando memoria de Libellis miraculorum Martyris, quæ in conspectu vestro leguntur, ante dies lectus est quidam Libellus, ubi cuidam egrotæ, quæ doloribus accerrimis torquebatur, cum dixisset, Ferre non possum, ait illi ipse Martyr, qui sanare venerat, Quid si Martyrium duceres?* Et in Sermone 32. cum cœpisset Augustinus miraculum narrare de puero, qui lactens in gremio matris, Catechumenus tantum, repente præter spem mortuus erat, sed mox ad vitam, beatissimo Martyre Stephano deprecatore, revocatus: cumque cœptam nequaquam potuisset persequi narrationem ob recens aliud miraculum in ea ipsa, in quantum concionabatur, Ecclesia ad ejusdem Martyris memoriam patratum; (tam læta enim gratulatione, tantisque clamoribus novum illud miraculum fuit ab Auditoribus exceptum, ut dicentis Augustinus non modo interrumpere, verum etiam cogere tacere) postera die inter

concionandum, intermissam repetens Augustinus, totam persecutus est narrationem. Ejus verba sunt hæc: *Apud Uzalim, ubi est Episcopus Frater meus Evodius, quanta miracula ibi fiant, quarite, & invenietis: prætermisiss autem aliis, indico vobis unum, quod ibi factum est, ut videatis, quanta sit ibi præsentia Majestatis. Mulier quædam subito ægotum filium, cui succurrere festinando non potuit, in gremio suo Catechumenum amisit, quæ clamans: Mortuus est, inquit, filius meus Catechumenus. Hucusque Augustinus in hujus miraculi narratione: hic enim illum Auditores jucundo tumultu, ut mox dicebam, faustisque clamoribus ob novum miraculum interrumpentes, filere coegerunt. Continuatam tamen ac integram ejusdem miraculi narrationem iterans in Sermone 33. Debet a nobis hesternus Sermo compleri, qui majori interruptus est gaudio. Cum autem opera divina per sanctum Martyrem commemorare breviter vellem, omissis ceteris unum institueram dicere; quod cum dico, restituta illi puellæ sanitate, subito lætitiæ tumultus exortus est, & nos aliter compulsi finire Sermonem. Ergo tale ibi miraculum scimus factum inter multa alia; quæ commemorari utique cuncta non possunt. Mulier quædam amisit in gremio ægotantem filium, Catechumenum, infantem lactentem; quæ cum vidisset amissum, & irreparabiliter perditum, cepit eum magis flere fideliter, quam mater. Non enim filii sui desiderabat vitam, nisi in futuro sæculo, & hanc sibi*

sibi ablatam, & periisse plangebat. Impleta affectu fiducia tulit illum mortuum, & cucurrit ad memoriam beati Martyris Stephani, & cepit ab illo exigere filium, & dicere. Sancte Martyr, vides nullum mihi remansisse solatium: non enim possum dicere, filium præcessisse, quem nosti periisse; tu enim vides, quare plangam. Redde filium meum, ut habeam cum tanto conspectum coronatoris tui. Hæc & talia cum precaretur, lacrymis quodammodo non petentibus, sed, ut dixi, exigentibus, revixit filius ejus. Hæc fere Augustinus.

Ut igitur certum est, miracula, si quæ recens accidissent, fuisse interdum ab ipso Concionatore memoriter inter concionandum ad Auditores relata: sic & illud minime dubium, eadem non raro a Lectore, sive proxime ante Concionem, sive ad ejus finem, de scripto publice recitata. Quod quomodo fieret, paululum consideremus, ut priscum morem, paucis quidem cognitum, nos omnibus studiosis magis explicatum communicemus. Qui igitur Sancti alicujus ope ac deprecationibus vel ex morbo convaluerant, vel impendens aliquod grave periculum, præsentemque calamitatem declinabant, ii Libellos Episcopo dabant, in Ecclesia publice recitandos, qui & morbi seriem, & restitutionem salutis, & imminentis urgentisque mali declinationem continerent; nec non etiam illius Sancti nomen, qui se pro eis deprecatorum præbuerat. Extant non pauca & ejusdem Augustini, & Evodii Uzalensis Episcopi testi-

monia, hanc consuetudinem planissime confirmantia, sed unicum ego illud proferre statuo, quod in extremo trigesimo primo ipsius Augustini de Diversis Sermonibus non omnibus patet: usitatam nimirum priscis iis temporibus huiusmodi Libellorum formulam; hac enim in medium vocata, velut adhibito lumine, res tota, si quid ego video, illustrabitur. Libelli porro Inscriptio ea est: *Exemplar Libelli dati a Paulo* (fuerat is B. Martyris Stephani deprecationibus ad sanitatem reductus) *sancto Augustino Episcopo*. Inscriptiōi mox subiiciuntur verba, quæ dicere solebat sanitati redditus, dum Libellum Episcopo publice recitandum exhibebat; sunt autem ista: *Rogo, Domine beatissime Papa Augustine, ut hunc Libellum meum, quem ex præcepto tuo obtuli, sanctæ plebi jubeas recitari*. Libellus porro ipse ita concipiebatur; quem, etsi multum verborum continet, tamen quia rem omnem ordine explicat, & pæne oculis subiicit, ad utilitatem legentium, quam spectamus unam, adscribere totum minime gravabimur. Cum adhuc in Patria Casarea Cappadocia moraremur, frater noster natus major gravibus atque intolerandis communem matrem affecit in tantum injuriis, ut ei etiam manus non dubitaret inferre: quod nos omnes filii pariter congregati patienter tulimus, ut ne verbum quidem fratri nostro pro matre nostra, cur hoc faceret, dixerimus. Illa autem, feminei doloris stimulis incitata, injuriosum filium

filium maledicendo punire constituit, Cumque ad sacri Baptismatis fontem post galloꝝ cantus memorato filio suo iram Dei imprecatura properaret, tunc ei nescio quis in patꝛui nostri similitudine, ut intelligitur, Damon occurrit, & ab ea prior, quo pergeret, requisivit: cui illa ad maledicendum filio suo ob intolerabilem contumeliam se ire respondit. Tunc autem ille inimicus, quoniam in mulieris corde insaniente locum facile invenire potuit, ut omnibus malediceret, persuasit. Illa autem viperis inflammata consiliis, sacrum fontem provoluta corripuit, & sparsis crinibus, nudatisque uberibus hoc a Deo potissimum postulavit, Ut extorres patria, & circumeuntes alienas terras, omne hominum genus nostro tereremus exemplo. Mox maternas preces efficax vindicta prosequitur: eundemque continuo fratrem nostrum, etate culpaque maiorem, tremor membrorum tantus invasit, quantum in me usque ante hoc triduum vestra sanctitas vidit. Servato autem ordine, quo nati eramus, intra unum annum eadem nos pœna omnes corripuit. Videns autem mater, maledictiones suas ad tantam efficaciam pervenisse, impietatis suæ conscientiam & opprobrium hominum diutius ferre non potuit, sed laqueo guttur adstringens, luctuosam vitam termino funestiore conclusit. Egressi ergo nos omnes, opprobrium nostrum non ferentes, & communem patriam relinquentes, passi sumus per diversa dispersi. Ex nobis autem omnibus decem fratribus, qui nascendi quoque ordine primum sequitur, ad

gloriosi Martyris Laurentii memoriam, quæ apud Ravennam nuper collocata est, sicut audivimus, meruit sanitatem. Ego autem, qui nascendi ordine sum sextus illorum, cum hac sorore mea, quæ me ætate subsequitur: ubicumque gentium, ubicumque terrarum, loca esse sacra, in quibus operaretur Deus miracula, comperissem, magno desiderata sanitatis amore carpebam iter. Sed ut de ceteris celeberrimis Sanctorum locis taceam, etiam ad Anconam Italia civitatem, ubi per gloriosissimum Martyrem Stephanum multa miracula Dominus operatur, eadem circuitione perveni. Sed ideo alibi curari non potui, quia huic loco divina prædestinatione servabar. Nec Uzalim civitatem Africa prætermisi, ubi beatus Martyr Stephanus prædicatur frequenter operari. Verumtamen ante hos tres menses, id est, Calendarum Juniarum die, tam ego, quam soror mea, quæ hic mecum est, eadem adhuc passione detenta, evidenti sumus visione commoiti. Ait enim mihi quidam aspectu clarus, & candido crine memorabilis, quod intra tertium mensem desiderata esset mihi sanitas affutura. Sorori autem meæ in visione sanctitas tua in ea effigie, in qua te præsentem videmus, apparuit: per quod nobis significatum est, ad istum locum nos venire debuisse. Nam & ego beatitudinem tuam sæpius postea videbam per alias civitates in itinere, quo veniebamus, talem prorsus, qualem modo conspicio. Admoniti ergo evidenti auctoritate divina, ad hanc penitus civitatem ante dies ferme quindecim.

decim. Passionis meae vel oculi vestri testes sunt, vel miserabilis soror mea, quae ad eruditionem omnium communis mali praebet exemplum, ut, qui in illa, qualis ego fuerim, vident, in me quantum per Spiritum Sanctum suum Dominus sit operatus, agnoscant. Orabam ego quotidie cum magnis lacrymis in loco, ubi est memoria gloriosissimi Martyris Stephani. Die autem Dominico Paschae, sicut alii, qui praesentes erant, dum omnis cum magno fletu cancellos teneo, subito cecidi. Alienatus autem a sensu, ubi fuerim, nescio: post paululum assurrexi, & illum tremorem in corpore meo non inveni. Huic itaque tanto Dei beneficio non ingratus hunc Libellum obtuli, in quo etiam quae de nostris calamitatibus ignorabatis, & quod de mea incolumitate & salute cognovistis, exhibui, ut & pro mea sorore orare dignemini, & pro me agere Deo gratias.

Talis ergo erat Augustino datus a Paulo Libellus: talis erat expressa huiusmodi Libellorum formula: in qua sane illud etiam debet animadverti, dari solitos hosce Libellos publice recitandos, ut & qui salutem acceperant, gratos se ac memores beneficii aliquo modo ostenderent, & allicerentur praeterea ceteri homines, atque excitarentur ad gratias Deo agendas. Nec me fugit tamen, aliam quoque assignari ab ipso Augustino ejus rei rationem, ut nimirum huiusmodi miraculorum memoria semper in omnium sermonibus ac mentibus haereret: ita enim inquit

inquit Augustinus citato xxii. de Civitate Dei lib. cap. 8. *Libelli dati sunt, qui recitarentur in populis; id namque fieri volumus, cum videremus, antiquis similia divinarum signa virtutum etiam nostris temporibus frequentari, & ea non debere multorum notitiâ deperire. Quam eandem ob causam puto illud etiam facere solitos Episcopos, ut illi ipsi, qui ad salutem redierant, post lectum eorum Libellum, proponerentur in Ecclesia, palamque in omnium conspectu collocarentur: qua de re non ita multo post dicam uberius.*

Hujusmodi porro Libellos, Episcopo, ut vidimus, datos, Lector deinde, vel proxime ante Concionem, vel sub ejus finem publice descripto ad populum recitabat. Cujus sane consuetudinis eundem Augustinum non semel, neque uno in loco, testem invenimus. In libro xxii. de Civitate Dei cap. 8. ita scriptum est: *Si miracula sanitarum, ut alia taceam, ea tantummodo velim scribere, quæ per hunc Martyrem, id est, gloriosissimum Stephanum, facta sunt in Colonia Calamensi, & in nostra, plurimi conficiendi sunt libri, nec tamen omnia colligi poterunt, sed tantum de quibus Libelli dati sunt, qui recitarentur in populis. Nec multo post: Petroniam clarissimam feminam, quæ ibi mirabiliter ex magno atque diuturno, in quo Medicorum adjutoria cuncta defecerant, languore sanata est, hortati sumus, volente supra dicti loci Episcopo, ut Libellum daret,*
qui

qui recitaretur in populo, & obedientissime paruit. Et aliquanto infra: Sequenti itaque die, post Sermonem redditum, narrationis ejus Libellum in crastinum populo recitandum promisi. Quod cum ex Dominico Pascha die tertio fieret, in gradibus Exedra, in qua de superiore loquebar loco, feci stare ambo fratres, cum eorum legeretur Libellus. Intuebatur populus universus sexus utriusque, unum stantem sine deformi motu, alteram membris omnibus contremtentem. Et qui ipsum non viderant, quid in eo divina misericordia factum esset, in ejus sorore cernebant. Videbant enim, quid in eo gratulandum, quid pro illa esset orandum. Inter hac recitato eorum Libello, de conspectu populi abire eos præcepi. In Sermone autem 51. de Sanctis idem aliis verbis ostendit; ea sunt: Habemus & Libellum de beneficiis Dei per sanctum Martyrem datis, pariter libentius audiamus. Et in Sermone 29. de Diversis de eadem re longe manifestius: De miraculis Dei per orationes beatissimi Martyris Stephani Libellos solemus audire. Sermone 30. Diximus quidem hesterno die, sicut meminit caritas vestra, Hujus Libellus aspectus est: tamen, quia nonnulla nobis indicavit, quæ nosse debetis ad majorem admirationem, & Domini nostri gloriam de suorum Sanctorum memoriis, de quibus dictum est, Pretiosa in conspectu Domini mors Sanctorum ejus, etiam Libellum dare decet, qui habet omnia, quæ ex ejus ore cognovimus. Sed, si Dominus voluerit, hodie parabitur & vobis die crastino recitabitur.

bitur. Sermone 31. *Hesterno die Libellum promissimus caritati vestrae, ubi de illo sanato audire etiam possitis, quae videre non potuistis.* Sermone deum 39. *Ego quia mando memoria de Libellis miraculorum Martyris, quae in conspectu vestro leguntur; ante dies lectus est quidam Libellus, ubi cuidam egrotae, &c.* Ex quibus omnibus Augustini locis, si modo eos semel inspexerit, per se quisque penitus intelliget, morem nostrum appositè confirmari. Sed præter Augustinum offert nunc mihi sese in hanc rem Evodius; Uzalensis Episcopus, Scriptor sane vetus, ut qui ipsius Augustini æqualis fuerit; idemque valde doctus, id quod ex ejus scriptis libris, qui ad nos pervenerunt, satis elucescit: atque is in 2. de Miraculis sancti Stephani libro cap. 1. consuetudinem, qua de agimus, his verbis verissime exprimit: *Bene mecum recolit sanctitas vestra, sanctissimi Patres & Fratres, quod cum in conventu nostrae hujus Uzalensis Ecclesiae Stephani primi Martyris Christi miracula fideliter descripta & publica attestatione comprobata, ante hoc tempus vobis, qui adfuisistis, de publico recitarentur, hoc quoque plenissima gratulationis munus, ipso amico Dei, ut credimus, procurante, dilectioni vestra exhibitum, ut, post recitationem divinorum operum atque gestorum, ipsarum etiam personarum, in quibus illa mirabilia facta, quaecumque in praesenti reperiri potuerunt, demonstratio perspicua & professio propria non solum scriptis nostris testimonium perhiberent,*

berent, verum etiam oculis aspectibusque vestris fidem veritatis ingererent. Unde factum est, dum ipsa virtutes Dei vestris auribus primitus per lectionem intimarentur, &c. Et mox: Ubi enim pronuntiaverat Lector quamlibet historiam, verbi gratia, primitus de quadam ceca postea illuminata, statim terminato sermone, &c. Et iterum paulo post: Item cum de paralytico sanato, multis antea cognito, precessit lectio; continuo idem, qui ab ejusmodi infirmitate fuerat curatus, &c. Atque ista quidem sunt Augustini & Evodii hac de re testimonia.

Neque vero reticere debeo in praesentia, quod & ante indicavi, post recitados hujusmodi Libellos, eos ipsos, qui Sanctorum ope ac deprecationibus in pristinam fuerant restituti salutem, produci in prospectum consuevisse, palamque in oculis omnium collocari; ea nimirum de causa, ut miraculorum memoria in omnium animis ac sermonibus fixa perpetuo maneret. Atque hoc eodem Augustino teste dicimus, apud quem ita in Sermone 29. de Diversis scriptum legitur: *De miraculis Dei per orationes beatissimi Martyris Stephani Libellos solemus audire. Libellus hujus (qui fuerat ad sanitatem reductus) aspectus est; pro scriptura, notitia; pro charta, facies demonstratur. Qui nostis, quod in illo dolentes videre solebatis, in praesenti gaudentes legite, quod videtis, ut Dominus Deus noster abundantius honoretur; & quod in Libello conscriptum est, in vestram*

stram memoriam conscribatur. Sermone 31. Hesterno die Libellum promissimus caritati vestrae, ubi de illo sanato audire etiam possitis, quæ videre non potuistis. Si ergo placet caritati vestrae, immo quia placere debet, quod & mihi placet, ambo fratres stent in conspectu vestro, ut, qui illum non viderant, in ista videant, quid ille patiebatur. Stent ergo ambo; unus, cui donata est gratia, & altera, cui potenda est misericordia. Sermone 32. Et cum hæc diceret Augustinus, populus de memoria sancti Stephani clamare cepit, Deo gratias, Christo laudes, in quo continuo clamore puella, quæ curata est, ad Absidam perducta est. Qua visa populus cum gaudio & fletu, nullis interpositis sermonibus, sed solo strepitu interposito, aliquamdiu clamorem protraxit, Et citato 22. de Civitate Dei libro cap. 8. Sequenti itaque die, post Sermonem redditum, narrationis ejus Libellum in crastinum populo recitandum promissi. Quod cum ex Dominico Paschæ die tertio fieret, in gradibus Exedrae, in qua de superiore loquebar loco, feci stare ambos fratres, cum eorum legeretur Libellus. Intuebatur populus universus sexus utriusque, unum stantem sine deformi motu, alteram membris omnibus contremementem. Et qui ipsum non viderant, quid in eo divinæ misericordiæ factum esset, in ejus sorore cernebant. Videbant enim, quid in eo gratulandum, quid pro illa esset orandum. Inter hæc recitato eorum Libello, de conspectu populi abire eos præcepi. Et statim: Ecce me disputante, voces aliæ de memoria Martyris novæ gratulationis audiun-

diuntur, *Conversi sunt eo, qui me audiebant, cœperuntque concurrere. Illa enim, ubi de gradibus descendit, in quibus steterat, ad Sanctum Martyrem orare perrexerat; quæ mox ut cancellos attigit, collapsa similiter velut in somnum, sana surrexit. Dum ergo requireremus, quid factum fuerit, unde iste strepitus latus extiterit, ingressi sunt cum illa in Basilicam, ubi eramus, adducentes eam sanam de Martyris loco. Tum vero tantus ab utroque sexu admirationis clamor exortus est, ut vox continuata cum lacrymis non videretur posse finiri. Perducta est ad eum locum, ubi paulo ante steterat tremens. Exultabant, eam similem fratri factam, cui doluerant remansisse dissimilem. Et nondum suas preces pro illa, jam tamen præviam voluntatem tam cito exauditam esse cernebant. Et Evodio etiam, Uzalensi Episcopo, a quo pauca hæc nostro arbitratur ex superius adducto lib. 2. de Miraculis sancti Stephani capite primo sumpsimus: Bene mecum recolit sanctitas vestra, sanctissimi Patres & Fratres, quod cum in conventu nostræ hujus Uzalensis Ecclesiæ Stephani primi Martyris Christi miracula fideliter descripta & publica attestazione comprobata, ante hoc tempus vobis, qui adfuisis, de publico recitarentur, hoc quoque plenissime gratulationis munus, ipso amico Dei, ut credimus, procurante, dilectioni vestræ exhibitum; ut, post recitationem divinorum operum atque gestorum, ipsarum etiam personarum, in quibus illa mirabilia facta, quæcumque in presenti reperiri potuerunt, demonstratio perspicua, & professio propria, non solum scriptis*

scriptis nostris testimonium perhiberent, verum etiam oculis aspectibusque vestris fidem veritatis ingererent. Unde factum est, dum ipsa virtutes Dei vestris auribus primitus per lectionem intimarentur, etiam visibus vestris oculata fide presentarentur. Et postea: Erat namque in tanta re cœlestis gloriæ spectaculum grande. Ubi enim pronuntiaverat Lector quamlibet historiam, verbi gratia, primitus de quadam cæca poëta illuminata, statim terminato sermone, hæc eadem persona requisita in populo, & inventa, & in medio omnis Ecclesiæ producta, admirantibus & congratulantibus, videbatur sola jam sine ullo comite ac duce, sicut prius solebat, incedere; ipsaque etiam per se gradus Abside conscendens, universis eminus conspicienda adstabat, & testimonium in se divina gratiæ, ipsorum suorum illuminatione oculorum, veluti fidelium testium, tacita quadam prædicatione proclamabat. Item cum de paralytico sanato, multis antea cognito, præcessit lectio; continuo idem, qui ab ejusmodi infirmitate fuerat curatus, similiter productus est populo, propriis gradiens passibus, cum totius Ecclesiæ magno gaudio cernebatur, præconia divina laudis quibusdam contestans palpabilibus documentis, ipsi sanatis sui corporis integris membris. Hactenus Evodius, in cujus testimonio a scribendi labore de miraculis, atque adeo de iis omnibus, quæ olim intra concionandum indici, ac denunciari seu promulgari solebant, acquiescendum. Pergamus deinceps ad reliqua, quæ de ipsa adhuc Concione utiliter dici posse videntur.

CA.

CAPUT XXXI.

Num licitum sit in Concionibus , præsertim de veneranda Christi Domini Passione , ad affectus concitandos animosque permovendos , externa quædam signa , fictasque personas , ac corporeas suppliciorum imagines nonnumquam producere in Auditorum conspectum . Ethnicorum Oratorum hac in re consuetudo . Adducitur Chrysostomi locus , in quo , ut Auditores a jurejurando deterreat vir ille beatissimus , Joannis Baptistæ caput in Concione veluti apponit . Externis hujusmodi signis commoti interdum Auditores , olim etiam , scelerum veniam a Deo implorarunt , Misericordiam contentis vocibus frequenter inclamantes . Garfise Loaysæ opinio perpenditur .

SCIO , permultis non admodum probari Concionatores illos , qui , ad excitandos affectus animosque permovendos , externa signa , fictasque personas , ac corporeas quasdam ima-

K

gines

gines producunt nonnumquam in Auditorum prospectum. Quibus ego, ut id, quod sentio, dicam, haud repugnante assentior; ob eam potissimum causam, quod in iis producendis quædam sæpe occurrunt, quæ risum magis excitent, quam moveant dolorem. Quoniam tamen oculorum sensus omnium acerrimus est, validiusque irritant animos, quæ oculis subjiciuntur, quam quæ demissa per aures influunt; non gravate concesserim, posse nonnumquam, præsertim in Concionibus de venerandis Christi Domini cruciatibus, ad multitudinis animos sollicitandos ac commovendos, (si modo prudenter illud & opportune, non frigide & affectate procedat) signa quædam externa proferri, nec non & suppliciorum instrumenta in Auditorum conspectu poni.

Enimvero, non solum dicendo, (ut Quintiliani verbis utamur lib. 6. cap. 1.) sed etiam faciendo quædam, lacrymas movemus: unde & producere ipsos, qui periclitantur, squallidos atque deformes, & liberos eorum ac parentes, institutum: & ab accusatoribus ostendi cruentum gladium, & lecta e vulneribus ossa, & vestes sanguine perfusas videmus, & vulnera resolvi, ac vulnerata corpora nudari. Quarum rerum ingens plerumque vis est, velut in rem præsentem animos hominum ducentium. Et populum Romanum egit in furorem prætexta Caii Cæsaris prolata in foro cruenta. Sciebatur, interfectum eum; corpus denique ipsum impositum lecto erat;

erat; vestis tamen illa, sanguine madens, ita representavit imaginem sceleris, ut non occisus esse Caesar, sed tum maxime occidi videretur. Ac de Caesaris quidem veste Dio quoque Cassius attestatur lib. 44. Non alia re magis excitatum populum Romanum, quam cum eam laceram & cruentam explicans in Concione Antonius, exclamavit, Hec tunicam discerptam ac dilaceratam! Caesar invictissime, invictissime Caesar. Hanc ideo sumpteras, ut in ea morereris?

Quapropter jam per me liceat sacro interdum Oratori, maxime in Concionibus de Christi Domini Passione, ut dolorem excitet, eliciatque lacrymas e durissimis Audientium pectoribus ob tormentorum Christi Domini acerbitatem, ostendere crucis imaginem; fictam Christi personam ad columnam alligari, & virgis ad necem fere cæsi, producere; discindere velum; clavos promere; & alia cruciatuum instrumenta prudenter & apposite Auditorum oculis subicere.

Atque hunc quidem morem veterum Patrum testimoniis etsi confirmare non queo, extat tamen nobilis apud Chrysostomum locus, in quo, uti jurisjurandi detestationem Auditorum mentibus commoveat, vir ille beatissimus ac eloquentissimus, Joannis Baptistæ caput in prospectum producit, non in externo quidem illud ac corporeo signo, sed in orationis tamen imagine, pallidum, cruentum, attritandum ma-

nibus, domum asportandum; cui etiam vocem tribuit ac locutionem. Sed ipsum audire Chrysostomum par est, ita fere, quod ad rem nostram interest, scribentem: *Antea vos rogavi, ut Joannis caput abscissum, adhuc calido cruore distillans, sumentes, sic domum quisque suam redeatis, & putetis ante oculos habere ipsum, vocem emittentem, & dicentem: Odio habete jugulato-rem meum, juramentum: quod increpatio non fecit, hoc fecit juramentum; quod ita non potuit Tyranni, hoc perjurii necessitas effecit: & quando nempe omnibus publice audientibus arguebatur, increpationem generose tulit Tyrannus; cum vero se in juramentorum necessitatem adegit, tunc illud beatum caput abscidit. Hoc ipsum igitur, & nunc peto, & petere non desistam, ut, quocumque abierimus, hoc gestantes caput abeamus, & omnibus clamans ostendamus, & juramenta condemnans: quamvis namque valde simus ignavi & negligentes, capitis illius oculos intuiti, terribiliter nos respicientis, & minantis jurantibus freno omni vehementius per timorem hujusmodi repressi, cohibere & avertere facile poterimus linguam a jurandi præcipitio. Illustre sane exemplum, ad cujus similitudinem, meo quidem judicio, possunt Concionatores, ad Auditorum animos excitandos ac permiscendos, non modo complures alias Orationis imagines prudenter exprimere, verum etiam externa ipsa interdum ac corporea signa, fictasque personas, & tormentorum instrumenta opportune producere.*

Quo-

Quoniam autem sæpe fit, ut externis hujusmodi signis ac imaginibus apposite prolatis excitati Auditores & commoti, sive ad dolorem, sive ad vitiorum detestationem, non sibi queant temperare; quin contentis quibusdam vocibus, concepti nimirum doloris ac detestationis testibus, scelerum veniam a Deo exposcant, misericordiam iterum ac sæpius inclamantes: quæret forsitan aliquis, num aliquod hujusmodi consuetudinis apud Antiquos extet vestigium. Accipe unum, instar omnium. Canon VII. Concilii Toletani IV. ita habet: *Comperimus, quod per nonnullas Ecclesias in die sexta Ferie Passionis Domini, clausis basilicarum foribus, nec celebratur officium, nec Passio Domini populis prædicatur; dum idem Salvator noster Apostolis suis præceperit, dicens, Passionem & mortem & resurrectionem meam omnibus prædicate. Ideo oportet eodem die Mysterium crucis, quod ipse Dominus cunctis nunciandum voluit, prædicari, atque Indulgentiam criminum clara voce omnem populum postulare. Hic ne vestigium quidem Sacramentalis Confessionis, ut voluit Gargas Loaysa; sed ea hujus Canonis mens est, si quid video, denunciandam esse Passionem Christi, atque ita illius commonefaciendum populum, ut, cum eum viderit ob sua peccata probris affectum, tormentis vexatum, turpissimæ denique morti datum, veniam criminum alta voce postulet, & erumpat in hæc aut similes voces, Indulge Christe. Pium enim*

populum aliquando prae dolore in voces erumpere & vidimus & audivimus, nec non & pectora tundere, cum audiebat aliquid quod de conscientia peccatorum vel confessione submoveret. Hoc testificatur S. Augustinus Serm. xxviii. in Natali Martyrum: *Nam cum Scriptura commemorasset eos, qui non intrabunt, ibi etiam nominavit homicidas, non expavistis. Nominavit fornicatores: audiui, quia pectora contudistis. Ego audiui, ego vidi, & quod non vidi in cubilibus vestris, vidi in sonitu, vidi in pectoribus vestris, quando contudistis pectora vestra. Ejicite inde peccatum. Nam pectora vestra tundere, & hac eadem facere, nil est aliud quam peccata pavimentare. Quod quidem usque adeo frequentabant, ut intempestive nonnumquam usurparent. Unde in Sermone viii. de verbis Domini, cum ad illa verba (Confiteor tibi Pater) pectora populus de more tutudisset, scite arguens illos Augustinus: In hoc ipso, inquit, quod sonuit Confiteor, pectora tutudistis. Tundere autem pectus quid est, nisi arguere quod latet in pectore, & evidenti pulsu occultum castigare peccatum? Quare hoc fecistis, nisi quia audistis Confiteor tibi Pater? Confiteor audistis, qui confitetur non attendistis. Nunc ergo advertite. Si Confiteor Christus dixit, a quo est longe omne peccatum, non solius est peccatoris, sed etiam laudatoris. Confitemur, ergo, sive laudantes Deum, sive accusantes nos ipsos.*

CAPUT XXXII.

Sacræ olim Conciones Sanctissimæ Trinitatis invocatione & laudatione conclusæ ut plurimum ac terminatæ. Hujusmodi invocatio ac laudatio non una semper eademque verborum formula concipi solita. Æterna etiam bona, cœlestiumque irarum veniam, ut nunc passim fit, Auditoribus a Deo exposcebant interdum Concionatores, atque ita suas terminabant Conciones.

EXtremam placet hoc loco veterum Concionum clausulam paucis excutere. Consueverunt prisca Patres, omnes pæne Conciones suas Sacrosanctæ Triados invocatione & laudatione concludere ac terminare; atque hoc beatissimo viro Basilio teste dicimus, apud quem ita in libro de Spiritu Sancto cap. primo non obscure scriptum legimus: *Nuper oranti mihi ad populum, & utroque modo glorificationem absolventi, Deo ac Patri: interdum cum Filio ipsius ac Spiritu Sancto, interdum per Filium in Spiritu Sancto, cum alii quidem ex his, qui tum aderant, id observarent, dicentes, nos non modo peregrinis*

ac novis usos vocibus , verum etiam inter se pugnantibus , tum tu precipue , nimirum consulens illorum utilitati . Hæc sunt Basilii verba , ex quibus , sicut intelligitur facillime , Sanctissimæ Trinitatis invocationem ac glorificationem fuisse consuetam veterum Concionum conclusionem , ut modo dicebamus ; ita illud perspicui licet , non una illam eademque semper verborum formula concipi solitam .

Placet autem hoc loco usitatas aliquot ac communes huiusmodi clausularum formulas ex Patrum Concionibus adscribere , quo minori quivis labore de toto hoc ritu possit existimare : illæ vero sunt huiusmodi : Gregorii Nazianzeni quidem : *In Christo Jesu Domino nostro , cui gloria & Patri cum Spiritu Sancto in secula seculorum , Amen .* Chrysostomi : *Gratia & benignitate Domini nostri Iesu Christi , per quem & cum quo Patri una cum Spiritu Sancto gloria , imperium , honor , nunc & semper in secula seculorum , Amen .* Cyrilli vero Alexandrini : *In Christo Jesu Domino nostro , per quem & cum quo Patri gloria & imperium cum Sancto Spiritu in secula seculorum , Amen .* A Græcis hisce Patribus non longe discedens beatissimus Leo Papa omnes ferme Conciones suas in hunc modum concludit : *Per Christum Dominum nostrum , qui vivit & regnat cum Deo Patre & Spiritu Sancto in secula seculorum , Amen .* Si est autem , ut aliquis dubitet , quin hanc eandem conclusionem , etsi non

non iisdem omnino conceptam verbis , alii quoque Patres complures usurparint , lectis Zenonis , Origenis , Athanasii , Hierosolymitani Cyrilli , Basilii , Gregorii , Ambrosii , Chrysologi , Cæsarii , ac Gregorii Magni Concionibus , is opinor , dubitare desinet : Quamquam scio , ex eis nonnullos haud ita sese in hac invocationis ac glorificationis clausula effudisse ; vel iis solis nimirum verbis quandoque contentos : *Cui (Christo) gloria in secula seculorum , Amen .*

Nec me fugit etiam , alios extitisse , qui (quemadmodum nunc fit assidua & communi pæne omnium Concionatorum consuetudine) Auditoribus æterna bona , cœlestiumque irarum veniam a Deo exposcerent , atque ita suas concluderent Conciones . In eis sunt , Origenes , Chrysostomus , Cyrillus Alexandrinus , Ambrosius , Augustinus , Leo , Gregorius , & alii non pauci , cum Græci , tum Latini Patres : quorum testimonia quia nimis longum esset persequi , & patet in promptuque sunt omnibus , idcirco ea sciens prætermitto .



CAPUT XXXIII.

*Proxime post Concionem factæ olim communes
ad Deum preces.*

REs ista etsi admodum dubia non est, tamen non puto alienum, aliquot gravissimorum Auctorum locis, quasi testibus, eam confirmare. Constitutionum Apostolicarum Auctoris de hoc ritu verba sunt in libro 2. cap. 52. Deinde (post Præsbyterorum & Episcopi exhortationes ad populum) *cuncti pariter consurgentes, & in orientem spectantes, egressis Catechumenis & Penitentibus, precentur Deum.* Justinus etiam Philosophus ac Martyr extrema ad Antoninum Apologia ejusdem consuetudinis illustre dat testimonium, sic inquit: *Die, qui Solis dicitur, omnes, qui in oppidis vel agris morantur, unum in locum conveniunt, commentariaque Apostolorum, vel Prophetarum scripta leguntur, quamdiu hora patitur: deinde, ubi is, qui legit, destitit, is, qui præest, admonet & hortatur, ut ea, quæ lecta sunt, bona imitemur: tunc surgimus omnes & comprecamur.* Hoc idem nobis Origenes indicat, ad finem Homiliæ tertiæ in Isaiam ita scribens: *Revera abstulit opprobrium Jesus, idcirco surgentes oremus Deum.* Et extrema Homilia 36. in Lucam: *Quæ omnia cognoscentes, & quam multa sint genera*

genera regnorum, surgamus, precemurque Deum. Beati quoque Athanasii verbis, quibus suam de Semente Homiliam concludit, quæ dixi de precibus communibus proxime post Concionem factis, facile confirmarim. Ceterum (ait) quia & Sermo noster satis processit, surgentes & nos ipsi extendamus manus, &c. Sed manifestius Chrysostomus: Probastis (inquit in Homilia tertia de incomprehensibili Dei natura) quæ dixi; magno cum tumultu & plausu admonitionem recepistis: sed velim, curam quoque adhibeatis, ut factæ vestra approbatio ostendatur; jam non longum post tempus periculum faciam obtemperandi: oratio excipere solet admonitionem. Et in Homilia 50. ad caput 14. Matthæi: Sed jam tempus est Sermonem orando concludere: orate igitur universi nobiscum. Jam vero tandem caput hoc pulcherrima illa precatione concludam, qua Sermones suos claudere solebat S. Augustinus: Conversi ad Dominum Deum Patrem omnipotentem puro corde, ei, quantum potest parvitas nostra, maximas atque uberes gratias agamus, precantes toto animo singularem mansuetudinem ejus, ut preces nostras in beneplacito suo exaudire dignetur: inimicum quoque nostris actibus & cogitationibus sua virtute expellat, nobis multiplicet fidem, mentem gubernet, spirituales cogitationes concedat, & ad beatitudinem suam perducatur, per Jesum Christum Filium suum. Amen.

CAP. XXXIV. ET ULTIMUM.

Habenda Concioni certum ac præfinitum, & fere unius horæ spatium conclusum, tempus Concionatoribus olim adsignatum. Ad clepsydram dixerunt veteres Gentium Oratores. Sacri nunc Concionatores ad arenarium plerumque horologium dicunt. In quæstionem vocatum, qua potissimum ratione prisce Patres in concionando constituta temporis ad dicendum spatia distinguere ac metiri solerent.

Illud unum adhuc restat, de quo videamus, antequam inchoato huic Libro fastigium imponatur. Libera-ne, an certis spatiis circumscripta, tempora ad dicendum habuerint olim Concionatores.

Prolixiori sane dicentis oratione Auditorum animos abalienari potius ac debilitari, quam erigi ac conciliari, fatentur omnes. Huic igitur certo ac communi malo ut medicinam facerent Ecclesiæ Patres, in concionando determinatum dicendi tempus, fereque unius horæ spatium conclusum, aut ipsi sibi præscribebant, aut ab aliis præfinitum religiose observabant. Hinc & frequen-

quentes illæ longioris orationis nequaquam postulatæ excusationes; & assiduz de angustiis temporis querelæ; & interruptus etiam non raro ipsemet dicendi cursus. Nec nos latet, (inquit Origenes Homilia 2. in Genesim) quod plura in hoc loco profundi & arcani mysterii secreta reperiet, quæ nunc nos adducere in medium, vel pro brevitate temporis, vel pro Auditorum labore, non possumus. Et Homilia 21. in Numeros: Priori quidem lectione tempore exclusi sumus, ne aliquid etiam de secunda dinumeratione diceremus, sed conveniens est omissa vel exclusa nunc reddere. Cyrilli Hiero solymitani verba sunt in Catechesi 13. *Ac multa cum sint, quæ sunt ab illis, contradictiones, age vestris precationibus adjuti, quantum temporis brevitæ patitur, per Dei gratiam de Passione nonnulla producemus testimonia.* Et paulo post: *Multa autem Scripturarum testimonia propter temporis angustiam prætermittimus.* Et deinde: *Et si latius enarrari voles, reperies & alias causas; sed hæc dicta sufficiant propter temporis angustiam, & ne sit Auditoribus fastidium audire.* Petrus Chrysologus in sermone 121. *Differendus est Sermo, Fratres, quia & dicendi tempus absumpsimus; & Lectionis loca, quæ vobis tractanda sunt maxime, subsequuntur.* Beatus Augustinus in Homilia 23. Libri Quinquaginta Homiliarum: *Oritur (ait) quæstio profecto solvenda, quæ attentionem vestra caritatis desiderat, ne forte sufficere non possimus verbis ad totam ejus obscuritatem removendam,*

dam, & dilucidandam pro angustia temporis. Et aliquanto infra: Videtis certe profunditatem questionis, scio. Videtis angustias temporis, & hoc videtis & sentitis. Accipite ergo pauca; si magnitudinis questionis non satisfecero, interim presentem recondite Sermonem, in futuro tenete debitorem. Rursus ibidem: Jam nunc, quantum potuimus, questionem profundam in tantilla temporis brevitate solvimus; aut, si non solvimus, debitores, ut dixi, teneamur. Et in Sermone 237. de Tempore: Tractavi, quantum potui, de Judicio, tantumque Sermo productus est, ut non remaneret temporis spatium, quo possem de ceteris disputare. Et hæc quidem superiora, non quamdiu voluerint dixisse olim Patres, sed definitum ac constitutum temporis spatium habuisse ad dicendum, ita patefaciunt luculenter, nihil ut fieri queat illustrius. Quæ vero mox suggeram, convincunt etiam, illud idem tempus in unius ferme horæ curriculum fuisse coactum. Atque, ut ita sentiam, faciunt iidem, quos supra adduxi, Cyrillus, Chrysologus, & Augustinus. Quæ cum multa sint, (inquit ille in Catechesi 13.) & tempus horæ per breve, pauca capiam & precipua. Et sub ejusdem Catechesis finem: Pudet me de his, quos illi Deos appellant; & pratermitto ista propter eantem horam. Et in Catechesi 14. Cum autem multa sint ea de re testimonia, propter horæ brevitatem his erimus contenti. Chrysologus in Sermone 112. Date ergo veniam, Fratres, si intra punctum temporis, & horæ unius vix

momentum, obscura lupidare, clausa referare, firmare dubia, profunda contingere, tot seculorum ineffabile sacramentum aperire non possum & eloqui. Augustinus vero in Sermone 11. de verbis Domini in Evangelium Matthæi: Semper in Sermonibus, quos ad populos habui, hujus questionis difficultatem, molestiamque vitavi, non quia nihil haberem, quod inde utrumque cogitarem; neque enim in re tanta quarere, petere, pulsare neglexerem, sed quia ipsi intelligentiæ, quæ mihi aliquantum aperiebatur, verbis ad horam occurrentibus me posse sufficere non putarem. Et in Sermone 143. de Tempore: Hodierno die jam ecce tertio audivimus ex Evangelio Domini nostri resurrectionem. Quantum existimo, responsum est illis; sicut intelligere potestis: sicut & nos loqui possumus, quantum hora Sermonis permittit.

Non dubium est igitur, quin certum aliquod ac determinatum temporis spatium habuerint præsci Patres ad dicendum, atque ideo in unius horæ curriculum suas circumscripserint Conciones. Illud adhuc incertum, quæ ratione constituta ac determinatæjussmodi ad dicendum spatia distinguere ac metiri solerent. Atque hic si me dicam hære, nihil certe mentiar: in promptu est ambigendi causa. Notum est enim ex Antiquorum monumentis, Ethnicos olim Oratores, cum Græcos, tum Latinos, ad clepsydram dicere consuevisse; hoc est, *ad horologium*, (ut Cassiodori verbis utar in Variarum libro 1. epi-

epistola 46.) *ubi Solis meatus sine Sole cognoscitur, & aquis guttantibus horarum spatia terminantur*: certonimirum ac constituto aquæ stillicidio data ad dicendum spatia fuisse dimensos: nostrorum vero temporum Concionatores hic in Italia videmus in arenariis plerumque horologiis illud idem facititare. Hoc igitur videtur restare, ut, ex iis alterutrum fuisse a priscis Patribus in concionando usurpatum, dicamus. Attamen, quominus hoc pro certo adfirmem, vetat mirum eorundem Patrum hac de re silentium: neque enim, qui vel subobscore, vel paulo apertius hanc consuetudinem commemorarit, posse quemquam reperiri puto. Quare nos etiam rem addubitata relinquentes, hoc uno contenti erimus, si id in quæstionem vocaverimus, quod vere quæstione dignum est. Explicabunt ii fortasse, quibus majus contigit aut otium aut ingenium. Et de ipsius Concionis ritibus quidem, cum ex Græcis, tum ex Latinis Patribus, satis atque adeo abunde dictum sit hactenus. Dehinc, suscepti muneris quod superest, exequamur.

FRAN-



FRANCISCI BERNARDINI
FERRARI

MEDIOLANENSIS THEOLOGI,

DE RITU

Sacrarum Ecclesiæ Veteris Con-
cionum:

LIBER SECUNDUS.

CAPUT I.

*Concionandi munus Episcoporum maxi-
me proprium fuisse.*

Roximo Libro de Concionum vo-
cabulis, deque ipsa Concione, quæ
cognitu digna videbantur, diligen-
ter quæsitæ & exegirata tradidi-
mus. Ad Concionantem & Auditores jam tam-
L dem

dem oratio nostra convertatur. Concionandi munus, jam inde a nascentis Ecclesiæ temporibus, post Apostolos, qui (ut habetur Matthæi cap. xxviii. Marci cap. xvi. Lucæ cap. xxiv. & Joannis cap. xv.) ad id potissimum vocati fuerunt & electi, ut euntes in mundum universum prædicarent Evangelium omni creatura, Episcoporum maxime proprium finit. Nihil hic necesse est, ubi res agitur pæne ex toto manifesta, cur singulos Auctorum locos, hanc veritatem confirmantes, ad verbum recitemus, Quam ob causam digitos ad fontes, ut fieri solet, intendisse nunc quidem contenti erimus. Rem istam pleraque Concilia stabiliunt, (ut interim Canonicas & Apostolicas Scripturas huc facientes, atque ab aliis productas reticeam) Arelatense I. can. 10. Carthaginense IV. can. 2. & 20. Turonense III. sub Carolo Magno can. 4. Tolentanum II. can. 2. Cabilonense II. sub Carolo Magno can. 1. 2. & 14. Trullanum can. 19. Nicænum II. can. 2. Remense can. 14. Moguntinum I. can. 25. Lateranense sub Innocentio III. can. 10. & sub Leone X. Sess. 1. & Tridentinum Sess. 5. can. 2. & Sess. 24. can. 4. Comprobant hoc idem planissime per multa sanctorum Patrum testimonia, ex quibus hæc illustria maxime indicabo: Ambrosii lib. 1. Officiorum cap. 1; Hieronymi Epistola 128. ad Fabiolam; Chrysostomi Homil. 7. ex variis in Matthæum locis, & Homil. 15. in primam ad
Ti-

Timotheum; Augustini Libro ad Pastores, Homilia 28. Libri Quinquaginta Homiliarum, de Tempore, Sermone 164. 166. 168. 210. 232. 243. de Sanctis, Sermone 3. 23. & 42; Fulgentii lib. 2. de Veritate prædestinationis; Cæsarii Arelatensis Episcopi Homilia 27; Athanasii Patriarchæ Constantinopolitani epist. 5; ac Magni demum Gregorii in Præfatione Libri 3. Pastoralis, Homilia 17. in Evangelia, Libro 2. Registri Epist. 39. & Lib. 4. Epist. 37. Quibus Conciliorum Constitutionibus, ac Patrum testimoniis, apte Gunſtrhanti Francorum Regis verba adjungam ex Præceptione seu Ediſto ad eos Episcopos, qui in I I. Matisconensem Synodum convenerant. *Licet* (Præceptionis seu Ediſti verba sunt, prout ea nobis retulit Antonius Augustinus in sua Veteris Juris Pontificii Epitome, libro 4. titul. 49. cap. 47. & 48.) *absque nostra admonitione ad vos* (Episcopos) *specialiter prædicandi causa pertineat; attamen reliquorum peccatis vos omnino credimus esse participes, si filiorum vestrorum culpas non assidua objurgatione corrigitis, sed silentio præteritis. Et aliquanto post: Diebus Dominicis, &c. & reliquis Solemnitatibus, &c. vos Apostolici Pontifices iungentes vobiscum Consacerdotes vestros, & filios Seniores Ecclesie, ac Iudices locorum, quoscumque cognoscitis, quos vita qualitas honesta commendat; ita universam populi multitudinem constanti, vel Deo placita jugiter prædicatione corrigite, ut & bene viventes*

tes mysticus adhortationis Sermo mulceat, & excedentes ad viam recti itineris correctio Pastoralis adducat. Hæc fere Gunſtrhanus Rex vere pius ac Catholicus, & Episcopalis hujus muneris egregius æſtimator. Hoc loco non mihi quoque temperare, quin Eliam quoque Cretensem de hoc Episcoporum munere testem producam, ita ferme in ſuis ad primam Gregorii Nazianzeni Orationem Commentariis ſcribentem: Pictores quidem Magiſtros & Paſtores divinus hic Magiſter vocat, (Episcopos ſiquidem Pictorum appellatione nominarat in ea Oratione Gregorius) ut qui per varios & multiplices doctrinæ modos, tamquam per colores quosdam, vitam ad Chriſtianæ legis formam expreſſam, ac dogmatum ſinceritatem, & ut ſummatim dicam, virtutem omnem, tam quæ in actione, quam quæ in contemplatione ſita eſt, in diſcipulorum animis pingere debeant. His igitur de cauſis Pictores eos appellavit, &c.

CAPUT II.

Episcopis magnum impendit periculum; ſi concionandi munus explere neglexerunt.

ATque hæc quidem, concionandi munus Episcoporum maxime proprium fuiſſe, planiſſime docent: proxime vero quæ ſubjiciam,

eo spectant, ut & necessario id oneris eos habuisse sciri queat. Multa sunt autem, ex quibus potest perspicui hæc in Episcopis concionandi necessitas. Primum omnium est periculum, quod iis impendet, qui delatum ac susceptum munus explere neglexerint. *Væ* erit nobis, (inquit Symmachus Papa in VI. Synodo Romana, de se aliisque Episcopis agens) qui hujus ministerii onus susceptum habemus, si veritatem Salvatoris nostri Jesu Christi, quam Apostoli prædicaverunt, prædicare neglexerimus. *Væ* erit nobis, si silentio veritatem oppresserimus, qui erogare nummulariis jubemur, id est, Christianos populos imbuere & docere. Quid in ipsius Christi futuro dicturi sumus examine, si sermonum ejus veritatem confundimur prædicare? Quid erit de nobis, cum de commissis nobis animabus, & de officio suscepto rationem justus Judex Christus Deus noster distretam exegerit? Ideo nos oportet semper nociva rescare, & auxiliante Domino profutura erigere. Unde objurgando, hortando, suadendo, blandiendo, consolando prodesse, quibus possumus, festinemus, &c. Eadem, sed paucis, iterat Nicolaus Papa, (ut est apud Gratianum in Decret. parte prima, Distinct. 43. c. 5.) sic inquit: Dispensatio est nobis cælestis seminis injuncta. *Væ*, si non sparserimus: *væ*, si tacuerimus. Quod cum electionis vas formidet, & clamet, quanto magis cuilibet exiguo metuendum est? Proinde sicut non leve discrimen incumbit Pontificibus, siluisse pro Di-

vinitatis cultu, & Ecclesia correctione, quod congruit; ita his, quod absit, non mediocriter periculum est, qui, cum debeant parere, despiciunt. Id ipsum etiam discimus ex Athanasio Patriarcha Constantinopolitano in Epistola 5. Episcopis ad suas Dioceses proficiscentibus data, cujus loci verba ad faciendam fidem appono; ea vero sunt hæc: *Quare nisi aperto capite munera Dei, quæ neque oratione consequi, neque mente comprehendere licet, perpetuo predicaverimus, quicumque hujusmodi dignitate Pastoralis præditi sumus, haud dubie in manus Dei incidemus: nisi, inquam, predicaverimus, quemadmodum ex nihilo, &c. debemus penas daturi sempiternas.* Agnovit hoc idem Episcopis imminens periculum beatus Prosper, seu potius Julianus Promerius in Libro 1. de Vit. Contempl. cap. 21. ait enim: *Ille, cui dispensatio commissæ est, etiamsi sancte vivat, si tamen perditæ viuentes arguere aut erubescit, aut metuit, cum omnibus, qui, eo tacente, perierunt, perit.* Sed congerere unum in locum omnia Patrum testimonia huc facientia, minime necessarium duco; quare ea dumtaxat adjiciam, quæ apud beatissimum virum Augustinum, de impendente hoc periculo magnopere sibi metuentem, scripta leguntur: *Frequenter in Scripturis Sanctis (ait in Homilia 5. Libri Quinquaginta Homiliarum) audivit caritas vestra, Fratres carissimi, in quo sint Sacerdotes periculo constituti, si noluerint implere illud, quod contestatur Aposto-*
lus,

lus, Prædica verbum, insta opportune, impo-
 rtune, argue, increpa, obsecra cum omni patien-
 tia & doctrina. Et quia tam grave pondus im-
 minet cervicibus nostris, quibus dicitur, Si non
 annuntiaveritis iniquo iniquitatem suam, san-
 guinem ejus de manu tua requiram: necesse no-
 bis est, quoscumque negligentes aut secrete aut pu-
 blice castigare. Homilia 28. ejusdem Libri: Dico
 vobis, libero animam meam; in magno enim sum,
 non periculo, sed exitio constitutus, si tacero. Sed
 cum egodixero, & implevero officium meum, vos
 jam attendite periculum vestrum. Quid autem
 volo? quid desidero? quid cupio? quare loquor?
 quare hic sedeo? quare vivo? nisi hac intentione,
 ut cum Christo simul vivamus, &c. Sed si me
 non audieritis, non tamen ego non tacero, ani-
 mam meam liberabo. Sermone 160. de Tem-
 pore; Ideo loquor, ideo contestor, ideo non taceo,
 ideo vestimenta mea excutio, ideo in tribunali Dei
 mei excusatum me habeo. Dicam Deo meo, Do-
 mine, non tacui; Domine, talentum, quod mihi
 dedisti, non abscondi, sed erogavi. Hoc poterit
 mihi dicere, Serve nequam, Tu daret, ego exi-
 gerem. Ecce Domine dedi, tu exige. Sermone
 164. Ecce dico vobis, ecce clamo vobis, ego me
 absolvo, erogatorem me posuit Deus, non exatto-
 rem; sed tamen ubi possumus, ubi datur locus,
 non cesso: ubi scimus, corripimus, objurgamus,
 anathematizamus, excommunicamus, & tamen
 non corrigimus. Sermone 168. Hac omnia, Fra-

tres carissimi, dum vobis paterna pietate frequenter insinuo, absolvo apud Deum conscientiam meam. Sermone 232. Ego, Fratres carissimi, dum hac humiliter & cum grandi caritate pro sollicitudine paterna commonco, absolvo apud Deum conscientiam meam. Sermone tandem 243. Hæc ergo, Fratres carissimi, si vobis ego non dixero, rationem pro animabus vestris in die Judicii redditurus, ero. Hæc ex Augustino, qui, dum nullis se conscientia stimulis concitari ait, si concionandi munus obeat, acre vero ac severum Dei judicium omnino sibi subeundum, si illud idem non expleat, declarat etiam, necessario id oneris ac muneris habuisse olim Episcopos.

C A P U T III.

Episcopi olim, cum ipsi per se non possent, per alios solebant concionandi munus explere. Per Præbiteros id interdum facitatum; interdum per Notarios; aliquando per Diaconos; nonnumquam per Interpretes; sæpe etiam per Epistolæ.

E Adem Episcoporum in concionando necessitas ex eo facile intelligitur, quod, cum ipsi, sive impediti morbo, sive negotiis, aut
alia

alia re implicati, per se non possent hoc muneri exple, per alios id ipsum conficerent.

De beato Joanne Chrysostomo, adhuc Presbytero, narrat Palladius Helenopolitanus Episcopus, Antiocheni eum Antistitis vices in concionando frequenter egisse: *Agebat* (inquit Palladius in Chrysostomi Vita) *Episcopi vices in predicatione verbi Dei, omniumque corda mirabilifacundia, Scripturarum dulcedine ornata, ad se rapiebat.* Valerium quoque Episcopum Hipponensem, quod non recte posset vir natione Græcus, ob idque Latini sermonis parum peritus, concionandi munere apud Latinos defungi, vicariam sibi in eo munere operam Augustino Presbytero dedisse prodidit Possidius in ipsius Augustini Vita cap. v. iis verbis: *Sanctus Valerius, ordinator ejus, (de Augustino loquitur) ut erat vir pius & Deum timens, exultabat, & Deo gratias agebat: suas exauditas a Domino fuisse preces, quas se frequentissime fudisse narrabat: ut sibi divinitus homo concederetur talis, qui posset verba Dei & doctrina salubri Ecclesiam Dei adificare: cui se rei homo natura Græcus, minusque Latina lingua & literis instructus, utilem pervidebat. Et eidem Presbytero potestatem dedit coram se in Ecclesia Evangelium prædicandi, ac frequentissimo tractandi, contra usum quidem & consuetudinem Africanarum Ecclesiarum. Unde etiam ei nonnulli Episcopi detrahebant. Sed ille vir venerabilis ac providus, in Orientalibus Ecclesiis id ex more fieri sciens,*

sciens, utilitati Ecclesiæ consulens, obtreffantium non curabat linguas, dummodofactitaretur a Presbytero, quod a se Episcopo impleri minime posse cernebat. Hucusque Possidius, de hoc ritu nihil nobis dubitationis relinquens.

Sed & Notarios aliquando Episcopi vices in concionando egisse, idoneum testem invenimus Magnum Gregorium: hic enim in Prologo ad Librum Quadraginta Homiliarum in Evangelia, Secundino Episcopo scribent, hæc ait: *Inter sacra Missarum solemnia, ex his, quæ diebus certis in hac Ecclesia legi ex more solent, Sancti Evangelii quadraginta lectiones exposui. Et quarundam quidem dictata expositio assistenti plebi est per Notarium recitata; quarundam vero explanationem coram populo ipse loquutus sum; atque ita ut loquebar, ita excepta est, &c.* Est & alibi ab eodem Gregorio, licet paulo obscurius, hæc ipsa, qua de agimus, Ecclesiastica consuetudo litteris consignata; ita enim in Homilia 21. ejusdem Libri scriptum legitur: *Multis vobis lectionibus, Fratres carissimi, per dictatum loqui confuevi, sed quia lassescere stomacho ea, quæ dictaveram, legere ipse non possum: & quosdam vestrum minus libenter audientes intueor; unde nunc a me metipso exigere contra meum morem volo, ut inter sacra missarum solemnia lectionem Sancti Evangelii, non dictando, sed colloquendo edisseram, &c.* Hactenus Gregorius, qui commemorans, stomacho se debilitatam ac languentem recitare ea nullo

nullo modo posse, quæ Notariis jam dictaverat; ipsosque Auditores Notariis pronunciantibus haud ita attentas aures præbere: designat certe, fuisse interdum Homilias suas Notariorum voce populo pronunciatas, atque adeo ipsos Notarios Episcopi partes in concionando suscepisse aliquando, ac etiam impleſſe. Id quod Joannes quoque Diaconus in ipsius Gregorii Vita nobis scriptum reliquit, libro quidem 2. cap. 18. *Ita Stationes per basilicas, vel beatorum Martyrum cæmeteria, secundum quod basilenus plebs Romana quasi eo vivente certatim discurret, sollicitè ordinavit. Per quas & ipse simul discurrens, dum adhuc eloqui prævaleret, viginti Homilias Evangelii coram Ecclesia diverso tempore declamavit. Reliquas vero ejusdem numeri dictavit quidem, sed lassescente stomacho languore continuo aliis pronunciandas commisit. Libro autem 4. cap. 74. in hunc modum: Dum adhuc Gregorius ad loquendum voce flatuque sibi sufficeret, per Stationes discurrens, viginti Homilias Evangelii diverso tempore coram populo declamavit. Reliquas vero ejusdem numeri dictavit quidem, sed lassescente stomacho languore continua aliis pronunciare permisit. Quarum exemplaria Secundo servo Dei petenti mandavit.*

Per Diaconos id ipsum aliquando factitatum, planum sit ex Concilii Vasensis II. cap. 2. A. D. 529. in quo ista est: *Si Presbyter aliqua infirmitate prohibente per se ipsum non potuerit predicare,*

care, sanctorum Patrum Homilia a Diaconibus recitentur. Si enim digni sunt Diacones, quod Christus in Evangelio loquutus est, legere; quare indigni judicentur sanctorum Patrum expositione publice recitare?

Vicaria quoque Interpretum opera usos aliquando Episcopos discimus ex Theodorito in Hist. Eccles. lib. 5. cap. 30. Verba ejus, Latina facta ab Epiphanio Scholastico, lege apud Cassiodorum in tripartita historia lib. 10. cap. 5: *Videns vero Chrysostomus cohortem Scythicam Arianis retibus illaqueatam, & cogitans de eorum capienda salute, consilium hujusmodi venationis invenit. Ejusdem namque linguae Presbyteros, Diaconos, atque Lectores fecit, & unam eis Ecclesiam dedit. Qua occasione multos eorum cepit, cum & ipse frequenter illuc iret, & per Interpretem Scythicum divinas lectiones exponeret. Iterat eadem, sed paucis omnino ac summatim, Nicephorus Callistus in Hist. Eccles. lib. 13. cap. 3. sic inquit: Ut vero Scytharum quoque multitudinem Ariana liberaret contagione, qui ejusdem cum illis linguae essent, eis praefecit, sapius quoque ipse eos visens, doctrinisque suis per Interpretem illustrans, ad veritatem adduxit.*

Per Epistolas demum fuisse olim episcopale concionandi munus non raro expletum, fidem faciunt ipsae Apostolicae, quae sunt in manibus, Epistolae. Cum enim haudquaquam possent Apostoli longinquos viva voce coelestibus instruere

struere disciplinis, corruptosque absentium mores, præsentes ipsi dicendo formare ac corrigere, per Epistolas id ipsum conficere studuerunt. Est hoc a Tertulliano adnotatum in Lib. de Præscriptione adversus Hæreticos cap. 21. sic scribente. *Quid autem prædicaverint (Apostoli) id est, quid illis Christus revelaverit, & hic præscribam, non aliter probari debere nisi per easdem Ecclesias, quas ipsi Apostoli condiderunt, ipsi eis prædicando, tam viva, quod aiunt, voce, quam per Epistolas postea. De sanctissimo viro Cypriano, Carthaginensis Ecclesiæ Martyre & Episcopo, prodidit Gregorius Nazianzenus, plures ipsum solum, in exilio positum, per Epistolas ad subeundum Martyrium induxisse, quam cæteros omnes, qui dimicantibus corpore & voce præsentes aderant. Sed ipsum audire par est Gregorium: Tandem in exilium actus (loquitur de Cypriano oratione 18.) haudquaquam in privata salute sua vir egregius acquiescebat, aut præclare secum agi putabat, quod vita ipsi erepta non fuisset, nec securitatem corporis potius hanc ignominiam, quam animæ periculum interpretatur, si otio & silentio indulgeret, eorumque salutem negligeret, qui gravissimo tempore periclitabantur, ut qui neminem haberent, qui ipsos ad certamen erudiret, animisque obfirmaret. Nec enim ad augendum animi robur leve momentum iis affert oratio, qui ad virtutis studium accinguntur, Proinde quamvis corpore abesset, spiritu tamen aderat, in eodemque cum his,*

qui

qui pugnabant, certamine versabatur; & quibus lingua opitulari non poterat, iisdem per literas succurrebat. Aliptem enim, tametsi in exilio positus, sese præstat; cohortatorias orationes conscribens, pietatemque literarum monumentis prodens; ac plures propemodum solus ipse per Epistolas ad subeundum Martyrium inducit, quam ceteri per se omnes, qui cum dimicantibus præsto erant. Eadem, vel certe non dissimilia, dici possent de beatissimis viris Athanasio & Joanne Chrysostomo in exilio constitutis, sed quoniam sunt ea omnibus in promptu, idcirco iis recitandis supersedebo. Tantum admonebo, exules eos, alterum quidem in oppido Cucuso commorantem, alterum in monumento patris latitantem, Ecclesiarum sibi commissarum curam per Epistolas, cum non possent viva voce, præclare gessisse. Legat, qui volet, Theodorum, Socratem, Sozomenum, Evagrium, Nicephorum, & alios Ecclesiasticos Scriptores. Non omiserim autem, recte posse huc revocari, quæ de Paschalibus Cyrilli Alexandrini, ac aliorum Sermonibus superiore Libro cap. 25. dicta sunt; habitos nimirum illos viva quidem voce ad præsentem populum, sed postea in Epistolarum figuram habitumque formatos ad absentes mitti consuevisse. Atque in hunc fere modum legimus Gaudientium Episcopum Brixientem suos ad Benevolum transmisisse Tractatus, & Antiochum Monachum plures ad Eustachium Homilias, & Magnum

Magnum denique Gregorium duos Homiliarum codices ad Secundinum : ut nimirum , quod præsentibus non poterant viva voce , per Epistolas conficerent absentes .

C A P U T IV.

Interdictum olim Episcopis , ne in aliena civitate Conciones haberent . Canones id vetantes quomodo intelligendi .

HÆc quidem quamquam ita se habeant , non tamen ignoro Canones extare , qui Episcopum vetent in aliena civitate Conciones habere . Synodi VI. in Trullo canone 20. ita constitutum fuit : *Ne liceat Episcopo in alia , quæ ad se non pertinet , civitate publice docere ; si quis autem hoc facere deprehensus fuerit , ab Episcopatu desistat , & Presbyteri munere fungatur .* Hinc facilius intelligetur , quod Osius Episcopus dixerat in Synodo Serdicensi can. xiv. *Et hoc quoque statuere debetis , ut ex alia civitate cum venerit ad aliam civitatem , vel ex provincia sua ad aliam provinciam , & ambitioni magis quam devotioni serviens voluerit in aliena civitate multo tempore residere . Forte enim evenit Episcopum loci non esse tam instructum , neque tam doctum .* Is vero , qui advenit , incipiat contemnere eum , & fre-

frequenter facere sermonem, ut dehonestet & infirmet illius personam: ita ut ex hac occasione non dubitet relinquere adsignatam sibi Ecclesiam & transeat ad alienam. Neque tamen ita accipiendi sunt hujusmodi Canones, ut sit omnino interdictum Episcopis, ne in aliena civitate Conciones habeant, sed ne habeant eas publice præter mentem illius civitatis Episcopi. Etenim & ulu fuit olim receptum, quemadmodum mox infra demonstrabimus, ut peregrini Episcopi ad concionandum invitarentur ab ejus civitatis, ad quam venissent, Episcopo; & privatim poterat docere Episcopus, ac quidpiam ex eo quærenti satisfacere. Atque hunc verum esse illorum Canonum sensum satis declarant, quæ Zonaras & Bassamon in suis ad eos Commentariis scripserunt: Ne qua (ait Zonaras ad 20. Trullanæ Synodi canonem) inter Episcopos causa offensionis existat, nulli propterea Episcopo publice in aliena urbe docendi facultatem Patres esse voluerunt; nec enim id sine aliqua præfati urbis Episcopi contumelia fieri potest, sed publice tantum docendi facultate interdictum; ut vicissim quidpiam ex eo privatim quærenti satisfacere, seorsimque docere nequaquam Episcopo veritum, nec aliquid eum, qui id faciat, in se culpæ suscipere intelligamus. Et ad canonem 11. Synodi Serdicensis: Si quis (inquit) Episcopus in aliam civitatem; provinciamve adeat jactabundus, hoc est, ut ibi se jactet atque ostentet, laudemque eloquentiæ aucupetur, vel ut reli-

religioni consecrandæ inserviat; ac de fide & cultu qui Deo exhibendus est, quærat, & quam videlicet fidei, & quam divini cultus rationem sequi debeamus, edoceat, ac diutius ibidem commorari velit, neque sit ejus regionis Episcopus admodum discendi ac docendi peritus, nec crebriores ipse Conciones habeat, ex quo regionis illius Episcopum contemnere ac velut ineruditum notare videatur: perturbationes namque ea res excitat, callideque & versute factum interpretari licet, ut sese nimirum populo illius regionis admiratione eloquentiæ Episcopus commendat, ac sibi Cathedram ejusdem urbis despondeat. Balsamon autem hæc eadem, ut ferine omnia, a Zonara mutuatus, ita perstringit in suis ad eundem Trullanæ Synodi canonem Commentariis. Canon est apertus: decernit enim; Ne Episcopus publice doceat in civitate, quæ ad se non pertinet; est enim (inquit) hoc dedecus Episcopi illius regionis, & ejus ignorantia condemnatio: hoc autem intellige, quando sit præter mentem illius regionis Episcopi, si quis enim ejus voluntate tale quid fecerit, id ei præjudicium non afferet; nam & in alia regione sine ullo præjudicio sacra celebrat quispiam ejus, qui illam habet, voluntate. Et statim. Canonem recte adjicitur illud, publice; privatim enim interrogantibus de Ecclesiastica aliqua questione respondere licet cuilibet & ubique, sicut & XIV. Canon Serdicensis Synodi de ea re aperte loquitur. Ex quibus Zonaræ & Balsamonis verbis manifesto cernitur, ve-

M

titos

ritos olim Episcopos publicas in aliena civitate Conciones habere, quod id sine magna præfæcti ejus civitatis Episcopi contumelia ac dedecore nequaquam fieri posset, essetque publica ejusmodi Concio, publicum etiam illius ignorantie testimonium.

CAPUT V.

Peregrini Episcopi fuerunt antiquitus ad concionandum invitati ab ejus civitatis, ad quam venissent, Episcopo. Ejus moris origo tradita. Mediolanensis Ecclesiæ hac de re consuetudo.

QUamvis autem vetiti essent Episcopi, ut modo dicebamus, publicos in aliena Diocesi Sermones habere; invaluit illa tamen priscis temporibus in Ecclesia laudabilis consuetudo, ut peregrini Episcopi ad concionandum invitarentur ab ejus civitatis, ad quam divertissent, Episcopo. Auctor Constitutionum Apostolicarum lib. 2. cap. 62. de peregrino Episcopo agens, ait: *Rogabis eum, o Episcopo, ut Sermones habeat ad populum, ad docendum accomodatos. Cujus rei rationem reddens, subdit: Peregrinorum enim adhortatio & admonitio valde accepta atque vehementer utilis esse consuevit; nemo enim*
Propheta

Propheta acceptus in patria. Videtur autem ex eo mos hic in Ecclesiam inuictus, quod Paulus & Barnabas, ut est in Actis Apostolorum cap. 13. e Cypro regressi in Asiam, Antiochiæ Pisdia ingressi Synagogam die Sabbati, ab ejusdem Synagoga Principibus invitati fuere, ut, si quis esset in eis Sermo exhortationis ad plebem, dicerent, Hunc utique morem fuisse non semel usurpatum a beatissimis viris Gregorio Nazianzeno & Joanne Metropolitano Ephesi, tradit disertis verbis Balsamon ad 20. superius adductum Trullanz Synodi canonem: Magnus (inquit) in Theologia Gregorius, cum Sacerdotum esset Episcopus, multos Sermones legit Nazianzi, cum pater ejus in ea civitate Episcopus esset, & hoc ostenditur ex oratione, quæ sic habet, Cur solvitis ordinem laudabilem? Porro & sapientissimus ille Ephesi Metropolitanus Dominus Joannes, qui instar fluvii Philosophiæ fluentia affundit, & uoluptas, id est, sinuosus, dictus est, in eam regionem veniens, quæ illum erat sortita, cum auctoritate illius regionis Antistitem publice docuit. Retinuisse eandem consuetudinem Ambrosium constat ex Sermone 48. veteris editionis, & Cyrillum Alexandrinum ex Homilia 7. & 8. in seque servatam testis est Petrus Chrysologus in Sermone 138. & Casarius Arelatensis Episcopus non uno loco; atque neglectam conqueritur Gregorius Nyssenus ad Amphiloichium ab Helladio Casariensi Episcopo. Quin extat ea de re Decretum in

Concilio Carthaginensi IV. can. 33. iis verbis :
*Tam ad verbum faciendum, quam ad oblationem
 consecrandam invitentur Episcopi vel Presbyteri, qui
 causa visitanda Ecclesiam alterius Episcopi ad Eccle-
 siam venerint. Cujus Decreti ea apud Gratia-
 num translatio reperitur 2. p. cap. 7. q. 1. Epis-
 copi cap. 38: Episcopi vel Presbyteri, si cau-
 sa visitandi Ecclesiam alterius Episcopi venerint,
 in gradu suo suscipiantur, & tam ad verbum fa-
 ciendum, quam ad oblationem consecrandam invi-
 tentur, Piam hanc & laudabilem priscæ religio-
 nis consuetudinem negligi aut intermitteri cernens
 sanctus Cardinalis Carolus Borromæus, eam,
 ut alias non paucas, & facto & decreto revo-
 cavit, ut in nostræ Mediolanensis Ecclesiæ Actis
 legitur,*

CAPUT VI.

*Data olim aliqua concionante Episcopo lauda-
 tio iis Episcopis, qui in Concione præsentem
 aderant.*

Illud quoque fuit in veteri Ecclesia usu rece-
 ptum, ut Episcopi inter concionandum, si
 quando aderant aliarum sedium Antistites, ali-
 quam eorum laudationem Concionibus suis in-
 texerent. Cujus rei obvia sunt apud Græcos
 &

& Latinos exempla. Sed illustre illud Gregorii Nazianzeni Oratione 17. in Magnum Basilium, quem presentem præsens his verbis alloquitur: *Homo Dei & fidelis serve, & mysteriorum Dei dispensator, & vir desideriorum Spirituum hoc enim nomine virtute procellos & excelsos viros, & supra ea, quæ oculis cernuntur, positor, Scriptura vocat. Quin te quoque Pharaonis, hoc est, omnis Egyptiaca atque adversaria potestatis, Deum appello, & Ecclesia columnam ac firmamentum, & Domini voluntatem, & luminare in mundo verbum vitæ sustines, & fidei adminiculum, ac Spiritus domicilium. Et quid nomina ea omnia, quæ tibi tua virtus peperit, alia aliud tibi concilians atque offerens, enumerem? Præclara illa quoque laudatio, qua idem Nazianzenus ornat & Gregorium Nyssenum Oratione 6. & Eulalium Doarensem Episcopum Oratione 30. & centum quinquaginta Episcopos Oratione 31. Gaudentius quoque Brixientis Episcopus, Ambrosium, Atristitem Mediolanensem, presentem præsens ita compellat in Tractatu de sua Ordinatione: *Obsecro communem patrem Ambrosium, ut post exiguum rorem sermonis mei ipse irriget corda vestra divinarum misteriorum literarum: loquitur enim Spiritu Sancto, quo plenus est, & flumina de ventre ejus fluent aqua viva; & tamquam Petri Apostoli successor, ipse erit os universorum circumstantium sacerdotum. Coram Carthaginensi Episcopo Carthagine sermonem habuit Augustinus Hipponen-**

sis Episcopus de versu Psalmi xcii. *Deus, quis similis tibi? ut patet ex ejus verbis: Itaque & gratulamur caritati vestra, quia sancto domino & collega nostro Episcopo vestro obedistis in eo quod vobis mane locutus est. Est & illud nobile præconium, quod Adelpho Episcopo præsentī tribuit Petrus Chrysologus Ravennatensis Episcopus Sermone 136: Habet hoc (inquit Chrysologus) Adelphi Antistitis sanctus animus, & plena pietate dignatio, ut dives pauperis intret hospitium, pauperis se ponat ad mensam, & humilibus se faciat esse communem, quem divitiæ, potestas, honor fecit & reddidit singularem; inter maximas enim virtutes numeranda est ista voluntas, quæ, contempto obsequii sui fastu, despecta magnificæ domus reverentia, calcato etiam suæ fastigio potestatis, & abjecta opum suarum interna conscientia, unde tumor maximus humanis semper dominatur in mentibus, ad vilissimas inopis se inclinavit angustias, ut suo pauperem contubernio sublimaret. Beatus plane iste animus, & ab omni morbo arrogantia remotus, qui ad hoc pauperis diversorium primus intravit, ut ante humanitatis debitor, quam largitor existeret. Imitari Deum evidenter iste gestivit, qui ante humana in corpore suscepit obsequia, quam beneficia homini divina concederet: quod Pontificem Dei summi præsentem Adelphum fecisse conspiciamus, qui cum sit verbo dives, scientia copiosus, magnus ingenio, loco primus, egeni sensus, & mediocris eloquii nostri audientiam concupivit. Jam vero tandem caput hoc*

hoc iis Honorati Novariensis Episcopi verbis
 concludam, quibus præsentem Laurentium, An-
 tistidem Mediolanensem, inter concionandum
 commendat ad finem ejus Dictionis, quam in
 Dedicatione Basilicæ Apostolorum ab Ennodio
 compositam ipse pronunciavit. *Veni ergo, (ait)*
piissime Domine, & ad consecrationem operis tui
plenus illabere: vice humani per baptisma pectoris
purgentur hæc templa, turpi hætenus dedicata pa-
trocinio: institue Domine vertendo sacrificia, &
dum puris cumulamur altaria sancta donariis, præ-
sentiam tuæ majestatis interfere: evocatus sanctorum
merito Sacerdotum, electi seorsum præsentis Patris
nostri Laurentii conscientia, qui tot plenus dotibus
ad Ecclesiæ fastigia crevit, quot fecissent summum
singula quæque Pontificem: in quo vernat princeps
boni operis & mater honestatis verecundia, religio-
nis sanctæ nutrix patientia, Deum semper placatura
pietas: qui Ecclesiasticis membris non sermone vitæ
instituta tribuit, sed exemplis: qui omnem callem,
quo ad Deum itur, dum præviis incedit, ostendit,
 &c.

C A P U T VII.

Episcopi proxime ante Concionem audienti populo pacem a Deo precati sunt, eique benedixerunt.

IN superioris libri cap. 10. dixi, solitos olim Concionatores Concionum initio cruce se ipsos consignare; dicam nunc, Episcopos mox concionaturos Auditoribus pacem a Deo precari, eique benedicere consuevisse. Cujus rei nobis beatissimi viri Chrysostomi verba certissimo testimonio sunt, Homilia 3. in Epistolam primam beati Pauli ad Colossenses: *Ut Presul Ecclesiam ingreditur, dicit, Pax omnibus; quando concionatur, dicit, Pax omnibus.* Atque hunc eundem morem tenuisse in concionando ipsummet Chrysostomum, ex iis cognoscere licet, quæ apud Socratem & Sozomenum scripta leguntur: narrantes enim hi, quam alacres ac læti rediit de exilio Chrysostomum excepissent Constantinopolitani, illud etiam addunt, coactum eum tunc concionari, & ante Concionem ipsam pacem populo precatum fuisse: *Multitudo (ait Socrates lib. 6. cap. 14.) prodiit illi obviam: cum summa reverentia ad Ecclesiam recta deducit; orat, ut Sedem Episcopalem capeisset, moreque consueti pacem populo precetur. Cum ille recusaret, diceretque, hos non ante faciendum esse, quam*

SMT

tum causa ejus esset judicio disceptata, tum hi, qui ipsum condemnarant, mutata sententia absolverent, magis incendi capis; tanta enim cupiditas, cum in Sede collocatum videndi, tum de integro concionantem audiendi, illam incessebat. Itaque populi impulsu res sic confecta est. Cum Joannes esset in Sede Episcopali locatus, & de more pacem populo precatus fuisset, coactus necessitate etiam concionatus est. Sozomenus vero lib. 8. cap. 18. Tum vero populus cantilenis pro re nata compositis obviam procedens, cum & ardentibus tadas plurimi ferrent, ducunt ipsum (Chrysostomum) ad Ecclesiam, & quamquam reluctantem & saepenumero asseverantem, oportere prius eos calculum suum revocare qui contra ipsum tulerant, uti moris est Sacerdotibus, compulerunt illum & populo benedictionem impartiri, & in Episcopali Sede considere. Coactus itaque extemporalem quamdam Orationem habuit, & ex venustissima similitudine argumento sumpto subindicavit, &c. Hæc eadem a Socrate & Sozomeno mutuatus Nicephorus Callistus in lib. 13. cap. 16. Vi autem (ait de Chrysostomo loquens) plurima cogentes, in Sede Episcopali collocarunt, ut pacem populo ex superiore loco annuntiaret & precaretur. His rebus ita ex necessitate quadam actis, Oratione tum quoque ex tempore ad populum habuit, argumentis cum magna gratia apposis usus. Petrum quoque Chrysologum ipso Concionum initio pacem Auditoribus solitum precari, satis fidem facit ejus Sermo 138. de Pace inscriptus, qui

qui sic habet: *Melius quidem fuerat, Fratres carissimi, si pater ac magister noster communis imperitiam nostram latere permitteret, nec publicaret penuriam, quæ in nobis hætenus velamento propria verecundia tegitur; melius fuerat, ut qui tam copiose abundat in spiritualibus doctrina divitiis, de navicula pauperis nequaquam tenui verbi veltigal exigeret. Quis enim aut egenus divitibus aut peregrinus civibus, aut agrestis & ignarus studiosis conferat? Tamen quoniam jussis parere cogimur, eadem nos humilitatis ratio, quæ excusare videtur ad dicendum, cogit ad obediendum. Quid igitur est, o religiosa plebs Domini, quod vobis, quamvis pauperes, quamvis ineruditissimi, attamen decenter offerimus? Pacem sine dubio, quam Dominus noster Jesus Christus ingredienti nos offerre omni domui jubet: unde & nos in principio salutationis nostræ pacem vobis a Domino exoravimus, Ex quibus Auctorum locis quemadmodum satis constat, pacem Auditoribus tribuere ipso Concionum initio fuisse consuetum concionantium Episcoporum morem, (de more enim id factitatum testatur apertissime Socrates) ita & illud perspicue liquet, Episcopos, dum pacem eo modo Auditoribus precarentur, iisdem etiam benedictionem tribuisse: quo enim loci pacem precari dixerat Socrates, & ex eo Nicephorus; eodem benedictionem impertiri dixit Sozomenus: fatendum ut sit, vel idem omnino fuisse, pacem precari, & benedictionem imper-*

impertiri; vel certe numquam tributam pacem, quin daretur etiam benedictio. Atque hoc quidem ultimum ex eo quoque non obscure intelligitur, quod ad ea verba, *Pax omnibus*, quibus in tribuenda pace utebantur Episcopi, signum semper crucis exprimebatur, sine quo vix aut ne vix quidem solebat apud Christianos benedictio dari. Ac pacem quidem precantes & annunciantes Episcopos crucis signum adhibuisse, discimus, ex Marci Liturgia, in qua ita est: *Populum cruce signat Sacerdos, dicens, Pax omnibus*. Atque haud scio, an hunc etiam respexerint & Methodius, dum in Homilia de Simeone & Anna, 'quo die sibi in templo occurrerunt, Concionem suam appellat Navem crucis signaculo insignitam; & beatus Joannes Chrysostomus in Homilia 4. de verbis Isaïæ, crucem adfirmans fuisse Sermonis sui temonem ac clavum: quod nimirum pacem tribuentes mox concionaturi hi beatissimi viri, cruce etiam consignarent Auditores. Quamquam scio, posse etiam non male intelligi hosce locos de eo crucis signo, non quo audientem populum, sed quo se ipsos consignare consueverant Concionatores ipso Concionum initio; ut est a nobis adnotatum superiori libro cap. 10.

CAPUT VIII.

Adstiterunt olim concionanti Episcopo septem Diaconi. Cur id institutum.

AB Episcopo concionante non prius abibo, quam illud etiam admonuerim, septem olim Diaconos adstitisse concionanti Episcopo. Atque hoc ex Anastasio Bibliotecario in Evaristi Vita facile quivis didicerit, inquit enim: *Evaristus septem Diaconos ordinavit, qui custodirent Episcopum predicantem. Præstat autem ipsum Evaristi hac de re Decretum ex Epistola 1. apponere, quod est huiusmodi: Diaconi, qui quasi oculi videntur esse Episcopi, in unaquaque civitate, juxta Apostolorum constituta, septem debent esse, qui custodiant Episcopum predicantem. Subjicit autem, ejus rei rationem reddens: Ne aut ipse ab insidiatoribus quoquomodo infestetur, aut ladatur a suis: aut verba divina detrahendo, aut insidiando polluantur, vel despiciantur. Sed veritas spiritali redoleat fervore, & pax prædicata labiis animi cum voluntate concordet.*

CAPUT IX.

Alexandriae solus Episcopus concionabatur. In Africanis Ecclesiis nequaquam licebat Presbytero coram Episcopo concionari. Alexandrini moris origo & causa. Africanorum consuetudo a beato Hieronymo improbata. Jam inde a primis Ecclesiae temporibus concionandi munus Presbyterorum etiam fuisse.

Alexandriae solum Episcopum concionandi munus explere consuevisse restatur discretis verbis in Histor. Eccles. Socrates lib. 5. cap. 21. Sozomenus lib. 7. cap. 19. & Nicephorus lib. 12. cap. 34. In Africanis etiam Ecclesiis nequaquam licuisse Presbytero coram Episcopo concionari scriptum reliquit Possidius in Augustini Vita. Quin etiam (ait Socrates) Alexandria non concionatur Presbyter. Sozomenus: Apud Alexandrinos vero solus civitatis Episcopus in Ecclesia docet. Nicephorus: Alexandria solus hoc munere concionandi fungitur Episcopus. Possidius autem cap. v. Eidem (Augustino) Presbytero potestatem dedit (Valerius) coram se in Ecclesia Evangelium praeedicandi ac frequentissime tractandi, contra usum quidem ac consuetudinem Africanarum Ecclesiarum: unde

unde etiam ei nonnulli Episcopi detrahebant. Sed mos ille in Alexandrina Ecclesia eo dumtaxat tempore initium habuit, quo Arius Presbyter, accepta docendi facultate, res novas inducens, Ecclesia turbavit. Subdit enim ibidem Socrates: *Qui mos eo tempore initium habuit, quo Arius perturbavit Ecclesiam. Aiunt tamen (inquit Sozomenus) hanc consuetudinem non prius inolevisse, quam ex quo Arius Presbyter de doctrina differens insolitam introduceret.* Nicephorus: *Causam consuetudinis novæ præbuit Arius, qui, quod Presbyter esset, & docendi provinciam accepisset, contra veritatis doctrinam res novas inducens, Ecclesiam turbavit.* Africanorum autem consuetudinem, veluti pessimam, improbat beatus Hieronymus, ad Nepotianum scribens in hunc modum: *Pessime consuetudinis est, in quibusdam Ecclesiis tacere Presbyteros, & presentibus Episcopis non loqui, quasi aut invideant, aut non dignentur audire.* Vide Alcuinum in Epist. vi. Constat insuper, illud Valerii factum, tamquam utile ac necessarium, plures mox Africæ Episcopi fuisse laudabiliter imitatos: hæc enim aliquanto post subiicit eodem loco Possidius: *Postea currente & volante huiusmodi fama, bono præcedente exemplo (Valerii), accepta ab Episcopis potestate, Presbyteri nonnulli coram Episcopis populis tractare cœperunt Verbum Dei.* Jam inde igitur a primis Ecclesiæ temporibus, non Episcopi modo, verum etiam Presbyteri,

byteri, id operis ac muneris habuerunt, ut concionarentur in populis. Hoc nos docuit vir sapientissimus Apostolicarum Constitutionum Auctor; in cujus libro 2. cap. 57. ita non obscure scriptum legitur: *Deinde (post Evangelicam lectionem in Missa recitatam) hortentur populum Presbyteri, non omnes simul, sed singulatim: & postremus omnium Episcopus, qui similis est gubernatori navis, &c.* Atque hanc consuetudinem traditam per manus ab Apostolis adulta accepit Ecclesia, & diligentissime semper retinuit, Quare ita scriptum est ab Innocentio III. in Concilio generali Lateranensi capite ultimo: *Sacerdotes & alii Clerici, tam subditi quam prelati, orationi & exhortationi diligenter insistant, docentes verbo pariter & exemplo, ut timorem & amorem semper habeant divinum ante oculos, ne quid dicant aut faciant, quod Divinam Majestatem offendant.* In Concilio quoque Valensi II. can. 2. A.D. 529. ita constitutum fuit. *Hoc etiam, pro edificatione omnium Ecclesiarum, & pro utilitate totius populi, nobis placuit, ut non solum in Civitatibus, sed etiam in omnibus Parochiis, verbum faciendi daremus Presbyteris potestatem.* Quod & in Arelateni VI. sub Carolo Magno can. x. iis verbis fuit confirmatum: *De Predicatione, providimus, pro edificatione omnium Ecclesiarum, & pro utilitate totius populi, ut non solum in Civitatibus, sed etiam in omnibus Parochiis, Presbyteri ad populum verbum faciant, & ut bene vivere studeant,*

Audeant, & populo sibi commisso predicare non negligant. Et in Lemovicensi An. 1031. paulo ante finem: Omnes Sacerdotes, quibus Parochia commissa est, omnibus Dominicis & festis diebus admonere predicando populum debent, secundum illud, Argue, obsecra, increpa; quia Sacerdos, si sine predicationis sonitu incedit, interminatione divina mortis reus est. Episcopus autem, quos doctos viderit & ad hoc officium idoneos, non tantum jussu, sed etiam rogatu ad tam sublime opus incitare debet.

C A P U T X.

Diaconis permissum nonnumquam publicas habere Conciones. Facilitatum id potissimum urgente ac seviante persecutione. Ejus rei indicata ratio.

Sed & Diaconis concessum aliquando publice concionari, constat manifeste ex ipsis Apostolorum Actis, in quibus dicitur cap. 7. Diaconorum princeps Stephanus, magno spiritu & fructu de Christo Domino publice disputasse. Philippus etiam, unus e septem nascentis Ecclesie Diaconis, propterea in eorumdem Actuum cap. xxi. Evangelistæ nomine appellatur, non quod Evangelium scripserit, (est enim om-
nino

nino apocryphum, quod ejus nomine aliquando circumferebatur) sed quod prædicandi munus obierit. Atque in hac omnino significatione accipiendum Evangelistæ vocabulum (cum beatus Paulus in Epistola ad Ephesios cap. iv. ait: *Quosdam esse in Ecclesia Evangelistas*) adnotat ad eum locum beatus Ambrosius. Id quod dicendum etiam videtur, cum ad Timotheum scribens idem Paulus in Epistola 11. cap. iv. hortatur eum, ut opus faciat Evangelistæ. Beatissimus Martyr Ignatius in Epistola ad Philadelphenses Diaconum Philonem laudibus effert, quod sibi in Sermone præclare ministraret: eodemque hortatur, ut Episcopo & Presbyteris & Diaconis Verbum Dei tractantibus diligenter attendant. Ad Heronem quoque Antiochiæ Diaconum scribit in hæc verba: *Lectioni attende, ut non modo ipse leges noveris, sed etiam aliis easdem interpreteris, ut Dei athleta*. De Benjamin Persa Diacono prodidit Theodorus Histor. Ecclesiast. lib. 5. cap. 38. & ex eo Nicephorus lib. 14. cap. 20. acerbissimis enim cruciatibus, ac gloriosa tandem morte a Persarum Rege fuisse affectum, quod a Verbi Dei prædicatione cessare nequaquam voluisset, Sanctissimos item viros, Vincencium Martyrem, & Pontificem Gregorium Romanum, Diaconatus dumtaxat ordine insignitos, Evangelio munere fuisse defunctos, testantur Augustinus in Sermone 1. de sancto Vincentio, & Joannes Diaconus in Gregorii

N

Vita

Vita lib. 1. cap. 41. in Vascensi quoque Concilio II. can. 2. A. D. 529. ita Patres caverant: *Si Presbyter, aliqua infirmitate prohibente, per se ipsum non potuerit predicare, sanctorum Patrum Homilia a Diaconibus recitentur; si enim digni sunt Diacones, quod Christus in Evangelio locutus est, legere; quare indigni judicentur sanctorum Patrum expositiones publice recitare?*

Ceterum tunc potissimum puto id muneris explevisse Diaconos, cum, urgente ac sæviente Tyrannorum persecutione, ex Fidelibus non pauci ob Christiani nominis confessionem in vinculis detinebantur. Quamobrem beatissimus Martyr Cyprianus Epistola 11. ad Martyres & Confessores data; *Credideram (inquit) Presbyteros & Diaconos, qui illic presentes sunt, monere vos & instruere plenissime circa Evangelii legem, sicut in præteritum semper sub Antecessoribus nostris factum est, ut Diaconi ad carcerem commeantes Martyrum desideria consiliis suis & Scripturarum præceptis gubernarent, &c.* Atque hæc fortasse causa est, cur consueverint olim Tyranni persecutionis tempore Diaconos ipsos tam acerbè vexare ac cruciare, quod hi nimirum prædicatione sua cæteros Christianos jacentes excitarent, confirmarent nutantes, & ad martirium provocarent.

CAPUT XI.

*Hereticis ac Lapsis, sive Præbyteris, sive
Diaconis, interdictum concionandi munus.*

NEquè vero existimandum est, Evangelium prædicandi munus fuisse Sacerdotibus omnibus aut diaconis concessum; etenim iisdem, sive Hæreticis, sive Lapsis, id ipsum omnino interdictum fuit. De Hæreticis extat Canon. 6. Synodi VIII. Constantinopolitanæ sub Adriano II, qui sic habet: *Bonum profectò & valde proficuum est, sanctas & venerabiles iconas pingere, sed & proximos disciplinas divinæ ac humanæ sapientiæ docere: non autem bonum est, nec omnino proficuum, ab indignis horum aliquid fieri. Hujus rei gratia nequaquam iconas operari in sacris templis, sed neque in quovis loco docere anathematizatos ab hac sancta & universali Synodo definimus & promulgamus, usquequo a propria seductione ac malitia convertantur. Quisquis ergo post hanc definitionem nostram ad picturæ sanctarum imaginum in Ecclesiis, aut doctrinæ actionem quoquomodo eos admiserit, si quidem Clericus fuerit, proprio gradu periclitetur; si vero Laicus, separetur, & divinatorum mysteriorum communione privetur.* Et Canon. 8. in quo ita est: *Defini-*

vit sancta & universalis Synodus, neminem ex his omnibus a nunc tale tenere vel servare chirographum, sed absque quolibet offendiculo indubitanter & intrepide tam docere quam discere omnes, qui ad utrumque consistunt idonei, præter hos, qui erroris inveniuntur & hæretica impietatis servituti redacti; hujusmodi enim certissime & docere & discere interdicimus. Hisce Constitutionibus commode Cælestini Papæ verba addentur ex Epist.

I. C. I: Filii nostri (inquit) Prosper & Hilarius, tantum nescio quibus Præbyteris illic licere, qui diffensioni Christianæ studeant, sunt apud nos persecuti, ut indisciplinatas quæstiones vocantes in medium, pertinaciter eos dicant prædicare adversantia, veritati. Sed vestræ dilectioni justius imputamus, quando illi supra vos habent copiam disputandi. Legimus: supra Magistrum non esse Discipulum, hoc est, non sibi debere quemquam ad injuriam Doctorum vendicare doctrinam: quid illic spei est, ubi magistris tacentibus hi loquuntur, quasi ita est, eorum discipuli non fuerunt? timeo, ne connivere sit hoc tacere; timeo, ne magis ipsi loquantur, qui permittunt illis tantum loqui. In talibus causis non caret suspicione taciturnitas, quia occurreret veritas, si falsitas displiceret: merito namque causa nos respicit, si silentio faveamus errori, ergo corripiantur hujusmodi. Non sit his liberum habere pro voluntate Sermonem. Desinat, si ita res sunt, incessere novitas vetustatem, desinat Ecclesiarum quietem inquietudo turbare. Sciant omnes qui male docent,

cent, quod sibi discere magis ac magis competat, quam docere. Nam quid in Ecclesiis vos agitis, si illi summam teneant prædicandi? Nunc tamen repetentes sæpius admonemus, utentur huiusmodi, qui laborant, per terras aliud, quam ille noster iussit agricola, seminare. Nec tamen mirari possumus, si hæc erga viuentes tentare audent, qui nituntur etiam quiescentium fratrum memoriam dissipare. Hæc Cælestinus.

De Lapsis autem sic a Patribus, qui in Antycyranno Concilio congregati sunt. cap. 1. & 2, statutum fuisse accepimus: Presbyteri, qui immolarunt, & postea certamina sustinuerunt, non offerant, neque concionentur, neque ministrent in sacris ministeriis. Diaconi, qui immolarunt, & postea tormenta vicerunt, vacent ab omni ministerio sacro, etiam prædicandi. Qui Canones & a Burchardo lib. 5. cap. 40. & 41. & ab Ivone 2. parte Decreti cap. 49. & 50. referuntur.

CAPUT XII.

Laicis omnibus ac mulieribus interdictum publicas habere Conciones.

Mulieres quidem vetitas publice concionari; fidem facit caput 99. IV. Carthaginensis Synodi, a Burchardo libro 8. cap. 83. & ab Ivone parte 7. cap. 101. & parte 8. cap. 324. Decreti adductum, in quo ita scriptum est: *Mulier, quamvis docta & sancta, viros in conven-*

tu docere non præsumat. Id ipsum de viris etiam statutum fuisse, ejusdem Concilii Canon. 98. declarasse videtur: *Laicus præsentibus Clericis, nisi ipsis rogantibus docere non audeat.* Quamvis enim dicatur, præsentibus Clericis, Glossa tamen ad C. Mulier, Dist. 23. sic limitat: *Maxime coram Clericis id Laicis non licere, quia nec absentibus licet.* Sed magis expresse decreverunt hoc idem Trullanæ Synodi Patres in hæc verba, quæ habentur capite 64: *Non oportere Laicum publice disputare, vel docere, docendi auctoritatem ex eo sibi vendicantem, sed ordini a Domino tradito cedere, & aurem iis, qui docendi gratiam acceperunt, aperire, & divina ab eis doceri.* In una enim Ecclesia diversa membra fecit Deus, ut est vox Apostoli, quam aperte interpretans Gregorius Theologus, eum, qui in iis est, ordinem commendat, dicens: *Hunc ordinem revereamur Fratres, hunc servemus, hic quidem sit auris, ille vero lingua; hic autem manus, hic vero aliquid aliud; hic quidem doceat, ille vero discat.* Et paulo post: *Et discens in docilitate, & suppeditans in hilaritate, & opem ferens ac ministrans in alacritate: ne simus omnes lingua, quod est promptius, ne omnes Apostoli, ne omnes Prophetae, ne omnes interpretemur.* Et post quædam: *Cur te ovium pastorem facis? cur caput efficeris, cum sis pes? cur imperator esse conaris, cum relatus sis in numerum militum? & alibi jubet Sapientia, Ne sis velox in sermonibus, ne, cum sis pauper,*
una

una cum divite extendaris, nec quæras sapientibus esse sapientior. Si quis autem præsentem Canonem labefaciens deprehensus fuerit, quadraginta diebus segregetur. Ad quem Canonem hæc habent Zonaras & Balsamon. Ille quidem ait: Ordinem ab unoquoque, in quem vocatus es, retinendum, divino oraculo admonemur: idem hic quoque Canon præcipit, Laicumque hominem neque publice disputationem de fide instituere, neque docendi sibi munus usurpare; verum quibus ea docendi cura demandata est, silentio attentas aures præbere jubet. Unicum est enim Ecclesiæ corpus, quod ex multis membris perficitur, ut divinus Apostolus docet; deinde Theologi verba hoc Apostoli verbum interpretantis subnectit; tum illa quoque Sapientiæ subjicit, Ne sis velox in loquendo, & quæ sequuntur. Qui vero Canonem non obtemperaverit; quadraginta dierum segregatione mulctari placet. Balsamon vero: Populum Domini docere & divina Decreta interpretari solis Antistitibus a divini Spiritus gratia concessum est, & iis, quibus ab illis permissum est. Ut est ergo verissimile, quidam Laici, & forte etiam docti, de quibusdam Ecclesiasticis argumentis disputabant, & quamdam auctoritatem docendi præse ferebant; divini ergo patres hoc prohibentes statuerunt, ne quid amplius ejusmodi fieret, & ne Ecclesiæ ordo confunderetur. Sed quoniam, inquit, Deus ex diversis membris Ecclesiam suam stabilivit & erexit, & constitutum est, ut Laici docerentur, non docerent, debent potius aurem do-

centibus præbere, quam linguam movere, ac multos offendere, & eis scandali causam præbere, & unusquisque manere in quo vocatus est ordine, ut dicit Sacra Scriptura, &c. Illustrius autem ejus rei exemplum suppeditat beatus Leo epist. 62. ad Maximum Antiochenum Episcopum, scribens in hæc verba: Illud quoque dilectionem tuam convenit præcavere, ut præter eos, qui sunt Domini Sacerdotes, nullus sibi jus docendi & prædicandi audeat vendicare, si ve sit ille Monachus, si ve sit Laicus, qui alicujus scientia nomine gloriatur; quia etsi optandum est, ut omnes Ecclesia filii quæ recta & sana sunt sapiant, non tamen permittendum est, ut quisquam extra Sacerdotalem ordinem constitutus gradum sibi Prædicatoris assumat: cum in Ecclesia Dei omnia ordinata esse conveniat, ut in uno Christi corpore & excellentiora membra suum officium impleant, & inferiora superioribus non resulent. Quæ verba repetit Epist. 63. ad Theodoricum Cyri Episcopum data. Ceterum ex hisce verbis B. Leonis colligere est, prohibitum quoque fuisse Monachis Conciones habere. Ratio est, quia antiquitus Monachi intra Laicorum ordinem censebantur, ut signanter notant Conones Concilii Chalcedonensis II. & VIII. & S. Hieronymus Epist. ad Heliodorum, & ad Pammachium, & ad Riparium.

CA-

CAPUT XIII.

Laicis quandoque permissum ex justa ac laudabili causa publice concionari, ipso tamen iubente vel permittente Episcopo. Religiosis prima dumtaxat tonsura insignitis id ipsum a Romanis Pontificibus aliquando indultum.

QUamvis igitur satis constet, Laicos; & Monachos etiam, quod e Latinorum numero essent, vetitos olim publice concionari, negari tamen non potest, quin iisdem licuerit interdum, aut privatim de rebus vel fidei, vel ad animæ utilitatem spectantibus differe-re; aut etiam publice ex justa aliqua & laudabili causa, ipso iubente vel permittente Episcopo.

Primum quidem aperte colligitur ex iis, quæ ad Trullanæ Synodi Canonem 64. tradiderunt Zonaras & Balsamon? etenim is de Laico loquens: *Privatim* (inquit) *tantum* interroganti respondere, ac proposita ab eo quæstioni docendo satisfacere sine fraude licet. Balsamon autem ait in hunc modum: *Recte adjectum est illud, publice; si quis enim privatim de aliqua Decreti materia, vel de alia ad animæ utilitatem pertinente causa in-*
terro-

terrogetur, non prohibebitur id, quod sibi videtur, respondere.

Posterius vero fit ex eo perspicuum, quod, cum primis Ecclesiæ temporibus pauci essent Presbyteri, & sæviante persecutione haud ita facile reperirentur idonei homines, qui doctrina sua & prædicatione prodesse fratribus possent, aliquibus Laicis id munus adsignabant aliquando Episcopi, ut & auctoritate & exemplis probat Nicephorus Callistus Eccles. Hist. lib. 5. cap. 14. iis verbis: Cum Casarea degeret (Origenes,) Episcopi Palastini legatione quoque ad eum missa ei permiserunt, ut de Sacris Literis differeret, & publice eas in Ecclesia interpretaretur, quamvis nondum presbyteri honorem esset consecutus: id quod comprobatur ex scriptis iis, qua Demetrius male erga Originem affectus Episcopis Palastinis misit; in quibus scriptis, præter alia, illud erat. Numquam ante auditum, numquam factum esse, ut præsentibus Episcopis Laici concionarentur: quapropter illi, & potissimum Alexander Hierosolymitanus & Theoctistus Casariensis Antistites, defensionem ejus rei ad eum scripserunt, non vera illum dicere adseverantes: ubi enim, inquiunt, reperiuntur idonei homines, qui doctrina sua prodesse fratribus possint, si illi sanctorum Episcoporum jussu & permissione per cohortationes ad populum verba faciant, id offendiculo non est, sicuti apud Sarandos Evelpis a Neone, Iconii Paulinus a Celso, Synada Theodorus ab Attico, omnibus illis beatis fratribus invitati fecerunt.

runt. Et subdit: *Verisimile autem est, in aliis quoque locis, quod nos ignoramus, itidem esse factum.*

Sane quandoque, ut hoc etiam strictim admoneram, indulsit Romanus Pontifex justas ob causas plerisque Religiosis, ut, licet ad sacros ordines nondum promoti, possent tamen publice concionari; quemadmodum anno Domini 1584. Gregorius XIII. fecit, concedens id posse fieri a Societatis Jesu Clericis primumtaxat tonsura insignitis. Id quod ab aliis quoque Pontificibus & eidem Societati, & aliis etiam Religiosis singulari beneficio non semel indultum scimus.

C A P U T XIV.

Sacra olim Conciones fuerunt nonnumquam ab uno quidem compositæ, ab alio autem pronuntiata. Ethnici etiam Oratores scripserunt interdum Orationes, quas alii dicerent.

Lucium Ælium, virum eruditissimum & Græcis literis & Latinis, scripsisse non semel Orationes, quas alii dicerent, narravit nobis Cicero in libro de Claris Oratoribus his verbis: *Scribebat Orationes, quas alii dicerent: ut Qu. Metello F. ut Qu. Capioni, ut Qu. Pompeio Rufo.*
Atque

Atque ex hoc etiam Stilonis cognomen invenisse, auctor est Sveconius Tranquillus in libro de Illustribus Grammaticis & Rhetoricis; inquit enim: *Lucius Ælius cognomine duplici fuit; nam & Præconinus, quod pater ejus Præconium faceret, vocabatur; & Stilo, quod Orationes nobilissimo cuique scribere solebat: ducto scilicet nomine ab eo, quod est stilus, qua significatione stilum dixit Cicero artificem esse, effectorem, ac magistrum dicendi optimum.*

Inter veteres etiam Christianos extitisse, qui sacras componerent Conciones, quas alii deinde pronuntiarent, gravissimorum ac certissimorum Auctorum testimonio comprobabo. Eas certe aliquando, non viva Auctoris voce, sed per Notarios populo recitatas, Magni Gregorii verba & ex Prologo Libri Quadräginta Homiliarum, & ex ejusdem Libri Homilia 21. desumpta planissime docent: quos locos quamquam antea aliam in rem cap. 3. produxerim, tamen ad hujus etiam veritatis firmitatem hic iterum subicere non gravabor. *Inter sacra Missarum sollemnia (inquit Gregorius in ejus Libri Prologo) ex his quæ diebus certis in hac Ecclesia legi ex more solent, S. Evangelii quadraginta lectiones exposui; & quarundam quidem dictata expositio assistenti plebi est per Notarium recitata, quarundam vero explanationem coram populo ipse loquutus sum. In Homilia vero 21: Multis vobis lectionibus, Fratres carissimi, per dictatum loqui*

qui consuevi, sed quia lassescente stomacho ea; quæ dictaveram, legere ipse non possum; & quosdam vestrum minus libenter audientes intueor, unde nunc a memetipso exigere volo contra meum morem, ut inter sacra Missarum solemnia lectionem Sancti Evangelii, non dictando, sed colloquendo edisseram; sicque excipiat ut loquimur: quia colloquutionis vox corda torpentia, plusquam sermo lectionis excitat, & quasi quadam manu sollicitudinis, ut evigilent, pulsat. Narrat hæc eadem Joannes quoque Diaconus in ipsius Gregorii Vita sic scribens lib. 2. cap. 18. Per quas (stationes) & ipse simul discurrens, dum adhuc eloqui prævaleret, viginti Homilias Evangelii coram Ecclesia diverso tempore declamavit. Reliquas vero ejusdem numeri dictavit quidem, sed lassescente stomacho languore continuo aliis pronunciandas commisit. Et in libro 4. cap. 74. iterat eadem iisdem præne verbis, ait enim: Dum adhuc Gregorius ad loquendum voce statuque sibi sufficeret, per stationes discurrens, viginti Homilias Evangelii diverso tempore coram populo declamavit. Reliquas vero ejusdem numeri dictavit quidem, sed lassescente stomacho languore continuo aliis pronunciare permisit.

Diaconorum etiam voce fuisse interdum sanctorum Patrum Homilias publice recitatas, planum antea feci ex Concilio Vasensi II. Canone 2. in quo ita cautum fuit: Si Presbyter aliqua infirmitate prohibente per se ipsum non potuerit prædicare,

dicare, sanctorum Patrum Homilia a Diaconibus recitentur, &c.

Quin ipsosmet Episcopos nonnumquam eorumdem Patrum Homilias plebi pronunciasse, satis intelligimus ex eo Remensis Concilii capite, quod a Burchardo Decreti libro 1. cap. 196. in hæc verba refertur: *Episcopi Sermones & Homilias sanctorum Patrum, prout omnes intelligere possint, secundum proprietatem linguæ prædicare studeant.*

Sed & aliquos consuevisse aliquando, ut suas, pronunciare aliorum Homilias, facile credet quicumque eorum meminerit, quæ & de Cyrillo Alexandrino Episcopo, & de Salviano Massiliensi prodidit Gennadius; & oculos adjecerit ad Ilidori Pelusiotæ Epistolæ, sacrasque legerit Ennodii Ticinensis Episcopi Dictiones. Ac Cyrillum quidem Alexandrinum multas Græcæ totius Episcopis scripsisse Homilias, attestatur Gennadius in libro de Illustribus Ecclesiæ Scriptoribus cap. 57. *Cyrillus (inquit) Alexandrinæ Ecclesiæ Episcopus Homilias composuit plurimas, quæ ad declamandum a Græcis Episcopis memoriæ commendantur.* De Salviano hæc narrat idem Gennadius ibidem cap. 67. *Salvianus Massiliensis Ecclesiæ Praesbyter scripsit scholastico & aperto sermone multa, ex quibus ista legi, de virginitatis bono, &c. Homilias Episcopis factas multas, &c. Quæ verba mutuatus Honorius in libro de Luminaribus Ecclesiæ cap. 67: Salvianus (ait) Massi-*

Massiliensis Ecclesiæ Presbyter scripsit scholastico & aperto sermone multa, id est, Homilias Episcopis multas, & Sacramentorum plures. Isidorus vero Pelusiota Orationem scripsit, quam Dorotheus vel dixit ipse, vel ab alio dici mandavit: fuit autem illa, dum diceretur, ab audienti populo magnis plausibus excepta. Isidori verba id exprimentia sunt hæc in Epistola 382. libri 3. Et si, ut abs te scriptum est, Oratio (quam nimirum Dorotheo miserat publice pronunciandam) plausum peperit, at etiam Orationi plausus robur comparavit, quippe qui parenti adminiculi loco fuerit. At quoniam sæpenumero usuvenit, ut plausus Orationi quidem robur compareret, verum Oratoris mores inficiat ac labefactet, ad supinitatem videlicet ac socordiam eum, tamquam porrecta manu, ducens; prudentiam tuam moneo, maxime quidem ut Deo, qui hujusmodi gratiam largitus est, gratiam habeas; quod si etiam laudare vis, negas enim fieri posse, ut Orationi plausus tandem non rependatur, Orationem quidem arbitratiuo laudans, ne nimias adversum me laudes contexas, ut me supinum atque ignavum reddas. Ennodius tandem (id quod etiam ab eruditissimo viro Jacobo Sirmondo adnotatum fuit) Sacram secundam scripsit ipse quidem, sed ut gratiam iniret ab Honorato Novariæ Episcopo, qui eam pronunciavit ut suam. Tertia etiam ab Ennodio composita est, sed a Stephano Vicario recitata. Ipsamet autem earundem Sacra-
rum

rum Inscriptio hoc idem haud obscure indicat; etenim secundæ titulus is est, *Dictio missæ Honorato Episcopo Novariensi in Dedicatione Basilicæ Apostolorum, ubi Templum fuit Idolorum*. Tertia vero ita inscribitur; *Dictio data Stephano V. S. Vicario dicenda Maximo Episcopo*. Verba enim illa, *Missæ, Data, Dicenda* satis revincunt, scriptas illas quidem ab Ennodio, sed ab aliis deinde dictas. Extant aliæ id genus nonnullæ Dictiones apud eundem Ennodium, quas qui legit, fatebitur proculdubio, ab ipso fuisse certe elucubratas, sed ab aliis omnino pronunciatas.

C A P U T X V.

Conciones ut plurimum quidem memoriter, aliquando tamen de scripto recitatae a Concionatore. Per dictatum loqui idem est, ac de scripto dicere. Contenta & permanenti voce pronunciati Sermones. qui de scripto; flexibili autem & remissa, qui memoriter recitari solebant.

Possent id, quod primo loco posui, multis, vel innumerabilibus potius veterum Auctorum testimoniis confirmare; sed non est sane, cur suscipiatur hic labor, cum res sit ex
toto

toto manifesta. Quam ob causam ea dumtaxat adscribam, quæ veterem de scripto concionandi consuetudinem aliquatenus designant. Habemus autem illius idoneum adsertorem & vindicem beatum Augustinum in Sermone 6. de Sanctis; (nisi mavis Fulgentium appellare, sunt enim qui putent Fulgentium hujus Sermonis Auctorem.) Ejus, quicumque tandem ille sit, siue Fulgentius, siue Augustinus, ista sunt in hanc rem ad Auditores verba: *Quoniam video nostras Disputationes graphio ceraque ligari, & nequaquam sumus idonei lectitare, adjuvate me-ipsam quæso intercessu vestro.* Cur enim eam vocem, *lectitare* (quam quidem agnoscunt non modo impressi omnes, verum etiam, quotquot vidi, manu scripti Codices: quidquid scriptum reliquerit vir doctus Carolus Regius in suo Oratore Christiano, ex sola conjectura, qua nihil incertius; adfirmans; pro verbo *lectitare*, *dictare* esse substituendum) usurpasset eo loco Augustinus, siue Fulgentius, nisi interdum Conciones de scripto pronunciarentur? Extat etiam illustre hujus rei exemplum apud Magnum Gregorium in adducta semel atque iterum Homilia 21. ex Libro Quadraginta Homiliarum: narrat enim ibi Gregorius, solemne sibi fuisse, dum Concionem haberet, per dictatum loqui; additque; ob languentem stomachum jam legere se non posse, quæ dictaverat; ac proinde velle se Evangelicæ lectionis explanationem; non am-

O plus

plius per dictatum, sed per familiares collo-
 cutiones pronunciare. Per dictatum autem loqui,
 nihil aliud fuisse Gregorio, quam de scripto di-
 cere, ex eo perspicuum fit, quod verbo *dicta-
 re*, pro *scribere*, passim usi sunt veteres Aucto-
 res; Sidonius Epistola septima libri primi, un-
 decima quarti, ultima septimi, sexta octavi,
 tertia noni; Aldhelmus de laudibus Virginitatis
 cap. 7. Gregorius Magnus lib. 10. Epistola-
 rum, Epistola 22. ad Joannem Ravennæ Sub-
 diaconum, & Epistola ad Leonardum, quæ
 præmittitur Expositioni in Job; & alii: usu ni-
 mirum ex prisco more petito, quo Auctores
 olim, ut est apud Plinium in Epistolis non uno
 loco, Notariis dictare consueverant, Vox præ-
 terea, *legere*, qua usus est Gregorius, hoc ip-
 sum aperte confirmat: ea enim dumtaxat legere
 possumus, quæ scripta sunt & ante oculos po-
 sita. Verba Gregorii, quæ subobscura quidem
 videbantur, sed, hac adhibita interpretatione,
 plana & perspicua facta sunt, apponam, *Mul-
 tis* (inquit) *vobis lectionibus, Fratres carissimi,*
per dictatum loqui consuevi; sed quia lassescens
stomacho ea, quæ dictaveram, legere ipse non pos-
sum, & quosdam vestrum minus libenter audien-
tes intueor; unde nunc a memetipso exigere volo
contra meum morem, ut inter sacra Missarum so-
lemnium lectionem Sancti Evangelii, non dictando,
sed colloquendo edisseram. Hucusque beatus Gre-
 gorius, qui, dum ait, a semetipso exigere velle
 contra

contra morem suum, ut inter sacra Missarum
 sollemnia lectionem Evangelij, non per dicta-
 tum, sed per colloctionem edisserat: demon-
 strat utique, solitum se maps in concionando
 Sermones suos de scripto, quam ex memoria
 recitare.

. Ex hoc eodem Gregori loco illud præterea
 discimus, a re in qua versamur, minime alie-
 num; alia quidem vox, contenta nimirum &
 permanenti, eos fuisse pronunciatos Sermones,
 qui de scripto; alia hoc est, flexibili ac remis-
 sa, qui memoriter recitari solebant; quales ni-
 mirum voces depiciunt locutio & lectio. In-
 quit enim Gregorius: *Languere se stomacho ac*
debilitatum esse si per dictatum, id est, de scri-
pto, dicere velit; firmum autem satis ac robor-
atum, si ex memoria per familiares colloctio-
nes.



CAPUT XVI.

*Patres olim non raro ex tempore concionati:
Dicendi ex tempore fontem apud Ethni-
cos quis primus aperuerit. Divina appella-
ta fuit extemporalis hæc facultas. Fre-
quenti ea usu assiduaque exercitatione com-
paratur.*

Illud etiam nosse hoc loco nec injucundum
erit, nec inutile, Sacras olim Conciones,
fuisse illas quidem ut plurimum, meditatas ac
elaboratas, interdum tamen etiam sine studio
& ex tempore dictas. Prioris consuetudinis
probationem, cogitatas eas nimirum & elucu-
bratas fuisse, non est, quod a me quisquam
expectet: quicumque enim oculos adjecerit ad
sanctorum Patrum, Gregorii præsertim Nazian-
zeni, Basilii, Athanasii, Nysæni, Chrysosto-
mi, Gaudentii, Ambrosii, Augustini, Chry-
sologi, Leonis, sive Orationes, sive Homilias,
aut Sermones, is certe, vel me tacente, co-
gnosceret, cura eas & vigiliis fuisse elaboratas, ut-
pote omnibus sententiarum atque verborum lu-
minibus distinctas. Posterioris vero testimonia
si quis requirat, ea & clara suppeditabunt Au-
ctores iidem illi, quos modo supra nominavi,
aliique

aliique Ecclesiastici Scriptores. Sed hoc aptius meo iudicio docebitur, si pauca prius & ea summam subjecero de extemporali dicendi facultate.

Gorgiam itaque Leontinum primum subita ac fortuita Orationis aperuisse fontem, auctor est Cicero in lib. primo de Oratore, & in 2. de Finibus, cum ait: *Ausum hunc primum in conventu poscere questionem, id est, libere dicere, qua de re quis vellet audire.* Divina porro appellata fuit hæc dicendi facultas, ut est apud Philostratum in Æschine, quod supra mortalitatem esse quadammodo videretur, qui posset apposite dicere ex tempore. Recte igitur dictum a Quintiliano libro 10. cap. 7. Maximum studiorum fructum esse ac veluti præmium quoddam amplissimum longi laboris extemporalem hanc dicendi facultatem. Sed hac super re satis: nihil enim prætermittere, seu commemorare omnia, minime quidem in præsentia necessarium; itaque redeo ad institutum.

De Origene itaque, ut ab hoc initium sumam, prodidit Eusebius in Historia Ecclesiast. lib. 6. cap. 26. assidua exercitatione longoque usu tantam eum fiduciam in concionando consecutum, eamque vim, copiam, & facultatem Orationis adeptum, ut & publice magna omnium admiratione diceret ex tempore, & pateretur etiam excipi a Notariis, quæ hoc modo funderet. *Quo tempore* (ait Eusebius prout il-

lum Latine loquentem nobis exhibet Rufinus) sexagesimum agens Origenes ætatis annum, posteaquam & usu, & periculis, & laboribus plurimum fiduciæ in Verbo Dei acceperat, permisisse fertur ea; quæ ex tempore in Ecclesiis differebat, a Notariis excipi; nec ante umquam dedisse hanc copiam, nisi cum id sibi & vitæ gravitas, & ætatis maturitas, & multa experientia concessit auctoritas. Cyrillum etiam Hierosolymitanum meditatam concionandi consuetudinem neglexisse interdum, atque adeo illa dixisse, quæ tunc primo Spiritus dabat eloqui illi, ex eo facile intelligimus, quod omnes pæne ejus Catecheses extemporaneæ, seu ex tempore dictæ, inscribuntur, *Sancti Patris nostri* (hæc est primæ Cyrilli Catechesis Inscriptio) *Cyrilli Archiepiscopi Hierosolymitani prima Catechesis, seu Institutio illuminatorum Hierosolymis extemporanea*. Quam formam iisdem pæne verbis retinent omnes ferme aliarum ejusdem Catecheseon Inscriptiones. Beatissimum quoque Chrysostomum non semper meditatum accessisse ad dicendum, præterquam quod satis indicant plures ipsius Homiliæ, in quibus multa respondent iis, quæ casus fortuitus, aut tempus præter expectationem dabat, veluti solito frequentior alacriorque populi conventus, indecora plebis acclamatio, aliudve simile; (id quod non semel Augustino etiam accidisse testatur in ejus Vita Possidius) ex eo præterea liquet, quod, cum esset certior factus Joannes, armatum contra

tra illum ab Imperatoris conjugē Eudoxia Epiphanium, extemporaneam ipsum subito adversus malas mulieres Concionem habuisse scribit Socrates in Hist. Eccles. lib. 6. cap. 14. hoc pacto: *Joanni nuntiatum fuit Imperatricem Eudoxiam Epiphanium contra illum armasse. Ille, utpote natura paulo ardentior, & in dicendo exercitatus promptusque, sine mora apud populum Concionem, qua omnes mulieres acerbe exagitabat, pro suggesto habuit. Idem Chrysostomus ab exilio revocatus, inque Episcopali sede vi gaudentis populi coactus confidere, pace de more annunciata, extemporalem etiam habuit Concionem. Narrauit hæc idem Socrates ibidem: ab illo autem accepta iterarunt Sozomenus in lib. 8. cap. 18. & Nicephorus in lib. 13. cap. 16. Quorum locorum verba ad rei firmitatem subscribam: Multitudo (ait Socrates) prodiit illi obviam; cum summa reverentia ad Ecclesiam recta deducit: orat, ut sedem Episcopalem, capeſſat, moreque consueto pacem populo preteretur. Cum ille recusaret, diceretque, hoc non ante faciendum esse, quam tum causa ejus esset judicio disceptata, tum hi, qui ipsum condemnarant, mutata sententia absolverent, magis incendi cœpit; tanta enim cupiditas eum cum in sede collocatum videndi, tum de integro concionantem audiendi illam incesſerat. Itaque populi concursu res sic confecta est. Cum Joannes esset in sede Episcopali locatus, & de more pacem populo precatus fuisset, coactus necessitate etiam conciona-*

tus est. Hæc Socrates. Sozomenus vero: Tum populus cantilenis pro re nata compositis obviam procedens, cum & ardentes tadas plurimi ferrent, ducunt ipsum (Chrysostrum) ad Ecclesiam, & quamquam reluctantem, & sepenumero asseverantem, oportere prius eos calculum suum revocare, qui contra ipsum tulerant, uti moris est Sacerdotibus, compulerunt illum & populo benedictionem impertiri, & in Episcopali sede considerare. Coactus itaque extemporalem quamdam Orationem habuit, &c. Nicephorus tandem: Vi autem eum plurima cogentes, in sede Episcopali collocarunt, ut pacem populo ex superiore loco annuntiaret & precaretur. His rebus ita ex necessitate quadam actis, Orationem tum quoque ex tempore ad populum habuit, argumentis cum magna gratia apposisis usus. Sed & Suidas adfirmans, magnam ex eo quoque laudem sibi peperisse Chrysostrum, quod extemporales ad populum nullo negotio haberet Conciones, significat utique, solitum eum aliquando ex tempore dicere: quibus autem sententiam suam ostendit, exprimitque ritum nostrum, sunt hæc Suidæ verba in ipsius Chrysostrum Vita: Quodque ex tempore nullo negotio retentus erudiret omnes, linguamque haberet admirabili fluore Orationis exundantem, ipsis etiam abruptis Nil fluctibus fecundiorum, non mediocriter binc illi accrevit suorum de se testium celebritas nominis. De Attico Constantinopolitano Episcopo scriptum reliquit idem Socrates in lib. 7. cap.

cap. 2. crebro eum usu dicendi ac diligentia tantam affecutum audaciam, ut neque invite neque inutiliter ex tempore concionaretur. Primum, (ait) cum Presbyteri gradum obtinuisset, (Atticus) Conciones, quas summo studio confecerat, ad verbum ediscens, in Ecclesia recitavit: postea crebro usu & diligentia maiorem audaciam adeptus, ex tempore concionari cepit, rationemque docendi magis popularem secutus est. Faustum quoque Reientem Episcopum dixisse nonnumquam ex tempore fidem facit Apollonaris Sidonius, cum in lib. 9. epist. 4. scribit in hunc modum: *Licet Prædicationes tuas, (Faustum ipsum alloquitur Sidonius) nunc repentinas, nunc; cum ratio poposcerit, elucubratas, rancus plosor audierim; tunc præcipue, cum in Lugdunensis Ecclesiæ dedicatæ festis hebdomadalibus Collegarum sacrosanctorum rogatu exorareris, ut perorares.* Repentinæ enim Conciones ex sunt proculdubio, quæ subito & ex tempore solebant haberi; elucubratae vero, quas multum ac diu, antequam haberet, meditabatur Faustus. Hanc porro eandem veritatem ex eo præterea planissime licet intelligi, quod ex illa quandoque lectione dicendi argumentum sumebant Concionatores, quæ Lectori Codicem fortuito aperienti primum occurrisset, id quod a nobis supra in lib. 1. c. 18. demonstratum est. Certum autem est, dicenda non potuisse diu meditari Concionatores, cum fortuita & subita dumtaxat lectio dicendi argumen-

mentum tunc primo suggereret, nec multum temporis in legendo consumeretur a Lectore. Adductis vero a me in hanc rem primo libro placet nunc subicere illud Origenis factum, de quo meminere Suidas & ante Epiphanius; ritus autem noster ex illo mire comprobatur: rogatus enim Origenes ab Hierosolymorum Sacerdotibus ac pæne coactus Sermonem habere, ex iis verbis dicendi argumentum sumpsisse dicitur, *Peccatori autem dixit Deus, Quare tu enarras justitiam meam, & assumis testamentum meum per os tuum?* In quæ verba aperiens Psalmorum Librum fortuito inciderat. Origenes (inquit Suidas in Origene,) *rogatus ac pæne coactus a Sacerdotibus Hierosolymorum Sermonem habere; aperiens Librum, ubi ea verba elocutus est, Peccatori autem dixit Deus, Quare tu enarras justitiam meam, & assumis testamentum meum per os tuum? complicavit Librum, & sedit cum ejulatu lacrymans, omnibus una cum eo ejulantibus.* Hoc ipsum ante Epiphanius in Panario contra Hæresim 64. ita prodiderat: *Cum itaque pervenisset ad Hierosolyma (Origenes), velut talis enarrator & eruditus vir, compellebatur a Sacerdotibus in Ecclesia docere; & cum multum coegissent ipsum hi, qui tunc in Hierosolymis Sacerdotum sancta Ecclesiæ administrabant, surrexit, & dictum hoc sortum Psalmi 49. prolocutus, totam distinctionem præteriiit: sic autem dicit Psalmus, Peccatori dixit Deus, cur tu exponis justificationes meas, &*
adu-

assumis testamentum meum per os tuum? & complicatum Librum deposuit, & cum fletu ac lacrymis confedit, omnibus simul cum ipso plorantibus. Certe nihil aliud extra hunc unum ritum illa etiam declarant, quæ habent & de se-ipso Magnus Gregorius Homilia 14. in Ezechielem, & de Augustino Possidius in ejus Vita: is enim ait, multa se plerumque intra ipsam Concionem coram populo assecutum, quæ domi meditans intelligere nequaquam potuerat: alter vero affirmat, ea dixisse interdum Augustinum inter concionandum cum Auditorum utilitate, de quibus nihil omnino dicere decteverat. Gregorii verba sunt ista: *Ne quidam me fortasse tacita cogitatione reprehendant, qui Ezechielis Prophetæ tam profunda mysteria a magnis Expositoribus intenta discutere præsumo, qua mente id faciam agnoscant. Non enim hoc temeritate aggredior, sed humilitate. Scio enim, quia plerumque multa in sacro eloquio, quæ solus intelligere non potui, coram fratribus meis positus intellexi. Ex quò intellectu & hoc quoque intelligere studui, ut scirem, ex quorum mihi merito intellectus daretur. Patet enim, quia hoc mihi pro illis datur, quibus mihi præsentibus datur. Ex qua re largiente Deo agitur, ut sensus crescat, & elatio decreseat, dum propter vos discō, quod inter vos doceo; quia verum fateor plerumque vobiscum audio, quod dico. Apud Possidium autem sic scriptum est: Scio ego, non solum ipse Possidius, qui Vitam hanc conscripsi, ve-*

um

rum etiam alii fratres & conservi, qui nobiscum tunc intra Hipponensem Ecclesiam cum eodem sancto viro vivebant, nobis pariter ad mensam constitutis cum dixisse: *Advertistis hodie in Ecclesia meum Sermonem, ejusque initium & finem contra meam consuetudinem processisse; quoniam non eam rem terminatam explicuerim, quam proposueram; sed pendentem reliquerim?* Cui respondimus: *Ita nos in tempore miratos scimus & recognoscimus. At ille, Credo, ait, quod forte aliquem errantem in populo Dominus per nostram oblivionem & errorem doceri & curari voluerit, in cujus manu sunt & nos & Sermones nostri; nam cum propositæ questionis latebras pertractarem, in alium Sermonis excursum perrexi, atque, non conclusa vel explicata questione disputationem terminavi magis adversus Manichæorum errorem, unde nihil dicere decreveram, disputans de iis, quæ asserere proposueram.* Hæc Possidius. Igitur palam factum est, ea nonnumquam dixisse Patres in concionando, quæ minime cogitarent, aut pararent, sed quæ vel fortuita lectio subito obtulerat, vel casus aut etiam tempus præter expectationem suggererat. Ex quibus, ex tempore eos quandoque concionatos, tum vere, tum necessario videtur consequi. Excutiam nunc illa, quæ eorundem Patrum sive stationem, sive sessionem in concionando vel statuent, vel certe non obscure indicabunt.

CAPUT XVII.

Stantes-ne, an sedentes dixerint olim Concionatores. Hebræorum, ac Ethnicorum consuetudo. Perpenſa Aquinatis Thomæ ſententia. Sedentes quidem interdum, communiori tamen more ſtantes locuti ſunt antiqui Patres, niſi aut ſenectus aut valetudo minus id paterentur.

Cum Eccleſiaſtici pæne omnes in concionando ritus, ut eſt ſupra non ſemel adnotatum, ex iſtis Hebræorum fontibus manarint, non erit abs re, opinor, ſtatuerè; Starent-ne, an ſederent iſti Hebræi, dum Legem populo explicarent, moresque dicendo formarent. Stetiſſe quidem eos, indicat haud obſcure Eſdras lib. 2. cap. 8. ita ſcribens: *Stetit Eſdras Scriba ſuper gradum ligneum, quem fecerat ad loquendum, & aperuit librum toram omni populo; ſuper uniuerſum quippe populum eminebat; & cum aperuiſſet eum, ſtetit omnis populus, Levitæ ſilentium faciebant in populo ad audiendam Legem, populus autem ſtabat in gradu ſuo, &c.* Et lib. 3. cap. 9. *Et ſtetit Eſdras Sacerdos & Lector Legis ſuper ligneum tribunal, quod fabricatum fuerat;*

&

& steterunt ad eum Mathathias, & Samus, Ananias,
 Azarias, Urias, Ezechias, & Balsamus ad dexte-
 ram; & ad sinistram Faldens, Misael, Malachias,
 Abushtas, Sabus, Nabadias, & Zacharias. Et as-
 sumpsit Esdras librum coram omni multitudine; præ-
 sidebat enim in gloria in conspectu omnium. Ha-
 tetenus Esdras, ex cujus locis, ut singulos
 Hebræorum in dicendo mores data occasione
 summam saltem attingam, quatuor potissimum
 huc facientia colligo. Primum est; Populo au-
 dire Legis explicationem parato silentium impe-
 rari consuevisse; inquit enim Esdras; *Levita si-*
lentium faciebant in populo ad audiendam Legem.
 Quod etiam ex cap. 13. Actorum potest intelli-
 gi, ubi dicitur; *Surgens autem Paulus, & ma-*
nu silentium indicens, &c. Ad quem locum ait
 Chrysostomus solemnem fuisse tum morem Ju-
 dæis. Alterum; Sterisse populum, dum Lex
 exponebatur; subjungit etenim Esdras; *Et cum*
aperuisset librum, stetit omnis populus. Et paulo
 post: *Populus autem stabat in gradu suo.* Ter-
 tio; In ipso Templo, aut Synagoga, non nisi
 ex editiori loco fuisse Legem explicatam, ut Scri-
 ba nimirum & conspici ab omnibus & audiri
 commodius posset; Stetit (ait Esdras) *Scriba*
super gradum ligneum, quem fecerat ad loquendum.
 Et iterum; *Stetit Esdras Sacerdos & Lector Legis*
super ligneum tribunal, quod fabricatum fuerat;
præsidebat enim in gloria in conspectu omnium. Ul-
 timum est; Adstitisse viros aliquot ad hujus-
 modi

modi tribunal, Scribamque Legem interpretantem custodisse. Etenim, *Steterunt* (inquit) *ad eum Mathathias, & Samus, Ananias, Azarias, Urias, Ezechias, & Balsamus ad dexteram; & ad sinistram Faldens, Misael, Malachias, Abushas, &c.* Quos omnes in dicendo ritus a Synagoga profectos ad Ecclesiam manasse, & supra adnotatum est, & infra suo loco docebitur. Ut itaque redeam ad id, a quo me Esdræ verba non-nihil averterant, steterisse Judæos, dum publice verba facerent, commemoratum beati Pauli exemplum satis aperte docet; inquit enim Lucas Actorum cap. 13. *Surgens autem Paulus, & manu silentium indicens, de Christi adventu disserere cepit.* Colligiturque etiam ex ejusdem Pauli Epist. prima ad Corinthios, in qua cap. 14. ita habetur: *Quod si alii revelatum fuerit sedenti, prior taceat; quasi dixisset Paulus, ut ad eum locum præclare adnotavit Ambrosius Catharinus: Quod si revelatum fuerit ei, qui sedens audiebat, prior, id est, qui stans loquebatur, taceat. Ita ut dicenti, quod staret, sedentem opponat beatus Paulus.*

Communiori tamen ritu sedisse Judæos Legem in Synagogis explicantes, populique mores publice formantes, ex eo manifeste constat, quod Matthæi capite 23. & *Cathedra Moysis* hac in re nominatur, & sedisse super eam Scribæ & Pharisei dicuntur. Hinc Ambrosiaster seu Hilarius Ecclesiæ Romanæ Diaconus (quod semel monuisse sufficiat) ad caput 14. primæ ad Corinth. scriptum reliquit,

quit, Judæos in Synagogis non nisi sedentes docere solitos, seniores quidem dignitate in cathedris, sequentes in subseiliis, novissimos vero in pavimento super mattas. Christus etiam Dominus Lucæ capite 11. *inventus est in Templo inter Doctores sedens & docens*. Et cap. 14. *Cum in Synagoga Isaia librum stans perlegisset, docturus populum sedit*. Matthæi v: *Docturus in monte sedit*. Lucæ vi: *Sedens docuit de navicula turbas*. Joannis viii: *Sedens docuit in Templo populum*. Et Matthæi xxvi: *Quotidie sedens docebat in Templo*. Quod autem legitur Joannis cap. vii. stetisse Jesum die magno festivitatis, & clamasse; videtur id factum, vel quod ob populi multitudinem majori conatu & voce esset opus, cui rei statio proculdubio commodior est, quam sessio; vel quod ex media multitudine, hoc est, ex non consueto habendis Concionibus loco, verba fecisset Jesus.

Ethnicos utique Oratores, ut hoc etiam obiter admoneam, non nisi stantes dixisse, ex eo facile crediderim, quod præcipiat Cicero, dum suum format Oratorem, ut sit illius status erectus & cellus, rarus incessus nec ita longus, excursio moderata, eaque rara.

Jam vero constituta Ecclesia Christiana, variam fuisse hac in re Patrum consuetudinem, quæ mox suggeram, non obscure significant. Beatus Thomas ad Joannis caput 7. cum dixisset, Christum Dominum, sedentem interdum, interdum stantem

stantem docuisse; & sedentem quidem discipulos, stantem autem turbas: subdit: ideo inolevisse in Ecclesia consuetudinem, ut turbis verba fiant stando, Religiosis autem & Clericis sedendo: ejusque rei assignans rationem; ait: *Prædicatio ad turbas, cum sit quasi ad eas convertendas, fieri debet per modum exhortationis, quæ stationem omnino requirit; ad Clerum vero, cum existat jam in domo Dei, est veluti quadam commemoratio, quæ videtur sessionem dumtaxat admittere.* Eadem repetit ad caput 5. Matthæi. Sed revera cum Christus Dominus, ut supra dictum est, & in templo sedens docuerit, ubi non discipuli solum, sed etiam turbæ aderant: & de navicula ad turbas sedens verba fecerit; videtur beatus Thomas facti potius congruam rationem, quam probabilem consuetudinis originem, eo loco indicasse.

Stetisse porro antiquos Ecclesiæ Concionatores, designat beatus Chrysostomus Homilia 16. ad populum Antiochenum, dum ait: *Nisi multam a patribus necessitatem sustinuissem, neque surrexissem, neque locutus fuisset, dolore obtenebratus ex pusillanimitate vestra.* Cum enim, ut verba faciat ad populum, surgendum sibi adfirmet Chrysostomus, significat certe consuetum standi morem inter dicendum. Sed apertius exprimit hoc idem Homilia 33. in caput 10. Matthæi iis verbis: *Causa tui rectus stat Doctor, laboribus & afflictionibus affectus: qua igitur te excusabis ratione,*

tione, si ne ad audiendum quidem paratum animum ei præbueris? Nec obscure indicat eundem ritum beatus Augustinus Sermone 122. de Diversis, cujus ipsa verba promam: *Quamquam* (ait) *propter commoditatem depromenda vocis altiore loco stare videamur, tamen in ipso altiore loco vos judicatis, & nos judicamur. Doctores dicimur, sed in multis Doctorem querimus, &c.* Et Concione 2. in Psalmum 32. prope finem: *Adhuc quidem spectatores in amphiteatro forte insaniunt, & in sole sedent, & nos, si stamus, tamen in umbraculo sumus, & utiliora & pulchriora sunt quæ spectamus.* Et Tractatu 19. in Joannis Evangelium: *Nostis, Fratres, quia ad panem ventris cum labore pervenitur, quanto magis ad panem mentis? Cum labore statis & auditis, sed nos cum majore stamus & loquimur.*

Sedisse tamen veteres Patres in suis ad populum Concionibus habendis, eorundem Chrysostomi & Augustini testimonia non uno loco declarant. Chrysostomus quidem Homilia prima de Pœnitentia hæc habet: *Restant quidem plura, sed hæc sobrius ad correctionem sufficiant; quare necesse orationem suppressere, nam cupio Patris audire vocem: quoniam ipsi quidem pastoralis pueri subtili calamo sibilamus, veluti sub quercu aut fago quadam ad umbram satorum horum sedentes; hic autem, veluti Musicus optimus auream citharam modulatus, sonorum consonantia universum excitat theatrum.* Augustinus vero libro Quinquaginta Homiliarum Homilia 28: *Quid volo, (inquit) quid de-*

desidero, quid cupio, quare loquor, quare vivo, nisi hac intentione, ut cum Christo simul vivamus? Et Sermone 49. de Diversis: Ut ergo vos non diu teneam, præsertim quia ego sedens loquor, vos stando laboratis. Et libro de Catechizandis Rudibus cap. 13. ait: Longe consultius in quibusdam Ecclesiis Transmarinis non solum Antistites sedentes loquuntur ad populum, sed ipsi etiam populo sedilia subjacent, ne quisquam infirmior stando lassatus a saluberrima intentione avertatur, aut etiam cogatur abscedere. Solemnem autem ejusdem Chrysostomi morem fuisse, ut in ambone sedens ad populum verba faceret, tradunt disertis verbis Cassiodorus & Nicephorus Callistus. Post paucos dies (ait ille in Tripartita lib. 10. cap. 4.) cum ipse Eutropius offendisset Imperatorem, inter refugas erat apud Ecclesiam; Episcopus vero (Chrysostomus), Eutropio sub altari jacente, nimioque percusso timore, residens super ambonem, ubi solebat prius facere consuevit Sermonem, Homiliam increpatoriam fecit adversus eum. Nicephorus vero Ecclesiast. Historiæ lib. 13. cap. 4. ita scribit: Ex imperialibus ædibus profugiens (Eutropius), supplex in Ecclesia consedit; tum Joannes absurdum Eutropii conatum arguens, luculentam habuit Orationem in ambone seu suggestu: qui mos ejus erat, cum populum doceret, ut omnes vocem ejus exciperent, sedens. Sed & Optatus Milevitanus hanc sedendi consuetudinem indicat, cum in libro quarto adversus Parmenianum Sacerdotes alloquens

quens ita scriptum reliquit: *Electi estis, qui sedentes populum docetis. Et paulo post: Dum peccatorem arguit, & sedentem increpat Deus, specialiter ad vos dictum esse constat, non ad populum, qui in Ecclesia non habet sedendi licentiam. Et Gregorius Nyssenus Oratione de Sancto Baptismo, dum ait: Nunc agnosce meum gregem, hodie video formam Ecclesie consuetam, quando etiam carnalium curarum posthabito negotio iusta plenitudine ad cultum Dei concurristis, atque adem quidem populus angustam reddit, intra sacra adyta penetrans & irrumpens; quotquot autem ab iis, qui intus sunt, non admittuntur, apum in modum locum externum in vestibulis implent: nam apum alie quidem intus in opere occupata sunt, alie vero foris alveare circumstrepunt: sic igitur facite, o Filii, & nunquam hoc studium deseratis: affectu enim me pastoralis affici fateor, ac volo in hac sublimi specula sedens circa subiectos vertici colles undique congregatum gregem contueri. Quin etiam, cum multi Patres ad finem Concionum exsurgendi verbum usurpent, ut consuetas ad Deum preces una cum populo fundant, videntur huiusmodi sessionem adstruere. Origenes Homilia 20. in Numeros: Et ideo surgentes oremus, ut inveniamus paratum semper istum gladium Spiritus, per quem exterminentur, & semina ipsa, & conceptacula peccatorum. Et Homilia 3. in Isaiam: Revera abstulit opprobrium Iesus, idcirco surgentes oremus Deum, &c. Et Homilia 36. in Lucam:*

Quæ

Qua omnia cognoscentes, & quam multa sint genera regnorum, surgamus, precemurque Deum, &c. Athanasius Homilia de Semente: Ceterum quia & Sermo noster satis processit, surgentes & nos ipsi extendamus manus, &c. Gregorius Nyssenus Concione 5. de Oratione: Verum surgentes dicamus etiam nos ad Deum, Ne nos inducas in tentationem, &c. Denique Chrysostomus Sermo. ne adversus Hæreticos: Itaque, quia ostendimus regiam dignitatem & divinitatem Spiritus, nos cathedra exsurgentes, uno ore & uno corde glorificemus Patrem & Filium & Spiritum Sanctum.

Crediderim itaque, diversis in Ecclesiis diversam quidem fuisse hac in re consuetudinem, ut ex Augustino manifeste colligitur citato paulo ante de Catechizandis Rudibus cap. 13. Communiori tamen fortasse more stantes locutos fuisse antiquos Patres, nisi aut senectus aut valetudo id non parerentur, existimarim. Nam & Augustinus ipse videtur excusationem adferre, quod sederet, tamquam præter consuetudinem,

CAPUT XVIII.

Veterum Patrum prudentia in concionando.

Eam ob causam sacrorum mysteria in conspectu non initiatorum vel silentio prætermissa, vel certe maxima circumspèctione & nonnisi obscuro sermone cum iis communicata. Abstrusæ ac subtiliores quæstiones coram imperita multitudine aut consulto omisæ, aut accommodatæ ad vulgi captum & intelligentiam enunciatae. Hujus silentii ac circumspèctionis seu obscuritatis causa duplex; ut Catechumenorum desiderium magis accenderetur, & ut ipsa mysteriorum dignitas ac majestas sarta tecta ab omni contemptu conservaretur. Quam imprudenter faciant nostri temporis Concionatores, qui altiores quasque ac difficiliores disputationes ad rudium ac imperitorum aures afferunt, ingerunt vanas ac inutiles quæstiones, & in vernacula Concione nihil, nisi quod peregrinam linguam sonet, inculcant.

Culpa

Culpa non solum carere debet, qui alijs verbo & exemplo præire debet, sed & virtutibus omnibus præditus esse: talis certe sic Concionator. Ceterum inter præcipuas virtutes prudentiam imprimis numeret & scientiam opportunitatis idonearum ad dicendum rerum. Quare concionantes & sacrorum mysteria in conspectu non initiatorum vel fitebant omnino, vel certe non nisi circumspectione maxima obscurisque verbis enunciabant; & totos sese ad populi caprum atque intelligentiam quam familiarissime accommodabant. Quæ duo loco ac ordine suo pluribus patefaciam.

Beatus Basilii in Libro de Spiritu Sancto capite 27. de Christianorum doctrina disputans, duas ejus partes facit, Edicta nimirum seu Præconia, & Dogmata: atque hæc quidem magno silentio premenda adfirmat, illa vero apud omnes enuncianda. *Qui in primordiis Ecclesiæ (ejus verba sunt) certos ritus præscripserunt Apostoli & Patres, & in occulto Mentioque mysteriis suam servare dignitatem: neque enim omnino mysterium est, quod ad populares ac vulgares aures effertur. Hæc est ratio, cur quadam citra scriptum tradita sunt, ne dogmatum cognitio propter assuetudinem vulgo veniret in contemptum. Aliud autem est Dogma, aliud Edictum; nam Dogmata silentur, Edicta vero publicantur. Ta porro dogmata hoc loco appellavit Basilii, quæ alii τὰ ἀποκρῆτα dixerunt, hoc*

est, arcana minime evulganda. Quod si necessarium ducerent interdum Patres, hujusmodi mysteria aliquomodo aperire, id profecto circumspeditione maxima, accurataque consideratione, & non nisi obscuris quibusdam & per occultationem prolatis verbis factitabant: quod ea nimirum hoc modo vix aperirentur, cum silentii species sit obscuritas, ut ait ibidem Basilii. *Sunt etiam apud nos* (inquit Gregorius Nazianzenus in Oratione 3. quæ est in Julianum Invektiva 1.) *Sermones quidam non nisi per occultationem proferendi, neque enim inficias iero, &c.* Sed ut propius ad rem ipsam accedamus, Origenes Homilia 3. in Leviticum, cum in mysteriorum Eucharistiæ mentionem incidisset, aures non iniciatorum reveritus, post pauca nec satis aperta de eis verba, silentium sibi imponit, atque sola recordatione intelligi ea debere adfirmat. *Sed de his* (loquitur de Eucharistiæ mysteriis) *non est plura differere, quod recordatione sola intelligi sufficit.* Præclare Cyrillus Hierosolymitanus Cathechesi 6: *Hæc mysteria* (inquit) *sacramentaque nunc patefecit Ecclesia ei, qui ex Catechumenis excedit, nec moris est Gentilibus exponere: non enim Gentili cuiquam de Patre, & Filio, & Spiritu Sancto arcana mysteria declaramus; neque palam apud Catechumenos de mysteriis verba facimus, sed multa sæpe loquimur occulte, ut Fideles, qui rem tenent, intelligant, & qui non tenent, ne ludentur.* Chrysostomi
etiam

etiam ea verba sunt. in hanc rem Homilia 40. in 1. ad Corinthios: *Cupio equidem aperte hoc dicere, non audeo autem propter eos, qui non sunt initiati: ii enim expositionem nobis faciunt difficiliorem, ut qui nos cogant, vel non aperte dicere, aut eis arcana enunciare; sed tamen dicam, quoad ejus a me fieri poterit, teste & adumbrate.* Cyrillus quoque Alexandrinus lib. 7. adversus Julianum ita scriptum reliquit: *Dicerem sane de his (de Baptismi mysteriis) etiam multa alia & vera, demonstrans, per Mosem & Prophetas praefiguratum esse hoc Sacramentum; & non novum, vel nuper ortum, & a nobis inventum, nisi, sicut jam praedixi, revererer non initiatorum aures.* Solent enim minus comprehensibilia a plerisque rideri, quod praeter imbecillitate mentis suae non vident, & omnino nihili faciunt, quae omni admiratione prosequi decebat. Quae autem paulo ante dixerat Cyrillus, haec sunt: *Principium intelligentis fides, & hanc habet expositionem divinum nostrum venerabile Sacramentum.* Ut igitur non, in aures eorum qui non initiati sunt occulta proferens, impingam in Christum dicentem, *Ne detis sanctum canibus, neque projiciatis margaritas vestras ante porcos, profundioribus relictis convertam me nunc potius, &c.* Plane in ea Epistola, quam pro Athanasio scripsit Synodus Alexandriae congregata ex Aegypto, Thebaide, Libya, ad omnes ubique Catholicæ Ecclesiae Episcopos, gravissime insimulantur Meletiani, seu a Meletianis submissi & instructi vi-

ri,

ri quod apud Catechumenos, atque etiam Ethnicos non erubuissent de Eucharistiæ mysteriis Sermones habere. Reperitur ea Epistola in 2. Athanasii Apologia: cujus verba sunt hæc: *Ne pudet eos coram Cathecumenis, & quod pejus est, coram Ethnicis de mysteriis tragicari; cum oporteat, sicut scriptum est, mysterium Regis celare; & ut Dominus præcipit, non esse sancta porrigenda canibus, neque projiciendas margaritas ante porcos; non enim fas est, mysteria non initiatis prodere, ne per imperitiam ea subsannent, aut Catechumeni per curiositatem scandalizentur.* Dominicam coenam expendens Epiphanius in Ancorato, audientium & ipse aures reveritus, ejus Sacramenti formulam non nisi occultis verbis refert in hunc modum: *Videmus quod accepit Salvator in manus suas, quod surrexit in cæna, & accepit, & ubi gratias egisset, dixit, Hoc meum est, Hoc, & Hoc. Et videmus, quod non æquale est, neque simile, non imagini in carne, non invisibili Deitati, non lineamenti membrorum; hoc enim est rotundæ formæ, & insensibile quantum ad potentiam, & voluit per gratiam dicere, Hoc meum est, Hoc, & Hoc.* Orthodoxus quoque apud Theodorum in Dialogo primo, cum in Eucharistiæ mentionem incidisset, obscure omnino loquendum affirmat ea de causa, quod forte adessent aliqui non initiati: *Velim (inquit ille, Eranistem alloquens) te paulo magis mystice respondere; adsunt enim fortasse nonnulli, qui non sunt*

sunt initiati mysteriis. Respondet autem Eranistes: Ita audiui, & ita respondebo. Et in Dialogo secundo Eucharistiæ Symbola examinans idem Orthodoxus, postquam illa, propter non initiatos, ænigmatice omnino enuncianda dixisset, panem quidem nutrimentum ex seminibus, vinum autem potus speciem appellavit: Quod appellas (ait Eranistes) donum, quod adfertur ante invocationem Sacerdotis? Cui Orthodoxus: Non oportet aperte dicere, est enim verisimile adesse aliquos mysteriis non initiatos. Subdit Eranistes: Respondeatur ænigmatice. Orthodoxus vero: Id quod fit ex hujusmodi seminibus nutrimentum. Tum ille: Aliud autem signum quomodo nominamus? atque hic: commune etiam hoc nomen, quod potus speciem significat.

Præclara porro ea est in hanc rem verborum formula, quam priscos Patres non semel nec uno in loco usurpasse reperio cum enim inter concionandum in mysteriorum fidei mentionem, ac præsertim Sacramentorum, inciderent, nossetque optime, ut hætenus demonstratum est; ea nonnisi circumspectione maxima esse aperienda, de iis ita obscure commemorabant, ut initiatis dumtaxat, quod dicerent, perspicuum esset: atque ut id consulto, & non per imprudentiam se facere demonstrarent, eam verborum formulam adhibebant, *Norunt initiati quod dicitur*. Chrysostomus Homilia 27. in Genesim: *Si hoc fecerimus, poterimus pura conscientia*
ad

ad sanctam terribilemque hanc mensam accedere, & verba illa, quæ precationi inserta sunt, fideliter dicere. Sciunt initiati, quid dicatur. In Homilia 67. ejusdem libri: Vide quomodo nobis totum Sacramentum insinnavit. Sciunt, qui initiati sunt, quod dictum est. In Psalmum 140. de lingua loquens: Hoc est membrum, per quod in primis reverendum ac summa veneratione dignum sacrificium suscipimus: sciunt Fideles, quod dicitur. Homilia 72. in Matthæi Evangelium: ipsum autem Eucharistiæ mysterium quanta misericordia plenum sit, initiati solummodo noverunt. In Evangelium Joannis Homilia 8: Non casu & simpliciter hi fontes scaturierunt, sed quoniam ex ambobus Ecclesia constituta est; sciunt hoc initiati. Et in Homilia 15: Unam cunctis mensam, hoc est, terram, apposuit Deus; dedit & aliam hac longe majorem mensam, sed & hanc, Unam: norunt nostris mysteriis initiati quod dicitur. Quare necessario discendum, quam admiranda mysteria, & cur data sint, & quenam eorum utilitas, Unum corpus sumus & membra ex carne ejus & ossibus ejus; initiati autem assequantur, quæ dicuntur. In Oratione de beato Philogonio: Si cum fide accesserimus, proculdubio videbimus illum in præsepi jacentem: siquidem hac mensa vicem explet præsepis: nam & hic ponitur corpus Dominicum, non quidem fasciis involutum, sicuti tunc, sed undequaque Spiritu Sancto convestitum; qui mysteriis initiati sunt, intelligunt, quæ dicuntur. Homilia 6. in Epistolam

nam primam beati Pauli ad Timotheum :
vid autem sibi vult quod ait , Primum omnium :
obsequio scilicet quotidiano, perpetuoque divina
ligionis ritu; atque id noverunt Fideles . Sed sin-
 ilas Chrysostomi, aliorumque Patrum hac de
 : auctoritates cur ad verbum recitemus, mini-
 ne quidem in præsentia necessarium ducimus.
 quare satis erit ad id, quod spectamus, ipso-
 am Auctorum & locos & nomina deinceps
 indicare. Meminere igitur de hac eadem for-
 mula idem Chrysostomus Homilia 2. & 30. in
 epistolam 2. ad Corinthios, in Caput quartum
 ad Galatas, Homilia 17. 20. & 22. in Episto-
 lam ad Hebræos, & in Homilia de Proditione
 Judæ. Isidorus Pelusiota in libro quarto Epi-
 stola 162. quæ est ad Ophelium Grammaticum.
 Et beatus Augustinus in libro decimo de Civi-
 tate Dei cap. 6. Enarratione in Psalmos 33. 39.
 & 109. & in Sermone 17. de verbis Apostoli.
 Hujus autem formulæ illud forsitan adhuc exstat
 vestigium, quod nostri temporis Concionato-
 res, cum aut in altiore subtilioremque dispu-
 tationem inciderint, aut occurrerit difficilior ali-
 quis Scripturæ locus tractandus ac excutiendus,
 consueverunt doctiores compellare Auditores,
 ad eos Orationem convertere, atque conceptis
 verbis hortari, ut animum diligenter advertant.

Sed hæc nunc quidem hætenus. Deinceps
 nobis explicandum est, quid sit causæ, quam-
 obrem sacrorum mysteria in conspectu non ini-
 tiatorum

riatorum aut siluerint veteres Patres in concio-
 nando, aut obscuris certe remotisque a com-
 muni intelligentia verbis enunciarint. Duas igitur
 potissimum ejus rei causas nobis suppeditat
 accurata Patrum lectio. Prima est; ut in Ca-
 techumenis aliisque non initiatis sacrorum my-
 steriorum desiderium accenderetur. Altera, quam
 præcipuam puto; Ut ipsa mysteriorum dignitas
 ac majestas facta testis ab omni contemptu con-
 servaretur. Initium fumo a prima. Beatum
 Augustinum Tractatu 96. in Joannem hujus te-
 stem invenimus; inquit enim: *Etsi Cathecume-
 nis Sacramenta Fidelium non produntur, non ideo
 fit, quod ea ferre non possunt, sed ut ab eis tanto
 ardentius concupiscantur, quanto honorabilius oculan-
 tantur.* Enarratione etiam in Psalm. 109. hoc
 ipsum subobscurè significat idem Augustinus, scri-
 bens in hunc modum: *Judæi non agnoscunt Sa-
 cerdotium secundum ordinem Melchisedech: Fide-
 libus loquor, si quid non intelligant Cathecumeni,
 auferant pigritiam, festinent ad notitiam.* Huc
 etiam pertinere videtur, quod ab Ambrosio scri-
 ptum est sub initium libri de initiandis in hæc
 verba: *Inopinantibus melius se ipsa lux mysteriorum
 infundit, quam si eam Sermo aliquis præcurrisset.*
 Eos enim inopinantes hoc loco vocat meo ju-
 dicio Ambrosius, non qui fortuito atque ex casu
 inopinato inciderint in mysteria divina, sed qui
 ex ipsius rei ignorance nullam potuerint de
 mysteriis concipere opinionem. Recte igitur
 dictum

Num a Claudiano Mamerto in ipso libri 2. titio de Statu animæ: Mortalium generi natura tum est, ut abstrusa fortius quærat, ut negata igitur ambiat, ut tardius adepta plus diligat, & flagrantius ametur veritas, quo vel diutius desideratur, vel laboriosius queritur, vel tardius invenitur.

Quod autem ad alteram attinet causam; cum indigni putarentur a Patribus non initiati, quibus sacra mysteria concrederentur, existimabant etiam egregie cordati viri, eorumdem mysteriorum dignitatem ac majestatem quodammodo imminui, si illa ejusmodi hominibus apertis veris enunciarentur. Præclare Cyrillus in sua Catecheson Præfatione initiatum alloquitur: Si catechumenus ex te quæsierit, quid dicebant Doctores, nihil dicas externo: mysteria enim tibi & spem futuri sæculi tradidimus: custodi hoc mysterium retributori; nec unquam dicentem aliquem audi, quid habes, si & ego didicero? Etiam agroti vinum quandoque postulant, quod si intempestive illis detur, obhrenesim conciliat, & duo hinc nascuntur mala: nam & ager interit, & Medicus male audit. Sic & Cathecumenus, si audiat mysteria a Fidele, obhrenesim patitur; nescit enim, quid audierit, & tamen arguit rem ignotam, dictaque irridet, Fidelis vero tamquam proditor condemnatur. Jam ergo tu in finibus nostris constitutus, cave ne quid effutias: non quod digna non sint narratione ea, quæ ibi dicuntur, sed quod indignus est ille audire, cui

cui refers. Fueras & tu aliquando Catechumenus; neque tamen propofita myfteria tibi enarrabantur. Quando autem fublimitatem eorum, quæ nunc traduntur, experientia didiceris, tum plane intelliges, dignos non efle Catechumenos, qui ea audiant. Baſilius in paulo ante adducto libro de Spiritu Sancto cap. 27: Qui in primordiis Eccleſiæ (ait) certos ritus præſcripſerunt Apoſtoli & Patres, & in occulto ſilentioque myſteriis ſuam ſervavere dignitatem: neque enim omnino myſterium eſt, quod ad populares ac vulgares aures effertur. Hac eſt ratio, cur quadam citra ſcriptum tradita ſunt, ne dogmatum cognitio propter aſſuetudinem vulgo veniret in contemptum. Athanaſius in 2. Apologia ait: Oportet, ſicut ſcriptum eſt, myſterium Regis celare; &, ut Dominus præcipit, non efle ſancta porrigenda canibus, neque projiciendas margaritas ante porcos; non enim fas eſt, myſteria non initiatis prodere, ne per imperitiam ea ſubſannent, aut Catechumeni per curioſitatem ſcandalizentur. Cyrillus demum Alexandrinus adverſus Julianum libro 7: Dicerem ſane de his etiam multa alia & vera, niſi revererer non initiatorum aures: ſolent enim minus comprehenſibilia a plerisque rideri, quod præ imbecillitate mentis ſuæ non vident, & omnino nihili faciunt, quæ omni admiratione proſequi decebat. Sacrorum igitur myſteria prudentiſſime in conſpectu non initiatorum ſiluiſſe veteres Patres in concionando, aut certe non niſi abditis quibuſdam & obſcuris verbis expoſuiſſe, ex his, quæ

quæ dicta sunt hætenus, satis manifestum putamus.

Nunc autem apertendum est, derivasse ex eodem prudentiæ fonte, ut altiores ac difficiliores quæstionis coram imperita multitudo iidem Patres vel omiserint consulto, vel accommodare ad vulgi captum & intelligentiam enunciarint. Popularitatem in concionante præclaram semper fuisse virtutem, & ad conciliandos ac permovendos animos majorem, quam quisquam putet, fateantur omnes: quæ quidem, si modo perfecta fuerit, non nisi a magna quadam prudentia, & felicitis ingenii fecunditate, cui etiam assidua exercitatio, longusque dicendi usus accecerit, proficiscitur. Est autem Sermonis quædam ad omnium captum atque intelligentiam accommodata felicitas ac facilitas. De hac porro quid senserit Basilus Magnus, & Gregorius Nysseno non difficile est videre, dum quidem illa, quæ sub initium suæ in Hexaemeron explicationis ad Petrum Fratrem scripta sunt, teneantur: illa vero sunt ejusmodi: *Qui hæc & alia* (de altioribus concionantium disputationibus agit) *loquuntur, hi mihi non videtur propositum Patris nostri (Basili) doctrinæ finem intueri, qui in amplissima Ecclesia populum frequentissimum alloquens, pro audientium intelligentia sermonem moderabantur. In tanta enim multitudo licet essent nonnulli, qui altiores etiam disputationes intelligerent, plurimi tamen doctrinæ subtilitatem non capiebant,*

piebant, utpote homines imperiti, atque opifices; & negotiis vilibus occupati, & mulieres in huiusmodi disciplinis minime exercitate, & puerorum turba, atque provecti senes, qui omnes Oratione facili instituendi recreandique erant; & per res procreatas, quæ cernuntur, earumque pulchritudinem, ad rerum omnium auctorem procreatoremque producendi. Quare si quis ex Præceptoris consilio dicta ipsius expenderit, nihil dubitationis relinquetur: neque enim verborum contentiones aucupabatur, nec facile sese questionibus implicabat, sed simplici verborum expositione audientium simplicitati sic Orationem suam accommodabat, ut variam tamen externa Philosophiæ doctrinam redolens peritioribus etiam satisfaceret: quamobrem eam & imperiti intelligebant, & eruditi admirabantur. Eam ab eodem Magno Basilio vehementer adamatam; illud certissimo argumento est, quod, cum probe nosset Basilius, Pneumatomachos, quorum tunc late patebat imperium & potentia, in id unum maxime imminere, ut, si inter concionandum Spiritum Sanctum Deum esse apertis verbis fateretur, ex suggestu eum statim ac civitate pellerent, atque ita gubernatore ejecto Ecclesiam ipsi occuparent; eorum insidiis hac ratione sibi occurrendum putavit vir ille prudentissimus, & ad omnium auditorum captum atque utilitatem factus, ut ab aperta quidem Deitatis voce abstineret: verum aliis verbis illud idem explicaret. Rem totam his verbis persequitur Gregorius

rius Nazianzenus in Oratione 20, quæ est funebris in ipsius Basilii laudem: Ceterum Sermo-
nes cum iudicio disponere de Davidis consilio & sen-
tentia necessarium esse iudicabat (Basilius,) ac
belii tempus & Hæreticorum principatum aliquantif-
per tolerare, quoad libertatis tempus successisset, lin-
guaque libertatem ac licentiam attulisset. Illi enim
nudam & apertam vocem de Spiritu Sancto, quod
Deus esset, arripere studebant, (quod quidem tametsi
verum erat, impium tamen illis, atque improbo im-
pietatis Antistiti videbatur) ut eum quidem cum
Theologica lingua civitate pellerent, ipsi autem Ec-
clesiam occuparent, eamque sceleris sui propugnacu-
lum facerent; atque hinc deinde, velut ex arce
quadam, id omne quod reliquum erat, popula-
rentur. At ille in aliis quidem vocibus & Scriptu-
ra petitis, testimoniisque minime dubiis eandem vim
habentibus, necessariisque argumentis, adversarios
ita comprimebat, ut nullo modo repugnare ac con-
tra niti possent: Sed, quæ maxima Sermonis virtus
& prudentia est, propriis vocibus constringerentur.
Sed tamen propriam vocem interim usurpare diffu-
rebat, tum ab ipsomet Spiritu, tum a sinceris ip-
sius propugnatoribus in gratia loco hoc petens, ne hoc
suo consilio offenderentur; nec committerent, ut,
dum unam voculam mordicus retinere conarentur,
propter inexplebilem cupiditatem omnia perderent;
ipsos enim nihil ex eo incommodi ac detrimenti ac-
cepturos, si vocabula paululum immutarentur, modo

aliis verbis eadem docerentur, &c. Nec vero de eadem secus idem Gregorius Nazianzenus iudicavit, cum in eos invehit, qui de Spiritus Sancti Deitate coram indoctis ac simplicibus viris audebant disputare, ita scriptum reliquit in Oratione 44, quæ est in Sanctam Pentecostem: *Qui Deum cum (Spiritum Sanctum) censent; divini profecto viri sunt, ac splendido animo præditi: qui vero etiam appellant, si quidem apud probo iudicio præditos Auditores, sublimes & excelsi sunt: sin autem apud abjectos & humi provolutos, haud satis prudentes, utpote qui luto margaritam, & imbecille auritonitru sonum, & solem infirmis oculis, & lacte adhuc utentibus solidum cibum committant; cum eos paulatim ad ulteriora promovere, atque ad sublimiora provehere conveniat, lumen lumini largiendo, ac veritati veritatem conciliando.* Sed in hæc popularitate admirabile quidem est, quantum inter omnes Concionatores, tum Græcos, tum Latinos, unus excelluerit Chrysostomus. Hic enim Auditorum aures Orationis suæ mensuram arbitratus totum se ad illorum captum & utilitatem accommodabat; ac veluti Proteus, non quidem ad calliditatis flexus & illécebras, sed ad hominum salutem procurandam, in omnes se vertebat formas, omnia pæne omnibus factus. Narrat nobis Symeo Metaphrastes, ad unius mulierculæ vocem, conquerentis consuli parum suæ sui que similium intelligentiæ, descendisse eum
non

non semel ex dicendi sublimitate ad simplicem omnino facilemque Orationis formam; Cum itaque (ait Metaphrastes in Chrysostomi Vita) copiose ad eum affluxisset Spiritus sapientia, licebat quidem videre frequentiores congregationes, & populum ad eum audiendum convenientem, ejus autem linguam, quæ movebatur assidue, & Orationis fluente innundabat. Quo tempore cum Sermone extolleret altius, quam ut id vulgi ingenium caperet, mulier quædam, quæ prompto quidem & alacri animo concurrerat, eorum autem, quæ dicebantur, altitudinem assequi non poterat, ne dubitavit quidem ejus Orationem aperte reprehendere, & eam vocare infrugiferam; propterea quod non adepta esset id, quod desiderabat. Hoc cum ad aures illius pervenisset, effecit, ut intellectu faciliorem & apertiore componeret Orationem. Eam ob causam subtiles & reconditas ex Theologia quæstiones, de Scientia Dei, de Prædestinatione, de Gratia, de Libero Arbitrio, de industria omittebat vir prudentissimus, vel si quid hujusmodi necessario discutiendum erat, quam commodissime ad vulgi captum atque intelligentiam faciebat, in moralem sensum totum sese conjiciens: ac in his potissimum quæstionibus lubens acquiescebat, Eleemosinam esse artem omnium quaestuosissimam. Maximum fieri ex miseris & calamitatibus lucrum. Nolle omnia scire, summam sapientiam esse. Ignominiam esse hujus mundi gloriam. Mortem esse vitam meliorem. Melius esse in-

juriam pati, quam inferre. Neminem ledi nisi a semetipso. Et his similia inveniebat argumenta, hæc ad dicendum deligebat, hæc urgebat, hæc suavi quodam doctrinæ temperamento condiebat, ut nimirum Auditorum animos & novitate attentos teneret, & delectaret varietate, & facilitate doceret. Latinos etiam Patres in dicendo hanc eandem popularitatis virtutem mirifice dilexisse, facile fuisset exemplis non paucis ostendere: sed unicum ego illud proferre statui, quod nunc quidem in Augustini Sermone 78. de Tempore non omnibus patet; hæc igitur dicit Augustinus: *Si expositionem Sanctorum Scripturarum eo ordine & illo eloquio, quo a sanctis Patribus sunt expositæ, Caritatis vestræ auribus voluerimus intimare, non nisi ad paucos Scholasticos cibus doctrinæ poterit pervenire, reliqua vero populi multitudo jejuna remanebit. Et ideo rogo humiliter, ut contenta sint erudita aures verba rustica equanimiter sustinere, dummodo totus grex Domini simplici & ut ita dixerim, pedestri Sermone pabulum spirituale possit accipere. Et quia imperiti & simplices ad Scolaſticorum altitudinem non possunt ascendere, eruditi se dignentur ad illorum ignorantiam inclinare; quia quod simplicibus dictum fuerit, Scholastici intelligere possunt: quod autem eruditis fuerit prædicatum, simplices omnino capere non valebunt.*

Atque hoc loco quidem mirari satis non possum eos nostri temporis Concionatores, qui neque

neque sacrorum mysteriorum majestatem reveriri, neque ullam habentes rudium ac imperitorum audientium simplicitatis rationem, numquam satis concionandi munus se explevisse arbitrantur, nisi altiores quasque ac difficilioresex univēsa Theologia depromptas disputationes in suas congeſſerint Conciones. Et tunc se pulcros ac beatos putant, cum vel ad doctrinæ pompam, vel ad ostentationem memoriæ alia aliis Patrum testimonia acervatim ac continuato spiritu ingerunt; inculcant Latina, Græca, Hebraica, nonnumquam etiam Arabica & Syriaca; Theodotionis, Aquilæ, Symmachi versiones commemorant; Chaldaicam Paraphrasim adducunt; proferunt multa ex Manuscriptis Codicibus, quos nondum publici juris factos in hac vel illa Bibliotheca asservari dicunt; ex Cabalisticis etiam promunt quædam veluti oraculis simillima. Agitant inutiles sæpe quæstiones; ligno-ne, & qua ligni specie fuerit Abel interfectus: item ex qua arbore avulsa miraculorum effectris Moſis virga: rursus, factumne & signatum aurum, an in massa obtulerint Magi, similiter, an Christus & beata Virgo bovem & asinum in Bethlemitica peregrinatione secum duxerint: & cum in Evangelio agitur de signis in Sole & Luna, de terræ-motu, &c. tunc meteororum rationes ex Philosophia explicant; quid sint cinnabæ stellæ seu Cometæ, quidve de iis præci Philosophi judicant,

afferunt: addunt etiam, qui maximus terræ mortalium memoria extiterit motus; ab eoque adfirmant concussa tecta interdum interdum, ædes conquassatas, urbes etiam aliquando prostratas, nec non cum eo factas nonnumquam aquarum inundationes. Ad summam, ut aliquod doctrinæ choragium ingerant, promunt ex historia naturali quidquid est abditum & incredibile, vagantur per omnia terrarum imperia, locos percurrent, enumerant reges, & vel minima data occasione mirabiles de re quacumque faciunt excursiones; disjuncta quæque conjungunt, & cum præsentibus futura copulant, Quæ quidem omnia, sicuti delibata prudenter, ubi res nimirum videtur ita postulare, habent aliquid gratiæ, & Auditorum aures delectant, ita putide & inepte inculcata satietatem afferunt ac fastidium, & concionantium produnt infantiam. Sed omissis nostri temporis Concionatoribus venio ad præscos Auditores, de quibus ex instituto nunc dicam,

CAPUT XIX.

*Omnes olim in Concionibus adesse poterant ,
Catechumeni , Competentes , Hæretici ,
Judæi , ac Gentiles . Ejus rei causa ad-
signata .*

Antiquitus Ecclesiæ aditu prohibebatur ne-
mo, nemo submovebatur a foribus, qua-
les quales erant, sive Fideles, sive Catechume-
ni, sive Competentes, sive Hæretici, sive Ju-
dæi, sive Gentiles, & quicumque tandem non
initiati admittebantur in Concionem confuse ac
promiscue.

De Cathecumenis liquet ex ipsa nominis vi
ac significatione. Etenim *ἐκ τῆς αὐτῆς*, quod
est, *viva voce instruere*, suum traxere nomen
Catechumeni: quod viva nimirum voce, hoc
est, Concionatorum ministerio, Christianæ
fidei elementis imbuerentur; unde etiam *Au-*
diētes interdum, interdum *Auditores* ab Eccle-
siasticis Scriptoribus fuere vocitati. Tertullianus
deinde in Libro de Præscriptione adversus Hæ-
reticos cap. 41. cum adfirmet, in Ecclesia ipso
Concionum tempore secerni vix posse & inter-
nosci Fideles a Catechumenis, demonstrat uti-
que, ad ipsas Conciones audiendas Catechume-
nis æque ac Fidelibus aditum patuisse. *Quis Ca-*
techu-

catechumenus, (ait Tertullianus) *quis Fidelis*, incertum est: pariter adeunt, pariter audiunt. Ad hæc, cum ipsæ Conciones, quemadmodum loco docebimus, intra Missarum solemnias, olim etiam, haberi ut plurimum solerent proxime post Evangelii recitationem; cumque tunc solum Diaconorum voce dimitterentur ab Ecclesia Catechumeni, quando Sacramentorum Missa, ut Ivo nis verbo utar in Epistola 219. peragenda erat & ostendenda; manifestum est, adfuisse in Concionibus ipsos quoque Catechumenos. Id ipsum postremo ex eo perspicuum fieri arbitror, quod exstant adhuc plurimæ, tum Græcorum, tum Latinorum Patrum Homiliæ ad ipsosmet Catechumenos; unde etiam Catecheseon nomen invenere.

De Competentibus, in Augustini Sermone 216. de Tempore, diserte scribuntur hæc: *Hodie, Fratres carissimi, specialiter ad Competentes humilitatis nostræ Sermo dirigitur; & quamvis omnibus etiam Fidelibus baptizatis admonitio nostra conveniat; peculiariter tamen eos, qui nunc Baptismi Sacramenta desiderant, volumus admonere.*

De Hæreticis vero illa sunt in Augustini Vita a Possidio conscripta: *Libros ejusdem (Augustini) sive Tractatus, mirabili Dei gratia procedentes, instructos omni rationis copia atque auctoritate Sanctarum Scripturarum, ipsi quoque Hæretici concurrentes cum Catholicis ingenti ardore audiebant. Manichæos utique concionanti Augusti-*

no adfuisse interdum, in eodem Libro testificatur illud ejusdem Possidii, cum ait: Scio ego, non solum ipse Possidius, qui *Vitam hanc conscripsi*, verum etiam alii fratres & conservi, qui nobiscum tunc intra Hipponensem Ecclesiam cum eodem sancto viro vivebant, nobis pariter ad mensam constitutis eum dixisse: *Advertitis hodie in Ecclesia meum Sermonem, ejusque initium & finem contra meam consuetudinem processisse; quoniam non eam rem terminatam explicuerim, quam proposueram, sed pendentem reliquerim?* Cui respondimus: Ita nos in tempore miratos scimus, & recognoscimus. At ille, Credo, ait, quod forte aliquem errantem in populo Dominus per nostram oblivionem & errorem doceri & curari voluerit, in cujus manu sunt & nos & Sermones nostri: nam cum proposita questionis latebras pertractarem, in alium Sermonis excursum perrexi, atque non conclusa vel explicata questione, disputationem terminavi magis adversus Manichæorum errorem, unde nihil dicere decreveram, disputans, quam de iis, quæ asserere proposueram.

De Judæis tandem, ac Gentilibus, seu potius de quibuscumque non initiatis accipiendus est Canon ille 84. Concilii IV. Carthaginienfis, relatus a Burchardo in libro 3. cap. 24; ab Ivone, tum in libro secundo Panormiæ tit. 4. cap. 14. tum in tertia Parte Decreti cap. 33; & a Gratiano Distinct. 1. cap. 60. Verba autem hujus, quem dixi, Canonis sunt hæc: *Episcopus*
nullum

nullum prohibeat ingredi Ecclesiam, & audire Ver-
 bum Dei, sive Gentilem, sive Hæreticum, sive
 Judæum. Dum enim (nullum) dicit Canon,
 profecto quemcumque etiam non initiatum in-
 telligit. Sed & Concilii Valentini in Hispania
 can. 1. A. D. 546. hac de re ita Patres caverunt:
Antiquos Canones relegentes inter cetera hoc cen-
suimus observandum, ut Sacrosancta Evangelia,
ante munerum illationem, in Missa Catechumeno-
rum, in ordine lectionum post Apostolum legan-
tur, quatenus salutaria præcepta Domini nostri Je-
su Christi, vel Sermonem Sacerdotis, non solum
Fideles, sed etiam Catechumeni, & Penitentes,
& omnes, qui ex diverso sunt, (Hæreticos in-
tellige, Judeos, Gentiles, & quoscumque
non initiatos) audire licitum habeant. Hoc ip-
sum locus ex Gregorii Nysseni Oratione de san-
cto Baptismate plane probat; in quo ista scripta
sunt: Atque idcirco vos quidem, qui ex hoc popu-
lo initiati estis, bona fidei nostræ experti conveni-
stis, atque adducitis etiam expertem adhuc & im-
peritam harum rerum multitudinem, tamquam boni
patres cura atque conciliatione non initiatos ad per-
fectam pietatis comprehensionem deducetes. Ego
vero gratulor utrisque: initiatis quidem, quod ma-
gno dono ditati estis: non initiatis vero, quod bo-
na futura speratis, &c. Apud Augustinum etiam
in Homilia 49. Libri Quinquaginta Homilia-
rum in hanc rem sic scriptum videas: Audite,
carissimi, membra Christi, & matris & Catholica
filii.

fili. Quod dico Competentibus, audiant Fideles; audiant & Pœnitentes: quod dico Fidelibus, dico & Competentibus & Pœnitentibus, audiant Catechumeni, audiant omnes, omnes timeant, nemo contemnat. Huc tandem illa faciunt, quæ superiori capite sunt adducta ad probandum, sacrorum mysteria priscos Patres concionantes, in conspectu non initiatorum vel minime exposuisse, vel certe maxima circumspectione & non nisi obscuris verbis enunciasse.

Quid porro causæ sit, quam ob rem Catechumenis, atque omnibus non initiatis licuerit olim in Catholicorum Concionibus interesse, iidem Patres in Valentino Concilio congregati prodidere, ita scribentes: Sic enim Pontificum predicatione audita nonnullos attractos ad fidem evidenter scimus. Atque hinc nemini jam obscurum erit, cur inter concionandum consueverint veteres Patres, præsertim vero beatus Augustinus, Hæreticos compellare interdum, interdum exagitare Judæos, sæpe etiam adversus Gentiles inire certamen.

CAPUT XX.

Separati a laicis clerici, viri a mulieribus, atque a nuptis virgines, aderant in Concionibus. Cancellis clerus a populo dirimebatur, a feminis mares ligneis septis; virgines editionem aliquem habebant in Ecclesia locum, in quo a nuptis separatæ consisterent. Intermissam lignei septi consuetudinem sanctus Carolus in Mediolanensi Ecclesia revocavit.

Quemadmodum olim in Hierosolymitano Templo, juxta sexum, conditionem, & gradum, suus erat cuique proprius atque ab aliis distinctus locus; ita in Christianorum Ecclesiis fuere semper loci discrimine separati a clericis laici, mares a feminis, atque ab innuptis nuptæ.

Plura sane de locorum discrimine in priscis Hebræorum templis possunt ex sacris vetustiorum monumentis testimonia proferri, sed, cum hoc a loco, qui nunc tractatur, longius paulo recederet, satis habeo nonnulla dumtaxat indicasse, ex quibus hujus rei cognitio, quantum licet, peti queat. Locorum igitur discrimen in
He-

Hebræorum templis statuunt, Exodi caput 38, Maccabæorum libri 2. caput 3, Lucæ Evangelii caput 2, Josephi de Bello Judaico libri 6. caput 6, Origenis Tractatus 26. in Matthæum.

Quod ad Christianorum Ecclesias attinet, clerum semper in iis fuisse loci discrimine a populo separatum, discimus ab Auctore Constitutionum Apostolicarum his verbis scribente in libro 2. cap. 57. *Sit solum Episcopi in medio positum, & adstent Diaconi succincti & expediti sine multa veste, &c. Sit autem horum cura, ut laici in altera parte ordine & decore & quiete sedeant.* Quibuscum ea, quæ Gregorius Nazianzenus in Insomnio de Anastasiæ Ecclesia prodidit, maxime congruunt; inquit enim: *Sublimi quidem throno insidere mihi videbar: utrinque porro, inferioribus tamen subselliis, Presbyteri, hoc est, gregis Christiani duces, considebant: at vero Diaconi candidis vestibus ornati stabant, Angeli splendoris speciem præ se ferentes. Plebs autem partim circum cancellos apum more fusa erat, (certatim enim omnes incumbabant, ut proximum quemque suggestui nostro locum obtinerent) partim ad me audiendum confluens vestibuli angustia premebatur, auribus nimirum ac pedibus aque festinans, partim ex foro vicisque urbis ad Sermones meos accurrebat. Et statim: Distinctim autem plebs stabat Sermonis nostri audiendi cupiditate flagrans.* Hæc Nazianzenus, ex quibus apparet illud facillime,

cillime, tamen in hoc Libello per insomnium dicat omnia, nihil tamen eum dicere, quod non revera cum Ritibus Ecclesiasticis apte consentiat. Nec ab his Gregorius Nyssenus discedit; nam in Oratione de Sancto Baptismate populum dicens ob acriorem Sermonis audiendi cupiditatem in ipsamet adyta sacra penetrasse ac irrupisse, demonstrat utique, solis hæc adyta clericis patere consuevisse, atque adeo separatim loci discrimine a populo clerum. Gregorii autem verba, ex ea, quam dixi, Oratione, sunt hæc: *Nunc agnosco gregem meum; hodie video formam Ecclesia consuetam; quando etiam carnalium curarum posthabito negotio iusta plenitudine ad cultum Dei concurristis: atque ad eam quidem populus angustam reddit, intra sacra adyta penetrans & irrumpens; quotquot autem ab iis, qui intus sunt, non admittuntur, apum in modum locum externum in vestibulis implent: nam apum alie quidem intus in opere occupatae sunt, alie vero foris alveare circumstrepunt. Sic igitur facite, o Filii, & numquam hoc studium deseratis: affectu enim me pastoralis affici fateor; & volo in hac sublimi specula sedens circa subiectos vertici colles undique congregatum gregem contueri. Concilium quoque Turonensis II. Canone 4. ita constitutum fuit: Laici secus altare, quo sancta mysteria celebrantur, inter clericos, tam ad Vigiliis quam ad Missas, stare penitus non presumant, sed pars illa, quæ a cancellis versus altare dividitur, choris*

choris tantum psallentium pateat clericorum. Apud Gratianum etiam C. Sacerdotum de Consecrat. distinct. 2. ea verba leguntur: Sacerdotum, aliorumque clericorum Ecclesie servientium honores a laicorum loco discrete apparere convenit; quamobrem nulli laicorum liceat in eo loco, ubi Sacerdotes & reliqui clerici consistunt, quod Presbyterium nuncupatur, quando Missa celebratur; consistere.

A mulieribus autem separatos adfuisse viros in conventibus sacris significat Apostolicarum Constitutionum Auctoris locus ex lib. 2. cap. 57, in quo ita scriptum est: *Sit autem horum (Diaconorum) cura, ut laici in altera parte ordine, & decore, & quiete sedeant; item ut sedeant mulieres separatim ac cum silentio.* Hoc ipsum idem Auctor & beatus quoque Ignatius videntur sensisse; cum is in loco citato Diaconissas ad mulierum introitum in Ecclesiam custodiendi causa collocat; alter vero, cum, ad Antiochenos scribens, easdem Diaconissas sacrorum vestibulorum custodes appellat: quod nimirum, quemadmodum Ecclesie foribus, qua viri ingrederentur, praefecti olim erant Ostiarii, ita Diaconissae praerant portis mulieribus tantum patientibus: vana autem prorsus atque inanis fuisset haec portarum distinctio, si intra ipsam deinde Ecclesiam potuissent viri ac mulieres confuse & promiscue consistere. Locus est etiam in Cyrilli Hierosolymitani Catecheson Praefatione,

R

tione,

rione, qui hanc virorum ac mulierum separationem sic approbat: *Conclusa est Ecclesia, & vos omnes intus: hæc tamen separentur, viri ut sint cum viris, mulieres cum mulieribus.* Cujus rei rationem hanc illico suggerit: *Ne studium salutis sit perditionis occasio: etsi enim pulcrum sit institutum, proximum assidere proximo; sed procul tamen sint affectiones.* De eadem separatione, in prima Procopii de Justiniani ædificiis Oratione, ista planissime dicuntur: *Sunt autem duæ utrinque porticus, (loquitur Procopius de sanctæ Sophiæ templo) quas fastigiata testudo & aurum venustant: harum una viros, altera mulieres admittit.* Id ipsum ab Amalario quoque Fortunato in libro 3. de Ecclesiasticis Officiis cap. 2. aperte significatur his verbis: *In conventu Ecclesiastico, seorsum masculi, & seorsum feminae stant; quod accepimus a veteri consuetudine.* Augustinus præterea & Romani Ordinis Auctor huc intendisse animum possunt videri, cum seminarum partis in Ecclesia meminerint. Augustini verba in libro de Civitate Dei 22. cap. 8. sic habent: *In Carthagine Innocentia, religiosissima femina, de primariis ipsius civitatis, in mamma cancrum habebat: admonetur in somnis appropinquante Pascha, ut in parte seminarum observanti ad Baptisterium quæcumque illi baptizata primitus occurrisset, signaret ei locum signo crucis Christi; fecit, & confestim sanitas secuta est.* Romani vero Ordinis Auctor paucis ait in hunc mo-

modum: Pontifex antequam transeat in partem mulierum, &c. Quin etiam masculorum locum in Ecclesia fuisse ad Meridiem, seu in Australi parte, feminarum autem in Boreali, seu ad Aquilonem, testatur idem Amalarius, Micrologi Auctor, & Radulphus Tungrensis: *Masculi* (inquit ille loco paulo ante adducto) *stant in Australi parte, & feminae in Boreali; ut ostendatur, per fortiores sexum firmiores Sanctos semper constitui in majoribus tentationibus ætus hujus mundi, & per fragiliorem sexum infirmiores Sanctos aptiori loco, &c.* Alter in libro de Ecclesiasticis Observationibus cap. 9. ita scribit: *Diaconus, cum legit Evangelium, juxta Romanum Ordinem in ambone vertitur ad Meridiem, ubi & masculi conveniunt, non ad Aquilonem, ubi feminae consistunt. Quæ excepta a Radulpho in Libro de Canonum Observantia propositione 23. referuntur hoc modo: Diaconus, cum Evangelium legit, juxta Romanum Ordinem in ambone vertitur ad Meridiem, ubi & masculi conveniunt, &c.*

Sed & suum virginibus proprium atque a nuptis mulieribus distinctum fuisse in Ecclesia locum, in Constitutionum Apostolicarum libro 2. cap. 57. haud obscure significatur his verbis: *Nuptæ jam & matresfamilias seorsum: virgines autem, & vidua, & anus primæ omnium stent, aut sedeant.* Hoc idem voluisse Cyrillum Hierosolymitanum, citata Catecheson Præfationis clausula docet, in qua sic est: *Conventus porro virgi.*

R 2

virgi.

virginalis sic congregetur, ut vel psallat, vel oret, vel legat; & nupta quoque similiter agat & oret, &c. Cum enim, ut mulieres in Ecclesia loca a viris separata haberent, decere dixisset Cyrillus, de virginibus tandem, tamquam a nuptis distinctis, ea verba pronunciavit. Cyrillo autem consentiunt Ambrosius & Gregorius Nazianzenus: ille quidem in Tractatu ad virginem lapsam; etenim, postquam tabulis separari consuevisse marium ac feminarum loca adfirmasset, concludit hoc pacto: *Divisa est mulier, & virgo.* Gregorius vero Nazianzenus suum pergens de Anastasiæ Ecclesia narrare infomnium: *Sanctæ virgines (ait) una cum gravibus matronis (viduas & anus intellige) e sublimi tecto castissimas Sermonibus meis aures inclinabant.* Etiam in Hebræorum templo fuisse locum, in quo virginibus quidem, aliis non item mulieribus, liceret consistere, docet Origenes Tractatu 26. in Matthæum his verbis: *Venit ad nos talis traditio, quasi sit aliquis locus in templo, ubi virginibus quidem consistere licet, & orare Deum: expertæ autem torum virilem non permittebantur in eo consistere.*

An hæc omnia non satis indicant, vere separata habuisse olim in Ecclesia loca a laicis clericos, viros a mulieribus, atque a nuptis virgines? Quæ tamen fient adhuc illustriora, si hujusce separationis modum ac formam aliquatenus expresserimus.

Cle-

Clerus certe a populo cancellis dirimebatur :
 Extat apud Eusebium Cæsariensem in Hist. Eccl.
 lib. 10. c. 4. Panegyrica Oratio pro Ecclesiarum
 exædificatione, Paulino Tyrionum Episcopo de-
 dicata, in qua, dum Tyri Ecclesiæ instauratio
 ab eodem Paulino facta graphice depingitur, de
 cancellis etiam populum a clero dirimentibus ita
 scriptum : Porro cum templum in hunc modum
 absolvisset, thronisque altissimis in honorem præsi-
 dentium ac præterea subselliis per universum tem-
 plum dispositis exornasset, postremo Sanctum Sancto-
 rum, altare videlicet, in medio constituit. Utque
 hæc sacraria multitudini inaccessa essent, ea rursus
 ligneis cancellis munivit. Meminit eorundem
 cancellorum non semel Gregorius Nazianzenus,
 veluti Oratione ad 150. Episcopos, quæ est
 numero 32. quo loci : *Valete Sermonum meorum*
amatores, & cursus & concursiones, & calami
tam perspicui, quam occulti, atque hujus suggesti
cancelli a multitudine compressi hominum audiendi
studio sese mutuo protrudentium. Et citato de A-
 nastasiæ Ecclesiæ insomnio : *Plebs* (inquit) *par-*
tim circum cancellos apud more fusa erat : cer-
tatim enim omnes incumbabant, ut proximum quem-
que suggestui nostro locum obtinerent ; partim ad
me audiendum confluens vestibuli angustia pre-
mebatur. Sed apertius in carmine ad Episco-
 pos :

- *Hos quoque , qui mundos dirimunt , quorum effluit alter ,*
- *Alter at usque viget , stabilisque in secula durat ,*
- *Divosque atque homines discludunt limite certo , Cancellis . ---*

Eodem autem referenda sunt ; quæ in II. Turonensi Concilio Can. 4. ita scripta leguntur : *Laici secus altare , quo sancta mysteria celebrantur inter clericos , tam ad Vigilias , quam ad Missas , stare penitus non præsumant : sed pars illa , quæ a cancellis versus altare dividitur , choris tantum psallentium pateat clericorum .* Hinc & pulchre Germanus Constantinopolitanus in sua Ecclesiasticarum rerum Theoria pronunciavit : *Cancelli locum Orationis designant , quousque extrinsecus populus accedit , intrinsecus autem sunt Sancta Sanctorum solis Sacerdotibus pervia .* Ambrosius in Tractatu ad virginem lapsam cap. 6. cujus ipsamet verba promam : *Nonne (ait) vel illum tabulis separatum , in quo in Ecclesia stabas , recordari debuisti , ad quem religiosæ matronæ & nobiles certatim currebant , tua oscula petentes , quasi sanctioris & dignioris ? Nonne , vel illa præcepta , quæ oculis tuis ipse scriptus paries ingerebat , recordari debuisti ?* Nec obscure hoc idem designat Chrysostomus Homilia 74. in Matth. ita scribens : *Oportebat quidem interiori pariete a mulieribus disseparari viros ; verum , quoniam non vultis , necessarium esse patres nostri putaverunt , saltem*

*saltem his ligneis parietibus vos disseparare. Audi-
vi autem ego a senioribus, non fuisse hos parietes
ab initio. Habemus etiam hujusce tabulati testes
non contemnendos Metaphrastem & Procopium:
atque apud hunc quidem citata Oratione prima
de ædificiis Justiniani ita legitur: Sunt autem
duæ utrinque porticus, quas fastigiata testudo &
aurum venustant. Harum una viros orantes, al-
tera mulieres admittit, alias nulla re differentes.
Quis tabulata, in quibus versantur mulieres, ex-
ponet? Ille vero, tabulati mentionem faciens,
illud etiam adjungit, fuisse eidem obductum
eam ob causam velum, quod unus aliquando
sacrorum ministrorum oculos in despectantem
feminam coniecisset; sic enim in Chrysostomi
Vita scriptum reliquit: Cum autem unus ex mi-
nistris, qui ei (Chrysostomo) adsistebant, in
quamdam mulierem ex eis, qua desuper sole-
bant despicere, oculum coniecisset, & eam curio-
se aspiceret; ministrum quidem statim movit (Chry-
sostomus) e sua statione, deinde futuri quoque
curam gerens, jussit velis superiora muniri tabu-
lata.*

Videntur ipsæ quoque virgines, ut essent a
ceteris mulieribus separatæ, editiorem quemdam
locum in Ecclesia habuisse, in quo consisterent.
Nam & despectantis e superiori tabulato femi-
næ meminit Metaphrastes ubi supra; & sublime
tectum commemorat Gregorius Nazianzenus in
Insomnio de Anastasiæ Ecclesia, ex quo castis-

simas ad audiendos Sermones aures inclinarent
sanctæ virgines.

Laudabilem porro hunc lignei septi morem
apud Mediolanenses, sive neglectum, sive in-
termisum, sanctus Carolus Borromæus, ad Ec-
clesiæ decus, hominumque honestatem, in plu-
ribus, iisque amplioribus præsertim Ecclesiis,
dicto & facto revocavit.

Sed hæc nunc quidem hætenus de locorum
in audiendis Concionibus separatione. Reliqua
persequamur.



CAPUT XXI.

Starent-ne, an sederent olim Auditores. In magna hominum multitudine stabat olim maxima populi pars. In communibus etiam ac quotidianis Concionibus id ipsum plerumque factitatum, in Africanis præsertim Ecclesiis. Antiquiori tamen ac communi consuetudine sedentes aderant in Concionibus Auditores. Transmarinæ Ecclesiæ, Transmarini Episcopi, Transmarinæ Synodi, Transmarina Judicia, &c. hoc est, Italiæ urbis præsertim Romæ, Ecclesiæ, Episcopi, Synodi, Judicia, &c.

Constituto inter Auditores locorum discrimine, existit nunc illa quæstio; Stantes-ne iidem, an sedentes in Concionibus olim adessent.

Atque in iis hominum effusionibus, quas in Ecclesiis aliquando ad disertissimum aliquem virum audiendum undique factas legimus, sterisse olim maximam populi partem, quemadmodum
nunc

nunc passim fieri videmus in amplioribus Italiz templis, libenter fatebitur quicumque aut Gregorii Nazianzeni suggestum meminerit a multitudine compressum virorum audiendi cupiditate sese protrudentium; aut fulam commemorabit circa cancellos apum more plebem, ipsaque adyta sacra penetrantem ac irrumpentem, ut & Nazianzeno & Nysseno Gregoriis dicentibus præsto esset; aut demum animum advertet ad frequentes illos populi impellentis sese ac urgentis concursus, qui audiendi causa, cum dicturus erat vel idem Nyssenus, vel Chrysostomus, ex tota pæne Græcia non raro fiebant: *Valete Sermonum meorum amatores*, (ait Gregorius Nazianzenus in Oratione 32.) & *curfus & concursiones*, atque *hujus suggesti cancelli a multitudine compressi hominum audiendi studio sese mutuo protrudentium*. In Insomnio etiam de Anastasie Ecclesia: *Plebs autem* (inquit) *partim circum cancellos apum more fusa erat: certatim enim omnes incumbabant, ut proximum quemque suggestui nostro locum obtinerent; partim ad me audiendum confluens vestibuli angustia premebatur*. Gregorii Nysseni sunt hæc ipsa in Oratione de sancto Baptismate: *Ædem quidem (sacram) populus angustiam reddit, intra sacra adyta penetrans & irrumpens; quotquot autem ab iis, qui intus sunt, non admittuntur, apum in modum locum externum in vestibulis implent*. In Oratione vero 1. de sanctis quadraginta Martyribus:

Quas

Quas res existimo plerisque graves ac molestas esse, his ipse animo lator: molestum enim nimirum plerisque est, comprimi inter sese & constipari, hoc vero mihi summa laticia est. Latatur enim oculus pastoris, cum gregem præ multitudine coarctari, & ovile superfundi videt: quamquam non exiguum stabulum est, sed laxitatem angustam efficit multitudine grex abundans. Et in 2. de iisdem Oratione: Meministis prorsus, in qua parte Orationis habebamus, cum optatus ille & jucundus nobis ex multitudine congregatorum tumultus confunde-
 bat eorum, quæ dicebantur, auscultationem, cum animatum illud Ecclesiæ mare, multitudine aliorum super alios confluentium & ingruentium inundans, ad impetum & impulsionem eorum, qui semper, ut irrumperent, fluctuaret & astuaret, sonitu quoque ipso verum imitans mare, veluti rupibus litoralibus auribus nostris undarum strepitum infringens & illidens. Et Chrysostomus Homil. 2. in cap. 1. Evangelii Joannis: Hic concursus frequens, & diligens attentio, impulsioque, & preparatio, ut ea vobis loca occupentur, unde clarius exaudiamur, nec non vestra in tanta angustia perseverantia, quousque spirituale hoc dimittatur spectaculum, ad hæc plausus, tumultus, & alia hujusmodi, maximum animi & fervoris vestri sunt argumentum. De hac hominum effusione ad audiendum Chrysostomum undique facta in Sozomeni Hist. Eccles. lib. 8. cap. 5. sic est: *Tanta vero frequentia eorum erat, qui Concionibus il-
 lius*

lius inhiabant ac satiari non poterant, ut, quoniam illi ex mutuo impulsu atque obtritu periclitarentur, dum singuli prorsus nituntur semper, ut propius adstantes dicentem certius audiant, ipse medium se omnibus exponens & suggestu Lectorum docuerit. Hæc eadem a Nicephoro excepta ita referuntur in Hist. Eccl. lib. 13. cap. 7: In tantum vero plebs doctrina ejus, qua satiari non poterat, inhiabat, ut periculum etiam sibi homines crearent, dum inter se conferta turba premerentur: cubitis alii alios submoventes atque repellentes, quod pro se quisque ad eum quam proxime accedere conaretur, quo certius clariusque illum dicentem audire posset, &c. Ex quibus nulli tandem dubium relinquitur, quin in magnis hominum effusionibus, audiendi causa factis, steterit olim maxima populi pars.

Illud perobscurum adhuc, & plenum questionis esse videtur; Quid de communibus ac quotidianis Concionibus, hoc est, de iis, quæ haud ita frequenti concursu haberi solebant, statuendum sit. Ex Optato quidem Milevitano, stantes semper adfuisse Auditores in Concionibus, satis aperte intelligimus, cum populum in Ecclesia neget habuisse sedendi potestatem: quibus autem suam sententiam ostendit, sunt hæc illius verba in lib. 4. adversus Parmenianum de Schismate Donatistarum: *Dum peccatorem arguit, & sedentem increpat Deus, specialiter ad vos (Sacerdotes) dictum esse constat, non ad populum,*
qui

qui in Ecclesia non habet sedendi licentiam. Dicimus hoc idem ex Chrysostomo sic scribente: Quando vero quæso vos Dilecti melius fecistis? an præterita synaxi, quando post mensam ad somnum convergebamini? an nunc, cum post mensam ad divinas leges audiendas convenistis? Quando in foro commorabamini, & confessuum nihil boni habentium participes eratis? an nunc quando cum fratribus vestris stetistis, & propheticos audistis Sermones? Id ipsum etiam significat locus Apollinaris Sidonii ex Eucharistico Carmine ad Faustum Reiensem Episcopum, in quo sub finem ita scriptum est:

*Seu te conspicuis gradibus venerabilis aræ
Concionaturum plebs sedula circumfistit.*

In Africa certe, Augustini maxime temporibus, ex communi more stetisse auditores omnes in Concionibus, ex eo planum fit, quod in Homilia 26. libri quinquaginta Homiliarum, & sedendi potestatem quibusdam ex infirmitate defert Augustinus, & eorum licentiæ fortiter resistit, qui, nequaquam infirmi, eandem tamen sedendi libertatem sibi interdum, quasi pro suo jure, sumebant. *Ante aliquot dies (inquit) propter eos, qui aut pedibus dolent, aut aliqua corporis inæqualitate laborant, paterna pietate sollicitus, consilium dedi, & quodammodo supplicavi, ut, quando aut Passiones proluxæ, aut certe Lectiones longiores leguntur, qui stare non possunt, humiliter & cum silentio sedentes attentis auribus audiant, quæ leguntur. Nunc vero*

vero aliqua de filiabus nostris putant, quod hoc; aut omnes, aut certe plures, quæ sana sunt corpore, frequenter debeant facere: nam ubi Verbum Dei cæperit recitari, quasi in lectulis suis ita jacere volunt, atque utinam vel jacerent tantummodo, & tacentes Verbum Dei sitiendi corde susciperent, non etiam se ita otiosis fabulis occuparent; ut, quod prædicatur, nec ipsæ audiant, nec alios audire permittant. Unde ergo vos, venerabiles filia, sollicitudine paterna commoneo, ut, quando aut Lectiones leguntur, aut Verbum Dei prædicatur, nulla se in terram projiciat, nisi forte, quam nimium gravis infirmitas cogit; sic tamen non jaceat, sed magis sedeat, & attentis auribus, quæ prædicantur, avido corde suscipiat. Hæc Augustinus, cujus verba illud etiam subobscurè videntur significare, fuisse morem in Africa, ut non modo viri, sed etiam mulieres, stantes adessent in Concionibus: siquidem iis quoque, dum aut Lectiones recitantur, aut habentur Conciones, sicuti præcidit licentiam libertatemque se prosterendi, ita sedendi etiam potestatem ex infirmitate concedit. Libro autem de Catechizandis Rudibus cap. 13. adfirmans idem Augustinus; sessione aliquando occurrendum Auditorum satietati & fastidio, earumque Transmarinarum Ecclesiarum consuetudinem commendans, in quibus sedilia audientibus subjacebant, ne quisquam videlicet infirmior stando, aut ab attentione averteretur, aut cogeretur abscedere; plane demonstrat,

monſtrat, ſtare ſolitos in Africa Auditores; atque eis non niſi ex juſta ac neceſſaria cauſa ſedendi poteſtatem permitti: totus Auguſtini locus in eo, quem dixi, libro ita ſcriptus eſt: *Sape etiam fit, ut qui primo libenter audiebat, vel audiendo, vel ſtando fatigatus, non jam laudans, ſed oſcitans labia diducat, & ſe abire velle etiam invitus oſtendat. Quod ubi ſenſerimus, aut renovare oportet ejus animum, dicendo aliquid honeſta bilaritate conditum, & aptum rei, quæ agitur, vel aliquid valde mirandum, ſtupendum, vel etiam dolendum, atque plangendum; & magis de ipſo, ut propria cura punctus evigilet, quod tamen non offendant ejus verecundiam aſperitate aliqua, ſed potius familiaritate conciliet: aut oblata ſeſſione ſtudeat ſuccurrere: quamquam ſine dubitatione melius fiat, ubi decenter fieri poteſt, ut a principio ſedens audiat; longeque conſultius in quibuſdam Eccleſiis Tranſmarinis non ſolum Antiſtites ſedentes loquuntur ad populum, ſed ipſi etiam populo ſedilia ſubjacent, ne quiſquam infirmior ſtando laſſatus a ſaluberrima intentione avertatur, aut etiam cogatur abſcedere.*

Uſitatam hanc porro Auguſtini ævo Auditorum ſtandi conſuetudinem in Concionibus placet aliis ejusdem Auguſtini testimoniis confirmare: *Noſtis Fratres, (ait Tractatu 19. in Joannis Evangelium) quia ad panem ventris cum labore pervenitur, quanto magis ad panem mentis? Cum labore ſtatis & auditis, ſed nos cum majore ſtamus*

ſtamus & loquimur. Tractatu 112. in eundem Joannem: Quomodo autem inter ſe omnes (Evangeliftæ) conveniant, ne veritati, qua per alium promitur, ab alio repugnetur, quiſquis noſſe deſiderat, non in his Sermonibus, ſed in aliis laborioſis Litteris quærat; nec ſtando, aut audiendo, ſed potius ſedendo & legendo, vel legenti aurem mentemque intentiſſimam præbendo, illa condiſcat. In Homilia 28. libri 50. Homiliarum: Audi ergo Pſalmum, te admonuit, te quicumque es, qui forte hic hodie ſtas, & noſſe aliquid feciſti, te admonuit, tibi dixit, Hæc feciſti, & tacui, &c. In Concione 2. ad Pſalmum 32: Adhuc quidem ſpectatores in amphitheatro forte inſaniunt, & in ſole ſedent, & nos ſi ſtamus, tamen in umbraculo ſumus, & utiliora & pulchriora ſunt, qua ſpectamus. In Expoſitione Pſalmi 147: Fatigatos vos nuſquam video, tamen vereor, novit Deus, ne oner ſim vobis, aut quibuſdam fratribus; & video ſtudia multorum hunc laborem de me & ſudorem, quem credo in Domino non futurum infructuoſum. Gaudio tantam eſſe voluntatem & voluptatem in veritate Verbi Dei, ut ſtudio vestrum bonum in bono & de bono vincat ſtudio inſanorum currentium in amphitheatrum; numquid illi, ſi tamdiu ſtarent; adhuc ſpectarent? Ergo fratres audiamus cætera, quia hoc vultis. In Sermone 49. de Diverſis: Ut ergo vos non diu teneam, præſertim quia ego ſedens loquor, vos ſtando laboratis. Et in Ser-mone 122. Quamquam propter commoditatem depro-

depromenda vocis altiore loco stare videamur; tamen in ipso altiore loco vos judicatis, & nos judicamur. Doctores dicimur, sed in multis Doctorem querimus, nec volumus non haberi Magistros. Periculosum est enim & prohibitum, Domino ipso dicente, Ne velitis dici Magistri, unus est Magister vester. Periculosum ergo Magisterium; Discipulatus securus est, securior est enim verbi auditor, quam verbi prolator; ideo ille securus stat, & audit eum, &c. In Sermone 20. de verbis Domini in Evangelium secundum Lucam: In Martha erat imago presentium, in Maria futurorum; quod agebat Martha, ibi sumus; quod agebat Maria, hoc speramus. Hoc agamus bene, ut illud habeamus plene. Numquid inde habemus? Quamdiu hic sumus? Quantum est, quod inde habemus? Nam & modo inde aliquid agimus remoti a negotiis, sepositis familiaribus curis; convenistis, statis, auditis. In Sermone tandem 8. de Sanctis, ex iis septemdecim, quos addidere Parisienses: Longam lectionem audivimus, (passionem nimirum sancti Vincentii) brevis est dies. Longo sermone etiam nos tenere vestram patientiam non debemus. Novimus, quia patienter audistis, & diu stando, & audiendo, tamquam Martyri compassi estis.

Atqui, ut Auditorum standi in Concionibus & morem magis stabiliam, & causas aliquo modo eliciam, subjiciam hoc loco præclarum illud & imitatione dignissimum Magni Constantiniani Imperatoris factum, quod in hanc rem

S

ab

ab Eusebio in lib. 4. de ejus Vita cap. 33. iis verbis refertur: *Cum ejus singulari erga Deum pietate adducti postularem, ut de Salvatoris monumento & sepultura disputantes nos audire vellet; libentissime sane aures suas Sermonibus nostris præbuit, & in ipsa basilica magno Auditorum cætu circumfusus, erectusque stans communem cum reliquis audiendi operam exhibuit. Cumque flagitarem, ut regali in solio, quod ibi sessionis causa positum erat, se reclinaret, minime cessit nostris precibus; quin potius contento animo quæ dicebantur secum dijudicabat; & Theologiæ decretis veritatis testimonium dabat. Sed cum jam multum temporis fluxisset, & nos longiores essemus, finemque facere statueremus; hic quidem ille restitit, & ut omnem Sermonem absolveremus, hortatus est. Rursus vero, ut sederet deposcentibus nobis, subivisti & austero vultu respondit, nefas esse institutis de Deo disputationibus negligentes aures præbere; sibi vero esse hoc in primis utile, præsertim cum pium sit, de divinis rebus differentes, erectos audire. Ex quibus Eusebii verbis perspicue liquet, non modo stantem inter cæteros Constantinum oranti Eusebio aures dedisse, verum etiam eam porissimum ob causam stetisse, quod sciret, standi actum decere pios ac humiles Auditores ob divini verbi reverentiam, & ipsam quoque attentionem ex eo maxime augeri.*

Ceterum standi morem in audiendis Concionibus, Africæ potius peculiarem, quam totius Ecclesiæ

Ecclesie communem fuisse : quin etiam communiori & antiquiori consuetudine sedentes adfuisse in Concionibus Auditores, adscripta mox Ecclesiasticorum Scriptorum testimonia facillime comprobabunt . Atque si res ab ultima antiquitate repetenda est , Christus ipse disputantes in templo Doctores sedens audivit , teste Luca in Evangelii cap. 2. sic scribente : *Et factum est, post triduo invenerunt illum in templo sedentem in medio Doctorum audientem illos . Ipsi quoque Esai sedentes aderant in Concionibus* : hæc enim de eis habet Philo in eo libro, quem de probi libertate inscripsit : *Quoties sacras ades adeunt, pro ætatis ordine juniores ad seniorum pedes confidunt, & ad audiendum se componunt : ibi alius ex libro prelegit, alius quispiam peritioribus accedens, quæ obscura sunt, explicat. Et in libro de Vita Contemplativa : Septima (die) conveniunt (Esai) in cætum communem, & juxta ætatis ordinem sedent, decenti habitu, manus continentes sub pallio, dexteram intra pectus barbamque, sinistram applicatam lateri; tum progressus in medium natu maximus differit, reliqui omnes ansultant per summum silentium, annutantes oculis tantum, vel capite . Invenitur etiam hic mos expressus apud Auctorem Apostolicarum Constitutionum in lib. 2. cap. 37. ubi ita est : Sit horum (Diaconorum) cura, ut laici in altera parte, ordine, & decore, & quiete sedeant; item ut sedeant mulieres separatim ac cum silentio: in*

medio autem, Lector ex edito loco, &c. Deinde hortentur populum Presbyteri, non omnes simul, sed singulatim, & postremus omnium Episcopus, qui similis est gubernatori navis, &c. Si quis autem receptus fuerit, qui sedeat loco non decenti, increpetur a Diacono, tamquam a Proreta, traducaturque in locum, qui eum deceat. Locis vero occupandis præsint Diaconus, ut quisque eorum, qui ingreditur, in locum suum se conferat, & nemo præter decorem sedeat. Consentire videtur & Justinus Martyr in Apologia ad Antoninum, dum surgendi verbo utitur, quod præviam sessionem necessario includit: Die, (ait) qui Solis dicitur; omnes, qui in oppidis vel agris morantur, unum in locum conveniunt, Commentariaque Apostolorum vel Prophetarum Scripta leguntur, quamdiu hora patitur; deinde ubi is, qui legit, destitit, is, qui præest, admonet, & hortatur, ut ea, quæ lecta sunt, bona imitemur. Tunc surgimus omnes, & comprecamur. In quam sententiam Origenes quoque & Athanasius surgendi vocem usurpant. Ille quidem in Homilia 3. in Isaiam, & 36. in Lucam; alter vero in Homilia de semine: quorum verba quia longum esset persequi, idcirco ea sciens prætermitto. Sed Auditorum sessionem significari a Cyrillo quoque Hierosolymitano arbitror, cum in Catechesi 16. inquit: Cogita, quot nunc estis, qui hic assidetis, quot nostrum animæ adsunt, in unoquoque tamen congrue operatur (Spiritus Sanctus), & medius existens

existens videt cujusque modum, cernit & cogitationem & conscientiam, & quid loquamur, & quid mente retineamus. Expressit illud idem æque aperte Chrysostomus in Sermone contra Judæos, Gentiles, & Hæreticos, iis verbis: *Hirundinum pulli, in nidulis sedentes, parentum suorum, qui sibi alimenta adferunt, adventum expectant, & cum ipsos venire conspexerint, levi ala movent aerem, cantillantes, & ad illorum adventum applaudentes; similiter & eorum parentes, cum nidulo appropriant, cantillant, pullis adventum suum annunciantes. Similiter autem & vos in nido templi hujus sedetis, meum adventum expectantes, & quia venientem videtis, levi mentis ala volatis, &c.* Quinimo Augustini ævo quemadmodum in Africa, ut vidimus, stantes aderant in Concionibus Auditores, ita in Italici Ecclesiis eisdem communi more sedisse, prodidit idem Augustinus citato de Catechizandis Rudibus lib. cap. 13. in hunc modum: *Longe consultius in quibusdam Ecclesiis Transmarinis non solum Antistites sedentes loquuntur ad populum, sed ipsi etiam populo sedilia subjacent, ne quisquam infirmior stando lassatus a saluberrima intentione avertatur, aut etiam cogatur abscedere.* Per Transmarinas autem Ecclesias, Italas proculdubio, ac Romanam præsertim, intellexisse Augustinum, fidem faciunt ea, quæ apud Augustinum ipsum, Possidium, Zonnam, & Balsamonem ita scripta leguntur. *Episcopum alium* (ait Augustinus in Epist. 162.)

plebi Carthaginensi ordinabimus, cum tota Ecclesia isti fuerint separati: ne forte cum alius modo fuerit ordinatus, non ei communicetur ab Ecclesia Transmarina. Romanam utique intelligit hoc loco Augustinus, quod ejus nimirum communicationem Catholicæ omnes Ecclesiæ debeant habere. Ibidem paulo post, Transmarinos etiam Episcopos pro Italis dixit: An forte non debuit Romana Ecclesiæ Melchiodes Episcopus cum Collegis Transmarinis Episcopis illud sibi usurpare iudicium, quod ab Afris lxx, ubi primas Tigistanus præsedit, fuerat terminatum? Possidius in Augustini Vita: Consequenti tempore trans mare in urbe Roma, & apud Mediolanum, ubi tunc temporis Imperatoris Valentiniani Minoris Comitatus fuerat constitutus &c. Sed apertius Zonaras ad Can. 77. Synodi Carthaginensis: Transmarinam Synodum, eam, quæ in Italia est, nominat. Et ad Can. 140: Si quis autem ad Transmarina Iudicia, hoc est, ad Italiæ Episcopos, vel ad Italiæ Synodum, provocare velit, a Communione in Africa Synodo excludatur. Balsamon etiam ad Can. 31. ejusdem Synodi: Transmarina (inquit) omnino Iudicia appellabuntur Romana. Et ad Can. 108: Eos, qui ab Ecclesiis in Africa clanculum defecerunt, & in Transmarinis Ecclesiis seu Romæ sacrificant, deponi jubet Canon. Et ad Can. 126: Sin autem eorum quoque, ad quos appellavit, sententia ei displiceat, non debet ad Transmarinas Synodos appellare, quæ Romæ scilicet sunt, sed ad propinquiores,

quiores, &c. Hac eadem notione, & apud eundem Augustinum, & apud alios, Maxime Africanos Scriptores, & Transmarinas partes seu regiones, & Transmarinos Episcopus, & Transmarinos Judices, & Transmarina Concilia, & Transmarina Judicia, non semel diligens lector reperiet. Sed hoc est longius, quam quo intendimus, progredi: ad institutum igitur.

Auditores olim & stantes & sedentes adfuisse in Concionibus, ex his, quæ dicta sunt, satis manifestum est. Posset porro non abs requæri hoc loco, sedendum ne sit, an standum nunc in audiendo Verbo Dei: qua de re si quis me cogeret sententiam dicere, ita pronunciarer. Et necessitati parendum, & serviendum attentioni. Qui enim corpore imbecilliores nequeunt standi laborem sustinere, ob eamque defatigationem ab ipsa avertuntur attentione, iis sedendi potestatem omnino concedendam statuo: qui autem firmi ac valentes sunt, nec stando defatigantur, quin sedentes & cito satietate afficiuntur & somnum tenere vix possunt, hos definitio, ob ipsametiam divini Verbi reverentiam, nonnisi stantes debere in Concionibus adesse. Ad hanc autem sententiæ pronuntiationem facem prætulere Eusebius Cæsariensis & beatus Augustinus, quorum verba superius producta ad faciendam fidem hic iterum subijcere non gravabor: *Ut sederet* (inquit ille in Con-

S +

stan-

stantini Vita lib. 4. cap. 33. de eodem agens) depofcentibus nobis, fubtrifti & auftero vultu refpondit, nefas effe institutis de Deo difputationibus negligentes aures præbere; ſibi vero hoc (ſtare nimirum) etiam in primis utile , præſertim cum pium ſit, de divinis rebus differentes, erectos audire . Auguſtinus vero in lib. de Cathechizandis Rudibus , cap. 13. poſtquam ſtantium Auditorum faſtidio ac ſatietati pronuntiavit ſeſſione occurrendum, mox ſubdit: Quamquam ſine dubitatione melius fiat, ubi decenter fieri poteſt, ut a principio ſedens audiat: longeque conſultius in quibuſdam Eccleſiis Transmarinis non ſolum Antiſtites ſedentes loquuntur ad populum, ſed ipſi etiam populo ſedilia ſubjacent, ne quiſquam infirmior ſtando laſſatus a ſaluberrima intentione avertatur, aut etiam cogatur abſcedere . Et in Homil. 26. libri 50. Homiliarum: Propter eos, qui aut pedibus dolent, aut aliqua corporis inæqualitate laborant, paterna pietate ſollicitus conſilium dedi, & quodammodo ſupplicavi, ut, quando aut Paſſiones prolixæ, aut certæ alique Leſſiones longiores leguntur, qui ſtare non poſſunt, humiliter & cum ſilentio ſedentes attentis auribus audiant, quæ leguntur .

CAPUT XXII.

De Auditorum silentio & attentione in sacris Concionibus. Ethnici etiam Oratores silentium ab Auditoribus exigebant. Exclusi ab Ecclesiis pauperes, ne inambulantes ac elemosynam petentes molesti essent & Concionatori & Auditoribus.

IN Concionibus porro audiendis, quædam internum Auditoris habitum respiciunt, quædam externum. Ad illum pertinet fitis audiendi & proficiendi desiderium: ad hunc refero silentium, attentionem, clamores plausum, & ipsam in audiendo perseverantiam. Atque externa hæc omnia ab ipso proficiendi desiderio, sitique audiendi proficisci, beati Chrysostomi locus ex Homilia 3. in caput 1. Joannis testis est certissimus, cujus verba, sicut adhuc feci, ad rei firmitatem subjiciam. Hic enim concursus, & firma statio, impulsioque mutua, ut interior a vobis locus occupetur, unde clarius exaudiamur; qui licet comprimimini, nolitis recedere, quousque spirituale hoc dimittatur spectaculum; ad hæc plausus, tumultus, & alia hujusmodi, maximum mentis vestræ fervoris atque amoris audiendi sunt argumentum.

mentum. Nos hoc loco de iis dumtaxat agemus, quæ ex ipso audiendi & proficiendi desiderio emanare diximus. Primum Igitur de silentio & attentione, tum de clamoribus, post de plausu, postremo de ipsa in audiendo perseverantia differemus.

Silentium igitur olim imperatum, factamque audientiam, Diaconi voce interdum, interdum manu concionantis, abunde exposuimus superiori libro; docebimus nunc, magnum ipsosmet Auditores concionantibus silentium & attentionem præbuisse.

Ethnicos quidem in dicendo silentium ab Auditoribus suis & attentionem exegisse, significat Poetarum sapientissimus, dum auditores illos (ut est apud Agellium in lib. 5. cap. 1.) Ulyssi labores suos illustrissime narranti, ubi loquendi finis factus est, non exultare, nec strepere, nec vociferari facit, sed consiluisse universos dicit, quasi attonitos & obstupidos. Ob admirationem nimirum; quæ, ut ait Musonius Philosophus apud eundem Agellium eodem loco, cum maxima est, non verba parit, sed silentium. Juniores quoque Plinium, sive dicentem, sive recitantem, Auditorum silentio non minus, quam faustis clamoribus & plausibus delectatum, discimus ex ipsius Epist. 10. lib. 2. ad Octavium data, in qua ita est: *Imaginer, qui concursus, quæ admiratio te, qui clamor, quod etiam silentium maneat; quo ego, cum dico vel recito,*

recito, non minus quam clamore delector. Ut autem ostendat Plinius, quali Auditorum silentio delectari soleret, illico subjicit: Sit modo silentium acre, & intentum, & cupidum ulteriora audiendi. Congruunt autem hæc Plinii cum iis, quæ prodiderat Plutarchus in libro de Officio Auditoris, iis verbis: Neque res exigit, ut acclamatione illam testeris, dummodo oculis hilaritatem præ te feras, vultum ac frontem explices quadam festivitate, affectusque serenos ac benignos in conspectum proferas; acie oculorum indicientem semper intenta, ita ut illum minime fallat, quam attento sis animo: vultus proinde tenor constans sit ac purus, non modo a procacitate & duritie vacans, sed ab omni alia sollicitudine atque negotiis. Quam exteriorem in audiendo hilaritatem beatus quoque Augustinus videtur ab Auditoribus suis depoposcisse atque expetivisse; ait siquidem in libro de Catechizandis Rudibus cap. 10. Facit etiam loquenti tadium Auditor immobilis, vel quia non movetur affectu, vel quia nullo motu corporis indicat, se intelligere, vel sibi placere quæ dicuntur; non quia humanæ laudis nos esse avidos decet, sed quia ea, quæ ministramus, Dei sunt. Et quanto magis diligimus eos, quibus loquimur, tanto magis cupimus eis ut placeant, quæ ad eorum porriguntur salutem. Quod si non succedit, contristamur: & in ipso cursu debilitamur ac frangimur; quasi frustra operam conteramus.

Enimvero Essenorum summum ac perpetuum

in Concionibus silentium & attentionem, seu potius externum omnem in audiendo habitum, verissime nobis expressit Philo in libro *de Vita Contemplativa*, sic inquit: *Septima (die) conveniunt in catum communem, & juxta ætatis ordinem sedent decenti habitu, manus continentes sub pallio, dexteram intra pectus barbamque, sinistram applicatam lateri; tum progressus in medium natu maximus differit, reliqui omnes auscultant per summum silentium, &c.* Beatus vero Augustinus in Sermone 218. *de Tempore* Auditores olim ex Fidelium more silentes ac quietos in Concionibus adfuisse testatur: *Rogo vos, Fratres carissimi, ut secundum consuetudinem Fidelium cum silentio & quiete ea, quæ vobis prædicantur, accipiat. Quinimo ipsa divini Verbi dignitas ac majestas silentium & attentionem ab Auditoribus omnino requirit. Tradunt Origenes & Augustinus, non minorem præstari debere ab Auditoribus attentionem ac reverentiam divini Verbi prædicationi, quam impendi soleat a Fidelibus ipsius augustissimæ Eucharistiæ sumptioni. Nostis (ait Origenes Homilia 13. in Exodum) qui divinis mysteriis interesse consuevistis, quomodo, cum suscipitis corpus Domini, cum omni cautela & veneratione servatis, ne ex eo parum quid decedat, ne consecrati muneris aliquid dilabatur: reos enim vos creditis, & recte creditis, si quid inde per negligentiam decedat. Quod si circa corpus ejus conservandum tanta utimini cautela, & merito utimini;*

mini; quomodo putatis, minoris esse piaculi, verbum Dei neglexisse, quam corpus ejus? Augustinus vero, Origenis fortasse vestigiis insistens, in Homilia 26. libri 50. Homiliarum: *Interrogo vos, Fratres (inquit) vel Sorores, dicite mihi: Quid vobis plus esse videtur, verbum Dei, an corpus Christi? Si verum vultis respondere, hoc utique dicere debetis, quod non sit minus verbum Dei, quam corpus Christi. Et ideo quanta sollicitudine observamus, quando nobis corpus Christi ministratur, ut nihil ex ipso de nostris manibus in terram cadat; tanta sollicitudine observemus, ne verbum Dei, quod nobis erogatur, dum aliquid aut cogitamus aut loquimur, de corde nostro pereat: quia non minus reus erit, qui verbum Dei negligeret audierit, quam ille, qui corpus Christi in terram cadere negligentia sua permiserit. Ex eo quoque apparet, necessarium esse Auditorum silentium in Concionibus, quod insusurrantium ac obloquentium vocibus & ipsi concionantes maximo incommodo afficiantur, & multam trahant molestiam ceteri audientes, ita ut omnis utilitatis fructus facile perdat. In hosce loquaces ob rei indignitatem acerbè invecus B. Ambrosius in lib. 3: de Virginibus ita pronunciat: *An quidquam est indignius, quam oracula divina circumstrepere: ne audiantur, ne credantur, ne revelentur? circumsonare sacramenta confusis vocibus, cum Gentiles idolis suis reverentiam tacendo deferant? Cæsarius quoque Arelatensis magnas in eodem**

eisdem jactat minas, certumque iis impendere periculum adfirmat; hoc enim pacto scribit in Homilia 34: *Qui in Ecclesia ineptis & incongruis fabulis occupatur, quasi venenum & gladium reliquis hominibus ingerere vel præbere cognoscitur; dum Verbum Dei nec ipse audit, nec alios audire permittit. Qui enim talis est, & pro sua & pro aliorum destructione in die judicii redditurus est rationem.*

Addo, Pontificem Pium, ejus nominis V, ob id negare, permittendos pauperes inter concionandum per Ecclesias inambulare & petere eleemosynam, quod hoc modo soleant & concionanti & ceteris audientibus molesti esse: *Ne pauperes (ait in Constitutione 5.) mendicantes, seu eleemosynas petentes per Ecclesias tempore Missarum, Prædicationum, aliorumque divinarum Officiorum, ire permittantur, sed ad valvas Ecclesiarum stare jubeantur.* Id quod statutum etiam fuit in I. Concilio Provinciali Mediolanensi sub sancto Carolo Borromæo, cap. de Ecclesiis & earum cultu. Quam ob causam olim etiam non nisi pro foribus Ecclesiarum stabant pauperes, ut est apud beatum Lucam in Actis cap. 3. de claudio agentem, qui quotidie exponebatur ad Templi portam Speciosam. Quod & sanctus Chrysostomus exprimit in Homilia in epist. Pauli ad Thessalonicenses & in II. S. Pauli ad Timotheum: & colligi potest ex Gregorii Nazianzeni Oratione 27, quæ est, *De pauperum amore.*

CAPUT XXIII.

*Acclamabant interdum Auditores in Con-
cionibus ; ut , quæ a Concionatore dice-
bantur , se penitus assecutos iis vocibus si-
gnificarent.*

Clamorum, seu potius acclamationum in
Concionibus factarum, genera duo reperio
apud Ecclesiasticos Scriptores. Unum, quo te-
stabantur Auditores, attentione & intelligentia
se penitus assecutos, quæ a Concionatore aut
dicebantur, aut dicenda erant; atque ita conten-
tis quibusdam ac distinctis vocibus, intelligen-
tiæ nimirum ac attentionis testibus, dicentem
ipsum aut comitabantur, aut etiam prævenie-
bant. Alterum genus est, cum traductus in ad-
mirationem populus ob rem aliquam præclare
dictam, faustis acclamationibus plausibusque com-
positis concionantem prosequeretur. Primum
acclamandi morem nunc idoneis firmabo testi-
moniis.

Acclamationum igitur, quibus utebantur Au-
ditores, tamquam attentionis & intelligentiæ
testibus, illustria nobis non uno loco suppeditat
exempla B. Augustinus; veluti Sermone 63. de
verbis Domini in Evangelium Joannis, ubi cum
de tribus animæ potentiis, Memoria, Intellectu,
&

& Voluntate, altius disputasset, indicaretque metuere se, ne ob disputationis subtilitatem minus intelligerentur quæ dicebat; audiens populus, ut illa, licet subtilius tractata, assecutum se nihilominus ostenderet, (*Memoria*) clamitare cœpit. Augustini verba, ut ad id, quod involutum est tenebris, illustre adhibeatur lumen, subijciam. *Hæc sunt tria (inquit) quæ me dicturum esse promiseram auribus & mentibus vestris. Tria hæc sunt in te, quæ potes numerare, & non potes separare. Hæc ergo tria, Memoriam, Intellectum, Voluntatem, hæc, inquam, tria animadvertite, separatim pronuntiari, inseparabiliter operari. Aderit Dominus, & video quod adsit: ex intellectu vestro intellego eum adesse. Ex his enim vocibus vestris, quemadmodum intellexeritis, adverto; præsumo eum adjuturum, ut omnia intelligatis. Tria promissi separabiliter demonstrari, inseparabiliter operari. Ecce nesciebam, quid esset in animo tuo, demonstrasti mihi dicendo, Memoria; hoc verbum, sonus iste, vox ista processit ad aures meas ab animo tuo. Hoc enim quod est, Memoria, tacite cogitabas, & non dicebas; erat in te & nondum venerat ad me. Ut autem, quod erat in te, proferretur ad me, dixisti ipsum nomen, id est, Memoria. Et paulo post: Sed, ut hoc diceres, Memoria, & quatuor istas syllabas operareris, unde operatus es? Hoc nomen, quod pertinet ad solam Memoriam, operata est in te Memoria, ut teneres, quod dicebas; & Intellectus, ut scires, quod tenebas; & Volun-*

Voluntas, ut proferres, quod sciebas. Gratias Domino Deo nostro. Adjuvit nos, & in vobis, & in nobis. Vere dico Caritati vestræ. Hoc discutendum & insinuandum trepidissime aggressus eram, metuebam enim, ne forte lætificarem capacium ingenium, & facerem grave tardioribus tedium. Nunc autem video vos, & attentione audiendi, & celeritate intelligendi, non solum percepisse dictum, sed prævolasse dicturum. Gratias Domino, &c. Et in Sermone 13. de verbis Domini in Evangelium Matthæi cum pronunciare cœpisset Augustinus illum Psalmi versiculum, Pluviam voluntariam segregans Deus, &c. populus verba, quæ proxime post proferenda erant, optime tenens, dicentem ipsum in illorum recitatione prævenit; ita enim inibi scriptum est: Attendite, audite, intelligite, agite. Neque enim agendum est cum firmis alibi, ut sint infirmi, sed agendum est cum infirmis, ut sint firmi. Multos autem impedit a firmitate præsumptio firmitatis: nemo enim erit a Deo firmus, nisi qui se a se-ipso sentit infirmum. Pluviam voluntariam segregans Deus hæreditati suæ. Quid præceditis, qui quod dicturus sum vobis? Temperetur velocitas, ut sequatur tarditas. Hoc dixi, & hoc dico, audite, capite, facite. Nemo a Deo fit firmus, nisi qui se a se-ipso sentit infirmum. Pluviam ergo voluntariam, sicut Psalmus dicit. Voluntariam, non meritorum nostrorum, sed voluntariam. Pluviam ergo voluntariam segregans Deus hæreditati suæ: ctenim infirmata est, tu vero

T

perfe-

*perfecisti eam. Id ipsum ab audiente populo factitatum, dum secundum de verbis Apostoli Sermonem haberet Augustinus, declarant illa ipsius Sermonis verba, quæ sic habent: Quid ergo Dominus dicit? Servite Domino in timore, & exultate ei cum tremore. Sic & Apostolus, cum timore & tremore vestram ipsorum salutem operamini; Deus enim est, qui operatur in vobis; ergo exultate cum tremore, ne quando irascatur Dominus: Video, quia clamando prævenitis; quid enim dicturus sum scitis, & clamando prævenitis: Et hoc unde habetis, nisi quia docuit, ad quem credendo venistis? Hoc ergo dicit, audite quod nostis, non doceo, sed commemoro prædicando; immo nec doceo, quia nostis, nec commemoro, quia meministis: sed simul dicamus, quod vobiscum tenemus. Hæc Dominus dicit, apprehendite disciplinam, & exultate, &c. Nec minus aperte discimus hoc idem ex ejusdem Augustini Sermone 42. de Sanctis, in quo ita est: Sed est aliud, quod hic magis recogitem non dissimile intelligere, quod plus pertinet ad me, & ad omnes dispensatores, sed & ad vos auditores. Qui salutatur, salutem dicit. Nam & Antiqui in Epistolis suis sic scribebant, Ille illi salutem: salutatio a salute nomen accepit. Quid ergo est, Neminem in via salutaveritis? Qui salutant in via, per occasionem salutant. Video vos cito intellexisse, nec tamen debeo jam finire; non enim omnes cito intellexistis. Vidi in voce intelligentes, plures video silentio requirentes. Sed quia
 de*

de via loquimur, tamquam in via ambulemus. *Veloces tardos expectate, & pariter ambulate.* In Sermone demum 45. de Diversis, cum dixisset Augustinus, duplicia pallia fecisse Ecclesiam viro suo: Auditores intelligentia statim comprehendentes, quæ essent illa pallia, acclamaverunt dicenti. Verba id exprimentia sunt hæc: *Videte ergo, quemadmodum induti esse debeatis. Pro vestibus nostris etiam opus faciamus; omnes enim apud eam vestiti sunt. Quid viro suo? Quæ servo vestit, viro suo nihil operatur? Duplicia pallia fecit viro suo. Jam acclamatis: credo, quod agnoscitis, quæ sunt duplicia pallia, quæ facit Ecclesia viro suo. Pallia, quæ illi facit, laudes sunt, laudes fidei, laudes confessionis, laudes prædicationis, &c. Est & qui ad hanc rem omnino pertineat locus in Pauli Emeseni Episcopi Homilia de Christi Incarnatione coram Cyrillo Alexandrino habita, (reperitur autem hæc inter ejusdem Cyrilli Homilias numero septima.) Cum enim ea verba in Concione protulisset Paulus, *Peperit itaque Dei-para Maria Emmanuelem*, statim populus ut se & intellexisse, & firmiter credere, quæ dicebantur, declararet, dicentis cui sum, interrumpens acclamavit in hunc modum: *Ecce fides eadem est, donum Dei, Cyrille Orthodoxe; hoc audire cupiebamus, qui non ita loquitur, anathema sit.* Venio ad alterum acclamandi genus, de quo ex instituto nunc dicam.*

CAPUT XXIV.

*Fauste olim concionanti ab audiente populo
factæ acclamationes, plaususque dati.*

Quemadmodum admiratio, cum maxima est, silentium gignit, (ut supra docuimus ex Musonio Philosopho apud Agellium libro 1. cap. 1.) ita mediocris verba parere & laudes in audientium ore consuevit. Propterea Isidorus Pelusiota in libro 3. epistola 343. ob admirationem aliquando ipsum Orationis cursum ab Auditoribus interruptum, laudibus nimirum faustisque vocibus pro dicente missis, pronūciavit, sic inquit: *Non parvi momenti res est acutus & sagax Auditor, qui non tantum ob admirationem Orationis cursum interruptit, verum etiam ea, quæ ardus contemplationis sunt, excogitat, atque a se ipso aliquid erogare potest. Ob rem aliquam igitur præclare dictam traducti olim in admirationem Auditores, dicenti & fauste acclamabant, & applaudebant composite. Quamvis autem a plausibus hoc revera differant acclamationes, quod plausus darentur manibus, vocibus fierent acclamationes: (id quod sedulo exponemus in Commentario de sacro & prophano acclamandi & plaudendi more) quia tamen junguntur sæpius*
hzc

hæc duo ab Auctoribus, confunduntur etiam ac
permiscuntur, eam nimirum ob causam, quod
raro ad acclamandum ederentur voces, quin ma-
nus etiam moverentur ad applaudendum; idcir-
co ea nos quoque hoc loco jungentes, confuse
ac permiscere veterum Auctorum de plausibus &
acclamationibus testimonia producemus. Quo-
rum recensendorum initium ab eo potissimum
faciam, qui, licet (ut erat ingenio austeriore,
fortiterque laudis omne studium aspernabatur, &
omnes etiam umbras falsæ gloriæ repudiabat) id
unum ageret ac moliretur, ut plausus & accla-
mationes de sacris Concionibus tolleretur, iteratis
nihilominus acclamationibus plausibusque certis
ac compositis sæpissime inter dicendum ab au-
diente populo fuit & interruptus & exceptus.
Beatum dico Chrysostomum, cujus hæc sunt in
Homilia 30. ad Apostolorum Acta: *Multa multi
faciunt, ut in medio constituti longam extendant
Orationem: & si plausus quidem a multitudine con-
sequantur, hoc eis regno simile factum est: si ve-
ro cum silentio Sermonem finierint, silentii tristitia
fit illis gehenna molestior. Hoc Ecclesias subvertit,
quoniam neque vos Sermonem audire queritis com-
punctivum, sed qui delectare sono valeat & ver-
borum compositione, tamquam citharædas & citha-
ristas audientes. Et nos segniter & ærumnose fa-
cientes, vestras sequimur concupiscentias, cum sit
opus eas excidere. Et aliquanto post: Hæc & nos
patimur, verborum fucos conquirentes, & compo-*

sitiones, & elegantem juncturam, ut delectemur; non prosumus: consideramus quomodo videamur admirabiles, non quomodo mores componamus. Credite mihi, vera dico: dum mihi applauditur dicenti, per ipsum quidem tempus humanum aliquid patior, (cur enim non verum fatear?) & gestio & exulto. Postquam domum ingressus plausores nihil adjutos esse cogitavero, & si quid profecisse debebant, per plausum & laudes amisisse, doleo, gemo, & lugeo: & tamquam omnia temere dixerim, sic afficior & mihimet-ipsi dico, quæ mihi sudorum utilitas, cum Auditores ex Sermonibus nostris lucrari nihil velint? Et frequenter legem ponere cogitavi, quæ plausus prohiberet, & cum silentio congruaque tranquillitate nos audire persuaderet. Sed tolerate, quaeso, & obedite mihi: & si videtur, hanc sanciamus legem, jam audientium nemini licere cuiquam inter dicendum applaudere: sed si velit admirari, cum silentio miretur, prohibet nemo. Omne vero studium & promptitudo ad dicta præstetur suscipienda. Quamobrem applausistis? De hoc legem profero. Vos autem nec audire toleratis. Chrysost. in Homil. 17. in Matthæum: Laudastis dicta, sed plausibus mihi non est opus, neque laudantium vocibus & tumultu. Unum dumtaxat volo, ut cum quiete & intelligentia audientes quæ dicuntur faciatis. Hoc mihi pro plausu, hoc mihi pro laudatione. Si vero dicta quidem commendes, quæ vero laudas non exequaris, major quidem pœna, major autem accusatio, & nobis dedecus & derisio. Nec enim

theatro

theatro paria sunt presentia, neque tragados spectantes nunc sedetis, ut dumtaxat applaudatis, Hic est spiritualis schola: propterea & quod elaboratur, unum est, ut dicta servetis & per opera obediensiam exhibeatis. Homilia autem 1. in Genesim: Neque enim (ait idem Chrysostomus) temere & frustra huc convenimus, ut unus quidem loquatur, alius vero quae dicuntur plausibus excipiat, &c. Homilia 4. ejusdem libri: Videbam vos omnes avidos doctrina ab ore meo pendentes, & omnia facientes, ne quid vos dictorum prateriret: praterea continui plausus maxime testabantur, quod dicta magna voluptate susceperitis. Et Homil. 54. Numquid temere & in vanum dicere volumus, ut a vobis laudum fructus recipiamus, & ut plaudentes manibus recedatis? Non hoc spectamus, absit. Sed vestra utilitas mea maxima laus est, & summus plausus, si quis a vitiis ad virtutem convertatur; & si quis antea deses nostra adhortatione studiosus fiat. In Concione 2. de Lazaro: Tacete qui hac auditis, multo majorem vobis habeo gratiam pro silentio, quam pro plausibus; propterea quod plausus quidem ac laudes me faciunt gloriosiores, silentium vero hoc vos reddit compositiores. In Homilia 2. ad cap. 1. Joannis: Hic concursus frequens ac diligens attentio, impulsioque & preparatio, ut ea vobis loca occupentur, unde clarius exaudiamus; nec non vestra in tanta angustia perseverantia, quousque spirituale hoc dimittatur spectaculum: ad hac plausus, tumultus, & alia hujusmodi, maximum animi &

fervoris vestri sunt argumentum. In Homilia 2. ad Populum Antiochenum: Non est theatrum Ecclesia, ut ad delectationem audiamus: adjutos hinc recedere oportet, lucratos quidquam amplius & magnum sic recedere expedit; quoniam temere & frustra proficiscimur, si ad tempus refrigerati sic recesserimus vacui, & dictorum utilitate inanes facti. Quæ mihi horum plausuum utilitas? quæ laudum & tumultuum? Laus mea est, per opera vos omnia, quæ dicuntur, exhibere: tunc ego felix habendus & beatus, non quando suscipiatis, sed quando omnium alacritate faciat quacumque audiveritis. In Homilia 5. ad eundem Populum Antiochenum: Laudastis dicta, verum & factis laudem demonstrare: quod enim alioqui hujus Concionis emolumentum? E paulo post: Etenim nunc quidem brevi temporis momento laudatis prædicata; si vero res impleatis, per omnem diem & per omne tempus & nos & vos ipsos laudabitis. In Homilia VII: Dicta nunc laudatis, sed cum correcti fueritis, magis laudabitis, non tantum nos, sed & vos ipsos, & cum majori voluptate audietis, quæ dicentur. In Homilia 11. in Epist. ad Titum: Dixisti recte, plaususque consecutus es? Et quid emolumentum? Si enim adjuti quidem sunt plaudentes, & mutati, & meliores effecti, prioribus abstinere malis, vere gaudendum est, non jam collatis laudibus, sed bona mirabilique mutatione: si vero laudantes quidem, & tumultuantes perseverant, & plaudentes, nullum autem ex plausibus fructum reportant, dolendum magis

magis est; quoniam hæc eis in iudicium cedunt & damnationem. In Homilia de recipiendo Severiano: Habeo gratiam, quod Sermonem meum laudibus prosecuti estis. In Homilia 3. de incomprehensibili Dei natura: Probastis quæ dixi, magno cum tumultu & plausu admonitionem recepistis; sed velim curam quoque adhibeatis, ut factæ vestra approbatio ostendatur. Jam non longum post tempus periculum faciam obtemperandi. Oratio excipere solet admonitionem. Equidem genus id probandi & commendandi cupio atque postulo; plausum illum desidero, quem non dicta, sed facta conficiunt. Et in 5. demum Homilia: Hæc ita doceo, non ut verbis probetis tantum & laudetis, verum etiam ut factis palam animum vestrum recepisse quæ laudat, faciatis. Hæc Chrysostomus. Ex quibus planè apparet, quanto sit Conciones ad pompam & ostentationem factas odio prosequutus: & quam severe faustas illas acclamationes ac plausus, inter concionandum ab Auditoribus solitos excitari, semper contempserit: haud immerito subverti ab iis Ecclesias adfirmans. Una & illud elucet, quas laudes Chrysostomus, quas acclamationes & plausus a suis deposceret Auditoribus. Deinceps locos proferam ex beato itidem Augustino; qui, licet admirandæ vir sanctitatis esset, videtur tamen faustas Auditorum acclamationes & plausus tulisse non invitus. Audistis, (ait in Sermonem 5. de verbis Domini in Evangelium Matthæi) laudastis, Deo gratias Semen

acce-

accepistis, verba reddidistis. Laudes istæ vestra gra-
 vant nos potius & in periculum mittunt; toleramus
 illas, & tremimus inter illas; tamen; Fratres mei,
 istæ laudes vestra folia sunt arborum, fructus qua-
 ritur. In Sermone 19. de verbis Apostoli: Ecce
 Christianus es, Ecclesiam frequentas, verbum Dei
 audis, de lectione verbi Dei latissime commoveris.
 Tu laudas tractantem, ego quero facientem. In
 Sermone 28. ejusdem libri: Quasi vero parvus sit
 fructus sudoris hujus mei, si omnes, qui mihi accla-
 maverunt, clament & contra te, ne falsum jurent
 adversum te. In Homilia 25. libri quinquagin-
 ta Homiliarum: Quid ergo mihi hodie maxime
 faciendum, nisi ut commendem vobis periculum me-
 um, & sitis gaudium meum? Periculum autem meum
 est, si attendam quomodo laudatis, & dissimulem
 quomodo vivatis. Ille enim novit, sub cujus oculis
 loquor, immo sub cujus oculis cogito, non me tan-
 tum delectari laudibus popularibus, quam stimulari
 & angī, quomodo vivant qui me laudant. Laudari
 autem a male viventibus nolo, abhorreo, detestor,
 dolori mihi est, non volu prati. Laudari autem a
 bene viventibus si dicam nolo, mentiar; si dicam
 volo, timeo ne sim inanitatis appetentior, quam su-
 liditatis. Ergo quid dicam? nec plene volo, nec ple-
 ne nolo. Non plene volo, ne in laude humana pe-
 ricliter; non plene nolo, ne ingrati sint, quibus præ-
 dico. In Sermone 45. de Tempore: Aliquando
 ista concupiscentia sic insidiatur Sanctis, ut faciat
 dormientibus, quod non potest vigilantibus. Unde
 omnes

omnes acclamastis, nisi quia omnes agnovistis? Tractatu 57. in Joannis Evangelium: Hæc vobis hodie satis sint, Dilectissimi, si quid secus, quam oportet, dicentes fortassis offendimus, vel laudibus vestris immoderatus, quam oportuit, elevatus sumus, impetrate mundationem pedibus nostris. In lib. 4. de Doctrina Christiana cap. 26: Quando nonnulla non jactatiuncula, sed quasi necessaria, atque, ut ita dicam, rebus ipsis extorta numerositas clausularum, tantas acclamationes excitat, ut vix intelligatur esse submissa. Loquitur autem Augustinus de submisso & humili dicendi genere, ex se ad excitandas acclamationem minime apto: subdit vero paulo post: Unde autem crebro & multum acclamatur ita dicentibus, (submisso ac humiliter) nisi quia veritas sic demonstrata, sic defensa, sic invicta delectat? In Expositione Psalmi 147: Quid de vobis clamavit? Dilectio pacis. Quid ostendit oculis vestris? Unde clamatis, si non amatis? Unde amatis, si non videtis? Invisibilis est pax. Quis est oculus, quo visa est, ut amaretur? neque enim acclamaretur, nisi amaretur. In libro de Catechizandis Rudibus cap. 13: Sape etiam fit, ut qui primo libenter audiebat, vel audiendo, vel stando fatigatus, non jam laudans, sed oscitans labia diducat, & se abire velle etiam invitus ostendat. Quod ubi senserimus, &c. Et in Sermone 27. de Diversis: Quid est enim modo, quod omnes attenditis, omnes auditis, omnes excitamini, & quando verum aliquid dicitur, delectamini? Quid vidij-

vidistis? quid tenuistis? quis color apparuit oculis vestris? quæ fama, quæ figura, quæ statura, quæ lineamenta membrorum, quæ corporis pulcritudo? Nihil horum, & tamen amatis: quando enim sic laudaveritis, si non amaretis? quando amaretis, si nihil videritis? Me itaque non ostendente formam corporis, lineamenta, colorem, pulcros motus, me non ostendente, vos tamen videtis, amatis, laudatis, &c.

Solitos olim Auditores concionanti fauste acclamare & plaudere, ex Chrysostomo & Augustino vere conclusum videtur; sed quominus planum idem faciam ex aliis quoque Patribus, nihil nunc quidem vetat. Magno igitur Constantino (frequens hic etiam habuit ad populum Conciones) faustis vocibus acclamatum non semel ab Auditoribus, prodidit Eusebius in ejus Vita lib. 4. cap. 29. iis verbis: *Quod si forte inter dicendum aliqua occasio incidisset de Theologia loquendi, erecto corpore consistens, contracto vultu, & demissa voce, cum singulari religione ac modestia, presentium animos cælesti disciplina initiare videbatur. Cumque universi faustis vocibus ei applauderent, solebant nutu significare, ut cælum suspicerent, & venerandis laudibus omnium regem Deum admirarentur & colerent.* De Gregorio Nazianzeno hæc narrat Hieronymus in Epistola 2. ad Nepotianum: *Præceptor quondam meus, Gregorius Nazianzenus, rogatus a me, ut exponeret, quid sibi vellet in Luca (capite VI.) Sabbatum* *divertitur* *elegan-*

eleganter lufit. Docebo te, inquit, ſuper hac re
 in Eccleſia; in qua, mihi omni populo acclamante,
 cogeriſ invitus ſcire, quod nesciſ; aut certe ſi ſolus
 ſacueriſ, ſolus ab omnibus ſtultitia condemnaberis.
 De ſe-ipſo autem ita ſcribit idem Nazianzenus
 in Inſomnio de Anaſtaſiæ Templo: Atque alii
 quidem Sermonem noſtrum miris laudibus eſſerebant,
 alii ſilentio atque admiratione deſixi tenebantur, alii
 partim verbis, partim animo ſolo ſtridebant, alii
 denique velut fluctus quidam vento excitati pugna-
 bant. Hieronymus quoque fauſtas ſibi concio-
 nanti factas a Vigilantio acclamations, plau-
 ſusque datos, ſcribens adverſus eundem Vigi-
 lantium in Epistoſa 75. memorat, cum dicit:
 Retordare quaſo illius diei, (ipſum aſſatur Vigi-
 lantium Hieronymus) quando, me de reſurrectio-
 ne & veritate corporis prædicante, ex latere ſubſul-
 tabas, & plaudebas manu, & applodebas pede, &
 orthodoxum conclamabas. Apollinaris vero Sido-
 nius in Epistoſa 3. lib. 9. fatetur, Fauſti ſe Reien-
 ſis Episcopii Prædicationes ad vocis uſque deſe-
 ctum clamore & plauſu fuiſſe proſecutum: Licet
 Prædicationes tuas, nunc repentinas, nunc, cum
 ratio popoſciſſet, elucubratas, rancus ploſor audie-
 rim; tunc præcipue, cum in Lugdunenſis Eccleſiæ
 dedicata feſtis hebdomadalibus Collegarum ſacroſan-
 ctorum rogatu exorareris, ut perorares. Exprefſere
 tandem hunc plaudendi & acclamandi morem
 & Iſidorus Peluſiora & Heſychius Hieroſoly-
 mitanus: illius verba ſunt in libro 3. epistoſa 382.

ad

ad Dorotheum clarissimum, qui ipsius Isidori Orationem recitans, plausibus & acclamationibus fuerat exceptus ab audiente populo: *Etsi, ut abs te scriptum est, Oratio plausum peperit, at etiam Orationi plausus robur comparavit, quippe qui parenti adminiculi loco fuerit. At quoniam sæpenumero usuenit, ut plausus Orationi quidem robur comparet; verum Oratoris mores inficiat & labefaciet, ad supinitatem eum & socordiam, tamquam porrecta manu, ducens, prudentiam tuam monco, maxime quidem ut Deo, qui huiusmodi gratiam largitus est, gratiam habeas: quod si etiam laudare vis, (negas enim fieri posse, ut Orationi plausus tandem non rependatur) Orationem quidem arbitrato tuo laudans, ne nimias adversum me laudes contexas, ut ne me supinum atque ignavum reddas. Hesy chius vero in Sermone 1. de laudibus Virginis Mariæ: Ego, (ait) Carissimi, animadvertens vestram animi promptitudinem ad audienda eloquia divina, & intimum amorem erga illorum interpretes, vestro audiendi studio victus excitator ad docendi desiderium, congratulatione Caritatis vestræ delectatus. Vos enim continenter cum plausu excipitis eos, qui Sermonem habent, perinde ac discipuli multarum rerum enarratores. Vos velut vectores gubernatores ipsi componitis; vos gubernacula lingua precibus continetis, &c.*

CAPUT XXV.

Ad ea quoque acclamabat interdum, ac plausus dabat audiens populus, quæ intelligentia nequaquam capiebat.

Semel porro inuenta in Ecclesiam acclamandi & plaudendi consuetudo, ita nonnumquam invaluit in sacris Christianorum auditoriis, ut ad ea etiam acclamaret ac plauderet audiens populus, quæ minime intelligeret. Beatum Chrysostomum in Homilia xxx. in Acta Apost. hujus moris testem invenimus: *Quomodo namque (ait) non deridendus auditor, & assentator magis & simulator putabitur? quod bene quidem dixit Doctor pronuncians; quid vero dixeris, demonstrare non sum idoneus: hoc assentationis est. Nam Citharædos quidem audiens & Tragædos hoc jure pateretur, utpote qui dictionem similiter proferre nesciant: ubi vero non cantus est ostentatio, neque vocis, sed sententiarum & philosophiæ facultas, cuique dicere & enunciare facillimum est. Quomodo non igitur accusatione dignum est, si quis laudans causam nequeat dicere, quia dicentem laudavit? Dicente quoque Augustino, nonnumquam acclamasse populum ad ea, quæ intelligentia minus assequabarur, discimus ex ejus Expositione ad Psalmum 147. in qua ita est: *Quomodo exultatis**

tis omnes? Nihil dixeram, nihil exposueram, verum pronunciaui, & exclamastis? In Sermone autem 47. de Diversis, eidem quæstionem tantum proponenti, nec dum solventi, populus tamen acclamavit: *Malus est mundus, (sic inibi scriptum est) sed bonus, a quo factus est mundus. Quomodo potero absolvere & explicare quod dixi? Deus. Quid enim dixi? Quid laudastis? Ecce Quæstio est, & tamen jam laudastis.*

CAPUT XXVI.

Quæ esset olim acclamationum formula in Concionibus, & qui plausuum modi. Orthodoxus appellatus quandoque Concionator ab acclamante populo, aliquando tertius decimus Apostolus; aliis quoque laudibus cumulatus. Manibus ac pedibus dati plausus. Jactata etiam oraria, seu amicu-la, ac fasciolaræ a plaudentibus Auditoribus. Pauli Samosatani superbia ac animi elatio in captandis ac redimendis plausibus & acclamationibus.

Non dubium est igitur, quin concionanti fuerint ab Auditoribus & plausus dati, & factæ

factæ acclamationes. Illud adhuc incertum, quæ
 esset harum acclamationum formula, & qui plau-
 suum modi. Est hæc autem res involuta tene-
 bris, nec, qui eam illuminarit ad hanc diem,
 audiui quemquam, aut legi: quam ob causam
 agendum nobis est diligentius, ut abditam illam,
 sicunde possumus, eruamus. Orthodoxum qui-
 dem appellatum nonnumquam ab audiente
 populo Concionatorem, testis est certissimus
 beatus Hieronymus in epistola 75. in qua Vi-
 gilantium alloquens hæc inter cetera ait: *Re-
 cordare, quæso illius diei, quando, me de resur-
 rectione & veritate corporis prædicante, ex latere
 subsultabas, &c. & Orthodoxum conclamabas.* Cy-
 rillus etiam Alexandrinus cum semel præfens
 adesset in Pauli Emeseni Concione: atque idem
 omnino tunc de genitrice Dei Maria pronun-
 ciaret Paulus, quod antea concionans Cyrillus
 protulerat, populus faustis clamoribus dicentem
 Paulum interrumpens, hæc laudes in Cyrillum
 congeffit, Orthodoxum itidem eum appellans:
*Ecce fides eadem est, donum Dei, Cyrille Ortho-
 doxe; hoc audire cupiebamus, qui non ita loquitur;
 Anathema sit.* Exstat hæc Pauli Homilia inter
 Cyrilli Homilias numero septima. Præclara est
 autem omnino ac iusta laudatio, quam Con-
 stantinopolitanum populum concionanti Chryso-
 stomo tribuere solitum memoriæ tradidit Geor-
 gius Patriarcha Alexandrinus in ejus Vita, cap.
 xlii. ejus verba sunt: *Omnes mirabantur eum*

ob sapientiam ipsi a Deo datam, & quomodo ipsi dissolvebat, qua in divinis Scripturis interpretatu atque intellectu difficilia sunt, necnon ipsi plaudebant clamantes, Revera dignus es hoc Sacerdotio, o Apostolorum tertie decime; Christus te ad nos misit, ut salvas faceres animas nostras, & potares de fontibus Salutaris quod ipse tibi dedit, &c.

Plausuum porro modos iidem illi, quos modo supra nominavi, Hieronymus & Georgius Alexandrinus, paucis quidem, sed aperte tamen nobis ita expressere. Recordare (inquit ille in Epist. 75.) illius diei, quo, me de resurrectione & veritate corporis predicante; ex latere subsultabas, & plaudebas manu, & applodebas pede, &c. Alter vero in Chrysostomi Vita: Mirabantur (ait) eum ob sapientiam ipsi a Deo datam, &c. Quare ipsi plaudebant: alii quidem rursus chlamides suas astollentes: alii fimbrias cutzulon, alii vero manualia, alii denique fasciolas seu oraria, &c. Ista quidem sunt Hieronymi & Georgii verba, ex quibus manifeste tamquam oculis cernimus, fuisse olim in plaudendo & manus motas, & agitados pedes, & jactatas fasciolas seu oraria. Sed & multo ante Hieronymum & Chrysostomum e theatris jam traductos in Ecclesias hosce plausuum modos, fidem faciunt, quæ de Paulo Samosateno, acclamationes & plausus ab Auditoribus captante ac redimente, prodidit Eusebius Cæsariensis. Paulus enim, qua erat superbia,

bia, animique elatione, injuriam sibi fieri putabat, nisi faustis inter dicendum acclamationibus fuisset ab Auditoribus interruptus, plausibusque exceptus: tenuium præsertim fasciarum & orariorum jactatione ac concussione. Eusebii verba ex Rufini interpretatione in Historia Ecclesiastica lib. 7. cap. 26. sunt hujusmodi: *Verbum faciens ad plebem (Paulus) jactare supra modum dexteram, ac palmam femori illidere; pede quoque subsaltare, ac scabellum ferire cum sonitu. Ab Auditoribus vero non favorem, neque plausum sperare solum, sed theatriali more oraria moveri sibi expectabat, & vocem tamquam de caveis dari. Hæc non solum a viris, sed etiam a mulieribus indecenter expectabantur. Si quis vero Auditorum honestius, & verecundius agens a clamore nimio temperasset, & velut injuriam faciens patiebatur injuriam. Hæc eadem ab Eusebio accepta narrat Nicephorus lib. 6. cap. 30. Ac mirum, nisi ad hunc eundem Paulum pertineant, quæ in Homilia xxx. in Acta Apost. sic scripta reliquit Chrysostomus: Multi multa faciunt, ut in medio constituti longam extendant Orationem, & si plausus quidem a multitidine consequantur, hoc eis regno simile factum est; si vero cum silentio Sermonem finierint, silentii tristitia fit illis gehenna molestior. Hactenus Chrysostomus, qui, si de Paulo Samosateno nequaquam locutus est, indicavit saltem, fuisse aliquos, suis etiam temporibus, Pauli æmulos & sectatores, qui hosce plausuum modos & ac-*

tionum formulas ab Auditoribus inter dicendum expeterent sibi, atque suo quodam jure deposcerent. Adducta autem Eusebii verba illud etiam non obscure significant, virorum fuisse proprium, non item feminarum, clamores & plausus concionanti dare: siquidem vitio vertitur Paulo Samosateno, quod ab ipsis etiam mulieribus acclamationes & plausus expectaret. Verum pro tempore de plausibus & acclamationibus satis: in Libris enim de sacro & profano acclamandi & plaudendi more, si quod spero, erit otium, eadem fusius ac enucleatius tractabuntur.

C A P U T XXVII.

Nulli Auditorum recedere licebat de Ecclesia, Concionatore verba faciente. Præclarum Arelatensis Cesarii factum, quo recedentes Auditores ad Conciones revocaret.

Illud etiam ad extremum Auditoris habitum vere pertinet, si constans in audiendo permaneat, nec ante recedat ab Ecclesia, quam spirituale Concionis spectaculum dimittatur. Apud Senecam quidem in Suaforia septima vitio datum legimus Pollioni Asinio, quod, Sextilio poema recitante, ante recitationis finem de Auditorio recesserit. Prisci quoque Fideles id severe ob-

observarunt, ut nonnisi terminata Concione de Auditorum confesso discederent. In Concilio Carthaginensi IV. Canone 24. in hanc rem ita statutum fuit: *Sacerdote verbum faciente in Ecclesia, qui egressus de Auditorio fuerit, excommunicetur.* Quæ Canonis verba referuntur a Burcardo Decret. libro 2. cap. 66. ab Ivone sexta Parte Decreti cap. 162. & in Capitularibus Additione 4. cap. 42. Quamvis autem Canon hic, ut est recte à viris doctis adnotatum, nequaquam sit intelligendus de majori Excommunicatione, sed vel de minori, vel etiam fortasse de sola alicujus communionis privatione, (quod poenæ genus multis scimus irrogatum in Apostolorum Canonibus) maxima tamen videtur, meo judicio, observatione dignus.

Atque hoc loco quidem non mihi quæo temperare, quin præclarum illud Arelatensis Cæsarii factum commemorem, quo recedentem de Ecclesia populum ad Concionem revocavit. Cum enim semel animadvertisset Cæsarius, stans ad altare, multos ab Ecclesia discedere, ne mox inchoandæ Concioni interessent, subito convolans recedentibus se immiscet, eosque accommodatis & gravibus verbis insectatus vehementius, retinet tandem, repetit, revocat: ac, ne possent amplius, si vellent, recedere, ipsas Ecclesiæ fores claudit. Rem ita gestam narrat nobis Cyprianus Diaconus ipse Cæsarii discipulus in ejus Vita cap. 12. sic scribens: *cum*

die quadam esset ad altare Casarius, animadvertit; quosdam lecto Evangelio ex Ecclesia egredi, quod sancti viri Conciones auscultare initio detre-
 scarent: (solebant enim olim ut plurimum haberi Conciones inter Missarum solemnias, proxime post Evangelii recitationem, quemadmodum loco docebimus) Mox igitur advolat; appellat his vocibus populum, Quid facitis filii? Quid ita foras absceditis mala persuasione subversi? Stare pro animabus vestris ad accipienda verba adhortationis nostrae, eaque auscultate solliciti: non licebit id vobis in illo tremendo iudicii die: moneo, clamo, obtestor. Ne sitis, obsecro, vel surdi, vel profugi; auditis foris mei buccinam, perinde ac si animas vestras suo mucrone Satan jugularit. Non ego taceretur nitatis arguar, Hac de causa sepiissime ostia, lectis Evangeliiis, occludi iussit; donec propitio Deo ipsi gratularentur, ea coercitione se profecisse, qui solebant esse fugitivi. Hæc Cyprianus. Extat ipsius Casarii Homilia, in qua populum vehementer hortatur, & obsecrat amantissime, ut ab Ecclesia non ante discedat, quam & Concioni, & divinis Mysteriis fuerit finis impositus. Rogo vos, (inquit in Homilia 12.) Fratres carissimi, & paterna pietate commoneo, ut quoties aut in die Dominico, aut aliis maioribus festivitibus, Missa sunt, nullus de Ecclesia discedat, donec divina Mysteria compleantur. Et quamvis multi sint, de quorum fide & devotione gaudeamus, sunt tamen plures minus de salute
 sua

*sua anima cogitantes, qui; lectis divinis Lectio-
nibus, (cum esset ipsa nimirum Concio habenda)
statim de Ecclesia foras exeunt. Unde rogo vos,
Fratres, ut humilitatis nostrae suggestionem, non
solum patienter, sed etiam libenter accipiatis.*

CAPUT XXVIII.

*Scripto exceptæ ab Auditoribus sacrae olim
Conciones. Et clam, & palam adfuerunt
in Ecclesia hujusmodi Exceptores.*

INter Auditores fuisse aliquando Exceptores,
hoc est, qui in scribendo notis seu verborum
compendiis ad celeritatem utentes, sacras, dum
viva voce haberentur, Conciones exciperent,
jam demonstramus. Origenis certe Concioni-
bus, quas sexagenarius habuit, interfuisse non-
nullos, qui, notas edocti, quæcumque dixisset,
celerrime exciperent, testatur Eusebius in lib.
6. Historiæ Ecclesiasticæ cap. 36: *Origenes sexa-
gesimum ætatis annum prætergressus, cum jam ex
diurna exercitatione maximum dicendi, usum sibi
comparasset, Conciones, quas habebat ad populum,
a Notariis excipi permisit, cum id antea fieri num-
quam concessisset.* Ab Eusebio eadem Niceph. lib.
5. c. 19. *Catecheticas etiam Cyrilli Hierosoly-
mitani Conciones, dum publice pronunciaren-*

tur scripto ab auditoribus exceptas, aperte declarat antiquissima adnotatio ad Catecheses ipsas Græce affixa, quam nos ita Latine convertimus: *Plures quidem habitæ sunt a Cyrillo Catecheses, singulis annis; & ante baptismum, & post baptismum recens illuminatis: has autem, cum dicerentur, trecentesimo trigesimo secundo anno adventus Domini nostri Jesu Christi, studiosi quidam excipientes perscripserunt, &c.* Quem morem brevi verborum ambitu Gregorius quoque Nazianzenus in Oratione 32. expressit in hunc modum: *Valete Sermonum meum amatores: & cursus & concursiones; & calamitatem perspicui, quam occulti; atque hujus suggesti cancelli a multitudine compressi hominum audiendi studio se se mutuo prorrudentium. Quid enim aliud declarant perspicui & occulti calami, quam Notarios; qui sive clam, sive palam positi, quæ diceret Nazianzenus, scripto velociter exciperent? nos quidem ita de loci hujus sententia opinamur. In Chrysostomi itidem Coneionibus, audienti turbæ immistos quidem, sed apte tamen collocatos, adfuisse celeres ac exercitatos hujusmodi Exceptores, litteris mandarunt ejus Vitæ scriptores, Socrates, Nicephorus, Georgius Patriarcha Alexandrinus, Symeo Metaphrastes; quorum omnium verba ad rei confirmationem subjiciam. Socrates refert in Historia lib. 6. cap. 4: *Conciones vero, cum ab ea ipso in lucem editæ, tum a Scribis celeri & exercitata manu, illocas e suggestu recitante,**

tante, exceptæ, qualesnam fuerint, quam illustres; quamque ad persuadendum accommodatæ, non est necesse in præsentia differere, præsertim cum omnibus copia sit eas pro arbitratu evolvendi, &c. Nicephorus lib. 13. cap. 3: Quid rursus hic dicere attinet, quales ejus fuerint Orationes, quales vel ipse scriptas edidit, vel eodiciente Notarii celebres plurimas excipere? Quam splendida namque sint, atque ad persuadendum simul & demulcendum compositæ, experiri ei licet, qui versare eas & legere, utilitatemque earum percipere, & voluptatem divinam haurire ex eis velit, &c. Metaphrastis vero ea sunt verba in Chrysostomi Vita: Studio erat omnibus, ne abesset quisquam ab auscultatione (Concionum Chrysostomi), quin etiam, ne ipsa quoque verba semel audita negligerentur, omni studio ea veloces Scriptores excipiebant, & tamquam thesaurum reponebant. Georgius tandem Patriarcha Alexandrinus in ejusdem Chrysostomi Vita: Ejusmodi autem (inquit) fuerint ab ipso editi Sermones, quam multi a velocibus Scribis excepti, quamque elegantes & ad persuadendum apppositi, quid nunc attinet dicere? Et cap. 42: Inter ejus Auditores aderat multitudo disertorum & Notariorum: atque studiosorum qui exciperent dicta ejus: & stupebant quomodo nulla barbarie Orationem inficeret, aut eadem iteraret, sed ut omnia composite loquebatur. De Artico, Episcopo Constantinopolitano, prodidit Socrates, & ex eo Cassiodorus ac Callistus Nicephorus, tales

les nequaquam fuisse illius Conciones, ut eas Auditores vel mandarent memoriæ, vel scripto exciperent; atque ita aliud pæne agentes Scriptores isti morem nostrum præclare expresserunt. Socratis locus extat in septimo Ecclesiasticæ Historiæ libro cap. 2. in quo est: *Primum cum Presbyterii gradum obtinuisset (Atticus), Conciones, quas summo studio confecerat, ad verbum ediscens, in Ecclesia recitavit. Postea crebro usu & diligentia majorem audaciam adeptus, ex tempore concionari cepit, rationemque docendi magis popularem secutus est. Verum, ejus Conciones non ejus generis fuere, ut merito vel ab Auditoribus studiose perdiscerentur, vel monumentis mandarentur litterarum ad posteritatem, Planius Cassidorus in Tripartita libro 11. cap. 2: Primo quidem (ait) cum Presbyter esset, libros faciebat, (λογος, id est, sermones, quamquam liber & de oratione dicitur, & meditados coram Ecclesia recitabat; postea vero etiam fiduciam cum labore sortitus, sub oculis doctrinam laudabilem proferebat, non tamen tales erant ejus Sermones, ut etiam ab Auditoribus scripturæ traderentur. Nicephorus vero in hoc quoque, ut sæpe alias, Socratem imitatus: In Orationibus Ecclesiasticis (inquit lib. 13. cap. 29.) simplex fuit (Atticus), easque tales edidit, ut neque ab Auditoribus transcriberentur, neque omnino doctrinâ liberaliore & elegantiâ carerent.*

Latinoꝝ item Patrum testimonio, quæ dixi de more excipiendarum ab Auditoribus Concio-
 num,

num; placet confirmare. Omnium autem primum produco Gaudentium Brixientem, apud quem in Tractatum suorum Præfatione ad Beneyolum non obscure ita scriptum legitur: *De illis vero Tractatibus, quos, Notariis, ut comperi, latenter adpositis, proculdubio interruptos & semiplenos otiosa quorundam studia colligere præsumpserunt, nihil ad me attinet. Mea jam non sunt, quæ constat præcipiti excipientium festinatione esse conscripta.* Titulus etiam sexti decimi & decimi septimi ejusdem Gaudentii Tractatus hoc idem ostendit; est enim in eis sic: in 16. quidem: *Ejusdem Tractatus, quem prima die Ordinationis ipsius quorundam civium Notarii exceperunt. In altero vero: Tractatus ejusdem exceptus die Dedicationis basilicæ sanctorum quadraginta Martyrum.* De Augustini Concionibus ab Auditoribus scripto exceptis, apud Possidium in ejus Vita hæc sunt: *Libros vero ejusdem, sive Tractatus, mirabili Dei gratia procedentes ac profluentes, instructos omni rationis copia atque auctoritate Sanctarum Scripturarum, ipsi quoque Heretici concurrentes cum Catholicis ingenti ardore audiebant: & quisquis, ut voluit, & potuit, Notarios adhibens, etiam ea, quæ dicebantur, excepta descripsit.* Et aliquando post in eodem Opere: *Episcopatu suscepto, multo instantius ac ferventius majore auctoritate, non adhuc in una tantum regione, sed ubicumque rogatus venisset, verbum salutis æternæ, alacriter ac suaviter pullulante atque crescente Domini Ecclesiæ, prædicabat,*

cabat, paratus semper poscentibus reddere rationem de fide & spe, quæ cum Deo est; & ejus dicta, atque excepta maxime Donatistæ in eadem Hippo- nensi, vel vicina manentes civitate ad suos Episco- pos deferabant. Fit a Magno denique Gregorio istius moris non obscura mentio: ad Maximum enim Episcopum scribens, dum suas illi in Eze- chielem Homilias dicat, ait in hunc modum: *Homilias, quæ in beatum Ezechielem Prophetam, ut coram populo loquebar, excepta sunt, multis cur- ris irruentibus in abolitione reliqueram. Sed post annos octo, petentibus fratribus, Notariorum sche- dulas requirere studui, easque favente Domina trans- currens, in quantum ab angustiis tribulationum li- cuit, emendavi, &c.* In Prologo item ad librum quadraginta Homiliarum in Evangelia hæc ha- bentur: *Inter sacra Missarum solennia, ex his, quæ diebus certis in hac Ecclesia legi ex more solent, sancti Evangelii quadraginta lectiones exposui. Et quarundam quidem dictata expositio assistenti plebi est per Notarium recitata; quarundam vero expla- nationem coram populo ipse locutus sum; atque ita ut loquebar, ita excepta est.* Et infra non longo sane intervallo: *Quod vero quædam anteposita sunt, quæ in Evangelio post leguntur; quædam vero postposita, quæ ante per Evangelistam scripta sunt, inveniuntur; nequaquam movere tuam Fraternali- tatem debet, quia, sicut a me diversis temporibus dicta sunt, ita quoque sunt ab Exceptoribus in Co- dicibus affixæ, &c.* In Epistola tandem ad Leo- nardum

nardum Episcopum, quam suæ in Job Expositioni præmittit, scribit hoc pacto: *Quamvis eorum, quibus exponere compellebar, longe me vita transcenderet, injuriosum tamen esse non credidi, si fluente usibus hominum plumbi fistula ministraret. Unde mox eisdem coram positis Fratribus priora libri sub oculis dixi; & qui a tempore paulo vacantius reperi, posteriora tractando dictavi. Cumque mihi spatia largiora suppeterent, multa augens, pauca subtrahens, atque ita ut inventa sunt nonnulla derelinquens, ea, quæ me loquente excepta sub oculis fuerant, per libros emendando composui, quia & cum postremo dictarem, quo stylo prima dixeram, sollicitè attendi.*

Istà quidem sunt tam Græcorum, quam Latinorum Patrum testimonia, ex quibus, scripto exceptas ab Auditoribus sacras olim Conciones, manifeste tamquam oculis cernimus. Tum illud etiam perspicui licet, non clam modo, verum etiam palam, adfuisse in Concionibus hujusmodi Notarios sive Exceptores: nam & occultos ac perspicuos calamos dixit Gregorius Nazianzenus in Oratione 32. & Notarios latenter adpositos memorat Gaudentius Brixienfis in Præfatione ad Benevolum. Eusebius item ac Nicephorus, cum narrent, ante sexagesimum annum semper vetuisse Origenem, suas a Notariis scripto excipi Conciones, indicant etiam, palam ante oculos omnium positos fuisse in Ecclesia hosce Origenis Exceptores: qui enim
potuisset

potuisset iis, ne exciperent, interdicere Origenes, nisi iidem fuissent & sibi aliis noti atque manifesti.

CAPUT XXIX. & ULTIMUM.

Quibus potissimum nominibus solerent olim Auditores a Concionatore appellari. Fratres sese ac Sanctos invicem vocavisse priscos Fideles Cœtus etiam Christianorum Fraternitas dicta. Horum nominum causa indicata. Manavit ex hisce fontibus, ut Auditores inter concionandum & Sanctitas vestra, & Charitas vestra & sancta Fraternitas, & Fratres carissimi, & Dilectio vestra, & Dilectissimi dicerentur.

Hoc manifestius, meo quidem animo, intelligitur, si cognitum erit prius, omnes olim Fideles & Fratrum & Sanctorum nomine fuisse appellatos.

Fratrum igitur appellatione Christus ipse, de Fidelibus loquens, usus est & Matthæi cap. xxi i. & Lucæ xxi i. & Joannis xx. Usi sunt & Apostoli, & antiquiores Patres; Paulus in Epistolis passim, Lucas in Actibus non semel, Justinus Martyr in Apo-

Apologia 2. & in Dialogo cum Tryphone Judæo, Athenagoras in Legatione pro Christianis, Clemens Alexandrinus Stromat. lib. 2. & 5, Tertullianus in Apologetico cap. 39. lib. ad Martyr. cap. 2. & de Virginibus velandis cap. 13, Minutius Felix in Octavio, Ecclesia Viennensis ac Lugdunensis apud Eusebium in lib. 5, Historiæ Ecclesiasticæ cap. 18. & 19. & in lib. 6. cap. 3, Optatus Milevitanus, Augustinus, Lactantius, & alii non uno in loco. Sed & ipsa Ecclesia ac Christianorum cœtus olim dicebatur *Fraternitas*, ut ex eodem Tertulliano, & ex Cypriano, Ambrosio, ac Hieronymo didicimus. Quid autem causæ sit, quamobrem sese Fratres invicem appellarent Christiani, Tertullianus in Apologetici cap. 39. ostendit his verbis: *Sed & quod Fratres nos vocamus, non alias, opinor, infamant, quam quod apud ipsos omne sanguis nomen de affectatione simulatum est. Fratres autem etiam vestri sumus, jure natura matris unius, etsi vos parum homines, quia mali Fratres. At quanto dignius Fratres & dicuntur & habentur, qui unum Patrem Deum agnoverunt, qui unum Spiritum biberunt sanctitatis, qui de uno utero ignorantia ejusdem ad unam lucem expaverint veritatis. Sed eo fortasse minus legitimi existimamur; quia nulla de nostra Fraternitate tragædia exclamat, vel quia ex substantia familiarum fratres sumus, quæ penes vos fere dirimit Fraternitatem.* Minutius vero Felix hoc pacto:

Sic

Sic mutuo, quod doletis, amore diligimus; quoniam odisse non novimus: sic nos, quod invidetis, Fratres vocamus, ut unius Dei parentis omnes, ut consortes fidei, ut spei cohæredes. Quam eandem spem ac æternitatis cognitionem Athenagoras quoque citata pro Christianis Legatione videtur agnovisse, sic scribens: Quamobrem etiam pro ætatis discrimine, alios pro filiis & filiabus, alios pro fratribus & sororibus habemus: proVectiores ætate patrum & matrum loco honoramus. Illorum igitur, quos tamquam fratres & sorores, aut alio cognationis nomine conjunctos nobis ducimus, inviolata & integra manere corpora, maximi apud nos sit. Et statim: Ergo spe vitæ æternæ freti præsentem hanc, ejusque delicias, & sensuum etiam, animæque non puras voluptates contemnimus.

Quod ad Sancti nomen attinet; fuit hæc quoque communis olim Fidelium omnium appellatio: quam usurparunt Petrus in Epistola 1. Paulus ad Romanos scribens cap. 1. & 15. in Epistola 2. ad Corinthios c. 13. & ad Philippenses c. 4. Lucas Actorum c. 9. & 26. Ignatius & Polycarpus in Epistolis, Tertullianus in lib. 1. ad Uxorem c. 6. & in lib. 2. cap. 1. 2. 3. 6. & alii passim. Atque eam quidem ob causam, reor Sanctos dici consuevisse priscos Fideles, quod per Baptismum primo, dein per Pœnitentiam sanctificarentur, & ad vitam moreque sanctos a Deo vocarentur. Unde Sanctissimi

simi dicti sunt olim Episcopi: quem deinde titulum ex antiquitate solus retinuit Pontifex Romanus. Nunc vero etiam qui morum sanctitate in Ecclesia fulgent, eos *Sanctos* appellamus.

His de communi ac usitata *Fratrum* ac *Sanctorum* in veteri Ecclesia appellatione isto modo constitutis, in eo, de quo quaeritur, ecquid sit veri, non difficile est videre. Nam certe ex his iisdem fontibus manarunt ea nomina, quibus inter concionandum solitos olim Auditores a Concionatoribus appellari legimus; hoc est, *Sanctitas vestra*, *Caritas vestra*, *Sancta Fraternitas*, *Fratres carissimi*, *Dilectio vestra*, *Dilectissimi*, & his similia, quibus frequentes utuntur prisca Patres in suis Concionibus, Origenes, Zeno Veronensis, Athanasius, Hilarius, Cyrillus Hierosolymitanus, Basilius, Gregorius Nazianzenus, Ambrosius, Gaudentius Brixienfis, Chrysostomus, Augustinus, Chrysologus, Leo, Gregorius Magnus, & alii: quorum quidem testimoniorum recitatione idcirco superse- dendum puto, quod res agatur pæne ex toto manifesta. Haëtenus igitur de Concionante, & Auditoribus. De Concionum autem Loco ac Tempore proxime videamus.



FRANCISCI BERNARDINI
FERRARI

MEDIOLANENSIS THEOLOGI,

DE RITU

Sacrarum Ecclesiæ Veteris
Concionum:

LIBER TERTIUS.

CAPUT I.

*Habita olim ubique, in publicis etiam plateis
atque agris, Conciones. Hebræorum, Chri-
sti Domini, Christiique Fidelium hac de
re consuetudo.*



Is ita patefactis, nunc ad id aggre-
dior, de tribus antea propositis
quod mihi restat tertium: id ve-
ro erat, ut in suscepti hujus mu-
neris parte ultima de Concionum Loco ac Tem-
pore

pore ageremus. Quæ sane res & utilitatem habet & delectationem. Ac de Loco quidem illud primo statuendum videtur; habitas olim, quemadmodum nunc interdum fieri videmus, ubique, in publicis etiam plateis ac campis, Conciones.

Hebræorum utique, ut hinc ordiar, fuisse hanc consuetudinem, Esdra teste dicimus; apud quem in libro 2. cap. 8. scriptum legitur: *In ea, quæ erat ante portam aquarum, platea Legem populo explicasse.* Hieremias quoque, ut est cap. 17, jubetur Verbum Domini in cunctis Hierusalem portis prædicare: atque non de templi dumtaxat, verum de urbis etiam portis intelligendum Hieremiam, adnotat beatus Hieronymus. In Amos præterea cap. 5. ea verba habentur: *Odio habuerunt corripientem in porta.* Quem locum explicans beatus Gregorius Moralium lib. 21. cap. 15: *Mos (ait) apud Veteres fuit, ut ad portam seniores sederent, qui certantium jurgia judiciaria examinatione discernere, quatenus urbem, in qua concorditer oporteret vivere, discordes minime intrarent.* Quod & beatus Hieronymus ante Gregorium prodiderat, inquiens: *Se non semel dixisse, fieri judicia consuevisse ad portas, ut peregrini minus defatigarentur, cum pro justitia obtinenda Hierusalem venirent.* Atque ex hoc Judicium usu exercendorum in frequentioribus urbis portis judiciorum colligunt viri docti laudabilem Prophetarum consuetudinem concionandi in portis civitatis,

vitatis, vel certe in ea, quæ cuique portæ ad-
hærebat, platea, & in quam frequentior ad ju-
dicia solitus erat populus convenire. Et hoc est,
quod Salomon in Proverbiis cap. 1. inducit Sa-
pientiam foris prædicare, in plateis dare vocem suam,
in capite turbarum clamitare, in foribus portarum
urbis proferre verba sua. Et cap. 8: Numquid (ait
idem Salomon) non Sapientia clamat, & Pru-
dentia dat vocem suam? in summis excelsisque ver-
tibus, in mediis semitis stans, juxta portas civi-
tatis, in ipsis foribus loquitur.

Existimarim autem, id ipsum a Christo Do-
mino, veteri Prophetarum exemplo, factitatum:
siquidem & in deserto, & in litore, & in pla-
teis, & in domibus privatis legitur Christus
multitudinem ad eum confluentem docuisse. Quin
etiam magna id cura factum, atque ipsosmet con-
quisitos Auditores, colligo haud obscure ex Mat-
thæi cap. 22. & Lucæ cap. 14. quibus locis dicitur
nuptiarum Dominus misisse servos suos ad exitus via-
rum, in plateas & vicos civitatis, in vias & sepes,
vocatam ad cœnam quoscumque; atque adeo jussisse,
ut intrare compellerentur. Addo, Christum ipsum
hanc in publicis plateis prædicationem præcepisse,
cum Matthæi cap. 10. ea verba pronunciavit:
Et quod in aure auditis, predicate super tecta.
Publice nimirum, juxta Lirani & aliorum ex-
positionem, quolibet in loco, ubi conveniunt
homines.

Eandem sedulitatem secuti sunt Apostoli, ac
pro-

proinde ubicumque se ferebat occasio, divina spargebant semina. Atque hanc imitati consuetudinem Apostolici viri lætos non semel atque uberes ex otiosa plebecula fructus tulere; quemadmodum de sanctissimis viris, Vincentio Ferrerio, Petro Martyre, Antonio Patavino, & Bernardino Senensi, memoriæ tradiderunt eorum Vitæ Scriptores. De Equitio Abbate ita scriptum reliquit beatus Gregorius Dialogorum libro 1. cap. 4: *Tantus illum fervor ad colligendas Deo animas accenderat, ut sic Monasteriis præesset, quatenus per Ecclesias, per castra, per vicos, per singulorum quoque fidelium domos circumquaque discurreret, & corda audientium ad amorem patriæ cœlestis excitaret.* Beatum Nicolaum Tolentina-tem ex una in publico foro habita Concione ita commotum testatur ejus Vitæ Auctor, ut ex accepto ibi semine tantos deinde fructus sanctitatis mundo præbuerit. Extat adhuc in Patavino agro vetustissima nucis arbor, e qua sanctum Antonium sæpius fuisse concionatum constanter adfirmant ejus loci habitatores. Nec reticenda sunt hoc loco privilegia multis Religiosorum Ordinibus proprio Decreto a summis Pontificibus concessa, quibus hanc in plateis & compitis concionandi consuetudinem comprobarunt. Prædicatorum ac Minorum Ordinibus Clemens V, ut habetur Clementina Dudum de sepulturis, § Nos autem, & Extravag. Inter cunctas de privilegiis §. Ideoque concessit: *Ut etiam in pla-*

teis communibus libere valeant clero & populo prædicare : habita tamen quorundam temporum ratione . Benedictus quoque II. statuit : Ut etiam in plateis communibus ac publicis libere valeant clero & populo prædicare , eique proponere Verbum Dei . Concessionem porro supra dictis duobus Ordinibus factam , ad Eremitas quoque S. Augustini a Clemente , & ad Carmelitas a Joanne XII. prorogatam , tradunt Jo. Andreæ c. constit. de reg. lib. 6. & Cardin. Clementina Dudum de sepulturis §. ab olim num. 2 : Paulus deinde III. proprio Decreto Societati Jesu speciatim concessit facultatem , etiam in plateis communibus , seu publicis , & alias ubicumque locorum , prædicandi clero & populo Verbum Dei , ac proponendi , & interpretandi , &c. Et sane , ut hoc caput concludam , egregium est opus , hominibus in foro otiose degentibus , nec Ecclesiam alioqui adituris , divina annunciare monita , moresq; dicendo formare ac corrigere .

CAPUT II.

Ecclesia semper apud Christianos fuit proprius Concionum locus , quemadmodum apud Hebræos Templum & Synagoga .

Atque hæc quidem vere existimamus . Verumtamen proprius Concionum locus fuit semper

semper Ecclesia apud Christianos, quemadmodum apud Hebræos Templum ac Synagoga. Ac de Hebræis quidem ex Joannis cap. 18. perspicue liquet, quo loci, *Ego semper* (ait Dominus) *docui in Synagoga & in Templo, quo omnes Judæi conveniunt.* Et de Paulo ac Barnaba loquens Lucas Actorum cap. 13: *Prædicabant* (inquit) *Verbum Dei in Synagogis Judæorum.* De Christianis vero, licet res admodum dubia non sit, tamen non erit alienum eam aliquo modo confirmare. A beato Martyre Justino hanc puto firmari veritatem, cum in 2. pro Christianis Apologia adfirmat, eundem omnino fuisse Fidelibus locum, in quo & administraretur Eucharistia, & Verbum Dei prædicaretur: ignorat autem nemo, in Ecclesiis dumtaxat solitam administrari Eucharistiam. Cognoscitur etiam hoc idem ex ipsa voce (Ecclesia;) quamvis enim ea vox ex prima sua institutione concionem hominum, seu cœtum, conventum, ac congregationem significet, frequentius tamen accipitur pro loco ipso, in quem a Fidelibus publice convenitur: quod sit nimirum locus in hunc finem institutus, ut in illum populus conveniat ad divinum cultum, & Dei verbum audiendum. Quamquam non ibo inficias aliquas Conciones habitas fuisse in baptisteriis, exedris, ut mox videbimus, & cœmeteriis.

CAPUT III.

Ex edito semper ac præcelso loco habitæ omnes, tam prophane, quam sacræ Conciones.

JAm posito proprium fuisse Concionum locum Ecclesiam, quæret aliquis in quam ejus parte solerent haberi: qua de re dicere aggrediar, si illud ante definiero, ex edito semper eas ac præcelso habitas loco.

Atque ut a prophanis initium ducam, consueverunt Imperatores, Reges, Duces, ac Principes omnes, non nisi ex editiori ac celsiori loco publice verba facere, id quod facillime perspexerit quicumque oculos ad veteres, Historiarum præsertim, Scriptores adjecerit. De Pompeio adfirmat hoc Plutarchus in ejus Vita; de Cæsare Lucanus in lib. 5; de Percennio Tacitus in 1. Annalium libro; de Trajano Plinius in Pannegyrico; de Probo Vopiscus; de Juliano Ammianus Marcellinus in libro 23; de Boudicca Britannica muliere Xiphilinus in lib. 62. de Crispini parente Statius in Silvis lib. 5; ac de Honorio tandem Claudianus in libro de Bello Gildonico. Ex quibus Auctorum locis illud præterea elucet. Si nequaquam adesset erectum in ea mrem tribunal sive suggestum, solitum id subito

ac

ac tumultuario opere excitari, ex palliis interdum, interdum ex cespitibus, nonnumquam ex terræ glebis, aliquando etiam ex terra palustris.

Sed dimissis prophanis ad sacras redeo Conciones. Atque has etiam ex edito semper ac præcelso habitas loco, firmissimis & gravissimis veterum Patrum testimoniis comprobabo. Gregorius Nazianzenus in Insomnio de Anastasiæ Ecclesia (in quo quidem tamen per Insomnium dicat omnia, nihil dicere tamen eum, quod non revera cum nostris ritibus sacris apte consentiat, jam supra monuimus) hæc de editiori ad concionandum loco non obscure habet: *Sublimi quidem throno insidere mihi videbar; utrinque porro, inferioribus tamen subselliis, Presbyteri, hoc est, gregis Christiani duces, considebant. At vero Diaconi candidis vestibus ornati stabant, Angelici splendoris speciem præseferentes; Plebs autem partim circum cancellos apud more fusa erat; certatim enim omnes incumbebant, ut proximum quemque suggesto nostro locum obtinerent, &c.* Et in Carmine de Vita sua ita canit:

*Nos ille torrens, ille torrens nos sumus,
Ordoque noster dissolutus, flens loquor:
Qui considemus haud bene altis in thronis
Boni Magistri, plebis atque Antistites,
Animos alentes pabulo sacro, &c.*

Etiam

Etiam Nazianzenis æqualis Gregorius Nyssenus in eorum numerum, qui celsioris ad concionandum loci meminerint, vere adscribendus est: siquidem in Oratione de Sancto Baptismo hæc prodit inter cetera: *Nunc agnosco gregem meum, hodie video formam Ecclesiæ consuetam, quando & carnalium curarum posthabito negotio iusta plenitudine ad cultum fidei concurristis. Atque ædem quidem populus angustam reddit, intra sacra adyta penetrans ac irrumpens: quotquot autem ab iis, qui intus sunt, non admittuntur, apum in modum locum externum in vestibulo implent. Nam apum aliæ quidem intus in opere occupatae sunt, aliæ vero foris alveare circumstrepunt. Sic igitur facite, o filii, & numquam hoc studium deseratis: affectu enim me pastorali affici videor, ac volo in hac sublimi specula sedens circa subiectos vertici colles undique congregatum gregem contueri, &c.* Ambrosium quoque ac Chrysostomum recte possumus in hanc rem testes citare; is enim in Epistola 13. referens ad Marcellinam sororem habitum a se publice de Job lectione Sermonem: *Unum (inquit) Job miraturus ascenderam, sed omnes Job, quos mirarer, inveni.* Alter vero in Homilia 19. ad Populum Antiochenum: *Horum quemque (ait) cerneret, nunc quidem boves iugantem aratorios, & aratrum trahentem, & profundum scindentem sulcum; nunc autem sacrum ascendentem suggestum, & subditorum animos arantem; nunc quidem agri spinas excidentem falce; nunc*

vero

vero *Sermone ex animis peccata extergentem*. Etenim ascendendi vocabulo utentes Ambrosius & Chrysostomus, editiorem proculdubio locum designant. Eodemque spectant hæc Paulini Episcopi Nolani verba, quæ in ejusdem Ambrosii Vita ita leguntur: *Sanctus vero Ambrosius, cum ignorasset quod factum esset, ne diutius posset plebem tenere, ascendens pro tribunali, de eadem questione, quæ fuerat proposita, Sermonem adorsus est, dicens: Debitum, Fratres, curo solvendum, sed hesteros meos non invenio creditores, &c.* Plane Aurelius Prudentius ad finem Carminis de sancto Hippolyto, præcellsum atque editum fuisse locum, ex quo Episcopi Sermones haberent, commemorat, eleganter in hunc modum canens:

*Fronte sub adversa gradibus sublime tribunal
Tollitur, Antistes prædicat unde Deum.*

Sed omnium planissime Augustinus pluribus in locis: in libro 2. de Civitate Dei cap. 28: *Populi (inquit) constnunt ad Ecclesias casta celebritate, honesta utriusque sexus discretionem; ubi audiant, quam bene hic ad tempus vivere debeant, ut post hanc vitam beate semperque vivere mereantur, ubi sancta Scriptura, justitiæque doctrina de superiore loco in conspectu omnium personante, & qui faciunt audiant ad præmium, & qui non faciunt audiant ad iudicium.* Et in lib. 22: cap. 8. *Ubi autem ventum est ad mei Sermonis locum, dixi*
pauca

pauca pro tempore, & pro illius jucunditate letitia; Sequenti die post Sermonem redditum, narrationis ejus libellum in crastinum populo recitandum promisi: quod cum ex Dominico Paschæ die tertio fieret, in gradibus extræ, in qua de superiore loquebar loco, feci stare ambos fratres. Et in Sermone 122. de Diversis: Quamvis propter commoditatem depromendæ vocis altiore loco stare videamur, tamen in ipso altiore loco vos judicatis & nos judicamur: Doctores dicimur, sed in multis Doctorem querimus. In Serm. 48. de verbis Domini in Evang. Joannis: Novit Caritas vestra, omnes nos unum Magistrum habere, & sub illo Condiscipulos esse; nec ideo Magistri sumus, quia de loco superiori loquimur vobis, sed Magister est omnium, qui habitat in omnibus nobis. In Sermone 49. Fratres mei, numquid non ascendit aliquando aut Presbyter, aut Episcopus? & non dicit aliud de superiore loco, nisi ne rapiantur res alienæ, ne fraudes fiant, &c. Et aliquanto post: Hoc autem cuperam dicere, quia de loco superiore non possunt dicere isti, nisi benefacite, nolite perjurare, &c. Et in Sermone 62.: Pertineat ad nos cura, ad vos obedientia; ad nos vigilantia pastoralis, ad vos humilitas gregis; quamquam & nos, qui vobis vide-mur loqui superiore loco, cum timore sub pedibus vestris sumus; quoniam novimus, quam periculosa ratio de ista quasi sublimi sede reddatur. In Sermone 42. de Sanctis: Debetis ergo audire, quid pertineat ad dispensatorem, sive ut in vobis
ipsis,

ipsis, si tales inveneritis, congratulemini, si ve etiam in hoc ipso instruamini. Quam multi enim in hoc populo futuri sunt dispensatores? Et nos ibi fuimus, ubi estis: & nos, qui videmur modo de superiori loco conservis metiri cibaria, ante paucos annos inferiori loco cum conservis accipiebamus cibaria. In Sermone 51: Si sic damnatur, qui non erogaverit, quid debent expectare qui perdunt? Nos ergo dispensatores sumus; nos erogamus, vos accipitis: lucra quarimus, bene vivite; lucra enim erogationis ista sunt, sed etiam nolite existimare, ad vos non pertinere erogationem: non potestis erogare de isto loco superiore, sed potestis ubicumque estis. Expositione demum in Psalmum 126: Ideo (inquit) altior locus positus est Episcopis, ut ipsi superintendant, & tamquam custodiant populum: Nam & Græce, quod dicitur Episcopus, hoc Latine Superintensor interpretatur, quia superintendit, quia desuper videt. Quomodo enim vinitori altior fit locus ad custodiendam vineam, sic & Episcopis altior locus factus est: & de isto alto loco periculosa redditur ratio, nisi eo corde stemus hic, ut humilitate sub pedibus vestris simus, & pro vobis oremus, ut qui novit mentes vestras, ipse custodiat, quia nos intrantes vos & exeuntes possumus videre. Tamquam vobis ex hoc loco Doctores sumus, sed sub illo uno Magistro in hac schola vobiscum Condiscipuli sumus. Etymon ipsum eorum nominum, quibus Concionum locus ab Ecclesiasticis Scriptoribus appellari consuevit, hanc eandem firmat veritatem.

tatem. Pulpitum enim dici, Tribunal, & Ambonem scimus. Pulpitum quidem, ut scriptum reliquit Vualafrius Strabo in Libro de Rebus Ecclesiasticis cap. 6. quod sit locus ille in publico statutus, ut qui in eo consistunt, ab omnibus videri possint. Tribunal, quod, quemadmodum Tribunal (ut præclare conjicit vir doctus Jacobus Pamelius ad Cypriani Epistolam 34) locus erat excelsus, ex quo Jus Tribubus reddebatur, ita Concionum locus in sublimi positus erat, ut commodius ex eo Evangelica Lex populo traderetur. Ambo vero, quasi ascensus, seu locus editus, a verbo *draßaire*, hoc est, *ascendo*, quod gradibus ad eum ascendatur: quamquam scio, Ambonis etymon ab aliis aliunde deduci. Sed de hac & hujusmodi aliis vocibus nunc satis: eadem enim infra uberius retractata dilucide magis patebunt.



CA-

CAPUT IV.

Editiori ad concionandum loci causa ut posset Concionator facilius ac commodius ab omnibus audiri. Ad indicandum, palam ante oculos omnium enunciandam Legem Evangelicam. Ad commemorationem ascensus Domini ad montem, ut turbas doceret. Ad designandam demum prædicationis Evangelicæ excellentiam atque auctoritatem.

Sunt ista quidem vera, quæ proxime scripsi; sed cur editior fuerit ac celsior hic Concionum locus, nonnisi subobscore significant: quare faciendum videtur, ut ejus rei causas enucleatius nunc aperiāmus. Socrates quidem hanc hujus rei causam affert in Historia Ecclesiastica lib. 6. cap. 5. Ut nimirum Concionator facilius posset ac commodius ab omnibus audiri: Joannes Episcopus, (inquit Socrātes, de Chrysostomo loquens) cum Eutropius ad basim altaris procumberet, & præ metu consternatus esset, sedens in suggestu, unde antea, quo facilius audiretur, concionari solebat, Orationem in reprehensionem ejus habuit. Quæ verba a Socrate accipiens Nicephorus

rus ita perstringit Histor. Eccles. lib. 13. cap. 4: Tum Joannes absurdum Eutropii conatum arguens, luculentam habuit Orationem in ambone seu suggestu, qui mos ejus erat cum populum doceret, ut omnes vocem ejus exciperent, sedens. Metaphrastes etiam de eodem agens Chrysostomo: Conscendens (inquit in ejus Vita.) suggestum, ut esset omnibus manifestus. Atque hanc unam ob causam factum est, ut idem Chrysostomus e Lectorum suggestu in medio Ecclesiæ suas frequenter haberet Conciones, quemadmodum ex Sozomeno discimus in Historia Ecclesiastica lib. 8. cap. 5. sic scribente: Tanta vero frequentia eorum erat, qui Concionibus illius inhiabant, ac satiari non poterant, ut, quoniam illi ex mutuo compulso atque obtritu periclitarentur, dum singuli prorsum nituntur semper, ut propius adstantes dicentem certius audiant, ipse medium se omnibus exponens e suggestu Lectorum docuerit. Eandem expressit rationem beatus quoque Augustinus, cum in Sermone 122. de Diversis ita scriptum reliquit: Quamvis propter commoditatem depromende vocis altiore loco stare videamur, tamen in ipso altiore loco vos judicatis & nos judicamur, &c. Innocentius Pontifex Romanus, ejus nominis tertius, illas hujus rei indicat rationes: prima est, ut significaretur, debere Legem Evangelicam palam ante oculos omnium enunciari, non autem in latibulis occultorum locorum, ut faciunt Hæretici: altera, ad commemorationem ascensus Domini

mini ad montem, ut turbas doceret. Innocentii verba quæ nos hæc docent, ea sunt in libro tertio de Mysteriis Missæ capite 43: *Diaconus in ambonem ascendit, ut annunciet Evangelium secundum illud propheticum, (Isaia 40.) supra montem excelsum ascende tu, qui evangelizas Sion, exalta in fortitudine vocem tuam. Et Dominus inquit in Evangelio (Matthæi 10:) Quod dico vobis in tenebris, dicite in lumine, quod in aure auditis, prædicate super tecta: nam & ipse Dominus ascendit in montem, ut Evangelium prædicaret, (Matthæi 5.) & aperiens os suum docebat discipulos, dicens, &c. Hæc Innocentius. Amalarius vero Fortunatus ob id potissimum ex edito loco Sermones haberi commemorat, ut Evangelicæ prædicationis excellentia & auctoritas designaretur: inquit enim in libro 3. de Ecclesiastic. Offic. c. 18: *Excelsior locus eminentissimam doctrinam Evangelicæ prædicationis, atque manifestissimam auctoritatem judicandi signat.**

CAPUT V.

Antiquitus duæ fuerunt Ecclesiarum præcipue partes, Chorus videlicet seu Tribuna, & Navis seu Basilicæ gremium. Augustini loci duo de Exedra nomine. In prima Ecclesiæ parte, hoc est, intra Chori cancellos, habitæ ut plurimum sacræ olim Conciones.

Verum, his patefactis, videamus jam, in quam Ecclesiæ parte solerent Conciones haberi. Quod ut facilius intelligatur, præmonendi sumus, sacrarum olim ædium (quemadmodum præclare observatum est a Gentiano Herveto viro doctissimo in ea Epistola, quam libro Nicolai Cabasilæ de divino altaris sacrificio a se Latine reddito præposuit) duas fuisse præcipue partes; quarum prima tum *βήμα*, tum *ἱερῶν*, a Græcis dicebatur; *βήμα* quidem, hoc est, tribunal, seu suggestus, quod sit ille editior, gradibusque ad eum ascendatur: *ἱερῶν* vero, id est, sacrarium, quod sacrificio hic destinatum; ideoque altare in eo habetur, in quo Sacerdos corpus & sanguinem Domini consecret: ob eamque causam & Sancta Sanctorum, & Sacra Mensa, & Propitiatorium, & Magni Sacrificii

Sacrificii Officina, & locus Dei nuncupatur. Secunda pars *nis* ab iis vocatur, nos templum, seu maiorem templi navem, gremiumque basilicæ appellamus; & in hac universus congregatur populus. Primam porro illam ædis, sacrae partem nos & Chorum & Tribunal nunc vocamus: Tribunal, meo quidem iudicio, quod in ejus latere (uti nunc etiam passim in vetustis basilicis cernimus) Tribunal reperiretur, hoc est Episcopalis Cathedra, ex qua tamquam ex Tribunali Divinum Verbum audienti populo promeretur Episcopus; ac propterea Aurelius Prudentius beati Hippolyti basilicam describens cecinit in hunc modum;

*Fronte sub adversa gradibus sublime Tribunal
Tollitur, Antistes prædicat unde Deum.*

Chorum vero, quod Clerici in eo (ut ex Rabani Mauri de Institutione Clericorum lib. 1. cap. 33. & Amalarii Fortunati de Ecclesiasticis Officiis lib. 3. cap. 3. intelligimus) in modum coronæ (2 corona enim Chori nomen deductum tradunt Festus & Isidorus) circum aram starent, & ita psallerent. Ac forte de hac eadem prima Ecclesiæ parte sentiebat beatus Augustinus, cum Exedræ nomen alicubi usurparet: *Sequenti die* (inquit in lib. 22. de Civit. Dei cap. 8. de duobus fratribus sancti Stephani miraculo sanatis agens) *post Sermonem redditum, narrationis ejus*

libellum in crastinum populo recitandum promissum, quod cum ex Dominico Pascha die tertio fieret, in gradibus Exedra, in qua de superiore loquebar loco, feci stare ambos fratres. Et in Tractatu 9. in Epistolam Joannis: Alloquamur, & illam (animam), qua habet jam timorem castum permanentem in seculum seculi. Putamus, invenimus illam, ut alloquamur? Putas, est in hoc populo? Putas, est in ista Exedra? Putas, est, in hac terra? Sed de Exedris, quia res non caret difficultate, nihil hic affirmamus.

In hac itaque prima Ecclesiæ parte, hoc est, intra Chori cancellos, veteres Ecclesiæ Patres suas ut plurimum habuere Conciones. Demonstrat hoc satis aperte Gregorius Nazianzenus, cum de suis agens Concionibus in ea, quam ad 150. Episcopos habuit, Oratione, cancellos ipsos ab Auditorum sese mutuo impellentium ac protrudentium multitudine vim passos scribit in hæc verba: *Valete. Sermonum meorum amatores, & cursus & concursiones, & calami tam perspicui quam, occulti, atque hujus suggesti cancelli a multitudine compressi hominum audiendi studio sese mutuo protrudentium.* Id ipsum ex ejusdem Gregorii Insomnio de Anastasiæ Ecclesia haud obscure intelligimus; sic enim inquit inter cætera: *Sublimi quidem throno insidere mihi videbar: utrinque porro, inferioribus subselliis, Presbyteri, hoc est gregis Christiani duces, considebant. At vero Diaconi candidis vestibus ornati stabant, Angelici splendoris*

splendoris speciem pra se ferentes Plebs autem partim circum cancellos apum more fusa erat; certatim enim omnes incumbabant, ut proximum quemque suggesto nostro locum obtinerent: partim ad me audiendum confluentis vestibuli angustia premebatur. Beatus etiam Gregorius Nyssenus mirum nisi ad hosce cancellos alluserit, cum in Oratione de Sancto Baptismate, saepius a me in hoc Opere citata, populum scriberet ob acrius Sermonis audiendi desiderium in ipsummet Sacrarium penetrasse ac irrupisse; effractis nimirum (ut ego interpretor) cancellis ipsis, vel certe cancello- rum foribus per vim quodammodo reclusis: Nunc agnosco gregem meum, (inquit Gregorius) hodie video formam Ecclesiae consuetam, quando & carnalium curarum posthabito negotio iusta plenitudine ad cultum Dei concurrissetis. Atque adem quidem populus angustiam reddit, intra sacra adyta penetrans & irrumpens; quotquot autem ab iis, qui intus sunt, non admittuntur, apum in modum locum externum in vestibulis implent. Nam apum alia quidem intus in opere occupatae sunt, alia vero foris alveare circumstrepunt. Sic igitur facite, o Filii, & numquam hoc studium deseratis; affectu enim me pastoralis affici videor; ac volo in hac sublimi specula sedens circa subiectos vertici colles undique congregatum gregem contueri.

173. Sacerdotalem Sedem. Quæ quidem totius
 uniuersa, quantum ego existimo, totius Ca-
 thedræ Episcopali apte possunt accommodari.
 Idem autem Augustinus in Expositione ad Phi-
 mum 116. cum eundem omnino locum in
 Episcopo in Ecclesia & sedendi & concionandi
 non obscure significet, hunc nobis planissime
 expressit morem; ait enim: *Ideo alius locus po-
 situs est Episcopis, ut ipsi superintendant, & non
 quam custodiant populum. Nam & Græce quod
 dicitur Episcopus, hoc Latine Superintendens interpre-
 tatur, quia superintendit, quia de super videt. Quo-
 modo enim vinitori altior fit locus ad custodiendam
 vineam; sic & Episcopis altior locus factus est. Et
 ideo de isto alto loco periculosa redierit ratio, nisi
 eo corde stemus, ut humilitate sub pedibus cubi-
 simus, ut pro vobis oremus, ut qui vult mentes
 vestras ipse custodiat, quia nos iactantes tuos & ex-
 untos possumus videre: quibus hæc illico accipere
 Tamquam vobis ex hoc loco Doctores sumus, sed
 sub illo uno Magistro in hac schola existimus con-
 discipuli sumus. Cognoscitur etiam hoc idem ex
 verbis Socratis manifeste, in Historia Ecclesi-
 astica lib. 6. cap. 14. de Chryostomo ab exilio
 reducto hæc scribentis: *Martinus in prælo sub du-
 vium; cum summa reverentia recte ad Ecclesiam
 deducit; orat, ut Sedem Episcopalem capere, non
 teque consueto pacem populo precetur. Cum ille
 recusaret, diceretque, hoc non esse faciendum esse,
 quam tum causa ejus iudicio esset accepta, tum**

hi, qui ipsum condemnarant, mutata sententia absolverent, magis incendi cepit; tanta enim cupiditate eum cum in Sede collocatum videndi, tum de integro concionantem audiendi illam inceserat. Itaque populi impulsures sic confecta est. Cum Joannes esset in Sede Episcopali locatus, & de more pacem populo precatus fuisset; coactus necessitate etiam concionatus est. Iteratim autem hæc eadem iisdem ferme verbis Georgius Patriarcha Alexandrinus, Cassiodorus, & Nicephorus Callistus: ille quidem in Chrysostomi Vita hoc pacto cap. XLIX: Egressa enim populi multitudo multo cum honore & veneratione statim ipsum deduxit in Ecclesiam, obsecrans, ut Episcopali Throno insidens consuetam pacem apprecaretur populo; hoc ipsum etiam flagitante Imperatore. Et statim: Ingenti desiderio ardebat plebs ipsum videndi in Throno sedentem, eumque audiendi pro more docentem. Tum certe obtinuit populus, ut ea exequeretur. Insidens igitur Episcopali Throno Joannes, consueto more populo apprecatus est pacem, & ad explendum officium adactus docuit. Alter in Tripartita libro 10. cap. 34. iis verbis: Cum vero rediisset (ab exilio Chrysostomus), cum multo ejus honore ad Ecclesiam plebs occurrit: & mox ut Joannes ingressus est, rogabant, ut in Episcopali Sede resideret, & populo Orationem pacis impenderet: quod cum refutaret, atque diceret, quod hoc oporteret judicio fieri Synodali, & eos, qui damnaverant, suam sententiam revocare, accendebantur omnes eum videre in loco proprio residentem,

*fidenter, & verba Doctoris audire. Qui licet diutardaret, praevaluit tamen populus, & cum in Sede Episcopali residere coegit, & consueta Orationem praeberet pacis; coactus etiam Sermonem fecit ad populum. Nicephorus vero in Historia Ecclesiastica lib. 13. cap. 16. in hunc fere modum: Vi autem eum plurima cogentes, in Sede Episcopali collocarunt, ut pacem populo ex superiore loco annuntiaret & precaretur. His rebus ita ex necessitate quadam actis, Orationem tum quoque ex tempore ad populum habuit, &c. Et cap. 17. ejusdem libri: Quas ob causas in immensa omnium condemnatione Theophilus fuit. Sanctus autem Joannes Constantinopolim reversus in eum amorem & gratiam populi pervenit, ut cupiditate eum e Throno suo docentem videndi magis atque magis accensi flagrarent. Sed plane omnino declarant id ipsum ea, quae de igne divinitus emisso, dum secundo pelleretur in exilium Chrysostomus, referuntur a Palladio, Georgio Alexandrino, & Metaphraste in ejus Vita, ac Nicephoro Callisto Historiae Ecclesiasticae lib. 13. cap. 21. Ignis enim illius vim & effectum narrantes hi, illud etiam addunt huc apte cadens, ex ipsa Episcopali Sede, quae omnium prima missam e caelo flammam conceperat, solitum Chrysostomum (veluti cor in medio corpore positum, sanguinem in caetera membra) eloquia Domini in universam multitudinem diffundere ac distribuere. Praestat autem ipsa Auctorum verba ad probationis firmitatem adscribere. Post
*incessa-**

ineffabiles (inquit Palladius) illas tenebras, immensaque caliginem (ob Chrylostomum in exilium pulsum) flamma de medio Throno, in quo Joannes sedere consueverat, & veluti medio in corpore positum cor, eloquia Domini ceteris membris exponere, repente profiliens, Verbi Dei Doctorem requirebat: quem ubi non invenit, Sedem totam depascebatur, ac speciem arboris praeferebat, & per catenas in sublime se porrigens ad tectum usque serpebat, &c. Quorum verborum sententiam desumens Georgius ait: Quo die Joannem eliminarunt Ecclesia aditu, flamma e medio Throno, cui beatus insidere consueverat, erumpens, perinde atque cor in meditullio corporis visa est exponere velle reliquis membris Salvatoris eloquia; quare & requirebat salutaris eloquii interpretem: eo minime invento quidquid obvium occupasset, depascebatur, ac veluti in arborem conscendens perrepsit in sublime per catenas ad usque fastigii summi contignationem. Metaphrastes vero; Eo enim die, quo magna illa stella Ecclesiae, veluti ad quemdam occasum, ibat in exilium, ignis divinus ex illa Sede, in qua assidens sacram effundebat doctrinam, a nulla manu accensus, per sacras catenas serpit in altum, &c. Repetit ista eadem Nicephorus Callistus, in hunc modum scribens: Eo die, quo magnum Ecclesiae sidus veluti occidens in exilium abiit, ignis ex medio Throno, in quo doctrina illa lux confidens coruscaverat, a nemine conjectus, emicans derepente per sacras catenas in sublime prorepit, &c.

CA.

CAPUT VII.

Ex Altaris gradibus concionati nonnumquam veteres Patres. Id tum potissimum factitatum, cum intra Missarum solemnia Conciones habebantur. Nunc etiam Mediolanensis Ecclesie Paræci ex ipsis Altaris gradibus adhortatoriis Sermonibus plebis sibi commissæ mores corrigunt ac formant.

Certum est igitur, habitas sæpe olim ex Episcopali Sede Conciones: sed & illud minime dubium, ex Altaris etiam gradibus id ipsum quandoque factitatum. Quod ex Gregorii Nysseni in exhibita nuper de sancto Baptismo Oratione cognoscitur; quo in loco adfirmat, ad Altare se adstitisse, cum hanc haberet Orationem: *Quare ne contempnas (inquit) divinum lacrum, neque id tamquam commune propter usum aquæ parvi facias, & levi momento ducas: nam id, quod operatur, magnum est, & ab illo mirabiles existunt effectus: nam & Altare hoc sanctum, cui adstimus, lapis est natura communis, nihil differens ab aliis cunctis lapideis. Atque etiam ex* Chrysologi Sermone 173. ita scribentis: *Quæ ordinamus*

ordinamus attendite, quæ dicimus audite, quæ facimus approbate, nec pro voluntate vestra, sed pro dispositione nostra Prædicationis nostræ percipite rationem: & siue cum dicimus de Gradu isto, siue cum de Sacerdotali Sede pro temporis ratione tractamus, ut oves bonæ, ut cari greges, dilectæ pignora, sine fastu impigre ac toto fidei cursu convenite, concurrite: nec vos locorum mutatio tam propinqua, & spatia sic arctata, aut reddant desides, aut faciant murmurantes. Per Gradum autem accipe, ut, ego conjicio, ipsos Altaris gradus. Id ipsum addidici ex Apollinaris quoque Sidonii Eucharistico Carmine, ad Faustum Reiensem Episcopum dedicato, sub finem ita canentis:

*Seu te conspicuis gradibus venerabilis Ara
Concionaturum plebs sedula circumstetit.*

Cypriani denique Diaconi verbis, quibus Arelatensem Cæsarium, ad Altare stantem intra ipsa Missarum solemnia, recedentem ab Ecclesia populum revocasse memorat, quæ dixi de Concionibus ex Altaris gradibus haberi solitis facile confirmarim. Cum die quadam (ait Cyprianus in Cæsarii Vita cap. 12.) esset ad altare Cæsarius, animadvertit, quosdam lecto Evangelio ex Ecclesia egredi, quod sancti viri Conciones auscultare initio detrectarent. Mox igitur appellat his vocibus populum. Quid facitis Filii? Quid ita foras absceditis, mala persuasione subversi? Stare pro animabus vestris

stis ad accipienda verba Adhortationis nostra, eaque auscultate solliciti: non licebit id vobis in illo tremendo Iudicii die; moneo, clamo, obtestor. Nesitis, obsecro, vel surdi, vel profugi: auditis oris mei buccinam, perinde ac si animas vestras suo mucrone Satan jugularet: non ego taciturnitatis arguar. Hac de causa sapissime ostia, lectis Evangeliiis, occludi iussi, donec propitio Deo ipsi gratularentur, ea coercitione se profecisse, qui solebant esse fugitivi. Hæc Cyprianus.

Existimarim autem, tunc potissimum ex Altaris gradibus priscos Patres concionatos, cum intra ipsa Missarum sollemnia (qua de re suo loco) eo munere fungerentur. Cujus sane moris extat adhuc vestigium, constanti sæculorum successione usurpatum, in nostra Mediolanensi Ecclesia, in qua Parœci Festis, ac Dominicis præsertim, diebus, intra Missam, proxime post Evangelii recitationem, ex ipsis Altaris gradibus, adhortatoriis Sermonibus plebis sibi commissæ mores corrigunt ac formant.

CAPUT VIII.

Extra Chorum etiam aliquando, hoc est, in Basilicæ gremio, ex Ambone habitæ olim Conciones.

INtra Chori cancellos, de Episcopali Sede interdum, interdum ex Altaris gradibus, conciona-

libellum in crastinum populo recitandum promisi; quod cum ex Dominico Pascha die tertio fieret, in gradibus Exedra, in qua de superiore loquebar loco, feci stare ambos fratres. Et in Tractatu 9. in Epistolam Joannis: Alloquamur, & illam (animam), qua habet jam timorem castum permanentem in seculum setuli. Putamus, invenimus illam, ut alloquamur? Putas, est in hoc populo? Putas, est in ista Exedra? Putas, est, in hac terra? Sed de Exedris, quia res non caret difficultate, nihil hic affirmamus.

In hac itaque prima Ecclesiae parte, hoc est, intra Chori cancellos, veteres Ecclesiae Patres suas ut plurimum habuere Conciones. Demonstrat hoc satis aperte Gregorius Nazianzenus, cum de suis agens Concionibus in ea, quam ad 150. Episcopos habuit, Oratione, cancellos ipsos ab Auditorum sese mutuo impellentium ac protrudentium multitudine vim passos scribit in hæc verba: *Valete Sermonum meorum amatores, & cursus & concursiones, & calami tam perspicui quam, occulti, atque hujus suggesti cancelli a multitudine compressi hominum audiendi studio sese mutuo protrudentium. Id ipsum ex ejusdem Gregorii Innomnio de Anastasie Ecclesia haud obscure intelligimus; sic enim inquit inter cætera: Sublimi quidem throno insidere mihi videbar: utrinque porro, inferioribus subselliis, Presbyteri, hoc est gregis Christiani duces, confidebant. At vero Diaconi candidis vestibus ornati stabant, Angelici splendoris*

splendoris speciem pra se ferentes Plebs autem partim circum cancellos apum more fusa erat; certatim enim omnes incumbabant, ut proximum quemque suggesto nostro locum obtinerent: partim ad me audiendum confluentis vestibuli angustia premebatur. Beatus etiam Gregorius Nyssenus mirum nisi ad hosce cancellos alluserit, cum in Oratione de Sancto Baptismate, saepius a me in hoc Opera citata, populum scriberet ob acrius Sermonis audiendi desiderium in ipsummet Sacrarium penetrasse ac irrupisse; effractis nimirum (ut ego interpretor) cancellis ipsis, vel certe cancello- rum foribus per vim quodammodo reclusis: Nunc agnosco gregem meum, (inquit Gregorius) hodie video formam Ecclesiae consuetam, quando & carnalium curarum posthabito negotio iusta plenitudine ad cultum Dei concurrissetis. Atque adem quidem populus angustiam reddit, intra sacra adyta penetrans & irrumpens; quotquot autem ab his, qui intus sunt, non admittuntur, apum in modum locum exter- num in vestibulis implent. Nam apum alia quidem intus in opere occupatae sunt, alia vero foris alvea- re circumstrepunt. Sic igitur facite, o Filii, & num- quam hoc studium deferatis; affectu enim me pasto- rali affici videor; ac volo in hac sublimi specula se- dens circa subiectos vertici colles undique congrega- tum gregem contueri.

173. Sacerdotalem Sedem. Quæ quidem nomina uniuersa, quantum ego existimo, nonnisi Cathedralæ Episcopali apte possunt accommodari. Idem autem Augustinus in Expositione ad Psalmum 116. cum eundem omnino locum fuisse Episcopo in Ecclesia & sedendi & concionandi non obscure significet, hunc nobis planissime expressit morem; ait enim: *Ideo altior locus positus est Episcopis, ut ipsi superintendant, & tamquam custodiant populum. Nam & Græce quod dicitur Episcopus, hoc Latine Superintensor interpretatur, quia superintendit, quia desuper videt. Quomodo enim vinitori altior sit locus ad custodiendam vineam; sic & Episcopis altior locus factus est. Et ideo de isto alto loco periculosa redditur ratio, nisi eo corde stemushic, ut humilitate sub pedibus vestris simus, ut pro vobis oremus, ut qui novit mentes vestras ipse custodiat, quia nos intrantes vos & exeuntes possumus videre: quibus hæc illico attexit: Tamquam vobis ex hoc loco Doctores sumus, sed sub illo uno Magistro in hac schola vobiscum Condiscipuli sumus. Cognoscitur etiam hoc idem ex verbis Socratis manifeste, in Historia Ecclesiastica lib. 6. cap. 14. de Chrylostomo ab exilio reducto hæc scribentis: Multitudo prodiit illi obviam; cum summa reverentia recta ad Ecclesiam deducit; orat, ut Sedem Episcopalem capeſſat, moxque consueto pacem populo precetur. Cum ille recusaret, diceretque, hoc non ante faciendum esse, quam tum causa ejus judicio esset disceptata, tum*

hi, qui ipsum condemnarant, mutata sententia absolverent, magis incendi cepit; tanta enim cupiditate eum cum in Sede collocatum videndi, tum de integro concionantem audiendi illam incesserat. Itaque populi impulsu res sic confecta est. Cum Joannes esset in Sede Episcopali locatus, & de more pacem populo precatus fuisset, coactus necessitate etiam concionatus est. Iterant autem hæc eadem iisdem ferme verbis Georgius Patriarcha Alexandrinus, Cassiodorus, & Nicephorus Callistus: ille quidem in Chrysostomi Vita hoc pacto cap. XLIX: Egressa enim populi multitudo multo cum honore & veneratione statim ipsum deduxit in Ecclesiam, obsecrans, ut Episcopali Throno insidens consuetam pacem apprecaretur populo; hoc ipsum etiam flagitante Imperatore. Et statim: Ingenti desiderio ardebat plebs ipsum videndi in Throno sedentem, eumque audiendi pro more docentem. Tum certe obtinuit populus, ut ea exequeretur. Insidens igitur Episcopali Throno Joannes, consueto more populo apprecatus est pacem, & ad explendum officium adactus docuit. Alter in Tripartita libro 10. cap. 34. iis verbis: Cum vero rediisset (ab exilio Chrysostomus), cum multo ejus honore ad Ecclesiam plebs occurrit: & mox ut Joannes ingressus est, rogabant, ut in Episcopali Sede resideret, & populo Orationem pacis impenderet: quod cum refutaret, atque diceret, quod hoc oporteret judicio fieri Synodali, & eos, qui damnaverant, suam sententiam revocare, accendebantur omnes eum videre in loco proprio residens,

*ſidentem, & verba Doctōis audire. Qui licet diu
tardaret, prævaluit tamen populus, & cum in Sede
Episcopali reſidere coegit, & conſuetæ Orationem
præbere pacis; coactus etiam Sermonem fecit ad po-
pulum. Nicephorus vero in Hiſtoria Eccleſiaſti-
ca lib. 13. cap. 16. in hunc fere modum: Vi au-
tem eum plurima cogentes, in Sede Episcopali col-
locarunt, ut pacem populo ex ſuperiore loco annun-
ciaret & precaretur. His rebus ita ex neceſſitate
quadam actis, Orationem tum quoque ex tempore
ad populum habuit, &c. Et cap. 17. ejuſdem libri:
Quas ob cauſas in immenſa omnium condemnatione
Theophilus fuit. Sanctus autem Joannes Conſtanti-
nopolim reuerſus in eum amorem & gratiam populi
peruenit, ut cupiditate eum e Throno ſuo docentem
videndi magis atque magis accenſi flagrarent. Sed
plane omnino declarant id ipſum ea, quæ de igne
divinitus emiſſo, dum ſecundo pelleretur in exi-
lium Chryſoſtomus, referuntur a Palladio, Geor-
gio Alexandrino, & Metaphraſte in ejus Vita,
ac Nicephoro Calliſto Hiſtoriæ Eccleſiaſticæ lib.
13. cap. 21. Ignis enim illius vim & effectum
narrantes hi, illud etiam addunt huc apte cadens,
ex ipſa Episcopali Sede, quæ omnium prima
miſſam e cœlo flammam conceperat, ſolitum
Chryſoſtomum (veluti cor in medio corpore
poſitum, ſanguinem in cætera membra) eloquia
Domini in univerſam multitudinem diſfundere
ac diſtribuire. Præſtat autem ipſa Auctorum
verba ad probationis firmitatem adſcribere. Poſt
ineſſa-*

ineffabiles (inquit Palladius) illas tenebras, immensâque caliginem (ob Chrylostomum in exilium pulsum) flamma de medio Throno, in quo Joannes sedere consueverat, & veluti medio in corpore positum cor, eloquia Domini cæteris membris exponere, repente prosiliens, Verbi Dei Doctorem requirebat: quem ubi non invenit, Sedem totam depascebatur, ac speciem arboris præferens, & per catenas in sublime se porrigens ad tectum usque serpebat, &c. Quorum verborum sententiam desumens Georgius ait: Quo die Joannem eliminarunt Ecclesiæ aditu, flamma e medio Throno, cui beatus insidere consueverat, crumpens, perinde atque cor in meditullio corporis visa est exponere velle reliquis membris Salvatoris eloquia; quare & requirebat salutaris eloquiū interpretem: eo minime invento quidquid obvium occupasset, depascebatur, ac veluti in arborem conscendens perrepsit in sublime per catenas ad usque fastigii summi contignationem. Metaphrastes vero; Eo enim die, quo magna illa stella Ecclesiæ, veluti ad quemdam occasum, ibat in exilium, ignis divinus ex illa Sede, in qua assidens sacram effundebat doctrinam, a nulla manu accensus, per sacras catenas serpit in altum, &c. Repetit ista eadem Nicephorus Callistus, in hunc modum scribens: Eo die, quo magnum Ecclesiæ sidus veluti occidens in exilium abiit, ignis ex medio Throno, in quo doctrinæ illa lux confidens coruscaverat, a nemine conjectus, emicans derepente per sacras catenas in sublime prorepsit, &c.

CA.

CAPUT VII.

Ex Altaris gradibus concionati nonnumquam veteres Patres. Id tum potissimum factitatum, cum intra Missarum solemnias Conciones habebantur. Nunc etiam Mediolanensis Ecclesie Pæreci ex ipsis Altaris gradibus adhortatoriis Sermonibus plebis sibi commissæ mores corrigunt ac formant.

Certum est igitur, habitas sæpe olim ex Episcopali Sede Conciones: sed & illud minime dubium, ex Altaris etiam gradibus id ipsum quandoque factitatum. Quod ex Gregorii Nysseni in exhibita nuper de sancto Baptismo. Oratione cognoscitur; quo in loco adfirmat, ad Altare se adstitisse, cum hanc haberet Orationem: *Quare ne contemnas (inquit) divinum lavacrum, neque id tamquam commune propter usum aquæ parvi facias, & levi momento ducas: nam id, quod operatur, magnum est, & ab illo mirabiles existunt effectus: nam & Altare hoc sanctum, cui adstitimus, lapis est natura communis, nihil differens ab aliis cunctis lapideis. Atque etiam ex Chrysologi Sermone 173. ita scribentis: Qua ordinamus*

ordinamus attendite, quæ dicimus audite, quæ facimus approbate, nec pro voluntate vestra, sed pro dispositione nostra Prædicationis nostræ percipite rationem: & sive cum dicimus de Gradu isto, sive cum de Sacerdotali Sede pro temporis ratione tractamus, ut oves bonæ, ut cari greges, dilecta pignora, sine fastu impigre ac toto fidei cursu convenite, concurrите: nec vos locorum mutatio tam propinqua, & spatia sic arctata, aut reddant desider, aut faciant murmurantes. Per Gradum autem accipe, ut ego conjicio, ipsos Altaris gradus. Id ipsum addidici ex Apollinaris quoque Sidonii Eucharistico Carmine, ad Faustum Reiensem Episcopum dedicato, sub finem ita canentis:

*Seu te conspicuis gradibus venerabilis Ara
Concionaturum plebs sedula circumfistit.*

Cypriani denique Diaconi verbis, quibus Arelatensem Cæsarium, ad Altare stantem intra ipsa Missarum solemnia, recedentem ab Ecclesia populum revocasse memorat, quæ dixi de Concionibus ex Altaris gradibus haberi solitis facile confirmarim. Cum die quadam (ait Cyprianus in Cæsarii Vita cap. 12.) esset ad altare Cæsarius, animadvertit, quosdam lecto Evangelio ex Ecclesia egredi, quod sancti viri Conciones auscultare initio detrectarent. Mox igitur appellat his vocibus populum. Quid facitis Filii? Quid ita foras absceditis, mala persuasione subversi? State pro animabus vestris

*stris ad accipienda verba Adhortationis nostra, ea-
 que auscultate solliciti: non licebit id vobis in illo
 tremendo Iudicii die; moneo, clamo, obtestor. Ne
 sitis, obsecro, vel surdi, vel profugi: auditis oris
 mei buccinam, perinde ac si animas vestras suo mu-
 crone Satan jugularet: non ego taciturnitatis arguar.
 Hac de causa sapissime ostia, lectis Evangeliiis, oc-
 cludi iussi, donec propitio Deo ipsi gratularentur,
 ea coercionem se profecisse, qui solebant esse fugitivi.
 Hæc Cyprianus.*

Existimarim autem, tunc potissimum ex Al-
 taris gradibus priscos Patres concionatos, cum
 intra ipsa Missarum solennia (qua de re suo loco)
 eo munere fungerentur. Cujus sane moris extat
 adhuc vestigium, constanti sæculorum successio-
 ne usurpatum, in nostra Mediolanensi Ecclesia,
 in qua Parœci Festis, ac Dominicis præsertim,
 diebus, intra Missam, proxime post Evangelii
 recitationem, ex ipsis Altaris gradibus, adhorta-
 toriis Sermonibus plebis sibi commissæ mores cor-
 rigunt ac formant.

C A P U T VIII.

*Extra Chorum etiam aliquando, hoc est, in
 Basilicæ gremio, ex Ambone habitæ olim
 Conciones.*

INtra Chori cancellos, de Episcopali Sede in-
 terdum, interdum ex Altaris gradibus, con-
 ciona-

cionatos veteres Patres, hæcenus ex optimis Auctoribus, iisque perantiquis ac nobilibus, docui: dehinc extra Chorum etiam aliquando, hoc est, in ipso Basilicæ gremio, ex Ambone id ipsum factitatum, eadem via comprobabo. Georgius Alexandrinus in Vita Chrysost. cap. XVII: Porro Flavianus Episcopus, videns S. Spiritus gratiam in ipso (Chrysostomo) scatulentem, hortabatur eum ut populo exponeret quæ commonitioni essent consentanea atque animarum saluti. Ipse autem id nolebat facere metu humanæ gloriæ. Attamen quod probe nosset debere se obedientiam, ut qui in mente haberet Angeli præcepta, vim sibi fecit, ut, quæ erat concionaturus, conscriberet, & sæpius in Secretario Ecclesiæ legebantur ipsius expositiones, præsentem Episcopo, Clero, nec non quibusdam civibus: quin & sæpe recitabantur in ambone: & omnes spirituali gaudio perfusi domum repetebant, atque ad mensas medioque in foro has expositiones sibi invicem referebant, illas quidem vice psalterii memoriter recitantes. Has vero in chartam transcribebant, ad perennem memoriam eas percurrentes. Multas commentationes conscripsit Antiochia, antequam Constantinopolitanus fuit Episcopus, quarum major pars incolumis servata est in ædibus Episcopi dictæ Ecclesiæ, nec non ab iis qui in populo studiosiores erant. Semel igitur ipsum hortatus est Flavianus Episcopus, ut consensu Ambone Scripturas populo ex tempore explanaret. Non autem de scripto: ille contra moleste tulit, ob idque veniam petiit; tum Flavianus
magis

magis ipsum urgebat, tandem coactus ille a sua conscientia, & habens in se-ipso fortitudinem Spiritus Sancti per munditiam cordis sui, primum ascendit in Ambonem; Sermonem ad multitudinem quæ convenerat & ad Episcopum dirigens, ejus initium est, An vera sunt, quæ vobis acciderunt. Cumque vidissent omnes non schedam in manibus habere eum neque librum, sed eis ex tempore concionari, multo magis obstupere, eum gloria, plausu & pluribus laudibus cumulantes. Nondum enim ea in civitate viderant aut audiverant tale quid gestum a quoquam fuisse. Eundem autem Chrysostomum Lectorum sæpe ambonem, in basilicæ græmio collocatum, conscendisse, ut ex eo concionans ab omnibus facilius ac commodius audiretur, docuit nos Sozomenus in Historia Ecclesiastica lib. 8. cap. 5. apud quem ita non obscure scriptum legimus: Tanta vero frequentia eorum erat, qui Concionibus illius (Chrysostomi) inhiabant, ac satiari non poterant, ut quoniam illi ex mutuo compulsu atque obtritu periclitarentur, dum singuli prorsum nituntur semper, ut propius adstantes dicentem certius audiant, ipse medium se omnibus exponens e suggestu Lectorum docuerit. Et Nicephorus eadem ista, quamquam aliquanto fusius, in Historia Ecclesiastica lib. 13. cap. 7. complexus est, ita inquit: In tantum vero plebs doctrinæ ejus, qua satiari non poterat, inhiabat, ut periculum etiam sibi homines crearent, dum inter se conferta turba premerentur, cubitis alii alios
sub-

submoventes atque repellentes, quod pro se quisque ad eum proxime accedere conaretur; quo certius clariusque illum dicentem audire posset. Quam ob causam ille quoque communem se omnibus præbuit, & in Lectorum suggestu in media turba confidens, uberem doctrinam, quasi communem quamdam gratiam, omnibus impertit. Et ex multitudine quisque suavitate Orationis ejus delibutus, anticipare locum properabat; die nocteque, ut ita dicam, in templo eum præstolans. Certe hi loci ad id, quod proposui, faciunt vehementer: nihil enim dubitationis relinquunt, cum in iis fateantur aperte Sozomenus & Nicephorus, in medio populi conventu ac turba constituisse Chrysostomum, dum ex Lectorum Ambone concionabatur: certum est autem, ut & ante docui, populi locum in Ecclesia extra Chorum semper fuisse, hoc est, in ipsa Basilicæ navi seu gremio.



CAPUT IX.

Quibus nominibus fuerit olim Concionum locus ab Ecclesiasticis Scriptoribus appellatus. Josephi Stephani de salutatorii voce opinio reprebensa. Vera ejus nominis significatio. Secretarium, & receptorium, idem salutatorium. Pulpiti, tribunalis, & ambonis appellatione nominatus Concionum locus. Horum nominum etymon. Per ambonem, Christi monumenti lapis designatur.

QUamvis de his nominibus jam cap. 3. hujus libri egi, ea adhuc hic attingere non gravabor, ut singula quæque suo loco tractentur.

Joseph Stephanus in libro de Osculatione pedum Romani Pontificis cap. 16. Salutatorium scripsit nuncupari consuevisse eum locum, ex quo Episcopi populum alloquerentur, eique benedicerent; atque, ut suam stabiliat sententiam, Pauli Diaconi locum adfert ex libro 13. Historiæ Miscellæ in Theodosio: (quamquam Cassiodorum potius in Tripartita libro 9. cap. 30. citare debuerat Stephanus, a quo certissime locum hunc,

2

quem.

quemadmodum pleraque alia, accepit Diaconus) Diaconis autem seu Cassiodori verba a Stephano allata sunt hæc: *Cum Theodosius ad sacra limina pervenisset, in sanctam quidem basilicam non præsumpsit intrare, sed veniens ad Antistitem, & inveniens eum in salutariorio residentem supplicabat, ut ejus vincula resolveret.* Verum, ut id quod sentio, libere dicam, in hujus vocis explicatione toto cælo mihi videtur errasse Stephanus, vir alioqui doctus & eruditus. Etenim saluatorium nihil aliud hoc loco significare, quam Episcopalis Ambrosii domus primum aditum, vestibulumque, omni asseveratione affirmare non dubitabo: idque ex eo certissime conjicio, quod (quemadmodum multa Auctorum loca testantur, & nos passim videmus) ædes omnes amplæ ac Magnificæ, sive sacræ, sive prophanz, vestibulum semper habuere, in quo advenientibus iretur obviam ab ædis domino, primi verborum congressus fierent, mutuzque salutationes haberentur. Hinc Eudoxia Augusta Arcadii uxor, ab Amantio Eunuchio de Marci & Porphyrii Episcoporum adventu edocta, intra regiz domus parietes humanissime officiosissimeque Pontifices consalutat, seque vehementer excusat, quod non vestibulo venientibus occurrisset, uteri onere jam ad partum propinqui impedita. Atque ab hisce mutuis advenientium & occurrentium salutationibus saluatorii nomine appellatum vestibulum firmiter assevero. Deinde, quod a Cassiodoro

&

& Paulo Diacono dicitur salutorum, id a Theodorito ædícula saluatoria. Theodoriti verba sunt hæc in Historia Ecclesiastica libro 5. cap. 17: *Ubi ad sacros templi parietes advenit (Theodosius), non ingreditur in templum ille quidem, sed ad Episcopum, qui in ædícula saluatoria sedebat, accedens obsecrat, ut vincula sibi solvat. Quæ quidem adium vestibulo maxime, nullo modo Concionum loco conveniunt. Statuitur præterea ab iisdem Auctoribus hujusmodi saluatorium extra Ecclesiam, & nos tamen supra docuimus, proprium Concionum locum intra Ecclesiam semper fuisse. Atque in hunc omnino sensum usurpavit saluatorii vocem Gregorius quoque Turonensis in Francorum Historia lib. 7. cap. 22. quod vero saluatorium nominavit hoc loco Turonensis, secretarium dixerat prius in libro 5. cap. 18. Receptorium autem appellarat Appollinaris Sidonius in lib. 5. epist. 17.*

Sed, ut veras tandem editioris Concionum loci appellationes persequamur, pulpitum aliquando nuncupatum eum fuisse reperio. Cyprianus in Epistola 3: *Nilil (ait) magis congruit voci, quæ Dominum gloriosa voce confessa est, quam celebrandis Divinis Lectionibus personare: post verba sublimia, quæ Christi Martyrium prolocuta sunt, Evangelium Christi legere, unde Martyres sunt: ad pulpitum post catastam venire. Et in Epistola 34: Quid aliud quam super pulpitum, id est super tribunal Ecclesiæ, oportebat imponi (Celerinum), ut loci altioris celsitate subnixus, &c.* Z 2 Ex

Ex quibus Cypriani verbis illud manifeste colligimus, tribunal quoque fuisse eum locum appellatum: quod & Uranius designat haud obscure in Vita sancti Paulini Episcopi Nolani, quæ extat apud Laurentium Surium xxix. Junii his verbis: *Sabbato secunda hora diei lætus ad Ecclesiam processit* (Joannes I. Neapolitanæ urbis Episcopus), & *ascenso tribunali ex more populum salutavit, resalutatusque a populo Orationem dedit*, &c. Aurelius quoque Prudentius in semel atque iterum citato carmine de sancti Hippolyti basilica eamdem tribunalis appellationem in eundem sensum usurpavit.

Ambonis demum vocabulo passim a Scripto-ribus vocitatur Concionum locus: a Socrate in Historia Ecclesiastica libro 6. cap. 5. Cassiodoro in Tripartita libro 10. cap. 4. Nicephoro Callisto in Historia Ecclesiastica lib. 13. cap. 4. Eadem appellatio usurpatur etiam in Concilio Laodicensi cap. 15. in Lateranensi sub Martino, & in Trulensi cap. 33. nec non a Zonara in Anastasio, & Matthæo Blastare in Synopsi Conciliorum, & ab Anastasio passim in Vitis Pontificum. Et quamvis superius in hujus libri capite 3. veram hujus nominis originem ac etymon a verbo Græco ἀναβαίνω, quod est *ascendo*, duxerimus, Ordo tamen Romanus, alique Rituales Libri ab ambiendo ita appellatum tradunt: vel quod ipse utrinque gradibus ambiatur; in quibusdam etenim Ecclesiis ambones visuntur duplicem graduum ordi-

ordinem habentes, unum a sinistris, quo fit ascensus versus Orientem, alterum a dextris Occidentem versus, quo fit descensus: vel quod intrantem cingat & ambiat quod ultimum nominis etymon notavit etiam Vualafrius Strabo in libro de Rebus Ecclesiasticis capite 6. Sed isti omnes originem Græci nominis frustra a Latinis reperunt.

Per ambonem autem, (ut nihil intactum relinquam, quod sit observatione dignum) Christi monumenti lapidem designari, scriptum reliquit Germanus Patriarcha Constantinopolitanus in suæ rerum Ecclesiasticarum Theoria iis verbis: *Ambonem figuram lapidis sancti monumenti designat, quem Angelus cum evolisset ex ostio monumenti, proclamabat resurrectionem Domini unguentiferis mulieribus. Est autem juxta Prophetam dicentem, In monte campestri tollite signum; ascende qui evangelizaris; & exalta vocem; mons est enim in loco campestri & aquabili positus.* Hactenus Germanus, in cujus verbis commodissime Concionum locis finietur. Ad earundem autem tempus properantem Lectorem jam nihil morabor.

CAPUT X.

Primis Ecclesiæ temporibus Dominico potissimum die habitæ Conciones . Una Sabbati, & Prima Sabbati, id est, Dominica dies. Sabbatum pro tota hebdomada positum . Dies Solis, hoc est, Dominica dies.

Ventum est ad extremam Operis destinati partem, in qua nobis de Concionum tempore, quia & res admonet, & obstrictam fidem meminimus, disputandum est. Legitimum itaque habendæ Concioni tempus fuit, jam inde ab ipsis nascentis Ecclesiæ primordiis, Dominicus dies. Actuum certe Apostolicorum cap. 20. ita scriptum reliquit beatus Lucas: *Una autem Sabbati cum convenissemus ad frangendum panem, Paulus disputabat cum eis.* Pro quorum verborum majori intelligentia illud videtur hoc loco repetendum, quod primo lib. cap. 3. ex Hugone adnotavimus, Prædicationem fere ubique ab Actuum Apostolicorum interprete fuisse Disputationis nomine appellatam; ob eam potissimum rationem, quod tunc Ecclesiæ fundamenta jacerent Apostoli, & esset necesse, ut *omni poscenti* (quemadmodum 1. Petri cap. 3. scriptum est) *parati semper essent rationem redde-*

re de fide Christi. Unam autem Sabbati pro Prima positam esse, quemadmodum etiam Marci cap. 16. Lucæ 24. Joannis 20. & in 1. ad Corinthios cap. 16. præterquamquod adfirmant quicumque in hæc loca scripsere: ex eo quoque magis perspicuum fieri arbitror, quod cum Matthæi cap. 28. dicantur venisse Magdalena & altera Maria ad Christi sepulchrum *ὡς πρὸς πρώτην*, hoc est, in una Sabbatorum, Latinus tamen interpretes vertit, in prima Sabbati. Atque ita loqui solitos Hebræos, cardinalem numerum pro ordinali usurpantes, satis intelligimus ex lib. Genesis cap. 1. vers. 5. ubi, *Factum est* (inquit Moyses) *vespere & mane dies unus*, hoc est, *primus*. Sabbatum vero totam hebdomadam significare hoc loco, sicut & Lucæ 18. cum dicitur, *Jesuno bis in Sabbato*, pridem monuerunt viri docti. Primam demum Sabbati fuisse Dominicam diem, in qua nimirum Ecclesiastici conventus haberi solerent, omnes Patres Græci & Latini tradiderunt, Gaudentius Brixienfis Tract. 1. de Sancto Paschate, Hieronymus Epist. 150. ad Hedibiam quæst. 4, Augustinus Epist. 86. ad Casulanum & 119. ad Januarium, Ambrosius, Chrysostomus, Beda, Theophylactus, Oecumenius, & alii passim ad citatum caput 16. epist. primæ ad Corinthios. Dum ergo in una Sabbati factam a Paulo Disputationem scribit B. Lucas, fateri oportet, in prima omnino hebdomadis die, hoc est, Dominica, habitam eam Pauli Concionem.

De qua consuetudine, illam quoque habemus Apostolorum doctrinam, quæ tradita legitur in Constitutionibus Apostolicis lib. 2. cap. 59. iis verbis: *Die Dominico, qui est dies resurrectionis, studiosius templum Domini adite, ut Deum laudibus celebratis; qui fecit omnia per Christum, quem ad nos misit, & pro nobis mori permisit, & a mortuis excitavit. Quid enim apud Deum excusare poterit, qui eo die ad audiendum verbum Dei salutare de resurrectione non convenit? Quo quidem die preces tres stantes facimus, memores ejus, qui post triduum resurrexit. In quo item adhibentur lectio Prophetarum, Evangelii prædicatio, oblatio sacrificii, & sacri cibi donum. Meminit ejusdem observationis, ut ab Apostolis per manus traditæ, beatus etiam Justinus in 2. pro Christianis Apologia, in hunc fere modum scribens: Solis, qui dicitur, die (sic appellant Dominicum diem non Justinus modo hic, & paulo post, sed & Tertullianus Apologetici cap. 16. Sanctus Maximus Taurinensis Episcopus in Homilia 3. de Pentecoste, & Gregorius Turonensis in Historia Francorum lib. 3. cap. 15. de qua appellatione nos etiam plenius commodiore loco, si Deus dederit) omnium, qui vel in oppidis vel ruri degunt, in eundem locum conventus fit, & commentaria Apostolorum, aut scripta Prophetarum, quoad tempus fert, leguntur. Deinde Lectore quiescente Præsides Orationem, qua populum instruit, & ad imitationem tam pulcrarum rerum cohortatur, habet.*

habet. Sed & Chrysostomus & Augustinus in usu id suis temporibus fuisse non uno loco indicant; siquidem ille in Homilia 5. in Matthæum de ipso Dominico die agens: *Legem hanc* (inquit) *nobis statuamus immobilem, nec nobis tantum, sed conjugibus etiam liberisque nostris, ut unum hunc totius hebdomadis diem, quo ad audiendum concurratur, totum in eorum, quæ dicuntur, meditatione ponamus.* Nec multo post: *Quod ne accadat, quoties a sancta congregatione disceditis, nihil magis necessarium judicave, quam ea, quæ audiendo didicistis, conservare meditando.* Nimirum enim omnino indevotio, & prorsus extrema est, ut quinque & sex dies quidem in rebus carnalibus consumentes, unum spiritualibus diem, imo exiguam diei partem nolitis impendere. Atque existimarim etiam, de hac ipsa Dominica die tunc intellexisse eundem Chrysostomum, cum in Homilia xi. ad cap. 1. Joannis Auditores, cupiens attentissimos in Concionibus adesse, admonet, ut semel in Sabbato, vel ipso Sabbato, Evangelicas illas velint domiprælegere lectiones, quas esset ipse deinde in Ecclesia expositurus. Dum enim Sabbato potissimum id ab eis peragendum dicit Chrysostomus, videtur certe de eo locutus tempore, quod destinatum habendæ Concionis hebdomadis diem, hoc est, Dominicum, proxime antecedeat; quod nimirum soleant nuperrime lecta in memoria penitus insidere. *Quid igitur* (ait Chrysostomus) *a vobis peto? Ut una diem.*

dierum in Sabbato, vel saltem Sabbato, cura vobis sit Evangelicas legere lectiones, quas ante has Conciones in manibus habere, domi frequenter repetere, earum diligenter sensum disquirere, quod clarum, quod obscurum in his sit, adnotare velitis, quod pugnare videatur, cum non pugnet; ita omnibus penitus examinatis, his vos Concionibus quam attentissimos exhibeatis, &c. Augustinus vero in lib. 6. Confessionum cap. 3. se-ipsum narrans solitum Mediolani omni die Dominico concionantem Ambrosium audire: *Et eum quidem* (ait, de eodem loquens Ambrosio) *in populo verbum veritatis recte tractantem omni die Dominico audiebam.* In Sermone autem 28. de verbis Apostoli, cum diem Dominicam habendo Sermoni destinatam dicat Augustinus, morem certe nostrum aperte confirmat: *Nunc* (inquit) *cum die Dominico, debito reddendi Sermonis, recitaretur eadem lectio, divinitus mihi inspiratum esse credidi, ut inde tractarem.* Id ipsum perstringitur ab eodem Augustino, sed paulo obscurius, in Tract. 7. in Joannem iis verbis: *Nos autem, Fratres, quoniam pasti sumus epulis saletaribus, quæ restant agamus, ut diem Dominicum solemniter impleamus in gaudiis spiritualibus.* Synodi quoque in Trullo habitæ can. 10. ita constitutum fuit: *Quod oportet eos, qui præsent Ecclesiis, in omnibus quidem diebus, sed præcipue Dominicis, omnem clerum & populum docere.* Cujus Constitutionis rationem reddens Zonaras, hæc scribit ad eum Canonem,

ex elegantissima doctissimi viri Anronii Salmatii collegæ mei interpretatione: *Apostolici decreti auctoritatem secuti Patres hoc edito Canone, cum aliis quoque, tum Dominicis diebus, Episcopi Oratione populum ad pia religionis studia informari ac institui jubent. Cum enim per eos dies vacationem a laboribus nati homines in Ecclesiam conveniant, ibique tempora divinarum Scripturarum auditione traducant, erit ea populo longe fructuosior industria, quam in eo erudiendo ac instituendo iis præcipue diebus Episcopus adhibuerit. Ex quibus Zonaræ verbis illud etiam apparet, quod supra dicebamus, ductam hanc consuetudinem ab ipsis Apostolorum temporibus. Zonaræ autem rationem, ut ferme omnia, mutuatus Balsamon, ita compendiose ait ad eundem Canonem: Episcopi Ecclesiarum Doctores constituuntur, & propterea dicit Canon, eis omnino necesse esse, eum, cui præsent, populum semper docere, & multo magis in diebus Dominicis, in quibus omnes fere solent in Ecclesiis interesse, ut qui a suis artificiiis operibusque cessent.*

CAPUT XI.

*In aliis quoque festis diebus habitæ
olim Conciones.*

ATque hæc quidem, in Dominicis potissimum diebus habitas antiquitus Conciones, fidem

fidem faciunt. In aliis porro festis an fuerit hoc idem factitatum, deinceps nobis explicandum est. Ii igitur ipsi, qui pæne innumeri, in festis diebus habiti, ad nos pervenerunt, sanctorum Patrum, tam Græcorum, quam Latinorum, Sermones hanc veritatem planissime confirmant. Verum non isto dumtaxat argumento fulta sustentatur ea res: sunt & aliæ certissime conjecturæ, quarum firmo omnino nititur fundamento. Beatissimos certe viros Chrysostomum & Chrysologum concionandi consuetudinem in aliis præter Dominicos, festis, ac Martyrum præsertim diebus, ita constanter retinuisse observo, ut, si quando in iis alia de re Sermones habere cogerentur, idoneam statim ac justam Auditoribus adferrent ejus cessationis ac necessitatis excusationem. Ne vero (ait Chrysostomus in Oratione 3. adversus Judæos) *vestrum quispiam reprehendat Orationem, velut intempestivam, si cum Martyres vos hodie vocent, nos supersedentes illorum exponere certamina, adversus Judæos exuimur. Nam & ipsis Martyribus hic Sermo est exoptatior; ex nostris enim laudationibus nihil illis splendoris accrescet. Quid enim egeant linguis nostris, quorum certamina superant naturam humanam? quorum præmia vim ingenii nostri vincunt?* Beatus vero Chrysologus in Serm. 122: *Deberet, (inquit) Fratres, Sermo noster hodie sancti Andreae, in quantum sufficit, referre virtutes, sed quia de divite, illo, & Lazaro Evangelico paupere, quod superest,*

perest, nos diximus reddituros, & beati Andrea Apostolatus, & Martyrii sui prerogativa sufficit, & abundat ad gloriam; si placet, nos, quæ promissimus, quæ debemus, ipso Domino reddente, solvamus. Quin etiam reperio eundem Chrysostomum, nec non Gaudentium Brixientem, & Augustinum interrupisse aliquando eum ordinem, quem in habendis quibusdam Concionibus, continuatis fere diebus, ipsi sibi præscripserant; ne videlicet usitatum hunc in festis diebus concionandi morem intermitterent. Oportebat quidem (Chrysostomi verba sunt in Concione 4. de Lazaro) superiore conventu debitum hoc dissolvissè, (finem nimirum imposuissè parabolæ de Lazaro) verum non existimavimus esse tutum, beati Baby-læ & Bigæ sanctorum Martyrum, qui Lazarum secuti sunt, bene facta præterire. Eoque disulimus fundamentum, reservantes in præsentem diem totam structuram. Age igitur, quoniam & Patribus suas laudes persolvimus, non ut illi promerebantur, sed pro viribus nostris persolvamus & vobis hujus expositionis reliquias. Et in Homilia 2. de incomprehensibili Dei natura: Fratres nostros morbo teterimo, Judæorum opinione, laborantes, nisi festinantis ab igne eripuissimus Judaico, nihil juvare admonentes possemus. Deinde nos adventus accepit Patrum spiritualium, qui complures huc diversis ex locis accesserunt. Neque enim per id tempus duximus esse opportunum, ut dum illi omnes veluti flumina quadam in hoc mare spirituale affluerent, nos

Sermone

Sermone prolixiore ageremus. Post decessum illorum celebritates percrebra Martyrum occurrere, quorum solemnitatem negligere & laudem haudquaquam deberemus. Quæ propterea refero atque enumero, ne per aliquam meam negligentiam aut desidium commissum esse existimetis, ut certamen Anomæorum usque ad hoc tempus differretur. Nunc itaque cum Judæorum pugnam Deo bene juvante cursu felici expedierimus, & patres in suas redierint sedes, & Martyrum laudes nos satis delectarint, age diuturnum vestrum audiendi desiderium expleamus. Gaudentius autem Brixienſis Episcopus in Tractatu 5, sic habet: Ordinem lectionis Exodi, ubi lex celebrandi Paschatis describitur, idcirco præposueravimus, ut Myſteriis reſerandis debita reverentia ordinem teneremus, quia oportebat in illa splendidiſſima nocte Vigiliarum ſecundo Tractatu non dictorum ſequentia, ſed congrua Neophytis explanari. Apud Auguſtinum demum ita ſcriptum legimus in Præfatione ad Expoſitionem Epistolæ B. Joannis: Meminit Sanctitas veſtra, Evangelium ſecundum Joannem ex ordine lectionum nos ſolere tractare; ſed quia nunc interpoſita eſt ſolemnitas ſanctorum dierum, quibus certas ex Evangelio lectiones oportet in Eccleſia recitari, quæ ita ſunt annuæ, ut aliæ eſſe non poſſint. Ordo ille, quem ſuſceperamus, neceſſitate paululum intermiſſus eſt, non omiſſus. Et Tractatu 9. in eandem beati Joannis Epistolam: Interceſſerunt autem, ut omitteremus textum hujus Epistolæ, quædam pro diebus feſtis ſolemnia

lemnia lectionum, qua non potuerunt niſi legi, & ipſa tractari; nunc ergo ad prætermiſſum ordinem redeamus, & qua reſtant intente accipiat Caritas veſtra.

CAPUT XII.

In Episcopatus natali die, ſive primo, ſive anniverſario, habitæ interdum a priſcis Patribus Conciones. Atque id non ab ipſis dumtaxat primo creatis Episcopis, ſed ab aliis etiam quandoque factitatum.

IN ipſo inſuper Cathedræ ac Episcopatus natali die, ſive primo, ſive anniverſario, habitæ nonnumquam a priſcis Patribus Conciones, notius eſt, quam ut longæ probationis egeat. Quis enim, in Patrum lectione non omnino peregrinus aut hoſpes, neſciat, Gregorium Nazianzenum publice verba ad populum feciſſe, quo primum die Saſimorum eſt creatus Episcopus? extat hæc Oratio inter Nazianzenicas numero ſeprima. Gregorii etiam Nyſſeni elegantiffimam; primo ſui episcopatus natali die habitam, Orationem videre eſt in ejus ſecundo Operum Tomo: quam quidem Orationem doctiffimus, acerrimique & elegantiffimi judicii vir, Fronto-Ducaus ex manu ſcriptis Codicibus non ita pridem

dem Latinam fecit, atque in vulgus edidit. Chrysostomus similiter, cum primum Episcopus ordinatus est, Sermonem ad populum habuit. Quintam demum sacram Ennodii, Ticinensis Episcopi, Dictionem, ab ipso, cum primo Episcopus creatus est, sive habitam, sive aliis conscriptam, ut ea in Episcopatus auspiciis uterentur, morem hunc nostrum verissime exprimere, nemo non videt.

Sed & panegyricis aliorum Concionibus laudatos interdum Episcopos primo suscepti Episcopatus die, indicant Chrylogi Sermo 107. in Petri Episcopi citationem factus, & prima Ennodii sacra Dictio, in Laurentii Mediolanensis Episcopi natali Cathedræ die habita.

Neque vero in prima dumtaxat Episcopatus aut Cathedræ natali habebantur olim Conciones, sed in ipso etiam nonnumquam anniversario Creationis die hoc idem factitatum reperio. Atque, ut ita sentiam, faciunt Augustini Homil. 24. & 25. ex libro quinquaginta Homiliarum; facit & Magnus Leo in Sermonibus suis 1. 2. & 3. Præstat autem ipsa Augustini verba apponere: *Die quidem omni, (ait in 24. Homilia) & omni hora, & cura omnino continua, Dilectissimi, cogitare debet Episcopus, quanta dispensationis sarcinam gerat, qualem de illa rationem Domino suo reddat. Verumtamen cum dies anniversarius nostræ Ordinationis exoritur, tunc maxime bonor hujus officii, tamquam primum imponatur, attenditur.*

attenditur. Et aliquanto post: Die ergo isto solemni Episcopatus mei prius paucis alloquar debitorum meos, &c. In 25. vero Homilia hæc inquit: Hodie diurnus dies iste, Fratres, admonet, me attentius cogitare sarcinam meam; de cuius pondere etiamsi mihi die nocteque cogitandum sit, nescio quo tamen modo anniversarius iste dies impingat eam sensibus meis, ut ab ea cogitanda omnino dissimulare non possim. Leonis autem testimonia recitare idcirco prætermitto, quod ipsa Sermonum Inscriptio legenti subito rem totam manifestet, & sint ii Sermones in manibus omnium.

C A P U T XIII.

In basilicarum ac altarium dedicatione concionati nonnumquam veteres Patres.

ATque hæc quidem, habitas antiquitus Conciones in Episcopatus natali die, sive primo, sive anniversario, fidem faciunt: quæ vero proxime addam, id ipsum in Basilicarum etiam seu Altarium dedicatione factitatum, docebunt planissime. Extat plures Augustini Sermones de Tempore, 252. 253. 254. 255. 256. & ex iis, quos addidere Parisienses; 16. & 17. quorum Titulus is est, ad nostræ omnino sententiæ confirmationem: *In anniversario dedicationis*

A 2

tionis

tionis Ecclesiæ, vel Altaris, Sermo, &c. Secunda quoque sacra Ennodii Dictio habita fuit in Basilicæ Apostolorum Petri & Pauli dedicatione; Quarta autem in dedicatione Basilicæ sancti Joannis Baptiste. Faustum item Reienssem Episcopum, Concionem Lugduni habuisse, cum inibi Ecclesiæ quædam dedicaretur, prodidit Sidonius Apollinaris in Epistola 3. libri 9. iis verbis: Licet prædicationes tuas, nunc repentinas, nunc, cum ratio poposcisset, elucubratas, rancus plosor audierim, tunc præcipue, cum in Lugdunensis Ecclesiæ dedicata festis Collegarum sacrosanctorum rogatu exorareris, ut perorares, &c.

CAPUT XIV.

In ipsis etiam festorum dierum Vigiliis habitæ aliquando Conciones.

NEc reticebo illud in præsentia; in ipsis etiam festorum Vigiliis concionatos interdum veteres Patres. Atque id locus ex 4. Gaudentii Brixienfis Tractatu plane probat, in quo ista scripta sunt: *Carnalem Judaicæ Paschæ observantiam, spiritualibus typis refertam, trino jam Tractatu docuimus; semel hesterno die, & bis in Vigiliis allocuti Caritatem vestram.* Et alter 5. in Tractatu, hoc modo conscriptus: *Ordinem lectionis Exodi, ubi lex celebrandi Pascha describitur, idcirco*

idcirco preposteravimus, ut mysteriis referendis debitum reverentiae ordinem teneremus; quia oportebat, in illa splendidissima nocte Vigiliarum, secundo Tractatu, non dictorum sequentia, sed congrua Neophytis explanari. Augustinus quoque in Homilia 26. libri quinquaginta Homiliarum ita, ut Gaudentius, morem hunc nobis expressit, cum dicat: *Et quia non toti viri, vel mulieres voluerunt hodie ad Vigiliis convenire, rogo vos, Filii & Filiae ut ea, quae vobis dicta sunt, illis, qui absentes fuerunt, fidelissime referatis.*

CAPUT XV.

In profectis etiam diebus habitae olim quandoque Conciones. Certi ac definiti fuerunt huiusmodi dies. Quaesitum, quinam tandem ii fuerint. Varia variarum Ecclesiarum hac in re consuetudo.

Sed in profectis quoque diebus habitas olim quandoque Conciones, ex Augustini Sermone 28. de Tempore, parvo negotio quivis dicerit: adfirmans enim inibi Augustinus, eam ob causam nolle se longius Sermonem producere, ne pauperes, quibus erat ad opera exeundum, retardarentur, significat, profectum omnino fuisse illum diem, utpote operibus destinatum.

tum. Adjungamus autem ipsa Augustini verba; ut ex iis, tamquam porrecta luce, antiqui moris notio magis illustretur: *Adhuc (inquit) nos delectabat cum Caritate vestra de beato Joseph aliquid loqui; sed propter pauperes, qui ad opera sua festinant, melius est, hoc ut vobis in die crastina reservemus.*

Quin certos etiam fuisse ac definitos hosce totius hebdomadæ dies, probat ejusdem Augustini locus ex Tractatu 46. in Joannis Evangelium, hoc pacto conscriptus: *Omnia, quæ hic adhuc discutienda arbitror, hodie non discutio, sed iterum vobis in nomine Domini, diebus reddendi Sermonis, eadem lectio recitabitur, & diligentius illo adjuvante tractabitur. Quid enim hæc sibi volunt verba (diebus reddendi Sermonis)? an non aperitissime ostendunt, constitutos fuisse certos aliquos in hebdomada dies in quibus Conciones de more haberentur? mihi quidem videntur, credo item aliis.*

Chrysostomus porro, duos omnino fuisse huic rei destinatos in hebdomada dies, planissime demonstrat, cum in Homil. 24. ad cap. 3. Joannis hæc scribit: *Pueri singulis diebus ad Magistros proficiscentes & doctrinam accipiunt, & acceptam recitant: numquam vacantes, ut scientiæ possessionem adipiscantur; interdum noctes diebus jungunt, & ad hoc pro caducis & fluxis rebus sæpenumero illos cogitis. Nos autem a vobis, qui perfectiori estis ætate, non tantum exigimus, quantum vos a liberis*

ris vestris: non enim singulis diebus, sed duobus tantum, & brevi eorum parte, vos labore levemus, hortamur, ut Orationi nostræ aures adhibeatis.

Sed peculiare hosce duos totius hebdomadæ habendis Concionibus destinatos dies, quosnam tandem putas fuisse? Alexandrinos certe in quarta & sexta Feria consuevisse suas habere Conciones, Socrate teste dicimus; apud quem ita in 5. Historiæ Ecclesiasticæ libro cap. 21. scriptum legitur: *Alexandriæ quarta Feria, & ea, quæ dicitur Parasceve, leguntur Scripturæ, & Doctores eas interpretantur.* Cujus consuetudinis originem hanc e vestigio attexit: *Atque hæc quidem est vetus apud Alexandrinos consuetudo: etenim illis diebus constant Origenem potissimum in Ecclesia docuisse.* Eadem, verbis paululum immutatis, referens Nicephorus in Histor. Eccles. lib. 12. cap. 34. sic scribit: *Quarta hebdomadis die, & ea, quæ Parasceve dicitur, Alexandrini Scripturas legebant, Doctoribus eas interpretantibus: atque eam illi antiquitus habuere consuetudinem.* Dicunt etenim, & Origenem plurimum diebus istis in Ecclesia docuisse. Ex quibus satis constat, esse hujusce Alexandrinorum moris initium usque ab ipso Origene repetendum. In Cypro autem, & Cæsareæ Cappadocum, Sabbato & Dominico potissimum die habitas Conciones, prodiderunt iidem Socrates & Nicephorus. *Cæsareæ Cappadociæ (inquit ille) & in Cypro, die Sabbati & Dominico*
A 2 3 semper,

semper, sub vesperum accensis lucernis, Presbyteri & Episcopi Scripturas interpretantur. Nicephorus vero: In Cypro (ait) & Casarea Cappadocum, in Sabbato & Dominico die vesperi post lucernarum accensionem, Episcopi & Presbyteri Sacras Scripturas populo exponunt. Eum autem Chrysostomi locum, quem proxime supra posui, de Sabbato ac Dominico item die si quis accipiendum existimarit, equidem non ego contra tendam. De Sabbati utique die, tamquam huic rei destinato, meminit etiam beatus Augustinus in Sermone 43. de verbis Domini in Evangelium Joannis, sic inquit: Suscepi hæc verba Apostoli adjuvante Domino exponere Caritati vestra. Vacat nobis, matutina capimus, hora prandii non urget; ad istum diem, id est, Sabbatum, maxime hi assolent convenire, qui esuriunt Verbum Dei. Existimarim igitur, varias hac in re fuisse variarum Ecclesiarum consuetudines ac observationes; quas consequens deinde tempus vel retinuit, vel immutavit, vel auxit, vel funditus sustulit.

C A P U T XVI.

Singulis sæpe diebus, in Quadragesima præsertim, atque in hebdomada Paschali, veteres concionati Patres.

T*rium puerorum (ait Chrysostomus in Homilia 5. ad Populum Antiochenum) & Babylonica*

bylonicæ fornacis enarratio aliquatenus, ut videtur,
 vestram heri caritatem consolata fuit. Et paulo
 post: Etsi enim heri & nudius tertius de hac vobis
 locutus sum materia, neque tamen hodie desistam;
 neque cras, neque perendie eadem persuadere. Et
 quid dico crastinam, aut tertiam diem? donec vos
 correctos videam, non absistam. Si enim legem
 prævaricantes non erubescunt, multo magis nos ju-
 bentes, ne prævaricemini, admonitione continua
 confundi non est dignum. In Homilia 6: Facite
 igitur quod & heri admonui, & hodie dicam, nec
 dicens quiescam. In Homilia 7: Multa quidem
 & de multis heri apud vestram disserui caritatem.
 In Homilia 12: Et heri dixi: Benedictus Deus,
 & hodie hoc ipsum rursus dicam. In Homilia 13:
 Ab eodem principio, & iisdem præmiis, quibus
 heri & nudius tertius cæpi; & hodie incipiam. In
 Homilia 15: Et quidem heri cum vestra caritate
 constitui, quod non amplius de hoc mandato dicam,
 quoniam omnibus superioribus diebus sufficienter dis-
 sertum est: sed quid faciam? Donec vos correctos
 videam, non possum absistere proposito. Apud Au-
 gustinum etiam sub finem Tract. 8. in Joan. ita
 legitur: Sunt forte hodie multi, qui propter so-
 lemnitatem diei, non propter audiendum Sermonem
 venerunt, crastino qui venerint, venient audituri, &c.
 Plenæ sunt consimilibus exemplis sanctorum
 Patrum Homiliæ, quibus commemorandis su-
 per sedeo. Illud autem ad hanc rem in primis
 pertinere puto, quod multarum extat mentio in

beato Crysoftomo habitarum continuatis deinceps diebus Concionum, multarum etiam in beato Augustino. Hæc enim inquit Crysoftomus in Homilia 4. ad Populum Antiochenum: *Præsentem per hebdomadam totam de Juramentis vobis dicemus, a faciliiori mandato initium facientes.* In ejusdem Operis Homilia 7: *Sed hic consolationis Sermonem solvamus: etenim quintam diem agimus, vestram consolantes caritatem, & jam molesti videmur.* Rursus in Homilia 8. *Bene novi, quod huic omnes inhiatis, & quisque discere cupit, qua de causa non ab initio editus est hic liber; sed neque nunc expositionis hujus esse tempus video. Quid ita tandem? Ad finem nobis hæc devenit hebdomas, & materiam attingere metuo, deinde statim expositionem abrumpere; multorum enim dierum jugis indiget orationis, & continuata memoria, ideo rursus ipsam differimus.* Et aliquanto infra: *Sextus hic dies est, quod de hoc vos præcepto admoneo; in futurum vobiscum pacisci volo, tamquam desistens, ut caveatis.* In Homilia demum 12: *Tribus præteritis diebus unum divinæ cognitionis modum quarebamus, ipsumque in finem deduximus, interpretantes, quomodo cæli enarrent gloriam Dei, & quale tandem sit Pauli dictum, quod invisibilia ipsius a creatura mundi per ea, quæ facta sunt, intellecta conspiciuntur.* Hodie vero paulisper in hanc philosophati materiam, ad alium transibimus Sermonem. Beatus vero Augustinus in Præfatione ad Expositionem Epist. B. Joannis: *Meminit Sanctitas*

*Sanctitas vestra, Evangelium secundum Joannem ex ordine lectionum nos solere tractare, sed quia nunc interposita est solemnitas sanctorum dierum, quibus certas ex Evangelio lectiones oportet in Ecclesia recitari, quae ita sunt annua, ut alia esse non possint, ordo ille, quem susceperamus, necessitate paululum intermissus est, non omisus. Cum autem cogitarem, quid secundum hilaritatem praesentium dierum per hanc hebdomadam vobiscum de Scripturis agerem, quantum Dominus donare dignatur, quod posset in his septem vel octo diebus finire, occurrit mihi Epistola B. Joannis. Et in Tractatu 9. in eandem Epistolam initio: Intercesserunt autem, ut omitteremus textum hujus Epistolae, quadam pro diebus festis solemnibus lectionum, quae non potuerunt nisi legi, & ipsa tractari; nunc ergo ad praetermissum ordinem redeamus, & quae restant intente accipiat Caritas vestra. Ex quibus manifeste animo, tamquam oculis, cernimus, Augustini Tractatus in Evangelium, & in Epistolam Joannis, perpetuis fere diebus habitos fuisse; id quod in multis etiam Psalmorum Enarrationibus animadvertere licet. Atque haec quidem certissimae sunt conjecturae, quibus nostra nititur sententia. Verumtamen extant etiam alia gravissima eorundem Auctorum testimonia, quibus eadem firmissime fulcitur. Hinc in secunda beati Chrysostomi, quae est adversus Judaeos, Oratione emanant illa: *Benedictus Deus, qui vobis tantum audiendi spirituales Sermones inspiravit ardorem.**

dorem. Quemadmodum enim homines vino & portionibus dediti, singulo quoque die, simul ac surrexerunt, obambulant, curioseque disquirunt, ubi computationes agantur, ubi convivium, ubi cœna, ubi commestationes, ubi temulentia, phialæ, crateres, & pocula: sic & vos quotidie, simul atque surrexeritis, curiose perquiritis, ubinam futura sit exhortatio, ubi salubris admonitio, ubi doctrina, ubi sermo ad sermonem Christi conducent, &c. Et in Homilia 13. in Genesim, de eodem longe apertius: *Videns vestrum inexplebile desiderium, & immodicam aviditatem, mentemque intentissimam, nec non omnes ad spiritualem hanc doctrinam anhelantes & accelerantes, quamvis valde sim mee inopiæ mihi conscius, quotidie tamen inopem & tenuem hanc mensam vobis proponere studeo, confidens, quod flagrantes desiderio majori promptitudine, quæ dicuntur, suscepturi sitis.* Et in ejusdem Operis Homilia 37: *Sed oro, ea, quæ dicuntur, auscultate diligenter. Nam etsi labor noster, utilitas tamen vestra, imo communis. Sed quid dico, labor noster? Donum est gratiæ Dei. Cum attentione igitur suscipiamus & nos ea, quæ a Deo donantur, ut hinc lucrifacientes aliquid in animarum salutem, inde abeamus. Hanc ob rem quotidie spiritualem hanc apponimus mensam, ut admonitione continua, & multa divinarum Scripturarum exercitatione, omnes maligni Dæmonis excludamus insidias.* Et in Homilia 41: *Cuncta abundus hodie, nec admodum alacris ad docendum enarrandumque accedo: nam*

cum

cum mente repeto, quod nobis quotidie insonantibus, admonentibus, & spirituale hoc vobis convivium apponentibus, multis ex his ipsis, qui adsunt, & spiritualis hujus doctrinae, & horrenda atque terribilis mensa participes, totos dies in spectandis ludis equestribus perdunt, & proinde atque non doceremus, tam nihil proficiunt. Et in Homilia 54: Ea enim de causa quotidie vobis concionamur, ut aliquid lucrificatiis, & virtutes vestrae crescant, & nos letemur videntes vestrum profectum. Eodem modo alibi etiam saepius; quæ quod opus non erat adscribere, idcirco ea consulto prætermisi. Augustinus etiam hoc idem, paucis quidem, sed aperte tamen, exprimit in Homilia 42. libri quinquaginta Homiliarum, sic scribens: *Et Verbum Dei, quod quotidie nobis verbis aperitur, & quodammodo frangitur, panis quotidianus est. Et quomodo illum panem ventres, sic istum esuriunt mentes, &c.* Et in Sermone 135. de Tempore: *Et Verbum Dei, quod quotidie predicatur, panis est; non enim quia non est panis ventris, ideo non est panis mentis.*

Atque hæc quidem vere existimamus. Si quis tamen hoc idem dicat de Quadragesimæ potissimum ac Paschalis hebdomadæ tempore, recte ex veterum Patrum sententia dixerit. Ac de Quadragesima indicio est Chrysostomi locus in Homilia 11. in Genesim: *Non hoc solum exquiratur, Carissimi, ut per singulos dies huc conveniamus, & de iisdem audiamus continue, & totam jejuncmus*

jejunemus Quadragesimam. Si nihil enim ex eo, quod huc assidue convenimus & admonemur, & ex jejunii tempore lucrari deberemus, hæc non modo nihil nobis prodesse, verum & majoris occasio damnationis fierent nobis, &c. Quibus hæc aliquanto infra subjiciuntur: Nisi hos superemus morbos, & alios in nobis nascentes, per singulos dies huc convenientes, & continue vacantes auditioni, tantamque consequentes doctrinam, & a jejunio subsidium habentes, quæ nobis erit venia? quæ excusatio? Dic enim quæso, si tuum videas filium quotidie scholam petentem, & tempore progressu nihil amplius inde lucrantem, numquid patienter feres? &c. Idem & hic fieri justum est. Nos enim quodammodo a divina sumus gratia constituti, quasi spirituales filios ad hanc scholam quotidie vocantes, salutarem vobis doctrinam apponimus, non quæ veniunt ex propria mente loquentes, sed documenta nobis a Domino per divinas donata Scripturas in medium proponentes, & hæc prædicantes. Itaque, si nobis omne studium & sedulitatem exhibentibus, & quotidie vos ad virtutis ducentibus semitam, &c. In Homilia etiam 4: Videns ego, (ait) Dilecti, alacrem & quotidianum vestrum in hoc templo conventum, magnam percipio voluptatem, misericordemque Deum in profectu vestro glorificare non cesso. De ipso autem Quadragesimæ tempore locutum hoc loco Chrysostomum, ex iis, quæ sub ejusdem Homiliæ finem habentur, perspicue liquet: inquit enim: Age, obsecramus vos, ut si per quod aliud,

aliud , maxime per jejunii tempus magnam bene vivendi curam geratis ; nec fiat vobis Sermo fastidiosus , si quotidie loquamur .

In Paschali autem hebdomada singulis etiam diebus concionatos priscos. Patres ex Praefatione Tractatum Gaudentii Brixienfis Episcopi ad Benevolum verba hæc plane declarant : *Communis voti fuerat , ut ea , quæ divinis eloquiis per Paschales dies proxima præteritos explanavi , coram valuisses audire . Sed illa manifestius , quæ non multo post subjiciuntur : Ex ingenti agritudine tuum nunc adhuc corpus invalidum , ne supra dictæ Festivitati (Paschatis) interesses , inhibuit , unde vehementer dolebas , omnino fraudem tibi spiritualium bonorum reputans peccatis urgentibus irrogatam ; ac propterea veluti singulare quoddam dispendii memorati remedium , magnopere exegisti , ut scriberem , quid in unaquaque die illius sacratissimæ hebdomadis sanctæ Fraternitati a me expositum meminisssem . Probatur hoc idem ex verbis Chrysostomi in Homilia 33. in Genesim hæc scribentis : Illucescente Resurrectionis die , necessarium erat , ut de Resurrectione Domini Caritatem vestram doceremus . Et sequentibus diebus propter miracula , quæ tunc facta sunt , Resurrectionis demonstratio iterum afferenda erat : in quibus etiam in manus accepimus Apostolorum Acta , inde vobis continua proponentes convivias , & crebris quotidianisque admonitionibus eos , qui nuper baptismi gratiam acceperant , exhortantes , &c.*

CAPUT XVII.

In eadem Ecclesia plures nonnumquam in una die habiti a diversis Concionatoribus Sermones.

ANtiqui certe Patres, quibus neque studium, neque sedulitas umquam defuit, summam semper operam in coposuerunt, ut, quantum possent, commissio sibi populo prodesse. Hujus autem voti se maxime compotes vel ipsa Concionum frequentia fieri posse existimabant. Eam ob causam plures in eadem Ecclesia legimus habitos una die, sive a diversis, sive ab eodem Concionatore Sermones. Quæ duo ordine suo patefaciam, A diversis igitur plures nonnumquam una die habitas in eadem Ecclesia Conciones, ex Apostolicarum Constitutionum Auctore in lib. 2. cap. 57. cognoscitur, quo in loco post publicas Presbyterorum exhortationes ipsi etiam concionandum Episcopo narrat: *In medio (ait) Lector ex edito loco legat, &c. Deinde hortentur populum Presbyteri, non omnes simul, sed singulatim, & postremus omnium Episcopus, qui similis est gubernatori navis.* Atque ex Gaudentii Brixiensis Tractatu 14. ita scribentis de beato Ambrosio, qui proxime post ipsum verba erat ad populum facturus: *Obsecro communem Patrem Am-*

*Ambrosium, ut post exiguum rorem Sermonis mei ipse irriget corda vestra divinarum Mysteriorum literarum. Loquetur enim Spiritu Sancto, quo plenus est, & flumina de ventre ejus fluent aqua viva, & tamquam Petri Apostoli successor, ipse erit os universorum circumstantium Sacerdotum. Chrysostomi etiam verbis, quibus primæ suæ de Pœnitentia Homiliæ finem ob id imponendum significat, quod Præfulis mox concionaturi vocem cuperet audire, quæ dixi de pluribus a diversis una interdum die habitis in eadem Ecclesia Sermonibus, facile confirmarim. Restant (inquit) plura, sed hæc sobriis ad correctionem sufficiant: quare necesse Orationem suppressere, nam cupio Patris audire vocem: quoniam ipsi quidem pastoralis pueri calamo sibilamus, veluti subqueru aut fago quadam ad umbram satorum horum sedentes, hic autem veluti Musicus optimus auream citharam modulatus, sonorum consonantia universum excitat theatrum; & hujus non ictuum soni, sed consonantia verborum, consonantia operum, plurimam nobis adfert utilitatem. Apud eundem, in Homilia quoque de Nativitate Domini ad secundum Lucæ caput, in hanc rem ita scriptum videas: Oblitus sumus propositum nostrum; plus diximus, quam cogitaveramus; aliud mens disputavit, ad aliud lingua prolapsa est. Præparemus igitur aures nostras Pontifici, & quidquid a nobis minus dictum est, intentis auribus audiamus, &c. Et in Oratione de beato Philogonio: Verum
ad*

ad aliam necessariam materiam nobis festinat Oratio; ideoque communi Patri, beatique Philogonii sectatori hac dicenda relinquentes, ut qui melius nobis teneat quidquid est antiquatum. Et in Homilia 2. de verbis Isaïæ: Eoque doctrina Sermoni silentii tempus præfinitum est, ut neque nos ipsos deteramus verborum multitudine, neque vos delassemus. Atque hæc tempora novit Salomon, dicens, Tempus tacendi, tempus loquendi. Sic igitur nobis tempus tacendi, quo detur & Præceptoris tempus loquendi: nam quæ nos asserimus, similia sunt vino, quod recens e lacu haustum est; quæ vero dicuntur ab illo, similia sunt vino, quod, quoniam vetustatem seniumque collegit, multam adfert tum utilitatem, tum vim, iis, qui opus habent: nobisque accidit illud Evangelii, Post deterius vinum, id, quod melius est, infertur, &c. Et in ejusdem Operis Homilia 3: Sed in præsentia de Martyribus Sermonem reservemus Martyrum amulatori, mihiq; vobiscum communi Doctore: ipsi nunc de Ozia disseremus, jampridem debitum æs alienum dinumerantes, &c. Et in extrema ejusdem Homiliæ parte de eadem re longe manifestius: Hæc servantes redeamus domum; quin potius hæc servantes excipiamus perfectiorem Doctoris exhortationem. Nam nostra quidem, qualiacumque sunt, habent juventutis ostentationem; hujus autem, qualiacumque fuerint, majore prudentia sunt ornata. Ac nostra quidem similia sunt torrenti, qui cum strepitu fertur; illius autem Oratio similis est fonti magna tran-

tranquillitate fluvios effundenti, qui olei magis, quam aquarum cursum imitentur. Excipiamus igitur ea fluentia, &c. Atque hoc idem plane ostendisse videtur Gregorius Nyssenus, cum in Oratione de sua Ordinatione hæc ait: Ne igitur longius vobis, Fratres, Sermonis exordium protrahamus: cum mirificis eorum, qui ante nos dixerunt, Orationibus operam dederitis, jam saturati estis, jam divites facti estis; a rebus quippe dulcibus satietas gignitur, quibus nimirum vos abunde præcedens Tractatus enutrivit. Itaque jam nihil aliud fortasse agitur, quam ut satietas satietati adjiciatur, ac veluti post aures Sermones memoriam vestram plumbeis numismatibus oneremus, &c. Sed hæc nimium multa: ex quibus tamen, plures una interdum die habitas a diversis in eadem Ecclesia Conciones, manifestum est.

CAPUT XVIII.

Ab eodem etiam Concionatore plures in una die habiti aliquando Sermones.

UT autem illud certum est, sic & hoc minime dubium. Etenim beatorum Gauden-
tium bis in eadem Paschatis Vigilia verba fecisse ad populum, ostendit locus hic ex Tractatu
4: Carnalem Judaicæ Paschæ observantiam, spiri-

tualibus typis refertam, trino jam Tractatu docui-
mus; semel hesterno die, & bis in Vigiliis allocuti
Caritatem vestram. In 5. etiam Tractatu, cum
secundæ Concionis in una eademque Vigiliarum
nocte habitæ meminerit idem Gaudentius, id,
quod dicimus; aperte significavit: Ordinem (in-
quit) lectionis Exodi, ubi lex celebrandi Pascha
describitur, idcirco præposteravimus, ut Mysteriorum
referendis debitæ reverentiæ ordinem teneremus;
quia oportebat in illa splendidissima nocte Vigiliarum,
secundo Tractatu non difforum sequentia, sed congrua
Neophytis explanari. De quo si aliquis adhuc
dubitet, lecta Augustini altera in Psalmum 86.
Concione, is, opinor, dubitare desinet; eam
enim ita exorditur: Ad reliqua Psalmi, de quo
in matutino locuti sumus, animum intendite. Pri-
mam autem terminat in hunc modum: Quod
restat, si placet, servemus, quia longus est Psal-
mus, & adhuc vobiscum aliquid in nomine Christi
sumus aucturi. Rescitate vires, non dico animi vestri,
nam video, quod animo infatigabiles estis, rescimini,
ac refecti a cibis redite. Ex quibus Augustini
verbis, hanc Sermonum frequentiam tunc
potissimum haberi consuevisse, cum aliquis Scrip-
turæ Sacræ Liber ordine ad populum continuatis
Concionibus exponendus suscipiebatur, licet con-
jici: quod quidem hoc pacto factum existimo.
Recitabatur a Lectore ea Scripturæ Sacræ pars,
quæ erat ad populum in Concione explicanda,
mox eam Tractator verbis ad Auditorum cap-
tum

tum & utilitatem accomodatis interpretabatur. Beatus Augustinus primam Psalmi 39. partem populo expositurus: *Hucusque* (inquit) *Psalmus lectus est hodie, hucusque tractandus est.* Ut jam satis constet, partiri consuevisse Patres Sacre Scripturæ recitationem, prout ipsa mox futura Concio magis postulare videbatur: quod tamen de voluntariis, non de propriis certorum temporum ac dierum lectionibus accipiendum est: de his enim nihil omnino immutare solitos Patres, jam supra monuimus.

C A P U T XIX.

Qua potissimum diei hora, sive parte, habitæ fuerint in veteri Ecclesia Conciones. Matutina tempora huic rei aliquando destinata,

HActenus igitur, qui fuerint olim habendis Concionibus destinati dies, tum quoties in iis aliquando a Patribus facta ad populum verba, satis dictum est. Nunc, qua potissimum diei hora, sive parte, habitæ fuerint antiquitus Conciones, si ostenderimus, nobis Opus erit Perfectum: omnia enim, quæcumque a principio instituímus, perducta erunt ad exitum & absoluta.

Matutina itaque tempora (ut a prima diei parte ordiar prius) habendis Concionibus fuisse

a priscis Patribus interdum constituta, Augustini ex Sermone 43. de verbis Domini in Evangelium secundum Joannem locus apertissime docet; in quo sic est: *Suscepi hæc verba Apostoli, adjuvante Domino, exponere vestræ Caritati. Vacat nobis, matutina cœpimus, hora prandii non urget, &c.* Et alter ejusdem Augustini locus ex Concione 2. in Psalmum 88. in hæc verba plane conscriptus: *Ad reliqua Psalmi, de quo in matutino loquuti sumus, animum intendite.* Id ipsum etiam ab eodem Augustino significari arbitror, cum in Sermone 9. de Tempore inquit: *In lectione; quæ nobis ad Missas legenda est, Fratres carissimi, audituri sumus, quod filii Israel, &c.* Tempus enim, quod est ante Missam, vere potest dici matutinum. Quin autem huc quoque pertineant illa ejusdem Augustini verba, quæ in prima ad eundem Psalm. 88. Concione ita leguntur: *Quod restat, si placet, servemus; quia longus est Psalmus, & adhuc vobiscum aliqui in nomine Christi sumus acturi. Reficite vires, non dico animi vestri, nam video, quod animo infatigabiles estis; reficimini, & refecti a cibis redite.* Dubitari minime debet, cum sit hæc illa ipsa omnino Concio, quam se in matutino habuisse adfirmat Augustinus in mox citata prima ad Psalmum 88. Concione.

CAPUT XX.

Inter ipsa missarum solemnia, proxime post Evangelii recitationem, habitæ olim ut plurimum Conciones.

HOc adeo colligere sum visus, cum ex aliis, quæ non multo post adferam, veterum Patrum testimoniis, tum maxime ex Apostolicarum Constitutionum Auctore in lib. 2. cap. 57. & in libro 8. cap. 5. & ex secundo Justini Martyris pro Christianis Apologia: quibus in locis universum solemnium primorum Christianorum Missæ sacrificii ritum ac ordinem perstringentes hi duo sanctissimi atque doctissimi Theologi, ipsam tum Presbyterorum, tum Episcopi Concionem, proxime post Evangelii lectionem statuunt. Illius verba sunt hæc ex libro 2: *Alius quispiam Psalmus David canat, (ecce Psalmorum cantum Missæ sacrificio de more tunc temporis præmitti solitum, cui deinde succedere Matutinum, Laudes, & Horæ Canonicæ) deinde Acta nostra legantur, item Epistolæ Pauli adjutoris nostri; quas Ecclesiis misit Spiritus Sancti instinctu dictatas: postea Diaconus, aut Presbyter Evangelia legat. Deinde hortentur populum Presbyteri, non omnes simul, sed singulatim, & postremus omnium Episcopus, qui similis est gubernatori navis. Deinde cuncti*

pariter consurgentes, & in orientem spectantes; egressis Catechumenis & Pœnitentibus, precentur Deum; Diaconi autem post precatorem alii oblationi Eucharistiæ operam dent, &c. In libro autem 8. cap. 5: Post lectionem (inquit) Legis, & Prophetarum, & Epistolarum nostrarum, & Actorum, atque Evangeliorum, salutet Ecclesiam Ordinatus, dicens, Gratia Domini nostri Jesu Christi, & Caritas Dei Patris, & Communicatio Spiritus Sancti cum omnibus vobis; & omnes respondeant, Et cum Spiritu tuo; & post salutationem alloquantur populum Sermonem hortatorio: quo Sermone habito ad docendum statuo ego Andreas frater Petri, ut consurgentibus edicat Diaconus ex loco alto, ne quis adsit Audientium, ne quis Infidelium. Ipsa similiter Justini Martyris verba (si quemadmodum oportet expendantur) & eisdem Missæ ritus manifeste satis declarant, & nostram valde confirmant sententiam; sic enim ille citato nuperrime loco scriptum reliquit: In omnibus, quas offerimus, oblationibus, benedicendo laudamus factorem omnium per Filium ejus Jesum Christum, & Spiritum Sanctum. Et Solis, qui dicitur, die, omnium, qui vel in oppidis vel ruri degunt, in eundem locum conventus sit: & Commentaria Apostolorum, aut Scripta Prophetarum, quoad tempus fert, leguntur; deinde LECTORE quiescente. Præsiciens Orationem, qua populum instruit, & ad imitationem tam pulcrarum rerum cohortatur, habet. Sub hac consurgimus communiter omnes, & preces profundimus;

fundimus; & precibus peractis panis offertur, & vinum, & aqua, &c. Hactenus Justinus, qui dum ait, (*benedicendo laudamus factorem omnium, &c.*) Psalmorum certe cantum haud obscure indicavit: cum vero subdit, (*Commentaria Apostolorum, aut Scripta Prophetarum, quoad tempus fert, leguntur*) designat Epistolarum Pauli ac Evangelii lectionem solitam in Missa pronunciari. Adjiciens autem, (*Lectore quiescente, Præsident Orationem, quæ populum instruit, & ad imitationem tam pulcrarum rerum cohortatur, habet*) omnino significat, statim post Scripturæ Sacræ lectiones ipsam haberi consuevisse Concionem. Istud idein, si quid judico, Tertulliani etiam auctoritate firmari mirum in modum arbitramur; cujus ex lib. de anima cap. 9. ista sunt, eorum multa compendiose narrantis, quæ in Missæ sacrificio de more peragi solebant. *Est hodie soror apud nos revelationum charismata sortita; quas in Ecclesia inter Dominica solemnia per ecstasim in spiritu patitur, conversatur cum Angelis, aliquando etiam cum Domino, & videt & audit Sacramenta, & quorundam corda dignoscit, & medicinas desiderantibus submittit: jam vero prout Scripturæ leguntur; aut Psalmi canuntur, aut Adlocutiones proferuntur, aut Petitiones delegantur, ita inde materia visionibus subministrantur, forte nescio quid de anima differueramus, cum ea soror in spiritu esset. Post transacta solemnia, dimissa plebe, quo usu solet nobis renunciare, quæ viderit, &c.* Ubi Adlocutiones nihil

aliud significant, ut in lib. 1. docuimus; quam Conciones ad populum. Easdem autem post Scripturæ Sacræ lectionem habitas ex eo constat, quod primo loco dicitur, *Scripturæ Sacræ leguntur*, tum subicitur, *Adlocutiones proferuntur*. Ac de Missæ tempore accipiendum hoc loco Tertullianum, indicant ea verba, *inter Dominica solemnia*; & ea, *Post transacta solemnia, dimissa plebe*.

Eandem porro consuetudinem illud etiam potest stabilire satis ac illustrare, quod ex recitatis Scripturæ Sacræ lectionibus, maxime vero ex pronunciato mox ante Evangelio, consueverunt veteres Patres suas non semel exordiri Conciones. *Apostolum audivimus*, (ait August. in Serm. 7. de verbis Apostoli) *Psalmum audivimus, consonant omnes divinæ lectiones, &c.* Idem in Sermone 10. de verbis Apostoli: *De divinis lectionibus, quod Dominus admonere dignatur, intenti audite Fratres, illo dante, me ministrante. Primam lectionem audivimus Apostoli, Fidelis sermo, & omni acceptione dignus, &c. Hoc de Apostolica lectione percepimus; deinde cantavimus Psalmum, exhortantes nos invicem una voce, uno corde dicentes, Venite Adoremus, &c. Post hæc Evangelica lectio decem leprosos mundatos nobis ostendit, &c. Has tres lectiones, quantum pro tempore possumus, pertractemus, &c.* Et in Serm. 237. de Tempore: *Lectioes sanctas plures, cum recitarentur, audivimus, & de his nos oportet dicere, quod*

quod Dominus fuerit donare dignatus. Sed lectionum omnis Auditor, quod recentius lectum est, magis meminit, & ut inde aliquid a Tractatore verbi dicatur, expectat. Cum ergo in ultimum sit Sanctum Evangelium recitatum, non dubito expectare Caritatem vestram, ut de conductis ac de mercede denarii aliquid audiat. Rursus de verbis Domini secundum Lucam Serm. 33: Lectiones sanctæ propositæ sunt, & quas audiamus, & de quibus aliquid Sermonis, adjuvante Domino, proferamus. In lectione Apostolica gratiæ aguntur Deo de fide gentium, utique ideo, quia ipse fecit. In Psalmo diximus, Deus virtutum converte nos, & ostende faciem tuam, & salvi erimus; in Evangelio ad cœnam vocati sumus, immo alii vocati, nos non vocati, sed ducti; non solum ducti, sed etiam coacti, &c. Et in Serm. 49. de Tempore: Divinæ lectiones omnes ita sibi connectuntur, tamquam una sit lectio, quia omnes ex uno ore procedunt. Audimus Apostolicam lectionem, & forte aliquem moveat, quod ibi scriptum est, secundum justitiam, quæ ex Lege est, qui fuerim sine querela. Audi Psalmum interiora dicentem, Tibi soli peccavi. Audistis & Evangelium istis lectionibus concordare, Voluntas, inquit, Patris est, ut quæ dedit mihi non pereant, &c. Sed nolo ipsa omnia, vel ejusdem Augustini, vel aliorum Patrum in rem istam testimonia proferre, satis erit admonere, id ipsum passim factitatum ab Origene, Hilario, Ambrosio, Gaudenzio, Chrysostomo, Cyrillo Alex-

Alexandrino, Chrysologo, Leone, Cæsario Arelatenſi, Gregorio Magno, & a vetuſtis quibuſcumque Patribus alii, quorum ad nos Conciones pervenere.

Dum hæc ſcrutamur, ad veritatem prope acceſſimus: eaque maniſeſtius aliquanto, quam adhuc factum ſit, debet pateſcere. Catechumenorum igitur dimiſſio mox habita Concione fieri olim conſuevit. Oſtendit hoc citatus aliam in rem Apoſtolicarum Conſtitutionum Auctoris locus ex lib. 2. cap. 57, in quo hæc plane ſcripta ſunt: *Hortentur populum Presbyteri, non omnes ſimul, ſed ſingulatim, & poſtremus omnium Episcopuſ, &c.* Subjungit autem: *Deinde & cuncti pariter conſurgentes, & in orientem ſpectantes, egreſſis Catechumenis & Pœnitentibus, præcentur Deum: Diaconi autem poſt præcationem alii operationi Eucharistiæ operam dent, &c.* Id ipſum ab Ambroſio ſignificari arbitror, cum ad Marcellinam Sororem ſcribens in Epistoſta 13. inquit: *Sequenti die, (erat autem Dominica) poſt Lectiones atque Tractatum, dimiſſis Catechumenis, ſymbolum aliquibus competentibus in Baptiſterii tradebam baſilica. Illic renunciatum eſt mihi, quod ad Portianam baſilicam de palatio Decanos miſſent, & vela ſuſpenderent, populi partem eo pergere. Egotamen manſi in munere. Miſſam (Fidelium nimirum) facere cæpi. Dum offero, raptum cognovi a populo Caſtulum quemdam, &c.* Cognoscitur etiam hoc idem ex verbis Auguſtini maniſeſtius, in Ser-
mone

mone 237. de Tempore hæc scribentis : *Ecce post Sermonem fit Missa Catechumenis, manebunt Fideles: venietur ad locum Orationis. Scitis, quomodo accessuri sumus, quid prius Deo dicturi sumus. Dimitte nobis, &c.* Et Patres in Laodicensi Synodo congregati eadem ista in Canone 19. complecti videntur, cum inquit : *Oportere seorsum primum, post Episcoporum Sermones, Catechumenorum Orationem peragi: & postquam exierint Catechumeni, &c.* Quem Canonem exponens Zonaras: *Concio* (ait) *ad Catechumenos, vel ad populum, iis docendis ac erudiendis, primo loco ab Episcopis habebatur; tum precatione in Catechumenos recitata illi egrediebantur, &c.* Ex his igitur intelligi licet, factam olim Cathecumenorum dimissionem mox habita Concione: (in qua sententia priscos Patres, non paucos fuisse reperio, Tertullianum in lib. de Præscriptione adversus Hæreticos, Athanasium in secunda pro Catholicis adversus Arianos Apologia, Cyrillum Alexandrinum in lib. 12. in Joannem cap. 50, Gregorium lib. 2. Dialog. cap. 23; Germanum in Ecclesiasticarum rerum Theoria, Maximum in Liturgiæ expositione cap. 15, Alcuinum, Innocentium, Hugonem, &c.) tunc solum fiebat hæc Catechumenorum dimissio, cum Missa Fidelium erat inchoanda, hoc est, ipsum canendum Offertorium; ipsum autem Offertorium (nisi interponeretur aut ipsa Concio, aut Symboli recitatio; neque enim semper in Missa vel Concio habeba-

habebatur, vel recitabatur Symbolum) proxime post Evangelii lectionem canebatur; ex hoc plane sequi necesse est, ipsas quoque Conciones fuisse inter Missarum solemnias, proxime post Evangelii recitationem, habitas.

Et quamvis hæc nostra sententia jam satis superque, ut ego quidem arbitror, sit confirmata, commodum tamen facturus videor, si eam adhuc aliis veterum Patrum testimoniis illustravero. Beatus igitur Augustinus Tractatu 9. in Joannis Epistolam ita pronunciavit. *Interceperunt autem, ut intermitteremus textum hujus Epistolæ, quædam pro diebus festis solemnias lectionum, quæ non potuerunt nisi legi, & ipsa tractari.* Ista enim (solemnias lectionum non potuerunt nisi legi, & ipsa tractari) de Concione post recitatum Evangelium mox habita, vix est, ut accipienda esse quisquam dubitet. Illud item, quod habet Leo Pontifex hujus nominis primus in Sermone 2. de Resurrectione Domini, huc pertinere, si modo locum inspexerit, per se quisque penitus intelliget: ait enim: *Notum quidem, Dilectissimi, Pascale Sacramentum Evangelica nobis narratio præsentavit, &c. sed adjiciendum est etiam nostri Sermonis officium, ut sicut pia expectatione deposcere vos consuetudinis debitum sentio, ita solemnitati sacratissima lectionis subjungatur exhortatio sacerdotis.* Est & qui ad hanc rem pertineat in sanctæ Pelagiæ Vita cap. 6. locus, in hæc verba conscriptus: *Post lectionem Sancti Evangelii idem Episcopus*
civitatis

civitatis (Antiochiæ), porrigens Sanctum Evange-
 lium beatissimo Nonno (Episcopo), hortabatur
 eum, ut verba faceret ad populum: qui aperiens
 os suum loquebatur sapientiam Dei, quæ habitabat
 in eo; quoniam nihil compositionis, aut philosophiæ,
 aut indiscretum alloquebatur, nihil in se habens
 humanæ naturæ superfluum; sed repletus Spiritu
 Sancto arguebat & commonebat plebem, sincerissi-
 me loquens de futuro iudicio, &c. Sed & Valen-
 tinæ Synodi in Hispania Canone primo de hac
 eadem re ita Patres caverunt: Antiquos Canones
 relegentes, inter cetera hoc censuimus observandum,
 ut sancta Evangelia ante munus oblationem in
 Missa Catechumenorum in ordine lectionum post A-
 postolum legantur; quatenus salutaria præcepta Do-
 mini nostri Jesu Christi, vel Sermonem Sacerdotis
 (ecce Concionem statim post lectum Evange-
 lium) non solum Fideles, sed etiam Catechumeni,
 & Penitentes, & omnes, qui ex adverso sunt,
 audire licitum habeant: sic enim Pontificum prædi-
 catione audita nonnullos ad fidem attractos eviden-
 ter scimus. De re eadem in Concilio Aurelia-
 nensi Canone 3. sic est, prout illum referunt
 nobis Burchardus libro 2. cap. 70. & Ivo par-
 te 2. cap. 120: Oportet, ut in diebus Dominicis
 vel festis, post Sermonem intra Missarum solemn-
 itatem ad plebem, Sacerdos admoneat, &c. Istud
 idem insuper beati Gregorii Magni testimonio
 confirmari posse admoneo, qui in Prologo ad
 librum quadraginta Homiliarum in Evangelia,
 Secun-

Secundino scribens, has omnes Homilias inter sacra Missarum solemnia a se habitas, utique post Evangelii recitationem, in hæc omnino verba refert: *Inter sacra Missarum solemnia, ex his, quæ diebus certis in hac Ecclesia legi ex more solent, Sancti Evangelii quadraginta lectiones exposui, & quarundam quidem dictata expositio assidentis plebi est per Notarium recitata, quarundam vero explanationem coram populo ipse locutus sum. Illud autem hujus moris longe pulcherrimum atque illustre arbitror beati Cæsarii Arelatensis Episcopi testimonium, quod, etsi alibi relatum, in cruditorum tamen gratiam non gravabor iterum hoc loco appingere: Rogo vos, (inquit in Homil. 12.) Fratres carissimi, & paterna pietate commoneo, ut, quoties aut in die Dominico, aut aliis majoribus festivitibus Missæ fiunt, nullus de Ecclesia discedat, donec divina Mysteria compleantur. Et quamvis multi sint, de quorum fide & devotione gaudeamus; sunt tamen plures, minus de salute suæ animæ cogitantes, qui lectis divinis lectionibus (cum ipsa esset nimirum Concio habenda) statim de Ecclesia foras exeunt. Unde rogo vos, Fratres, ut humilitatis nostræ suggestionem non solum patienter, sed etiam libenter accipiatis.*

CAPUT XXI. & ULTIMUM.

Pomeridiana etiam, ea nimirum, quæ sunt post prandium, tempora, fuerunt antiquitus habendis Concionibus non raro destinata.

Superest hoc quoque præter cetera, in quod consideratio propter utilitatem intendatur: quo quidem perfecto, tertius hic Liber, atque adeo Opus totum, apte, meo iudicio, claudetur. Id vero est, ut post prandium etiam habitas olim nonnumquam Conciones demonstremus. Abundant testimoniis veterum Patrum Homiliæ, ex quibus hæc illustria maxime, ex iisdem dumtaxat Augustino & Chrysostomo, supponuntur. Est igitur locus apud Augustinum in prima ad 88. Psalmum Concione, qui ea, quæ dico, sic approbet: *Quod restat, si placet, servemus: quia longus est Psalmus, & adhuc vobiscum aliquid in nomine Christi sumus acturi. Rescite vires, non dico animi vestri, nam video, quod animo infastigabiles estis: reficimini, & refecti a cibis redite.* Hic profecto aperte admodum Augustinus & sine circuitione ulla hortatur Auditores, ut post captum cibum redeant ad audiendum, quæ ex eo Psalmo restabant explicanda: quam autem hoc loco pollicetur Augustinus

Con-

Concionem, eam revera fuisse eodem die ab ipso post prandium habitam, plane omnino declarat principium, a quo alteram in eum Psalmum exorditur Concionem, ait enim: *Ad reliqua Psalmi, de quo in matutino loquuti sumus, animum intendite.* A Chrysostomo porro hac de re est in Homilia 10. in Genesim his ipsis verbis scriptum: *Quidnam sibi vult, quod minor est hodie vester conventus, & infrequens theatrum eorum, qui ad nos confluunt? Fortassis aliqui erubuerunt, post carnalem mensam ad spirituale hoc venire convivium, & hac ipsis est absentiae causa. Sed audiant sapientem quemdam dicentem, Est confusio, quæ inducit peccatum, & est confusio adducens gloriam & gratiam. Non est confusione dignum, qui corporalis mensæ particeps fuit, quod veniat ad spirituale convivium, non enim ut humanæ res, ita & spirituales ad definita tempora distinctæ sunt. Sermoni enim spirituali omne diei tempus idoneum fuerit. Et quid dico diei tempus? Neque, si nox ingruat, spirituales doctrinam impendit. Propterea & Timotheo dicebat Paulus, scribens: *Insta tempestive, intempestive, argue, increpa, obsecra.* Et iterum audi beatum Lucam dicentem: *Discessurus crastino Paulus a Troade, differebat eis, & Sermonem produxit usque ad mediam noctem. Numquid tempus obfuit, dic quæso? num propterea doctrinæ Sermo impeditus? Sobrius auditor etiam pransus spirituali conventu dignus est.* Et statim:*

Non

Non enim turpe fuerit, eum, quicibum antea acceperat, adesse spirituali Sermoni, sed ignavo animo adesse, & ab affectionibus vexari; & carnis illecebras non comprimere. Et paulo post: Fratres quoque nostros, quotquot ob corporis valetudinem jejuna nequeunt, exhortemini, ne propterea spiritualement hanc mensam relinquunt, & ad illos referte, quæ a nobis didiceritis; docentes; quod mediocriter pransus non indignus sit hoc auditorio, sed deses & dissolutus. Et deinde: Hæc omnia fratribus vestris dicite, & persuadete; ne unquam spirituali hoc alimento se privent; sed, etsi pransi sint, veniant omni cum alacritate, ut accepta hic spirituali doctrina diabolicis insidiis fortiter resistere possint. Hæc Chrysostomus, cuius locum, etsi multum verborum continet, tamen, quia rem nostram apertissime exprimit, adscribere totum non alienum duximus. In eo autem perspicue apparet, ad illos maxime verba fieri, quos pudebat quodammodo post cibum in Concionibus adesse. In Homilia prima de Lazaro investus idem Chrysostomus in eos, qui consuetudinem concionandi post cibum tamquam novam improbant: *A mensa* (inquit) non ad lectum, sed ad deprecationem vertamur, ne brutis animantibus simus magis bruti. Novi fore multos, qui damnant ea, quæ nunc dicuntur, veluti qui novam quandam & miram consuetudinem inveham concionandi: at ego magis damno pravam consuetudinem, quæ

nunc obtinuit . Etenim quod post cibum ac mensam non ad somnum oporteat ire , nec ab cubile , sed oporteat cibo preces ac divinarum Scripturarum lectionem succedere , manifestius declaravit ipse Christus , qui cum immensam multitudinem accepisset convivio in deserto , non remisit illos ad lectum , aut somnum , sed ad audiendos Sermones divinos invitavit : non enim distenderat illorum ventres , neque ad ebrietatem impulerat , verum ubi saturasset illos quantum exigebat necessitas , ad spiritualem adduxit alimoniam . Itidem nos quoque faciamus , eoque modo consuecamus capere cibum . Docet hoc idem Homil. iv. ad Popul. Antioch. ubi nonnullos reprehendens , qui tamquam supersticiosum quid conceperant , divinos post cibum in Ecclesia Sermones audire , hæc plane scribit : Qui corporalem tetigit mensam , indignum esse putavit , post corporis nutrimentum ad divinorum auditionem eloquiorum venire . Sed non recte in hoc sentit ; neque enim , si hoc esset absurdum , multos & longos impendisset Sermones Christus post illam mysticam cœnam . Non utique , si hoc incongruum esset , refecta sæpius in deserto multitudine , etiam Sermonem ipsis post mensam communicasset . Si enim fas est aliquid etiam præter opinionem dicere , tunc profecto utilissimum divinis est eloquiis aures accommodare . Cum enim tibi persuaferis , quod post cibum & potum ad Synaxim convenire necesse est , omnino vel invitatus

tus multam geret sobrietatis curam, &c. In ejusdem autem Operis Homil. 10. illustri laude celebrans eos, qui post cibum ad audiendum Sermonem convenerant, ritum hunc nostrum eleganter expressit. Gaudeo (inquit) & gratulor omnibus vobis, quod admonitionem nostram, quam pro non jejnantibus, & propterea absentibus nuper feci, re præstitistis. Arbitror enim multos jam pransos hodie adesse, & pulcram hanc nobis implere Concionem; & hoc conficio, eo quod magis amplum nobis theatrum factum sit, & major audientium conventus. Non frustra; ut videatur, multos de ipsis Sermones nuper impendimus, vestram exhortantes Caritatem ipsos ad matrem trahere, & persuadere, quod licet etiam post corporis nutrimentum spiritualis esca participatione non fraudari, &c. Si quis tandem Chrysostomi Homiliam perlegat, perspicuam adeo hujus consuetudinis veritatem perspiciet, nullus ut dubitationi locus relinqui videatur: sunt enim hæc ipsa illius: Quando quæso vos, Dilecti, melius fecistis? an præterita Synaxi, quando post mensam ad somnum convergebamini? an nunc, cum post mensam ad divinas leges audiendas convenistis? Quando in foro commorabamini, & consessuum nihil boni habentium participes eratis? an nunc, quando cum fratribus vestris stetitistis, & propheticos audistis Sermones?

Atque in hoc quidem Chrysostomi testimonio a scribendi labore acquiescendum. Omnia enim,

quæcumque de Sacrarum Ecclesiæ Catholicæ
Concionum Ritibus initio tractanda proposui-
mus, pro eo quantum in nobis fuit, perducta
sunt ad exitum & absoluta.



LOCA S. SCRIPTURÆ

I N H O C

OPERE CITATA.

Ex V. Testamento.

G *En. cap. 1. p. 359.*
Exod. cap. 38. pag. 255.
Levit. cap. 23. pag. 109.
Deuter. cap. 16. pag. 109.
II Paralip. cap. 7. pag. 109.
Psalms. 38. pag. 3.
Proverb. cap. 1. & 8. pag. 324.
Jerem. cap. 17. pag. 323.
Amos. cap. 5. pag. 323.

Ex Libris Apocryphis.

II Esdr. cap. 8. pag. 50. 221. 222. 323.
III Esdr. cap. 9. pag. 221. 222. 223.
II Macchab. cap. 3. pag. 255.

Ex N. Testamento.

Matth. cap. 5. pag. 224. cap. 10. pag. 324. cap.
12. pag. 324. cap. 23. pag. 223. 318. cap. 26.
pag. 224. cap. 28. pag. 162. 359.
Marc. cap. 16. pag. 162. 359.


G c 3

Luc.

I N D E X

- Luc. cap. 2. pag. 224. cap. 4. pag. 63. 67.*
224. cap. 5. pag. 224. cap. 14. pag. 324. cap.
18. pag. 359. cap. 22. pag. 318. cap. 24. pag.
62. 359.
Joan. cap. 7. pag. 224. cap. 8. pag. 224. cap. 15.
pag. 162. cap. 18. pag. 327. cap. 20. pag. 318.
359.
Act. cap. 3. pag. 286. cap. 7. pag. 192. cap. 8.
pag. 67. cap. 9. pag. 320. cap. 11. pag. 109.
110. cap. 12. pag. 56. cap. 13. pag. 56. 64. 67.
222. 223. 327. cap. 19. pag. 57. cap. 20. pag.
358. cap. 21. pag. 57. cap. 26. pag. 61. 320.
Rom. cap. 1. & 15. pag. 320.
I. Cor. cap. 14. pag. 223. cap. 16. pag. 110. 112.
359.
II. Cor. cap. 13. pag. 320.
Eph. cap. 4. pag. 193.
Philip. cap. 4. pag. 320.
II Tim. cap. 4. pag. 193.
Hebr. cap. 10. pag. 109.
I Petr. cap. 3. pag. 116. 358.

*Auctorum, qui in hoc Opere
citantur.*

- 
- Do, Archiepisc. Viennensis, pag. 16
 Agellius, p. 282. 294
 Albinus Flactus, p. 53. 54
 Alcuinus, p. 109. 190. 395
 Aldhelmus, p. 210
 Amalarius Fortunatus, p. 31. 258. 259.
 337. 339
 Ambrosiaster, seu Hilarius Eccl. Rom. Diaconus, p. 223
 Ambrosius, p. 3. 40. 50. 70. 99. 113. 153. 162. 179. 193.
212. 238. 260. 262. 285. 319. 321. 330. 359. 394
 Ambrosius Catharinus, p. 223
 Ammianus Marcellinus, p. 328
 Anastasius Bibliothecarius, p. 99. 100. 188. 256
 Antiochus Monachus, p. 174
 Apuleius, p. 59. 61
 Athanasius, p. 42. 153. 155. 163. 166. 212. 229. 276. 321.
395. --- ejusdem 2. Apologia, p. 234. 240
 Athenagoras, p. 319. 320
 Auctor Constitutionum Apostolicarum, p. 50. 65.
 110. 154. 178. 191. 255. 257. 259. 275. 276. 360. 382. 389.
 390. 394
 Auctor Romani Ordinis, p. 258. 259
 Augustinus (Antonius), p. 163
 Augustinus, pag. 5. 6. 9. 13. 14. 15. 16. 17. 18. 19. 20. 40.
 50. 68. 69. 70. 71. 72. 73. 74. 75. 77. 78. 80. 81. 95.
96. 109. 113. 119. 120. 121. 126. 131. 132. 133. 134.
135. 136. 137. 138. 139. 140. 141. 142. 143. 150. 153.
 155.

I N D E X.

155. 157. 158. 159. 163. 166. 167. 268. 182. 193. 209.
212. 226. 227. 229. 237. 238. 246. 250. 252. 258. 269.
270. 271. 272. 273. 277. 278. 279. 280. 283. 284. 285.
287. 288. 289. 290. 291. 297. 298. 299. 300. 303. 304.
319. 321. 331. 332. 333. 336. 339. 340. 342. 343. 359.
361. 362. 365. 366. 368. 369. 371. 372. 374. 375. 376.
377. 379. 386. 387. 388. 392. 393. 394. 395. 396. 399.
 400

B.

B Alfamon (Theodorus) pag. 54. 177. 179. 199. 201.
277. 278. 363
 Baronius, p. 26. 27. 35. 47.
 Basilus Seleuciensis, p. 19. 93. 94. 151. 153. 212.
231. 232. 240. 321
 Beda, p. 41. 99. 359
 Benedictus II, p. 326
 Blastares (Matthæus) p. 54. 356
 Budæus, p. 61
 Burchardus, p. 24. 197. 206. 251. 309. 397

C.

C Elestinus Papa, p. 196. 197
 Cæremoniale Romanum, p. 55
 Cæsius Arelatenfis, p. 53. 153. 163. 179. 285. 286.
310. 311. 398
 Cassianus, p. 36. 103. 106
 Cassiodorus, p. 11. 12. 109. 159. 172. 227. 312. 324. 344.
354. 356
 Chryfologus (Petrus) p. 6. 11. 20. 74. 153. 157. 158. 179.
182. 185. 186. 212. 321. 342. 347. 348. 364.
368
 Chryfostomus (Joannes) p. 19. 39. 42. 50. 51. 52. 58.
68. 69. 70. 82. 83. 84. 85. 86. 87. 88. 89. 90. 91. 93.
112. 113. 114. 115. 122. 148. 152. 153. 155. 162. 184.
187. 212. 214. 225. 226. 229. 233. 235. 236. 237. 262.
267.

INDEX.

267. 269. 277. 281. 286. 293. 294. 295. 296. 297. 303.
307. 321. 330. 342. 359. 361. 362. 364. 365. 372. 374.
375. 376. 377. 378. 379. 380. 381. 383. 384. 400. 401.
402. 403.
- Ciaconius (Alphonfus) p. 34
 Cicero, p. 203. 213. 224
 Claudianus, p. 328
 Clemens Alexandrinus, p. 319
 Clementinæ, p. 325. 326
 Concilium Ancyranum, p. 197
 ----- Arelatense 1, p. 162. VI, p. 198
 ----- Aurelianense, p. 104
 ----- Braccarense II, p. 102
 ----- Cabilonense II, p. 162
 ----- Carthaginense IV, p. 162. 180. 197. 198. 251.
 309. ----- Glossa in illud Concilium, p. 198
 ----- Chalcedonense II, p. 200. VIII, p. 200
 ----- Constantinopolitanum VIII, p. 195. 196
 ----- Laodicænum, p. 356. 395
 ----- Lateranense, p. 162. 191. 356
 ----- Lemovicense, p. 192
 ----- Mediolanense 1, p. 286
 ----- Moguntinum 1, p. 162
 ----- Nicænum II, p. 162
 ----- Remense, p. 162. 206
 ----- Toletanum IV, pag. 149. II, p. 162
 ----- Tridentinum, p. 162
 ----- Trullanum, p. 162. 193. 356. 362.
 ----- Turonense III, p. 162. II, p. 256. 262.
 ----- Valentinum, p. 252. 253.
 ----- Vafense II, p. 47. 171. 191. 194. 205
 Corippus Africanus, p. 44. 61
 Cyprianus, p. 114. 116. 194. 309. 310. 319. 348. 349.
 353
- Cyrillus Alexandrinus, p. 103. 104. 106. 152. 153. 379.
233. 239. 240. 291. 305. 395
- Cyrillus Hierosolymitanus, p. 43. 45. 153. 157. 158. 214.
232. 257. 258. 259. 260. 276. 312. 321.
De-

I N D E X

D.

| | |
|---|-------------------------|
| D ecreta Synodi <u>Mediolanensis</u> , | P. <u>107</u> |
| Diaconus (Joannes) | P. <u>171. 193. 205</u> |
| Diaconus (Paulus) | P. <u>354</u> |
| Dio Cassius, | P. <u>147</u> |
| Dorotheus, | P. <u>19</u> |

E.

| | |
|---|-----------------------------------|
| E lias Cretensis, | P. <u>164</u> |
| Elias Levita, | P. <u>55</u> |
| Eligius Episcopus Noviomensis, | P. <u>24. 94</u> |
| Ennodius, Episc. Ticinensis, | P. <u>206. 207. 208. 368</u> |
| Epiphanius, | P. <u>42. 99. 102. 218. 234.</u> |
| Epistolæ Ignatii & <u>Polycarpi</u> , | P. <u>320</u> |
| Evagrius, | P. <u>174</u> |
| Evodius, Episc. Uzalenſis, | P. <u>133. 140. 141. 143. 144</u> |
| Eusebius, p. <u>9. 99. 100. 105. 213. 214. 261. 274. 279.</u> | |
| <u>280. 300. 306. 307. 308. 311. 317. 319.</u> | |
| Extravagantes | P. <u>325.</u> |

F.

| | |
|----------------------------|--------------------|
| F abius Planciades, | P. <u>60</u> |
| Ferrarius (Vincenſis) | P. <u>46</u> |
| Festus, | P. <u>339</u> |
| Fronto Duczus, | P. <u>367</u> |
| Fulgentius, | P. <u>163. 209</u> |

G.

| | |
|--|--------------------------|
| G audentius, Episc. Brixienſis, | P. <u>3. 4. 14. 174.</u> |
| <u>181. 212. 315. 317. 321. 359. 365. 366. 370. 371.</u> | |
| <u>381. 382. 385. 386</u> | |
| Genebrardus, | P. <u>34</u> |
| Gennadius, | P. <u>206</u> |
| Gentianus Hervetus, | P. <u>338</u> |
| Geor- | |

I · N · D · E · X ·

- Georgius, Patriarcha Alexandrinus, p. 305. 306.
312. 313. 344. 345. 346. 350. 351.
 Germanus, Patriarcha Constantinopolitanus, p. 262. 357.
395
 Gratianus, p. 180. 251. 257
 Gregorius Magnus, p. 12. 20. 21. 23. 24. 70. 152. 153.
163. 170. 175. 204. 205. 209. 210. 211. 219. 316.
317. 321. 325. 397. 398
 Gregorius Nazianzenus, p. 173. 181. 212. 232. 243. 244.
255. 260. 261. 62. 263. 266. 286. 301. 312. 317. 321.
329. 340. 341. 342. 367. 395. Gregorius Nyssenus, p. 179.
212. 228. 229. 241. 242. 252. 256. 260. 267. 323. 330.
341. 342. 347. 367. 385
 Gregorius Turonensis, p. 51. 355. 366

H

- H**ermes, p. 99
 Herodianus, p. 57
 Hefychius Hierosolymitanus, p. 301. 302
 Hieronymus, p. 4. 8. 9. 17. 20. 24. 37. 59. 100. 105.
109. 111. 112. 113. 162. 190. 200. 300. 301. 305. 306.
319. 323. 359
 Hilarius, p. 321
 Honoratus, Episc. Norariensis, p. 182. 183
 Hugo Cardinalis, p. 16. 355. 395.
 Hugo de Sancto Victore, p. 109

L

- L**gnatius Antiochenus, p. 27. 28. 30. 193
 Innocentius III, p. 109. 336. 337. 395
 Interpres Latinus Bibliorum, p. 359
 Interpres Syrus Bibliorum, p. 61
 Joannes Andreas, p. 326
 Iosephus, p. 37. 255
 Isidorus Hispalensis, p. 51
 Isidorus Pelusiota, p. 99. 206. 207. 237. 292. 301. 302. 339
 Ivo

INDEX

 \dot{Q}_s

O Ecumenius,
 Optatus Milevitanus p. 3. 117. 228. 262. 319
 Ordo Romanus, p. 126. 127. 356
 Origenes, p. 70. 153. 154. 157. 228. 279. 312. 358.
 260. 276. 284 311

P.

P Achomius, p. 15. 16
Palladius, p. 36. 169. 345. 346
Pamelius, p. 334
Panegyricus Leonis Imperatoris, p. 36
Panvinus, p. 34
Paulinus, p. 6. 7. 116. 331
Paulus Apostolus, p. 318
Persius, p. 57
Petronius Arbitrarius, p. 59
Petrus Apostolus, p. 320
Philo Judæus, p. 64. 68. 275. 284
Pius V. Pontifex, p. 286
Plinius, p. 26. 38. 114. 210. 282. 283. 328
Plutarchus, p. 39. 281. 328
Polydorus Virgilius, p. 34
Possidius, p. 5. 16. 169. 189. 190. 214. 219. 220. 250.
251. 277. 278. 315. 316.
Procopius, p. 258. 263
Propertius, p. 59
Prosper, seu potius Julianus Pomerius, p. 166
Prudentius, p. 331. 330. 342. 356

Q.

Uintilianus, P. [92](#). [93](#). [146](#). [113](#)

Ra-

I N D E X.

K.

| | |
|-------------------------|--------------------------|
| R Abanus Maurus, | P. <u>51.</u> <u>339</u> |
| Radulphus Tungrensis, | P. <u>259</u> |
| Regius Carolus | P. <u>46.</u> <u>209</u> |
| Rufinus, | P. <u>9.</u> <u>307</u> |
| Rupertus Abbas, | P. <u>41</u> |

S.

| | |
|---|--|
| S Almatius (Antonius) | P. <u>363</u> |
| Scriptores Vitz Vincentii Ferrerii &c. | P. <u>325</u> |
| Seneca, | P. <u>308</u> |
| Severus Sulpitius, | P. <u>10</u> |
| Sidonius Apollinaris, p. <u>11.</u> <u>210.</u> <u>217.</u> <u>269.</u> <u>301.</u> <u>348.</u> | <u>355.</u> <u>370</u> |
| Sirmondus (Jacobus) | P. <u>207</u> |
| Socrates, p. <u>99.</u> <u>100.</u> <u>174.</u> <u>184.</u> <u>185.</u> <u>186.</u> <u>189.</u> <u>190.</u> <u>215.</u> | <u>216.</u> <u>217.</u> <u>312.</u> <u>313.</u> <u>314.</u> <u>335.</u> <u>343.</u> <u>344.</u> <u>356.</u> <u>373</u> |
| Sozomenus, p. <u>174.</u> <u>185.</u> <u>186.</u> <u>189.</u> <u>190.</u> <u>215.</u> <u>216.</u> <u>267.</u> | <u>268.</u> <u>336.</u> <u>351.</u> <u>352</u> |
| Statius, | P. <u>328</u> |
| Stephanus (Joseph) | P. <u>353.</u> <u>354</u> |
| Svetonius, | P. <u>204</u> |
| Suidas, | P. <u>102.</u> <u>216.</u> <u>218</u> |
| Surius (Laurentius) | P. <u>44.</u> <u>356</u> |
| Symmachus Papa, | P. <u>165.</u> |
| Synodus Sardicensis | P. <u>175</u> |
| VI in Trullo, | P. <u>175</u> |
| Valentina, | P. <u>397</u> |

T.

| | |
|--|--|
| T Acitus, | P. <u>58.</u> <u>328</u> |
| Tertullianus, p. <u>23.</u> <u>43.</u> <u>65.</u> <u>66.</u> <u>109.</u> <u>111.</u> <u>113.</u> | <u>116.</u> <u>173.</u> <u>249.</u> <u>250.</u> <u>319.</u> <u>320.</u> <u>360.</u> <u>391.</u> <u>395</u> |
| Theodorus, | P. <u>100.</u> <u>172.</u> <u>174.</u> <u>193.</u> <u>234.</u> <u>235.</u> <u>355</u> |
| Theophylactus. | P. <u>113.</u> <u>389</u> |
| Theophilus Alexandrinus, | P. <u>100.</u> <u>103</u> |
| Thomas, | P. <u>224.</u> <u>225</u> |
| | Victor |

INDEX.

V.

- V**ictor Uticensis, p. 5. 7
 Vincentius Lirinensis, p. 11. 13. 20
 Vita Dionysii Areopagitæ a Simeone Metaphraste scri-
 pta, p. 42
 Vita Joannis Chrysostomi a Georgio Alexandrino scri-
 pta, p. 42
 Vita S. Pelagii, p. 396. 397
 Vita S. Porphyrii, Episcopi Gazensis, p. 45
 Vopiscus, p. 328
 Vvalafridus Strabo, p. 32. 109. 334. 357

X.

- X**iphilinus, p. 57. 61. 328

Z.

- Z**eno, p. 153
 Zeno Veronenfis, p. 321
 Zonaras, p. 176. 177. 199. 201. 277. 278. 356. 262.
 363. 395

INDEX

I N D E X

Rerum, quæ in hoc Opere
continentur.

A.



Acclamationum apud Scriptores Ecclesiasti-
cos duo genera, pag. 287. acclamationes
faustæ factæ olim concionanti ab audiente
populo, p. 292. & seq. quomodo differant
a plausibus, p. 292. acclamationum formula quæ-
nam olim esset, p. 304. 305
Africane Ecclesie nequaquam permittēbant Presby-
tero coram Episcopo concionari, p. 189. Africano-
rum mos ab Hieronymo improbat. p. 189. 190
Alexandrie solus Episcopus concionabatur, p. 189.
Alexandrini moris origo & caussa, p. 189. 190
Ambo quinam locus, p. 334. 356. 357. lapidem mo-
numenti Christi designat, p. 353. 357
Apostoli ubique Evangelium prædicabant, p. 324. 325
Audiores an stantes vel sedentes adessent in Concio-
nibus, p. 265. & seq. tunc temporis an standum
vel sedendum in audiendo Verbo Dei, p. 279. Au-
ditorum silentium & attentio in sacris Concionibus,
p. 281. & seq. cur acclamarent Concionatori, p. 287.
& seq. acclamabant interdum ad ea, quæ non ca-
piebant, p. 303. nulli eorum licebat ab Ecclesia
recedere, Concionatore verba faciente, p. 308. qui-
bus

I N D E X.

bus nominibus appellati a Concionatore, p. 318. 321
 Augustinus acclamationes & plausus tulit non inuitus,
 p. 297. ejusdem duo loci notati de Exedra nomi-
 ne, p. 338. & seq.

B.

B qua quinam locus, p. 338
 Benedictio ante Concionem olim petebatur &
 dabatur, p. 41. 42

C.

Cæsarii Arelatensis præclarum factum, quo re-
 cedentes Auditores ad Concionem revocaret,
 p. 308. 309

Campanarum pulsandarum usus ad Fideles congre-
 gandos quando introductus, p. 33. unde ipse no-
 men traxerunt, p. 33. 34. hujusmodi usus auctor an
 Sabinianus, Pontifex Romanus, p. 34. 36. vel
 potius Paulinus, Episcopus Nolanus; p. 35. cam-
 panarum origo refertur a nonnullis ad eas tubas,
 quas Deus Num. 10. fieri jusserat, p. 37

Canones vetantes, ne Episcopi in aliena civitate
 Conciones haberent, quomodo intelligendi, p. 175

Chorus, seu Tribuna, quinam locus, p. 339

Christiani quo signo ad Concionem olim convocarentur.
 p. 26. cur latebrosa & lucifuga natio dicti, p. 26.

ab Episcopo vel Diacono privatim admoniti de loco
 & tempore publici Conventus, p. 30. an, urgente
 Caesarum persecutione, lignorum pulsatione congre-
 gati sint; necne, p. 31. & seq. eorum triplex ratio

D d

conve-

I N D E X.

- conveniendi ad Ecclesiam, p. 32 cum Hereticis disputaturi signo Crucis se consignabant, p. 45. fratres ac sanctos invicem se vocabant, & cur, p. 318. & seq. eorum cœtus Fraternitas dicta, & cur, ibid.
- Christus turbas ubique docebat, p. 324. ejusmodi morem Apostolis præcepit. ibid.
- Chrysostomus odio prosequutus Conciones ad ostentationem factas, p. 297. acclamationes & plausus contempsit. ibid.
- Clerici a laicis separati in Concionibus olim aderant, p. 254. 255
- Clerus a populo cancellis dirimebatur, pag. 254. 261
- Collectæ nomen multiplex, p. 108. 109. eorum nomen ratio, p. 109. ad quem finem imperatæ, p. 109. & seq. iis habendis Dominica maxime dies destinata, & cur, p. 112. 114. aliis etiam diebus indictæ, p. 113. 114. hujusmodi Collectarum dies denunciati ac indicti Auditoribus inter concionandum, p. 116
- Concionatores, Doctores seu Docentes dicti, & cur, p. 19. & seq. quodnam eorum officium, ibid. se olim Cruce signabant ipso Concionis initio, & cur, p. 43. 44. ab iis facta lectio quædam peculiaris accommodata ei argumento, quod ipsi tractandum suscepissent, p. 73. 74. ad arenarium horologium plerumque dixerunt, p. 156. 160. stantes ne, an sedentes dixerint, p. 221. Concionatores hujus temporis imprudentia notati, & cur, p. 130. 247. quomodo ab acclamante populo appellati, p. 304. & seq.

INDEX.

seq. olim ubique prædicabant, p. 325
 Concionis varia nomina, p. 2. Tractatus cur appella-
 ta, p. 3. & seq. cur Disputatio dicta, p. 16. cur
 Doctrina nominata, p. 19. Homilia, seu Sermo,
 nuncupata, p. 22. Adlocutionis seu Locutionis vo-
 cabulo signata, & cur, p. 23. 24. Conciones quan-
 do habitæ, p. 3. 23. 49. 66. 68. quomodo factæ a
 permultiis Patribus, p. 23. ante Concionem recita-
 batur apud Judæos semper aliquid e S. Scriptura,
 p. 63. 64. hunc morem retinuit Ecclesia Christi,
 p. 64. 65. Concionis scopus qui, p. 66. Concionis
 extemporalis argumentum aliquando fuit quod Le-
 ctori Codicem fortuito aperienti primum occurrisset,
 p. 75. Concionis argumentum quando & cur Audi-
 toribus indicatum, p. 82. 83. locus etiam Scriptu-
 ræ, quem Concionator tractare vellet, multo ante
 significatus, ibid. Concionis initium fecerunt Patres
 ab iis verbis, Benedictus Deus, p. 86. & seq.
 cur hoc factum, ibid. ejusmodi verbis præcipue usus
 est Chrysostomus, ibid. Conciones utplurimum ter-
 minatæ invocatione & laudatione S. Trinitatis,
 p. 151. 152. hujusmodi clausularum formula va-
 ria, ibid. conclusæ interdum petitione bonorum eter-
 norum & veniæ celestium irarum, p. 151. 153.
 Concioni habendæ quod tempus assignatum, p. 156.
 qua ratione illud tempus distinguere ac metiri sole-
 rent præfati Patres, p. 156. 159. Conciones nonnun-
 quam ab uno compositæ, & ab alio pronunciatæ,
 p. 203. 204. duobus modis recitatæ, p. 208. Con-
 cionibus adesse poterant olim omnes promiscue, &
 D d 2 cur,

I N D E X.

sur, pag. **249. 253.** *Conciones olim scripto exceptæ ab Auditoribus*, p. **311.** & seq. *habita olim ubique*, p. **322. 323.** *ubi habitæ apud Christianos & Hebræos*, p. **326.** unde & ex quo loco habitæ, p. **328.** & seq. *ipsarum locus cur editior fuerit quaeritur*, p. **335.** & seq. *ut plurimum habitæ olim intra Chori cancellos*, pag. **338. 340.** ex Episcopali sæpe Cathedra, p. **342.** & seq. ex Altaris gradibus nonnumquam, & quando id factitatum, p. **347. 349.** extra Chorum etiam aliquando habitæ, p. **349.** & seq. *Concionum locus quibus nominibus fuerit olim appellatus ab Ecclesiasticis Scriptoribus*, p. **353.** & seq. *Dominico die potissimum habitæ Conciones*, p. **358.** & seq. *aliis quoque diebus festis*, p. **363.** & seq. *Episcopatus quoque natali die, sive primo, sive anniversario habitæ*, p. **367.** & seq. *in basilicarum & altarium dedicatione nonnumquam habitæ*, p. **369.** *in ipsis etiam festorum dierum Vigiliis aliquando habitæ*, p. **370.** *in profestis quoque diebus*, p. **371. 372.** præsertim *Quadragesimæ & Paschalis hebdomadæ tempore*, p. **374. 379. 381.** *in una Ecclesia plures nonnumquam in una die habitæ a diversis Concionatoribus*, p. **382.** & seq. *ab eodem etiam Concionatore plures in uno die aliquando habitæ*, p. **385. 386.** *quibus diei horis habitæ*, p. **387. 388.** *inter ipsa Missarum sollemnia ut plurimum habitæ*, p. **389.** & seq. *iis habendis pomeridiana tempora non raro destinata*, p. **399.** & seq. *Cursores apud Christianos quinam*, p. **26.** & seq. *hujus vocis, ut & vocis Praconis, interpretatio*, a
Ba-

I N D E X

Baronio & recente Scriptore allata, refellitur,
p. 27. 29

D.

Decreta Pontificum, quibus consuetudinem concionandi in plateis & compitis comprobarunt,
p. 225. 326

Diaconi succedere Levitis, p. 49. omnes *Ecclesiasticas* actiones olim moderabantur, p. 52. aliquando voce, p. 52. 53. interdum nutibus, p. 53. 54. quandoque oratio, p. 54. Conciones publicas nonnunquam habuerunt, p. 192. quando & qua de causa, ibid. & *p. 154*

Dicendi ex tempore facultas apud Ethnicos cui debetur, p. 212. 213. quomodo appellatur, & quomodo comparatur, *ibid.*

Dictare pro scribere usi sunt veteres Auctores, p. 210

Dies Solis qui, *p. 358. 360*

Disputare pro concionari, *p. 15. & seq.*

Disputatio pro Concio, *p. 15. 16*

Disputator pro Concionator, *p. 15. & seq.*

Durantis confutatus, *p. 35*

E.

Ecclēsia semper fuit apud Christianos Concionum locus, p. 326. 327. in Ecclesiis due fuerunt antiquitus partes, p. 338. Ecclesiarum variarum consuetudo varia in Concionibus habendis diebus profectis, *p. 371. & seq.*

D d 3

Electio-

I N D E X.

- Elemosyne privata, inter concionandum indistincta, ratio, & origo,* p. **119. 121. 123**
Εορτασται apud Dionysium Alexandrinum Episcopum quid, p. **105**
Epiphaniorum nomine quid significatum, p. 102. cur in plurali numero usurpatum, p. **103**
*Episcopi munere concionandi maxime fugebantur, p. 161. ipsis magnum impendit periculum, si illud munus explere neglexerint, p. 164. illi, cum per se non possent, illud munus per alios explere solebant. p. 168. per Presbyteros, Notarios, Diaconos, Interpretes, & Epistolas id facilius, ibid. Episcopis interdictum olim, ne in aliena civitate Conciones haberent, p. 175. Episcopi peregrini ad concionandum invitati, & unde p. 178. Episcopus concionans laudabat aliquoties Episcopos qui Concioni intererant, p. 180. Episcopi proxime ante Concionem quid fecerunt, p. 184. Episcopo concionanti adstiterunt septem Diaconi, & cur, p. **188**
Erasmus confutatus, p. **48**
Ευλογιον Πατερ prefigi solitum plerisque Patrum Homiliis & Vitis Sanctorum, p. **41. 42**
Eusebii locus illustratus, p. **105**
Exceptores sive Notarii in Concionibus qui, & quomodo iis interfuerunt, p. **311. 317***

G.

- G** *Asie Loaysæ opinio perpenditur, p. 145. 149*
G *Gazophylacia cur in Ecclesiis constituta, p. 113. 116.*

I N D E X.

116. *eorum varia nomina,* p. **116.**

H.

H *Ebdomada quomodo a Judæis numerata,* p. **113.**
Hebræi stantes-ne, an sedentes Legem explicarent, p. **221.** & seq. *ubique concionabantur,* p. **323**
Heretici patefaciendi olim, p. **127.** *ipsis interdictum*
munus concionandi, p. **195**
Hieronymi locus illustratus, p. **105**
Homilia vox Græca, sed longo usu pæne Latina fa-
cta, p. **22.** *quod Concionis genus,* *ibid.*

I.

J *Ejuna cum Vigiliis conjuncta,* **123. 124.** *jejunio-*
rum statuta tempora inter concionandum denuncia-
ta, *ibid.* *ejusmodi denunciationis formula,* p. **126**
Ἰσπαράου quinam locus, p. **338**
Josephus Stephanus reprehensus, p. **353. 354**

L.

L *Aici non poterant Conciones publicas habere,* p. **197.** *ipsis tamen permissum aliquando concio-*
nari, p. **201. 202**
Lapsus, sive Presbyteris, sive Diaconis, interdictum
concionandi munus, p. **195. 196**
Libelli pro quibus & ad quem finem Episcopo dati,
D d 4 p. **130.**

I N D E X.

p. 130. 133. 137. *ejusmodi* Libellorum formula,
 p. 134. a Lectore quando recitati, p. 130. 138.
 post recitatos quid actum, p. 130. 141.
 Loqui per dictatum idem est ac de scripto dicere,
 p. 208. 210.

M

Martyrum passiones, certamina, ac triumpho,
 quando olim lecta, p. 76. & seq. hinc introductus
 in Ecclesiam mos recitandæ in Choro quotidie ex
 Martyrologio Lektionis, p. 79
 Mediolanensis Ecclesia denunciandi Paschatis morem
 hodie retinet, p. 107. retinuit morem invitandi pe-
 regrinos Episcopos ad concionandum, p. 178. 180.
 in ea Ecclesia renovata consuetudo lignei septi,
 p. 254. 264. ipsius Paræci ex ipsis Altaris gradi-
 bus plebis sibi commissæ mores corrigunt ac formant,
 p. 347. 349.
 Miracula quo tempore & a quo relata & recitata,
 p. 130. & seq.
 Monachi tubæ sono olim ad Collectam cogebantur,
 p. 36. malleo excitatorio ad Oratoria convocabantur,
 ibid. ligni cujusdam pulsu ad matutina Cantica
 excitabantur, ibid. plausu senioris Patris ad Ora-
 tionem consurgebant, ibid. voce denique Alleluia ad
 Synaxim evocabantur, p. 37. quid legere solebant
 in suis Conventibus seu Collationibus, p. 42. ipsis
 interdictum munus concionandi, & cur, p. 200
 Mulieribus interdictum Conciones publicas ha-
 bere,

INDEX.

bere, p. 197
 Myſteria ſacrorum coram non initiatis aut ſilentio
 prætermiſſa, aut certe maxima circumspectiōe
 cum iis communicata, & cur hoc factum, p. 220.
 & ſeq.

N.

N^{As} quinam locus, p. 339
 Natalis Chriſti Magorum adventus, &
 Chriſti baptiſmi ſolemnitas uno eodemque die a
 Græcis antiquitus celebrata, p. 103
 Navis ſeu Baſilicæ gremium quinam locus, p. 339.

O.

O^Rarium quid ſignificet, & unde ortum, p. 54
 Oratores Etbnici ad clepſydram dixerunt,
 p. 156. 159. ſcripſerunt interdum Orationes, quas
 alii dicerent, p. 203. nonniſi ſtantes dixerunt,
 p. 224. ab Auditoribus ſuis ſilentium exigebant,
 p. 281. 282

P.

P^Aſchatis dies olim valde controverſus, p. 99.
 die Donūmica eſſe celebrandum decrevit Pins
 I, ibid. Viſtor hoc idem confirmavit, ibid. ut &
 a Synodo Nicæna I, p. 100. quo poſſimum die
 ſingulis annis celebrandum eſſet, Ibid. & p. 101.
 102. Paſchatis enjuſlibet anni dies olim fuit denun-
 ciatus Auditoribus inter concionandum, p. 103. 104
 Paſſio

I N D E X.

- Passio Christi quando & ex quo Evangelio recitata,*
p. 79. & seq.
- Patres olim non raro ex tempore concionati,* p. 212.
interdum stantes, interdum sedentes locuti sunt,
p. 221. & seq. *ipsorum prudentia in concionan-*
do, p. 230
- Pauli Samosatani superbia in captandis plausibus,*
p. 304. 306
- Pauperes cur ab Ecclesiis exclusi,* p. 281. 286
- Plausus olim dati concionanti,* 292. & seq. *quomodo*
discrepent ab acclamationibus, pag. 292. *plausuum*
modi qui, p. 304. 306. *a quibus dati plausus,*
p. 308
- Precationis formula ab Ambrosio mox concionaturo*
pronunciata, p. 40
- Preces ad Deum ante Concionem semper fundebant*
Pagani, & cur, p. 38. & seq. *quod & Christiani*
imitari debent, & cur, *ibid.* *cur inter ipsam Con-*
cionem factæ, p. 92. & seq. *boc ipsum a Paganis*
facilitatum, ibid. *preces Auditorum a Concionatore*
etiam postulata, p. 95. 96. *post Concionem etiam*
factæ, p. 154
- Presbyteri jam inde a primis Ecclesie temporibus con-*
cionabantur, p. 189. 191
- Profesti dies Concionibus habendis destinati fuerunt,*
& quinam, p. 371. & seq.
- Proœmiis usi sunt olim Concionatores,* p. 84. *eorum*
causa & necessitas, p. 84. 85. *quibusnam Audito-*
ribus essent necessaria, p. 85
- Pulpitum quinam locus,* p. 334. 353. 354
Qua

I N D E X.

Q.

Quadragesime initium inter concionandum de-
nunciatum Auditoribus, p. 105
Questiones abstrusæ cur coram imperita multitudine
aut consulto omisse, aut accomodate ad vulgi ca-
pitum enunciate, p. 230. 241

R.

Receptorium quinam locus, p. 353. 355
Regius consultatus, p. 122
Religiosis prima dumtaxat tonsura insignitis concef-
sum aliquando concionari, p. 201. 203
Resurrectio Christi singulis annis publice legebatur ex
omnibus quatuor Evangelistis, p. 81

S.

Sabbatum pro tota hebdomada apud Judeos, p. 113. 358. 359
Salutatio Angelica a quo, quando, & cur recitari
cepta, p. 45. & seq. quibus Concionibus primam
præmissa, p. 48. ipsius appendix quando addita,
ibid.
Salutatorium quinam locus, p. 353. & seq.
Secretarium quinam locus, p. 353. & seq.
Sermo Latinis idem quod *Græcis Homilia*, p. 22.
Sermones duobus modis recitati, p. 208. 211
Signa externa, fidelesque personas, &c. num licitum
sit

I N D E X.

fit producere in Auditorum conspectum, p. [145.](#) & seq. hujusmodi signis interdum commoti Auditores, *ibid.*

Silentium ante lectionem Concioni præviā imperatum olim a Diaconis, p. [49.](#) & seq. a Levitis hoc quoque factum, p. [50.](#) illud etiam ab Ecclesia Mediolanensi adhuc observatur, p. [52.](#) a Concionatoribus ipso Concionum initio olim manu hoc idem factitatum, p. [56.](#) [62.](#) ab Apostolis ac Apostolorum æqualibus silentium manu imperatum, p. [56.](#) [57.](#) Ethnicis hoc quoque fecerunt, p. [57.](#) Judæorum hic mos etiam fuit, p. [58.](#) *silentium* aliquando indictum concrepatione digitorum, p. [59.](#) interdum indice & medio in jota erectis, ceterisque pollice compressis, p. [59.](#) [60.](#) sæpius dextera manu cum dignitate quadam porrecta, p. [60.](#) & seq. ille mos nunc in Ecclesia penitus amissus, p. [62.](#) ejus vestigium extat adhuc in familiaribus nostris colloctionibus, *ibid.*

T.

Templum & Synagoga semper fuit apud Hebræos Concionum locus, p. [326.](#) [327.](#)
 Textus aliquis brevis e S. Scriptura olim a Concionatoribus intra & extra Missarum solennia lectus, & cur, p. [66.](#) [70.](#)
 Thomas Aquinas perpenditur, p. [221.](#) [225.](#)
 Tractare, id est, concionari, p. [6.](#) [7.](#)
 Tractatores qui, p. [8.](#) & seq. ἑκκλησιαστικὸν τὸ λόγιον dicti, p. [9.](#) cum Canonicis & Authenticis oppositi ab Augu-

I N D E X.

Augustino & Mamerto, p. 13. an Tractatoris vox
 seculo Vincentii Lirinensis ad solos Concionatores
 pertinerit, ibid. Sacrum Codicem in manibus ha-
 bebant prisca Tractatores suggestum ascendentes,
 & cur, p. 71. 72
 Tractatus apud Ecclesiasticos Scriptores quid notet,
 p. 14
 Transmarinae Ecclesiae, Transmarini Episcopi, &c.
 p. 265. & seq.
 Tribunal quinam locus, p. 334. 336

V.

Vigiliarum usus in Ecclesia antiquissimus, p. 123.
124. ejus nominis origo, ibid. Vigiliarum statuta
 tempora inter concionandum denunciata, ibid. ejus
 denunciationis formula, p. 126
 Virgines a nuptiis sejunctae in Ecclesia habebant lo-
 cum quemdam editiorem, p. 254. 259. 263
 Una Sabbati, & Prima Sabbati, quid, p. 358
 Unum pro primo apud Hebraeos, p. 113

F I N I S.

